

中国古今医案类编

外科及骨伤科病类

主编 鲁兆麟 严寄澜 王新佩

中国建材工业出版社

中国古今医案类编

外科及骨伤科病类

主编 鲁兆麟 严寄澜 王新佩

中国建材工业出版社

<http://www.klrs999.cn/> hbtmxxy

图书在版编目(CIP)数据

中国古今医案类编. 外科病类/鲁兆麟主编. —北京:
中国建材工业出版社, 2001. 4

ISBN 7-80159-122-4

I. 中… II. 鲁… III. ①医案—汇编②中医外科
—医案—汇编 IV. R249.1

中国版本图书馆 CIP 数据核字(2001)第 021662 号

中国古今医案类编·外科及骨伤科病类

鲁兆麟 严奇渊 王新佩主编

中国建材工业出版社出版(北京海淀区三里河路 11 号)

新华书店北京发行所发行 各地新华书店经销

河北省邮电印刷厂

开本: 850mm×1168mm 1/32 印张: 21.5 字数: 540 千字

2001 年 6 月第一版 2001 年 6 月第一次印刷

印数: 1—2000 册 定价: 34.00 元

ISBN7 80159-122-4/R·010

序

“医案”之书，古已有之。它有立体与直观的效果。能反映医家当时的辨证思维、选方用药之特长、治疗得失成败之所在，包罗万象，引人入胜。

“医案”通于史学，《史记·扁鹊仓公列传》载有淳于意 25 例“诊籍”，而使《汤液经法》的“火剂”由此而流传。

先圣张仲景读史于“越人人虢之诊，望齐侯之色”，缅怀先贤，奋起直追，终成泰斗。可见“医案”涵有史学之意义，岂可轻视之哉？

夫禅宗之有“语录”，兵家之有“阵图”，围棋之有“棋谱”类也。孟子曰：“出乎其类，拔乎其萃”，惟吾医家之“医案”有理有例，有案有戒，读之其味隽永，用之而又神奇，集名医先贤于篇帙之间，可以谈心，可以神游。无怪乎经学大师章太炎先生赞为“中医之成绩，医案最著”，而良有以耶！

鲁兆麟教授，重视“医案”之学，又虑其年代湮远，而濒于失传；不畏艰难，与医学同志严寄瀾、王新佩诸君，历时数载，选出数百家名医医案，约有六百余万言洋洋大观。名为《中国古今医案类编》。

夫此书之著也，承前启后，使“医案”臻于完备，而又总其大成不言而喻，对《内》、《难》、《伤寒》、《金匱》之要义，临证之经验，亦尽在其中矣。

余今年八十岁，垂垂老矣，喜读“医案”新编，不禁手舞足蹈而乐为之序也。

劉渡舟

编写说明

一、本书收集了《名医类案》、《续名医类案》及《续名医类案》成书之后至中华人民共和国建国初期已故的名医医案，也收录了《续名医类案》成书之前未收之医案。共收集医案专著 200 余部，选录医案 1500 余则。

二、为了准确地反映历代医家的学术思想，所收医案均摘自原始资料。

三、《中国古今医案类编》系列丛书的分类按：温病类、伤寒类、肺系病类、脾胃病类、心肾病类、肝胆病类、气血津液病类、经络肢体及杂病类、外科骨伤科病类、妇科病类、儿科病类、五官科病类划分。各病之医案均按成书年代先后编排。

四、本书中药物的计算单位均保持原著原貌，未予统一。

五、部分医案后附有按语、注解等，均为原著中所有。

六、所收医案均注明出处。

前 言

《中国古今医案类编》是汇集我国名医医案精华,反映各家丰富临床经验的医案学著作。

在我国医学史上,曾有两部医案名著问世:一为明·江瓘《名医类案》,一为清·魏之琇《续名医类案》,二书将先秦到清代中期的名医医案进行了系统收集整理,它们在祖国医学发展史上产生过重要影响。然而自清代中期以后,尚无人对名医医案作过系统地整理研究。

《中国古今医案类编》系列丛书是继《续名医类案》之后,将清代中期直到新中国初期谢世的各家名医的医案进行了广泛的收集,经反复筛选、整理成书,填补了这一历史时期医案收集整理的空白。同时,将《名医类案》、《续名医类案》按病症分类,归其各科分类书中。这套丛书共收集名医 400 余家,选录医案 4 万余则,涉及内、外、妇、儿、眼、五官、骨伤等科 400 余种疾病,按病症分类,每种病症有 30~70 个医案,内容极为丰富。从中可以尽窥各地名医宝贵的临床经验和医术之圆机妙法。对于广大中医工作者具有很高的临床应用价值。

医案凝聚着医家的心血和经验,最具有真实性和实用性,可以“宣明往范、昭示来学”。著名学者章太炎先生曾说:“中医之贡献,医案最著”。作为一名中医工作者,若能掌握古今名家之医案,有如拿到祛病除疾的万能钥匙,可借鉴前人的经验,应用于临床。本书形成一个完整的医案学学术体系,为广大中医工作者提供一部较完整的医案学参考工具书。对于提高中医临床疗效和学术水平,将会起到重要的作用。

编 者

2000 年 10 月于北京

目 录

疮疡·····	(1)
疔·····	(17)
痈·····	(18)
疽·····	(142)
流痰·····	(215)
流注·····	(219)
疔·····	(229)
痰核瘰癧·····	(244)
乳痈·····	(277)
乳疽·····	(297)
乳中结核·····	(299)
痔疮·····	(306)
脱肛·····	(330)
肛痈·····	(339)
肛瘻·····	(341)
交肠·····	(342)
其它·····	(344)
石淋、砂淋·····	(351)
膏淋·····	(355)

癰閉·····	(359)
不育·····	(386)
陽痿·····	(386)
遺精·····	(390)
陽強·····	(451)
陰縮·····	(452)
白淫·····	(455)
精濁、血精·····	(455)
子痛、囊痛·····	(459)
前陰腫痛·····	(464)
腫瘤·····	(468)
疝·····	(479)
脫疽·····	(527)
臁瘡·····	(528)
破傷風·····	(532)
咬傷·····	(536)
燙火傷·····	(538)
金傷·····	(541)
其它·····	(542)
濕瘡·····	(549)
黃水瘡·····	(552)
天泡瘡·····	(553)
楊梅瘡·····	(554)

疥疮·····	(572)
翻花疮·····	(584)
疔疮·····	(585)
背痈疽疮·····	(587)
麻风·····	(598)
痒风·····	(601)
白屑风·····	(604)
瘾疹·····	(605)
斑·····	(618)
癣·····	(619)
脱发·····	(623)
丹毒·····	(625)
缠腰火丹·····	(630)
疣·····	(630)
其它·····	(636)
上肢骨折·····	(660)
下肢骨折·····	(667)
躯干骨骨折·····	(670)
关节脱位·····	(672)
下肢软组织损伤·····	(676)
头部软组织损伤·····	(678)

疮瘍

周南

草野七太夫室，少年生面疮，去冬蔓延满面，今春沿及胸颈，服清火解毒药，外敷燥湿生肌，半月痊愈。诊之六脉沉迟，虚寒气滞之候，所以月事衍期，临经必先作胀，及胃、小腹作痛。先用开郁行气丸药缓调旬日，候临经期复胀且痛，数噫气不除，乃以温经行血之剂乘势利导。二服而痛胀若失。

温经用肉桂、炮姜，行血用大黄酒拌九蒸九晒、桃仁、苏木、当归、川芎而已。先用开气药者，以血随气行，无形之气先已鼓动，有形之血凝滞为患者，得温利之药力，荡扫无余。不然气机未动，即用行血，未有不相持而痛益甚者。若骤用破气破血，犹恐有奔溃之虞矣。

《其慎集》

北山友松

泉州藤井法桥道安老母七十三岁，庚戌仲春，发瘍在京门带脉之分，大五寸许。法桥昆仲四位，俱显医名于时也，昆仲相议，先用吕洞宾仙传化毒汤，次用托里消毒散，再用精要十宣散。一外科为之敷贴，溃后脓汁清稀，疮口干燥不赤而黯，咽膈不利，咳嗽粘痰。其仲子北村救斋与予邻居于坂阳，请求赴泉，为母诊视。脉之虚弦，予谓诸昆仲曰：“令寿堂年过古稀，发瘍至今，溃脓多日，血气必亏。须进独参汤，大补元气，间用十全散，或增温中托里之物，或投消痰化毒品，缓缓图之。且元阳未至败绝，饮食不减常日，治不失法，回生可期矣。脉之虚弦，老者之常例，溃瘍之当然也。但发于少阳多气少血之地，似为可虑于收合之际。然而疮口虽阔，根盘似浅，可以动摇，得补托之内服药，灸之外施，或可移于太阳背部，未可料也。”法桥昆仲眼眼相觑，唯唯低首而已。予曰：“外科书所谓疮瘍灸法，

有回生之功，若未潰則拔引郁毒，已潰則補接陽氣，祛散其邪，瘡口易合，其功甚大。東垣亦云：毒氣沉伏者，或年高氣弱，若服克伐之劑，氣血愈虛，膿因不潰，必假火力以成全功也。”遂教以附子為末，唾津和作餅，厚三分，安瘡上，以艾柱灸之，使微熱不可令痛，干則易之，如困則止，日灸三度。夜以太乙膏每一兩加石菖蒲末、硫磺末各一錢，牛油五錢，木蜡三錢，一處溶和作油膏，攤在旧綿布，貼于瘡上。次日又灸三度，次夜又貼油膏，第三日赤處漸見。至七日夜黯處全消，赤肉漸生矣。于是改用東垣通氣防風湯一帖，每二錢許，一日與二貼，仍進人參湯一帖。至三日後，令搗萬槌綠云膏攤貼太陽經督門志室之分，以至癆之小半以吮引之，又制象皮膏敷貼大橫、腹結及章門，以至癆之大半，以追推之，其上總以加味太乙膏封之。待二日後，剝而視之，其癆將移于太陽經分之勢成矣。再加前法敷貼七日，內服補中益氣湯，加芍藥、桂，增柴胡、陳皮至十五貼，乃少陽之癆移于太陽之分矣。猗欤藥中肯綮，有如是之奇妙哉。其法虽似怪誕，其实远迩共知，故录之以俟好事君子为榜样矣。医中微妙，书不尽言，言不尽意焉。后用生肌膏药贴之，至三月余，癆平而收口矣。寿至八旬而终矣。

門人元貞子，壯年遷居新宅，日應世事，夜讀醫經，勤勞日久，腰脊間發出一癆，大如碗許。腫不高起，色不光赤。托外科付貼自用，調理多時，膿水將盡，不能生肌收口。請教于予。予問用藥始末，貞曰：“依方書之例，先用解散，次用托里，自知血氣未甚虛耗，所以未服純補人參湯耳。于今多日，不生新肌，且癆肉未盡，外科虽累易去癆生新之藥，而不能成功，为之奈何？”予診之沉緩，遂教用熟料五積散加入參少充獨活、皂角針為引用，服未及五十貼，其癆痊安。此與米賈之癆相若也，但因年之壯老，費工有多少之殊耳。

《北山醫案》

郭右陶

潘子亮女十八岁，患疮已半载。忽一日饮酒后，脓疮大盛，或以其酒助血热，且食鸡鹅发毒之味，脓疮肿痛，由斯而极，治以凉血活血解毒托里之剂。更觉昏迷饱闷，延余治之。脉不洪数而反沉微。余曰：“脉不对症，必痧使然。”刺出指头毒血，又刺头顶心一针，神情方始清爽。但胸中饱闷，用顺气散痧消毒之味四剂，微冷饮之，兼外搽合掌丸，饱闷、脓疮俱愈。

《痧胀玉衡》

许豫和

巴如冈兄子，百日，患霉烂疮，起自阴囊，上侵腹背。医用荆、防、蝉退、莠子、连翘、银花、甘草之类，疮渐延蔓，唇口、眼眶、四肢、指节，无所不有，色红紫，皮塌烂，舌如杨梅，啼哭不住，且其母前产二胎，皆死于疮。医用药与前无异，恐蹈前辙。求治于予。予曰：“霉烂疮，先天之毒，病自里发，与风湿在标者不同。治当从内解，今用疏托药，是助其欲发之势，故延蔓愈甚也。”为制一方：马料豆、土茯苓、丹皮、黄柏、银花、山栀、人中黄、甘草、木通九味，不时与服。外用雄猪油、紫草同煎，鹅翎涂疮。冬桑叶、川贝母、甘草等分，为末，绢囊扑之。疮渐收，热渐平，愈而复作，治法如前。两月后，不复发矣。后所经霉烂疮，皆用此法，能吮乳者，皆效。

《橡村治验》

中神零溪

一妇人，年三十，久患头疮，臭脓滴滴，流而不止；或发粘结不可梳。医因以为霉毒，攻之不愈，痛痒无止，请之先生。其脉弦细小，腹急痛引腰腿，曰瘀血也，投桂枝茯苓丸加大黄汤，兼以坐药，不出月全瘳。后一夜腹痛二三阵，大下畜血云。

东洞院五条南，某氏儿八岁，久病头疮。其毒内攻，身浮肿，呼吸短促殆邻死。师与龙门丸，取泻三五行。后与浮萍汤，兼前丸，每服十丸，数日乃已。

佛光寺街山形屋，久右卫门之妻，患头疮。其疮蔓延，状如覆釜，岁余不愈。先生与浮萍加大黄汤，时时以龙门丸一钱取泻，不出十日复故。

西洞院五条南近江屋，某儿三岁，腿股间，发疮五六头，皆溃而脓水流出。及暑，其臭气最不可闻。杂治无效，愈益腐烂。至五岁，而患殊甚。形体已惫，颜色青黄，腰脚委弱，不能步。动辄物触其患处，则啼叫不已，声音大哑。师诊之，脉微细，谓主人曰：“此遗毒也。”即与浮萍加大黄汤，兼赫赫丸。时主人尝闻之一书生，赫赫丸则以生生乳为君药，于是惧然有难色曰：“今体虚已如此，若遽用之，药毒甚于病。”先生曰：“否，阿郎之有病，犹子之家食奸奴。今子豪贾也，夫贾者，以能得其利者为才。有才奴子此货财所殖，必克走买贱卖贵，屡建奇功，此子之所爱也。然闻其有博弈好饮酒，杀越人于货，则犹用之乎？抑逐之乎？”曰：“不用也，即逐之，虽其才可爱哉。知其恶发，则累及我身也，未如之何也。”曰：“才奴为奸，犹且畏而谋之，矧儿之所养毒即奸也，奸岂可不逐？至其奸极，虽悔何及焉，善婆扁仓，亦无所试方矣。古曰：痈疮属热。世医徒眩二三外证，妄投乌鸡人参之类，姑息之，汝不省以热当热，噫！”主人曰：“诺，慎受命。”因与前方，而每曰服芥子大者三十丸，数日脓不出，明年而渐得健步。

寺街绫小路南象牙屋，八兵卫之女，年甫十余，自膝至臀腿，其大几类于中人，而无痛，色亦不变，身唯仰卧而不得反侧。岁余众医金以为痞癰，不可疗也而辞。竟乞拯子先生，先生脉之细数而有力，按抚其腿膝间良久，颇谓门弟子曰：“其状殆难言，尔等按之，以能谄识诸掌，是此中大酿脓，不急除之，后必有大害。”乃使召外科某具告由，某危疑有惮色。先生谕之曰：“余有所见也，子解疑效验

乎？”即使某以汤药熨腿膝间，而与浮萍加广东人参汤五六日，浮郛穴上果大泡起。又使某帖腐药，遂溃脓水流出。二旬余，得为常人。

《生生堂治验》

程文囿

智翁令孙三岁，痘后左手曲池穴侧，鬼肿溃经年余，外科疗治，不能收口，逆予商之。维时伊兄郎玉翁及同事叶殿扬兄在座，二元俱知医理。予视毕告曰：“毒生手足，固不害命，然溃久脓水流多，气血受伤，面黄肌瘦，神形疲倦，目无精采，天柱骨垂，一派大虚之象，最为可虑，溃口收否？无暇计也。”郎翁云：“证既属虎，虚则当补。”予曰：“不但用补，且须用温。”智翁云：“时下炎暑如蒸，过温恐其难受。”予曰：“医家治病，盛夏遇寒证用热药，隆冬遇热证用凉药，所谓舍时从证也。病若虚面不寒，单补亦可见功。今虚面兼寒，非温补莫能奏效。”爰定人参养营汤，加附子、鹿茸、枸杞、杜仲，合乎《内经》“形不足者，温之以气；精不足者，补之以味”之义。二公见方称善。初服精神略转，再服颈骨不倾，守服数十剂，气血恢复，溃口亦敛。此证获痊，虽予之执理不阿，亦赖二公赞襄之力也。

《杏轩医案》

何书田

七情郁结，痰火相凝，发于左腮；脉弦细不数，并非外因冻证。此为郁劳重候，即痼疮类也。最难奏效。

羚羊角 生栀子 川贝 郁金 海浮石 石决明 白杏仁
瓜蒌 橘红 竹茹

阴亏湿热之体，炎天辄发疮疾。治以凉营化湿法。

生地 丹皮 茅术 黄芩 苡仁 薏苡草 阿胶 归身 川
柏 苦参 赤苓

《辨山草堂医案》

王孟英

壬寅，余在海门之东昌镇。有徐姓者，患胸脘，腐肉上至顶，下至颈，左右至两耳，医不能治。余悯其贫，为设法痊之。并不服药，凡百四十余日而收功。此开手第一证也，由是求治者踵门不绝。余初亦未知不服药可愈病，因目击杨公之法，而私淑其意，治之果应。始悟世之外科，朝凉暮热，欺世盗名，杀人不可胜计，而无形迹可寻也。其始临证，则曰死证也，或他人治过之证，则曰前医误治，不可救矣。皆为日后邀功避谤之计耳，可叹也已。

《归砚录》

金元章媳，於甲午新寡后，患胀寒疮，大抵湿热之病耳。疡医连某，疑为遗毒竟作广疮疗，渐至上吐下利，不进饮食。另从内科治，亦无寸效。延至春末，更兼腹痛自汗，汛愆肌削，诸医皆见而却走矣。王仲安荐盍英视之，曰：此胃气为苦寒所败，肝阳为辛热所煽，前此每服阳刚，即如昏瞶，稍投滋腻，泄泻必增，遂谓不治之证，未免轻弃，乃以四君子汤加左金（丸）、（川）椒、（乌）梅、莲子、木瓜、余粮、石脂等，出人为方，百日而愈。第信犹未转也。诸亲友环议：再不通经，病必有变。孟英力辨此非经阻可通之证，惟有培养生化之源，使其气旺血生，则流行自裕，若不揣其本而齐其末，则薏糠不能榨油，徒伤正气，尽坠前功，岂不可惜？众议始息。恪守其方，服至仲冬，天癸至而肌肉充，康复如常矣。

《王氏医案》

方南薰

南丰陈姓子，两足生疮，肿如瓜瓠，皮白晕红，溃流黄水，发热则痒，搔破则痛。外科医治，洗敷之药，总是凉皮散血，所服之方，无非解毒滋阴，蔓延数载，体气日薄。延余诊之，六脉迟弱，余曰：“此因寒湿浸淫，如木淹泥水之中，渐次腐烂，《经》所谓湿淫足疾，此疮

是也。”法宜升阳除湿，阳旺湿去，疮自结痂。若用寒凉泻火，是犹恶湿居下，必致溃烂不已。依方调治，一月而痊。

服方 黄芪酒炒，三钱 党参米炒，二钱 白术土炒，二钱 茯苓二钱
米仁炒，二钱 小茴炒，一钱五 桔梗一钱 蔓荆子一钱 五加皮二钱
白芷八分 破故纸二钱 陈皮六分 寒，加附子、肉桂；湿，加苍术、煨姜、红枣煎服

洗方 紫苏叶五钱 白芷五钱 苍术五钱 蛇床子五钱
川椒一钱 艾叶一两 连根葱一握共煎汤，乘热洗之，拭干搽药

搽药 黄丹灰炒，一钱 石硫黄四钱 樟脑二钱 白芷一钱
炉甘石制，二钱 龙骨煨，一钱 枯矾八分，此味研末另包，搽时斟酌，痒则加入，痛则减去 共研细末搽之

家凤地先生次孙后鞠，满头生疮，医者用药涂愈，未能宣托，遂至久热不解，烦躁难安，命余诊视。唇红舌干，舌端不时伸缩，余以导赤散立方，先生诘曰：“月余之热，用导赤散何也？”余曰：“此疮愈蓄热之证。”先生又诘：“疮生何处？”余曰：“必生头上。头为诸阳之会，《经》云：诸热疮痒，皆属心火。心不可见，而舌为心苗，心有热，故舌常伸缩，心为丁火，不可以泻，惟泻小肠丙火，则心火翕然下降，且大热利小便，亦釜底抽薪之义”。服一剂而热减半，再服则热退身安矣。次日，先生授以札，云：前日之药，大有效验，贤侄可谓眼明手敏，精而进之，可以救世，亦可以传世。仍烦拨冗至家，基酌一方，以善其后云云。

《尚友堂医案》

费伯雄

某。毒结上焦，额颅破溃，已延数月。近加头疼引耳，太阳痛甚，有如锥刺，入夜寒热，牙关微强，恙延日久，阴分渐虚，厥阴少阳风火不宁，痼疾已著。

羚羊角一钱 炙僵蚕二钱 甘菊花炭二钱 酒黄芩一钱

薄荷炭一钱 丹皮二钱 鳖血炒柴胡一钱 桑叶二钱 生甘草八分
嫩钩钩后下，三钱 茅根五钱 夏枯草八分 石决明煨、先煎，四钱

某。头面腿臂溃烂，延久不愈，结毒不化。宜清解化毒。

青防风 威灵仙 连翘 生地 丹皮 黑山栀 大贝 银花
赤芍 甘草 白藓皮 川黄连 玄参 土茯苓 车前子

《费伯雄医案》

王燕昌

一船户，年四十余岁，左肘、右膝各患人面疮，两关脉弦，身略肥而无血色。方书谓此属痰，以贝母涂之可愈。今两关弦，则是木盛克土，且肘、膝系关节，是筋溢于肉而痰结之也。用贝母一两，白芍二两，白芥子三钱，甘草节、龙胆草、柴胡各二钱，数剂面消。后用四君子加白芍、贝母而愈。

《王氏医存》

杨毓斌

孙某。疮疡遍体，哮喘不卧，肢体振动无休，脉左沉迟微滑，右沉弦。

按：疮为湿热蕴于肌肤营分，今因寒邪抑遏，气机逆滞，肺金失权，木郁风生，最为恶候。先以温降开气。

沉香汁二分冲入 炒乌扇一钱五分 茯苓五钱 桂心五分
杏仁三钱 姜汁炒半夏三钱 喘平过半，痰吐微作红色。

炒乌扇二钱 紫菀三钱 苦杏仁三钱 刀豆壳五钱 细辛二分
紫苏子一钱五分 茯苓五钱 磁石二钱 姜夏三钱 沉香汁一分，
桂心三分

喘愈，疮甚，用五苓加減：

赤苓皮五钱 苏梗一钱五分 醋炒归须二钱 紫菀三钱
泽泻二钱 茜草一钱五分 赤芍三钱 炒乌扇一钱五分 猪苓二钱

苍术皮一钱五分 生甘草八分

愈后丸方服罄，并素患湿痰痼疾全瘳。

丸方：桂心 刀豆子 紫菀 醋煮半夏 苍术皮 苏子 炙草 茯苓 赤芍 苦杏仁 磁石 橘络 谷芽 生姜汁

《治验论案》

王旭高

周。立斋云：外疡经久不消散，亦不作脓，气虚也。徒用攻消，恐无所益。

黄芪 党参 防风 归身 泽兰叶 川山甲 僵蚕 丹参 广皮 桑枝

朱。结毒穿破不敛，在于当额眉棱，俱属阳明部位。已及半载，当养气血以化毒。

大熟地 党参 川芎 皂荚子 茯苓 土贝母 黄芪 当归 生甘草 银花 土茯苓

某。营行脉中，卫行脉外。体肥湿胜之人，卫恒虚冷，营多盛热。故肥人当暑，往往肌肤常冷，而易生外疡也。疡发背脊三候，内脓已结，外腐未透。营中之火极炽，卫弱失于敷布，不能引血化腐，载毒外出，渐显内陷之机，颇为可虑。非温不能助卫阳以鼓舞，非不能解营热以化毒。经曰：血实宜决之，气虚宜掣引之。此法是矣。

黄芪附子煎汁，炒 鲜生地 川山甲 地丁草 连翘 皂角刺 制僵蚕 金银花

另以三角风熏。

渊按：三角风未详是否三角胡麻。

《王高临证医案》

柳宝诒

李。痰疡发于少阳之经，内挟木火燔灼阴分。连年未愈，阴虚

则生内热，木病伤胃，纳谷尤少，脉象虚细而数，左寸关浮大，有延成劳病之虑。治宜于养阴中，佐以泄木培胃。

东白芍 生地炭 丹皮炭 黑山栀 刺蒺藜 於术 太子参
白扁豆 牡蛎 功劳叶 青蒿露

方。痰咳不已，继以内热咯血，脉浮数；项右溃瘍，流脓颇多，此属湿热之气，混于血络，蒸蕴而上溢。刻下营液被戕，余热犹恋，姑拟清营肃肺。

小生地 鲜生地 丹皮炒 白薇 苡仁 冬瓜仁 蛤壳 银
花炭 连翘 青蒿 茅根肉 枇杷叶

武。左脉绵软，关部独壅，阴虚而肝火不藏也。舌苔黄浊，有湿热蕴于中焦。其外疡宿疮，流水不止，湿热从此下泄，而营液亦因此而伤。左目昏胀，虽系阴虚，亦因肝火。拟方以养阴为主，佐以清肝熄火，培土渗湿。

大生熟地各 归身炒 白芍 枸杞子酒炒 菟丝子酒炒 滁菊
花 潼沙苑盐水炒 刺蒺藜 丹皮 黑山栀 杜仲盐水炒 砂仁
党参炒 於术 淮山药 茯苓 广陈皮 苡仁 车前子 泽泻
怀牛膝盐水炒 上药二十一味为细末，用熟地煮糊打和，酌加炼蜜
为丸。

《柳宝诒医案》

马文植

朱孩。此名胎痰，附脑着骨，消之不易，成脓亦难，日后穿破，得脓可医，得清水不治。白芥子二钱 当归四钱 冬术炒，三钱
半夏炒，一钱 竹油十匙 骨碎补五钱 怀牛膝炒，三钱 加姜三片

二诊：前方见效，原方加黄芪六钱、焦谷芽三钱。

三诊：原方加丹参三钱、银花二钱。

《外科集腋》

沈祖复

河埭口蒋姓遍发疮毒，体无完肤，形神消瘦。先生偕门人邹致和同往。致和幼读医书，并在他处学习内、外科五、六年，始入房，其形状，惊而却走。先生用枯矾末数两，麻油调敷遍体，两星期而愈。

黄泥桥薛姓子病遗精，北门王医用固涩补药十余剂，不独精不能固，遍体肿胀发疮，浓水淋漓，两手不能握箸，舌苔光绛。先生曰：“此湿火灼阴也。”用鲜首乌、黄柏、黄连、黄芩、丹皮等，外用枯矾末数两，麻油调敷。脓疮即愈，遗精亦止。后见其人，气体甚丰腴也。

《医验随笔》

陈莲舫

太仓，某。肝脾内虚，湿邪袭于营分，统身发黄，腕胀，肢肿，流毒溃烂，疮病并发，治以分疏。

生白术 粉草薤 宣木瓜 焦米仁 川郁金 全当归 制小
朴 木防己 连皮苓 焦建曲 广陈皮 野蔷薇 荷叶

《莲舫秘旨》

邵兰荪

渔庄沈。结喉旁及右手臂肿，溃而不敛，左脉细数，右寸关弦，不时汗出，形体怯弱。宜防疮劳。五月初十日。

北沙参三钱 霍斛三钱 稻豆皮三钱 忍冬藤三钱 茯神四钱
炒白芍钱半 枣仁三钱 地骨皮三钱 炙黄芪皮八分 生牡蛎四钱
新会皮钱半 引陈南枣三枚

三帖。

又：疮毒未敛，脉弦细数，阴火上升，齿痛，舌白少津。宜养阴清解，防疮劳。五月十三日。

历代中医资料大全分享

你好，我是**逢原**，你现在看到的这本资料是我从网上收集整理的。

本人自学中医多年，耗时多年搜集珍藏了众多的中医资料，包括了目前已经出版的大多数中医书籍，以及丰富的视频教程，而这些中医资料，是博览群书，勤求古训之必备。

只需要在下面输入你的邮箱并确认就可以直接下载中医资料：

http://list.qq.com/cgi-bin/qf_invite?id=03157beabc6d50e0b64029a2715966596d94dcac7ed0cfd7

如果有你也喜欢中医，需要一些学习中医的资料；或者是学习中医的路上碰到了什么问题需要交流；或者碰到一些疾病的困扰，需要求助，可以通过以下方式联系我：

一、发邮件：fyzy999@qq.com

二、加我 QQ/微信：**2049346637**

三、关注微信公众平台——逢原中医，经常有中医文章更新。

四、关注我的空间：<http://user.qzone.qq.com/2049346637>

免责声明：所有资源均是网上搜集，本人收集整理这些中医资料，仅仅为了方便中医同道中人私下交流学习之用，不为营利，将不对任何资源负法律责任。所有资源请在下载后 24 小时内删除，任何涉及商业营利目的均不得使用，否则产生的一切后果将由您自己承担！如果您觉得满意，请购买正版资源。



私人微信号：2049346637



公众平台：逢原中医

西洋参钱半 骨碎补三钱 生地四钱 天花粉钱半 粉丹皮三钱
怀药三钱 广皮钱半 蜜银花钱半 钗斛三钱 生牡蛎四钱
冬桑叶三钱

清煎三帖。

又：疮劳胃纯，脉虚濡，舌滑白，迺由湿热伤气，清窍不利。宜清利为妥。又月初四日

骨碎补三钱 生米仁三钱 蔻壳一钱 冬瓜子四钱 炒远志八分
抱木茯神四钱 新会皮钱半 川贝钱半 苦丁茶钱半 谷芽四钱
石莲子三钱

清煎四帖。

又：疮劳形怯，胃气稍振，脉虚细，舌滑白，湿热犹存。仍遵前法损益。又月初七日

骨碎补三钱 生米仁四钱 丹参三钱 省头草钱半 远志四钱
怀药三钱 新会皮钱半 通草钱半 茯神四钱 炒谷芽四钱
冬瓜子四钱

清煎四帖。

又：诸款悉减，脉虚细，疮口未敛，宜补虚扶元为妥。六月初九日

太子参一钱 归身钱半 霍石斛三钱 金樱子三钱 茯神四钱
灼白芍钱半 新会皮钱半 怀山药三钱 夜交藤三钱 生牡蛎四钱
炒杜仲三钱

清煎五帖。

史介生评：此症溃而未敛，脓血去多，营液大耗，以致形体怯弱，次以胃热上冲而齿痛，三因湿热重伤。故其处方，初以养胃敛阴，次则以滋阴潜阳，三四两方，又佐渗湿，终则悉属扶脾益肾以安神，俾脾能统血，肝能藏血，心能生血，血液充足，则形体亦得恢复如常矣。

《邵兰荪医案》

何长治

左。初起足疮，渐致少腹胀，麻木，脉细无力。当从和理。

归身二钱 怀膝三钱 炒川柏钱半 泽泻钱半 五加皮钱半
生草四分 冬瓜皮三钱 冬术二钱 赤芍钱半 赤茯苓三钱
远志钱半 广陈皮八分 加细桑枝五钱

《何鸿舫医案》

孙采邻

吴声振孙女，癸未九月初旬。忽患湿毒疮，数日内，由手臂而至两里股及肩胛内，俱生痞瘤甚痒，抓无宁刻。惟手腕臂，有如小豆脓颗状，抓之出水，浸淫皮肤，夜睡肌热且痒。天癸如常，食饮不减。内服祛风凉血、解毒完痒之法，外用煮熟鸡子黄十枚，放铜勺内，慢火熬油，去渣。调川黄柏末一钱，用棉裘蘸药搽之。如细小痒极者，可以蘸擦。两日后延诊，据述内服外擦，夜来痒止，痞瘤渐自焦平，内有几颗大如豆者，尚未平，却亦不痒，脓亦无。内服方，仍以前方出入，外仍照前法搽之，五日而痊。

《竹亭医案》

丁泽周

唐小。感受外邪，湿热内蕴，昨起寒热，胸闷纳少，小溲如泔，兼之燕窠疮浸淫痒痛，宜疏邪宣化。

荆芥穗一钱 净蝉衣八分 清水豆卷四钱 赤茯苓三钱
江枳壳一钱 苦桔梗一钱 制小朴七分 制苍术七分 福泽泻钱半
炒谷芽三钱 炒苡仁三钱 佩兰梗钱半 粉草薤三钱

倪右。湿热痰瘀凝结，营卫不从，腋痰肿硬疼痛，日晡寒热，虑其酿脓，姑拟祛瘀消解。

当归尾二钱 京赤芍二钱 银柴胡一钱 清水豆卷四钱

赤苓三钱 仙半夏二钱 杜红花八分 大贝母三钱 炙僵蚕三钱
炙甲片一钱 嫩桑枝四钱 小金丹一大粒，化服。

赵小。腋痰溃后，脓水清稀，四围肿硬疼痛。痰湿凝结，营卫不从，缠绵之症，姑拟和营托毒。

生黄芪四钱 紫丹参二钱 生草节八分 赤苓三钱 赤芍二钱
当归二钱 六神曲三钱 制香附钱半 大贝母三钱 丝瓜络二钱

《丁甘仁医案续编》

缪芳彦

王，右足底生疮，溃后不敛，在鼻衄止后起，于今年余。肾脏亏极，故水中之火游行无制。盖鼻衄之来由于冲脉，冲脉根于太冲，名虽异而其源则一，故不见于此，即见于彼，医若不请《灵》、《素》，何足以知之。

大熟地四两 紫河车一具 黄明胶二两 杞子二两 黄芪二两
料豆皮二两 龟板二两，炙 陈阿胶二两 杜仲二两 猪右蹄灰二两
猪脊髓二两，米炒 穿山甲三钱，炙 真象皮五钱，炙 山药二两
牛膝一两

蜜丸清晨开水送四钱。

《缪芳彦医案》

曹惕寅

马大策巷厥厚生兄，幼时在沪充任学徒，染湿疮。防其散漫，乃用含有硫轻质疮药敷之，渐愈十之六七。忽致遍体浮肿，溲便闭塞，形寒壮热，腰圆腹大，睾囊肿亮，气急咳逆，不能安卧。其舅陆姓与其母偕其同来诊治，谓其充任学徒时，不善护养，风寒积受，冒雨往来，又伏湿热。于其病旨，在表者汗之，在里者利之，则不仅湿去，而表邪亦解。病已如此现象，不事分解，一味抑遏，无怪其腠理闭塞，昼夜烦闷。风寒包于外，湿滞困于内，喘塞变端，意中事也。药用苏

叶、紫苑、杏仁、莱菔子、防己、五加皮、米仁、半夏、车前、泽泻、麦柴、蟋蟀干、川牛膝、赭石等味内服之。外用河败草三两，麻黄五钱、苏叶四钱、冬瓜皮二两、水姜皮三钱煎汤焗之，内外并治之。后肿势下趋，气急较平，五六剂诸恙均安。惟囊肿欲裂，转方改用桑皮、冬瓜皮、茯苓皮、泽泻、车前、猪苓、防己、五加皮、水姜皮、牛膝、蟋蟀干，焗方同前。另服单方，用湿草纸包皮蛋，火煨之，每日食一枚。三日后囊肿全消。继以健脾化湿之剂，如资生丸、橘白、宋半夏、米仁、鸡金、川断、车前、谷芽等。故凡一切疮疾，均戒用轻粉、水银、硫黄等药，强为抑遏，转使湿毒无外泄之路，酿成疮脓。体力强健者尚可补救，中虚者其祸不堪设想矣。

《翠竹山房诊暇录稿》

周镇

李左，北桥。辛亥七月，因患疮敷贴其外而未清理，湿热袭脾，遂病疮鼓肿胀，腹大，脉数舌红。因疏豆卷、防己、猪苓、泽泻、茵陈、苍术、薏苡、通草、大腹皮、知母、冬瓜皮及中满分消丸。气机宣通，湿热流动，疮势复绽，鼓胀渐消。另一乡人，因疔早用金鸡纳霜，湿热停阻，即成疔鼓。与利湿泄热之药多剂，肿退。纵观此二症，简单之敷疮与截疔，皆有流弊，昧者呆守板法，抹尽六气，陋矣。

《周小农医案》

翟竹亭

县西赵岗村，赵瑞祥子，半岁余。出湿疹后周身生疮，皆已溃烂，如蛇退皮，处处皆臭秽难闻，惟头部独重，日夜啼哭，乳食已减，中西两医，屡治不效，就诊于余。见小儿面目浮肿，气色暗淡，哭声低微。余曰：“此因阳气亏损，不能摄血，血不归经之故。”遂有参附回阳汤，每日一帖，五、六日后脓水稀少，啼哭已止。共服药十二帖，诸症遂愈。今之习外科而不明内科者，均不免顾此失彼之消也。

参附回阳汤

党参 6克 白术 5克 茯苓 6克 炙甘草 5克 炙黄芪 16克
白芍 5克 熟地 6克 附子 4克 当归身 6克 油桂 2克
炮干姜 4克 破故纸 4克 水煎服。

五堂村王绍轩之嫂，右耳下生一疮，迎余往治。病三月余，溃破甚险，脓水清稀，六脉虚细无力，饮食减少。看所服药，是凉血解毒，损伤脾胃，不知虚实之过也。余用十全大补汤，外上红升丹，十日后新肉渐生，饮食日增，始终调理，月余方愈。

管狱员王子勉，年五十余，一子三龄，患瘟疫后，毒气不尽，结于左腮之下生疮，中、西医百治无效。邀余诊视，见小儿身体极瘦，诊其脉亦无凶象。再审疮形，口深寸许，色又暗淡，脓水清稀，真虚证也。幸无臭气，虽属危证，尚且可治，惟费时日耳。子勉曰：“但求能得性命，实属万幸，迟速何妨。”又喜小儿善于服药，每日一帖，外上红升丹，掺玉红膏。余爱子勉忠厚长者，惟此一子，每日一次，亲自上药调理，共服三十余帖，近五十天方瘳。方开于后。

党参 6克 当归 6克 川芎 6克 茯苓 6克 白术 6克
炙甘草 3克 白芍 6克 防风 6克 连翘 6克 白芷 3克 陈皮 6克
乳香 6克 金银花 10克 柴胡 6克 桔梗 10克 水煎服。

《湖岳村叟医案》

张汝伟

朱冠生，年四十，无锡。脾胃湿热素盛之体，尤喜杜康，中气更伤，近患口唇碎腐而痒，层出不已，午晚潮热，大便溏薄，外症名曰燕窝疮，患进虑其便溏，告以湿热留于脾胃，不可因便溏而止泄，宜分利水道，以化湿热。

绵茵陈 姜半夏 平胃丸包 鸡距子 白鲜皮
生熟苡仁各三钱 酒炒防己 广藿梗 丝瓜络各钱半

二诊：投分泄之剂，便溏已减，小溲亦多，色黄赤，口唇燕窝疮，

痒势已平，碎腐处，亦渐收干，拟仍前意立方。

制川朴八分 制苍术 粉葛根各一钱 绵茵陈 生熟苡仁 黑山栀 橘泽泻各三钱 新会皮炒 广藿香各钱半 淡竹叶二钱

本证始末：朱君系大中华橡胶厂职员，平日素喜曲叶，所以湿热特重，此症虽是极普通，照本书规例，不应采入，不过余初诊之时，脉按之沉弦，而苔白腻，凭苔及大便溏，似未可用凉，凭脉之沉弦，知其内有蕴热，此即凭脉不凭苔之治法，更因病已月余，二方仅旬日即告痊愈，故亦选录及之，方意说明，已注于上不再赘。

《临症一得》

疖

许豫和

稠墅汪氏子，二岁。二月间，头面、胸背、四肢，发出疖子，大小垒垒百余颗，红者、淡红者、青者、紫者，时热时退，服药无效。请予治，已初夏矣。予曰：“疖子，多生于夏秋。方春而发，是胎毒所生，非天时之病也。”询其父母，皆艰于嗣，常服热药，乳母又多郁，故得是病。方用马料豆三钱，丹皮、赤芍、当归、人参各八分，柴胡、青皮各五分，黄柏四分，银花、木通、甘草各六分。令速换无病好乳，服此方十剂，青紫者贴洪大生膏药。溃者自溃，消者自消。又十剂，消者大半，除去黄柏、木通，加入茯苓、泽泻。又十剂而肿消殆尽。约而计之，大概溃者十之三，消者十之七。所溃之疖，非脓非血，如靛汁相似。其溃而消者，解毒散结之功。其易溃而易收者，换乳之力也。

《豫村治验》

王孟英

濮姬，於酷热之秋，浑身生疖如疔，痛楚难堪，小洩或秘或频，大便登圜则努挣不下，卧则不能收摄。人皆谓其虚也。孟英诊脉，

滑数，舌紫、苔黄而渴。予白虎汤加花粉、竹叶、栀子、白薇、紫菀、石斛、黄柏、十余剂而痊。

《王氏医案》

丁泽周

傅左。风邪挟痰瘀凝结，头颅疡疖，肿硬疼痛。虑其增剧，宜疏散消解。

薄荷叶八分 荆芥穗一钱 青防风一钱 生草节八分
苦桔梗一钱 京赤芍二钱 连翘壳三钱 大贝母三钱 炙姜蚕三钱
生蒲黄包，三钱 山慈菇片八分

朱幼。蟥瘻破溃，脓水甚多，耳根结核，耳内流脓，寒热日作。厥少之火上升，湿热蒸腾，风邪外乘，症情夹杂，非易速痊，姑拟消托兼施。

薄荷叶八分 荆芥穗钱半 京赤芍二钱 生草节八分
苦桔梗一钱 连翘壳三钱 大贝母三钱 炙姜蚕三钱 银柴胡一钱
夏枯花钱半 通草八分

《丁甘仁医案续编》

痛

薛己

巡抚陈和峰，脾胃不健，常服消导之剂，左腿股及臀患肿。薛曰：此脾虚下注，非疮毒也。当用补中益气，白术倍之（白术本草消脐腹水肿胀满）。彼惑于众论，云白术溃脓，仍主散肿消毒，其肿益甚，体益倦。始悔。前药用白术一味，煎饮而消。盖白术腐溃生肌之主药也。

一儒者，左臀患之，敷贴凉药，肿彻内股，服连翘消毒，左体皆痛。用补中益气以补脾肺；用六味丸加五味以补肝肾，股内消而臀间溃；又用十全大补而疮口敛。盖此症原属足三阴虚弱。三阴者，

少阴肾、太阴脾、厥阴肝也。胆者，肝之府，行人身之侧故耳。不治本而治末，未见其愈也。

一男子漫肿而色不变，脉滑数而无力，脓将成矣。薛欲托里而用针，彼畏针而欲内消。乃用攻伐之剂，顿加发热恶寒自汗。用十全大补汤数剂，肿起色赤，针之，仍以大补而愈。

一人年三十，脉如屋漏如雀啄，肿硬色夭，脓水清稀，此凉药复损脾气。薛用六君子加归、芪、附一钱，二剂肿溃色赤；后数剂，附子五分，元气复而疮愈。

上舍患痔，外敷寒凉，内服消毒，攻溃於臀，脓水清稀，脉洪大而数，寒热作渴。薛辞不治，果殁。此三阴亏损之症。

《名医类案》

薛己

地官李北川腿痛，内外用败毒寒凉，因痛极，刺出脓瘀，方知为痈。疮口开张，肉黯陷陷，外无肿势，此阳气虚寒不能少敛，用豆豉饼、六君加藿香、砂仁、炮姜，饮食进而患处暖；再以十全大补汤，元气复而疮口愈。

一男子腿肿一块，经年不消，饮食少思，强食作胀。或作泻，肢体消瘦。两尺脉微细，此命门火衰，不能生土，以致脾胃虚寒。与八味丸，饮食渐进，肿患变消。

银台郑敬斋腿患痼疽，愈而不敛，两月矣。时薛考绩京师，请治，谓薛曰：治者皆用十宣散（亦是温补剂）之类。云旬日可敛，今未应，何也？面色痿黄，脉浮大，按之微细，此脾气虚弱也。遂用补中益气加茯苓、半夏，壮其脾胃，数日而疮敛。

一男子腿患痈，因服克伐，亏损元气，不能成脓。为之托里而溃，大补而敛，但大便秘结，用十全大补加麦冬、五味而润，月余仍结，彼惑于人言，自服润肠丸，而泻不止。用补中益气送四神丸，数服乃愈。

一男子左腿肿痛，肉色如故，寒热恶心，饮食少思，此脾气不足，而感外邪。用六君，加藿香、桔梗、川芎，而寒热止；又用补中益气，而肿痛消。（江云外科概要仍有余痰方法）

一男子遍身生疮，似疥非疥，时或脓水淋漓，两腿为甚，肢体倦怠，作痒烦躁，年余不愈。薛作肾经虚火，用加减八味丸而痊。

一男子腿内作痛，用渗湿化痰药，痛连臀肉，面赤吐痰，脚跟发热。曰：乃肾虚阴火上炎，当滋化源。不信，服黄柏、知母之类而歿。

一男子腿患肿，色不变，痛不作，真气虚也。以补中益气加半夏、茯苓，为少用枳壳、木香饮之；以香附饼熨之。彼谓：气无补法，乃服流气饮，胃气愈虚。复求治，以六君加芎归数剂，饮食少进，再用补剂，用余而消。夫真气夺则虚，邪气胜则实，今真气既虚，邪气愈胜，苟不用补法，气何由而行乎？

《名医类案》

吕沧洲

一小儿十二岁，患内痛，腹胀脐凸而颇锐。医欲刺脐出脓，其母不许，请吕视之。见一僧拥炉炽炭，燃铜箸一枚烈火中，瞪目视翁曰：此儿病痈发小肠，苟舍刺脐，无他法。吕谕之曰：脐，神阙也，针刺所当禁。矧痈舍于内，惟当以汤丸攻之。苟如而言，必杀是子矣。僧怒，趋而出。吕投透脓一匕，明日脓自气合溃，继以十奇汤下万应膏丸而瘥。

《名医类案》

薛己

给事钱南郭，腹内患痈已成，而不见，欲用托里之药发之，彼用行气破血，以图内消。形体甚倦，饮食益少，患处顿陷，色黯坚硬，按之不痛，仍用大补之剂，色赤肿起，脓熟针之；再用托里，肿溃渐愈而消。

一男子腹内作痛，腹外微肿，或欲药汗之。薛曰：肉色如故，脉数无力，此元气虚损，毒不能外发。遂与参、芪、归、术之类，数剂渐发于外；又数剂脓成，而欲针之；彼惑于人言，用大黄、白芷、川山甲之类，引脓从便出，以致水泻不止，患处平陷，自汗盗汗，热渴不食。仍用前剂加半夏、陈皮、姜、桂四剂，形气渐复；又数剂，针去其脓；仍用补剂，幸幼未婚故得痊也。

鸿胪苏龙溪，小腹内肿胀作痛，大小便秘结作泻，欲饮冷，脉洪数而实。用黄连解毒散二剂，热痛顿止，二便调和，用活命饮而傅。

大司马李梧山，腹痛而热已成，用活命饮，一剂痛顿退。用托里消毒散，肿顿起，此脓将成。用托里散补其元气，自溃而愈。

锦衣掌堂刘廷器，仲夏，腹患痢，溃而脓水清稀，发热作渴，腹胀作呕，饮食不入。诸医以为热毒内攻，皆用芩、连、大黄之剂，病加剧。邀薛诊。投以参、芪、姜、附等药，一剂呕止食进而安；再用托里补剂而痊愈。

进士边云庄，腹痛恶寒，作湿痰食积治之益甚，脉浮数。薛曰：浮数之脉，更恶寒，疽疮之症也。彼不信，旬余，复请视之，左尺洪数，知内有脓矣。仍不信，至小腹肿胀，连及两臀，始悟。薛曰：脓溃臀矣，气血俱虚，何以收敛。服活命饮一钟，臀溃一孔，出脓斗许，气息奄奄，势诚可畏。用大补药一剂，神思方醒，每去后，粪从疮出，且出血甚多，痛不可忍，欲求死而不可得。时小腹间若觉有物上柱，即发痠牙关紧不省人事，发热，烦躁，脉洪大，举按皆实。省而诊之，脉仍洪大，按之如无（大则为虚，况出脓之后耶）。此气血虚极，以十全大补，内用参、芪至四斤，余加附子二枚而痊愈，又用大补汤五十余剂而痊愈。

《名医类案》

项彦章

一人病胸膈壅满，昏不知人。项以杏仁、薤苡之剂灌之，立苏。

继以升麻、黄芪、桔梗消其脓，服之逾月瘳。项所以知其病者，以阳明脉浮滑，阴脉不足也。浮为风，而滑为血聚，始由风伤肺，故结聚客于肺阴，脉之不足则地于宣逐也。诸气本乎肺，肺气治则出入易，苑陈除，故行其肺气而病自己（已见前痞满门）。

《名医类案》

石山

一妇，年近三十，形色瘦白，素时或咳嗽一二声，月水或前或后，夏月取凉遂咳甚，不能伏枕者月余，嗽痰中或带血或兼脓，嗽急则吐食。医用芩连二陈，不效；复用参、芪等补药，病重。汪视左脉浮滑，右脉稍弱而滑，幼伤手腕，不能伸，右脉似难凭矣。乃以左脉验之，恐妊兼肺病也。遂以清肺泻之剂进之，三服而能著枕，痰不吐，脓不咯，惟时或恶阻。汪曰：此妊之常病也。教用薏苡仁（薏苡胎前禁用，有肺病亦不禁，可见有病病受如此）、白术、茯苓、麦冬、黄芩、阿胶煎服，病减。月余复为诊，脉皆稍缓而浮，曰：热已减矣，但吐红太多，未免伤胃。教用四君子加陈皮、黄芩、枳壳煎服调理，妊至六月，食鸡病作，却鸡而愈。至九月病又复作，声哑，令服童便获安。汪曰：产后病除，乃是佳兆。病若复作，非吾所知。月足而产，脾胃病作，加泄，竟不救。

一儒者鼻塞流涕，咳吐脓血，胸膈作胀。先用消风散乱发灰，二服而鼻利；又用四君芎、归及桔梗汤而愈。后因赴选劳役，咳嗽吐脓，小便滴涩，面色黄白，此脾土不能生肺金，肺金不能生肾水。用补中益气、六味地黄而愈。

一儒者，素善饮，咳痰项强，皮肤不泽，此肺病也。盖肺系于项，故项不能转侧；（非风痰而项强能强，斯之肺病，见亦种）肺气虚弱，故皮肤不泽。先用桔梗汤，以治肺，后用八珍补肺汤以补脾土生肺金而痊。

一男子吐脓血，饮食少思胸腹胀，脾肺心脉皆洪数。（洪数脉不佳）此火不能生土，土不能生金。用桔梗汤为主，佐以补中益气而

愈。

一男子不时咳嗽，作渴自汗，发热便数。彼恃知医用清肺降火、理气渗利之剂，小便不通，面目赤色，唇裂（似火）痰壅，肺脾胃三脉浮大，按之而数。此足三阴亏损，不能相生，当滋化源，否则成痼。彼不信，仍用分利之利，后果患肺痈，始悟其言，用桔梗汤及滋化源而愈。

一男子面赤吐脓，发热作渴，烦躁引饮，脉洪数而无伦次。此肾火伤肝。先用加减八味丸加麦冬（妙法），大剂一钟，热渴顿止，久睡觉而神爽索食，再剂，诸症又减六七。仍用前药，更以人参五钱、麦冬二钱五分、五味二钱，水煎代茶，日饮一剂，月余而安。此症面赤者，当补脾肾；面白者，当补脾肺，故用此药。

《名医类案》

江应宿

贡士汪宾篁，患滞下赤白月余，逆予诊视，投药数剂而愈，六脉洪数不减，即告之曰：公年高，足三阴虚损，不能相生，当滋化源，否则恐生他病。与六味地黄丸加生脉散，因循半月，未及修制，遂觉右乳傍牵痛，面赤，吐痰腥臭，脉洪大浮数，按之无力。予曰：脉数不时见，此肺痈也。次日，吐脓血甚多，投以桔梗汤加羚羊角，未应；再与升麻汤（升麻汤：升麻、桔梗、苡仁、地榆、赤芍、生甘草、丹皮、黄芩）十余剂，更以前丸滋其化源而愈。

《名医类案》

薛立斋

一膏粱之从，寒热作渴，不时咳吐，口内血腥，又五日，吐脓血，皮毛错纵。用射干汤四剂，脓血已止，但气壅痰多，以甘桔汤二三剂而愈。

一男子用射干汤之类乍愈，但气喘体倦，发热作渴，小便频数。

用补中益气加山药、山茱萸、麦冬、五味。时仲夏，更以生脉散代茶饮而愈。

一老妇素味厚，吐脓已愈，但小便淋沥。用补中益气加麦冬、五味及加減八味丸而愈。膏粱之人，初起清胃散亦可用。

《名医类案》

江应宿

上舍汪中宇，患喉肿不进饮食，腹中不饥，但日饮清茶数盏，召予视之。诊得气口紧数，此胃痈也。脓已成，宜引下行（可法）。投以凉膈散，稍稍利一、二度，次早吐脓血，再服干汤一剂，即知饿索饮食，六剂全愈。

《名医类案》

丹溪

一女子腹痛，百方不治，脉滑数，时作热，腹微急。曰：痛病脉当沉细，今滑数，此肠痈也（妙、妙）。以云母膏一两（云母膏即阳起石），丸梧子大，以牛皮胶溶入酒中，并水下之，饒时服尽，下脓血一盆而愈。

一妇以毒药去胎后，脐右结块，块痛甚则寒热，块与脐高一寸（有形之块），痛不可按，脉洪数。谓曰：此瘀血流溢于脉外育膜之间，聚结为痛也。遂用补气血、行结滞、排脓之剂，三日决一锋针，脓血大出，内如粪状者臭甚，病妇恐。因谓气血生肌，则内外之窍自合，不旬日而愈。

羽林妇病，医者脉之，知其肠中有脓，为下之即愈。盖寸口脉滑而数，滑则为实，数则为热；滑则为荣，数则为卫（脉法佳）卫数下降，荣滑上升，荣卫相干，血为浊败，小腹痞坚，小便或涩，或时汗出，或复恶寒，脓已成。设脉迟紧，聚为瘀血，下之即愈。

《名医类案》

吕沧洲

郡守李母庞病小腹痛，众医皆以为癥聚，久药不效。吕诊循其少阴脉，如刀刃之切手，胞门扎而数，知其阴中痛，痛结小肠也。告之曰：太夫人病在幽隐，不敢以闻，幸出侍人语之。乃出老姬，吕曰：苦小肠痛，以故脐下如癥聚。今脓已成，痛迫于玉泉，当不得前后溲，溲则痛甚。姬拜曰：诚如公言。遂用国老（甘草）、将军（大黄）为向导，麒麟竭虎珀之类攻之，脓自小便溃，应手愈。

《名医类案》

虞恒德

一人得潮热，微以症状，小腹右边有一块大如鸡卵，作痛，右脚不能伸缩。一医作膀胱气治，十余日不验。虞诊其脉，左寸扎而带涩，右寸扎而洪实（积血未成脓，故寸扎，若脓已成，则洪数），两尺两关俱洪数。曰：此大小肠之间欲作痛耳。幸脓未成，犹可治。与五香连翘汤，加減与之，间以蜈蚣炙黄，酒调服之，三日愈。

儒医李生治一富家妇有疾，诊之，曰：肠胃间有所苦耶？妇曰：肠中痛不可忍，而大便从小便出。医皆谓古无比症，不可治。李曰：试为筹之。若服我之药，三日当瘳，下小丸子数十粒，煎黄芪汤下之，下脓血数升而愈。其家喜，问治法。李曰：始切脉时，觉扎脉见于肠部。《脉诀》云：寸扎积血在胸中，关内逢扎肠里痛。此病在内，所以致然。所服者，云母膏为丸耳。切脉至此，可以言医矣。

《王仲言余话》

薛己

一男子里急后重，下脓胀痛，用排脓散、蜡矾丸而愈。后因劳，寒热体倦，用补中益气而安。

一妇人小腹胀痛，小便如淋，此毒结于内。先以神效瓜蒌散，二

剂少愈，更以薏苡仁汤而安。

一妇人小腹胀痛而有块，脉芤而涩，此瘀血为患。以四物加元胡索、红花、桃仁、牛膝、木香，二剂血下而愈。

一妇人，小腹胀痛，大便秘涩，转侧有水声，脉洪数。以梅仁汤一剂，下瘀血，诸症悉退；再以薏苡汤，二剂而瘳。

一妇人腋成胀痛，小便不利，脉洪数，服太乙膏三钱，下腋甚多；胀痛顿止，以瓜蒌散、蜡矾丸及托里而安。

一妇人产后，恶露不尽，小腹作痛，服瓜子仁汤，下瘀血而瘳。凡瘀血停滞，宜急治之，缓则腐化为脓，最为难治。若流注关节，则为败症。

《名医类案》

江汝洁

一男子，病小肠痈初起，左小腹近胁下一块如掌大，甚疼。江以蜂蜜调大黄末，敷于痛处，再以生姜一大块，切片置于大黄之上，以火熨之（妙法可师），四五度，痛即止，逾半月而块自消。

一人胁破，肠出臭秽。急以香油抹肠送入，即不出。又以人参、枸札子煎汤淋之，皮自合，吃猪肾粥十日愈。

《名医类案》

江应宿

汪上舍之内，当脐结痛，发热恶寒，脉洪数，此肠痈也。投以仙方活命饮、五香翘汤、瓜蒌散，俱不应。过七日，小便间有脓血，乃制云母膏为丸，十数服而愈。可见药之对病，其验如此。

《名医类案》

薛己

赵州守，脓多作痛，五月余矣。晡热口干，盗汗，食少体倦，气短

脉浮数而无力。用补中益气加制甘草、五味、麦冬，三十余剂，食进势缓。又以六味丸料，五十余剂，脓溃疮敛；后因怒作痛少食，胁痛发热；仍用前汤而安，喜其稟实，慎疾而得愈。

《名医类案》

江应宿

族弟应楚，在燕京患悬痈，气短咳逆，而赤，口期期不能成语，素有痔漏，多服寒凉解毒，大伤中气，脉浮数而无力。用补中益气，一服而咳逆定，数剂而脓血溃，五十余剂而愈。

《名医类案》

薛立斋

一儒者，年二十，左患便痈。用托里药，溃而将愈。入房，发热作痛，右边亦作浓水清稀，虚症悉具，脉洪大，可畏。用十全大补加附子一钱，脉症顿退，继用大补汤，三十剂而敛。

一儒者肿痛便涩，用八正散清肝火导湿热二剂，而肿痛愈；再用小柴胡加芎、归、泽泻、山栀二剂以清肝火补脾血而小便利。

一男子肿痛不止，用活命饮一剂而痛止；再剂而肿消。

一男子痛甚发热，用前饮一剂止；再以神效瓜蒌散加山栀、柴胡，二剂而消。

一男子肿而不溃，用参、芪、归、术，以补托元气，用白芷、皂角刺、柴胡、甘草，以排脓清肝，数剂而溃，复以八珍加柴胡，补其气血而愈。

《名医类案》

江应宿

一男子患便毒，两胯骭间坟起焮赤，大如鹅卵。服败毒散及消毒利药，不应。过予求治，投以知母、贝母各五钱，僵蚕、穿山甲俱各

炒一钱，大黄三钱(炒方)作一服，利下，脓血从大便出，痛肿减半，再剂而已。后治人皆验。人黄以强弱加减。

《名医类案》

丹溪

一人肩井后肿痛，身热且嗽，其肿按之不坚，此乃酒痰流结也。遂用南星、半夏、瓜蒌、葛根、芩连、竹沥作煎饮之，烧葱根* / 肿上，另用白介子、白矾作小丸，用煎药吞二十丸，须臾痰随嗽出，半日约去三四碗而愈。

《名医类案》

薛己

一妇卧床十二年矣，遇回禄，益加忧郁，甲辰三月，右肩下发一块，焮肿如瓠中赤外白。用凉药一剂，不解，次用十宣散四剂，(十宣散方：人参、黄芪、当归、甘草、白芷、川芎、桔梗、厚朴、防风、桂)加痛略红。迎徐医视之，连投参、芪、丁、桂、防风、白芷之类，脓溃。徐云：无患矣。辞后，眩晕呕逆，恶寒战栗，顶陷脓清。其夫检《外科发挥》，至发背门云：若初起一头如黍，不肿不赤，烦躁便秘，四五日间，生头不计其数，疮口各含一粟，名曰莲蓬发云云。始骇为恶症，治法虽详，不谙于行，迎薛至，诊云：辛凉解散，气血两虚者忌之，连投参、芪、归、术、地黄、姜、附大剂，肿高脓稠，兼经乌金膏。数日果腐落筋如脂膜者数斤，仍用前剂，每服人参加至八钱，日进二服，逾二月平复。

《名医类案》

丹溪

一人性急味厚，尝服热燥之药，左胁一点痛，脉之轻弦，重芤，知其痛处有脓，作内疽治(明眼)。与四物汤加桔梗、香附、生姜，煎十余贴，痛微微肿如指大，令针之，少时屈身而脓出，与四物調理而

安。

《名医类案》

薛己

一儒者患流注，发热作渴，头痛自汗，脉洪数，按之无力，此气血虚也。用十全大补加麦冬、五味治之，益甚；仍用前药加附子一钱，四剂诸症悉退；却去附子，加肉桂二十剂，气血渐复；又因劳心，发热恶寒，饮食减少，此脾胃复伤，元气下陷，用补中益气加附子一钱，二剂热止食进，仍用大补元气而安。后因考试不利，怀抱不舒，更兼劳役，饮食日少，形气日衰，吐痰作渴，头痛恶寒，或热或止，仍用补中益气数剂，诸症渐愈，元气渐复，乃去附子，再加肉桂五分，百余剂而愈。

东侍御左胁下近腹肝胆经部分结一块，四寸许，漫肿不赤，按之即痛。薛曰：此当补脾胃。彼谓：肿疡宜表散。乃服流气饮，胃气顿虚，七恶并臻。薛乃用四君加芎、归、酒炒芍药、姜、桂，治之，胃气平而恶症退，乃去干姜加黄芪数剂，疮赤微痛。又三十余剂，脓成，针之。用补中益气、加减八味而愈。盖肝胆属木，因肾水虚弱，不能滋生，况肝胆之血原少。岂可复行消散？且肿疡内外皆壅，宜托里表散为主，盖先于补气而佐以行散，非专攻之谓也。

一男子元气素弱，臀肿硬，色不变，饮食少，将年余矣。此气虚而未能溃也，先用六君为主，加芎、归、芍药治之，元气渐复，饮食渐进，患处渐溃；更加黄芪、肉桂、并日用葱熨之法月余，脓熟针之；以十全大补汤，及附子饼灸之而愈。

一男子胁肿一块，日久不溃，按之微痛，脉微而涩，此形症俱虚，当补不当泻。乃以人参养荣汤，及艾炒热熨患处。脓成，以火针刺之，更用豆豉饼、十全大补汤，百剂而愈。

一妇人左臂患之，年许不溃，坚硬不痛，肉色不变，脉弱少食，月经过期，日晡益热，劳怒则痛。与参、芪、归、术、川芎、芍药、贝母、

远志、香附、桔梗、丹皮、甘草，百余剂而消。

一妇人因怒肋下肿痛，胸膈不利，脉沉滞。用方脉流气饮数剂，少愈；以小柴胡对二陈，加青皮、桔梗、贝母，数剂顿退；更以小柴胡汤对四物汤，二十余剂而瘥。

一妇人因内膈肩患肿，遍身痛，遂以黑丸子二服而痛止；以方脉流气饮，二剂而肿消；更以二陈对四物，加香附、枳壳、桔梗而全愈。

《名医类案》

汪石山

一司训，年近六十，长瘦色苍，赴福建考试回，病背腿痠肿，一肿愈，一肿作，小者如盏，大者如钟，继续不已，俗曰流注是也。医皆欲用十宣散、五香汤、托里散。汪诊之，脉皆濡弱。曰：此非前药所宜也。夫以血气既衰之年，冒暑远涉热瘴之地，劳伤形、热伤气矣。经云：邪之所凑，其气必虚。理宜滋补，使气运血行，肿不作矣。遂用大补汤减桂，倍加参、芪、归、术，佐以黄柏、黄芩、红花，服至二三十贴，视肿稍软者，且砭决去其脓，未成者果皆消释，仍服二三贴，以防后患。

《名医类案》

江应宿

刑部正郎昆石容公，肋下近腰软处患痠肿，外科用消毒药，既溃月余，疮口不敛，肌瘦神瘁。诊得六脉缓弱无力，乃用补中益气，人参加作三钱，黄芪五钱，时值七月，少加黄柏以救肾水，麦冬、五味以滋养化源（亦可法），食进而疮敛，三十余剂而瘥。

《名医类案》

汪石山

一人，肥短紫淡，年逾三十，因劳感湿，两腿膝间结核，痛甚。医用蒜片艾灸，又针大敦（肝穴），三阴交（脾穴），又以药水洗之，遂致阴囊肿胀如升，茎皮肿如水泡，复进人参败毒散，皆不中病。汪诊之，脉皆濡缓而弱，略驶（濡缓弱为阳为虚，驶为热，宜石山之变例治也若见孩儿大之脉，又当别论，不可执此一案为法也）。曰：此湿气乘虚而入，郁而为热成结核也。理宜补中行湿，可免后患。月余，左腿内腓阴经分，肿痛如碗，恶寒扫热，复用蒜灸。六日后，肿溃脓出，体倦头面大汗，手足麻木，疮下又肿如碗，寒热大作，始信。用人参三钱，黄芪三钱，白术钱半，归身尾、牛膝、茯苓各一钱，青皮、黄柏各七分，甘草节五分，煎服五六贴。右额羊矢穴分肿痛，长五寸许，亦作寒热。医谓补塞太过，欲改前方，彼不信，锐意服前药月余，肿皆脓溃，成痂而愈。惟左脚委中，筋急短缩，艰于行步，彼以为蹇，汪曰：脓血去多，筋失所养故也。药力足日，当不蹇矣。果验。后觉阴囊肿胀，他医加茴香、吴茱萸治疝等药，不效。汪适至彼，令守前方，减去治疝等药，加升麻一钱，服一二贴，囊即缩。彼愿详言之，汪曰：《经》云：营气不从逆于肉理乃生痈肿。又云：受如持虚。盖谓气馁行迟，血少留滞则阻逆肉理，乃作痈肿也。久则郁而为热，化肉腐筋而成脓矣。肿在厥阴，虽曰多血，亦难供给，日之毛耗，夜之所损，故邪乘虚，留结不散，如持虚器而受物也。身之气血，如风与水，风疾水急则颓波溃堤，莫之能御；风息水细则沙障石壅，多所阻碍矣。故今补其气血，使气壮而行健，血盛而流通。又何肿之不散，结之不行哉！彼曰理也。

《名医类案》

李东垣

通父家翟梗，于尻臀上足太阳经生痛，坚硬肿痛大作，左右尺

脉俱紧，按之无力。羌活、黄柏各二钱，防风、藁本、连翘各一钱，肉桂七分，甘草、苍术、陈皮各五分，当归一钱，黄芪一钱五分，酒二大盏，水一大盏，煎至一盏，去渣，热服空心。以夹被盖覆其痛，使药行罢去之，一服愈。

予族叔父平生多虑，质弱神劳，年近五十。忽右膊外侧臑上生结核，身微寒热，而易怒，食味颇厚。脉之俱弦大浮数，而重似涩。曰：此多虑而忧伤血，时在初秋，勿轻视之。宜急补以防变症。以人参一斤作膏，下以竹沥。病才吝费，招一外科，以十宣五香散间与服，旬日后一日大风拔木，病者发热，神思不佳。急召视之，核稍高大，似有脓于中，起一红线，延过肩后，斜走绕背脊过入右肋下，不痛，觉肩背重而急迫，食有呕意，脉同前，但弦多耳。作人参膏入芎术生姜汁饮之，用人参三斤。疮溃脓干，又与四物汤加参、术、陈皮、甘草、半夏、生姜，百余帖而安。此等若在春令，虽神仙不治也。幸而在秋金之令。不幸因时下暴风，激起木中相火而致此。自非参膏骤补，何由得免？

朱郎年四十余，恶寒发热，右腿内臑厥阴分生一肿毒。此是冷折，热在肺经血分。与此方，萎仁、黄药子、赤芍、归头、条芩各三钱，青皮、角刺、桂枝各二钱，甘草节一钱，分四帖煎取一盏，入忍冬藤汁二蛤壳，食前饮，以忍冬藤渣敷肿上。

吕孺人恶寒发热，腹上有小疽，此血少有热，与此方，白术、川芎各三钱，赤芍、连翘各二钱半，陈皮、防风、黄芩各二钱，木通钱半，甘草五分，分五帖煎服。

郑经历性嗜酒与煎煇，年五十余。忽春末夏初，患额上作痛涌出一角，长短大小如鸡距，稍坚，求治。曰：此非膏粱所致而何？宜断厚味，先解食毒，针灸以开泄壅滞，未易治也。此少阳经所过，气多血少者。郑以悻悻召他医，以大黄、朴硝、脑子等冷药罨之，一夕豁开，如酱蚶径三寸，一二日后，血自蚶中溅出高数尺而死。此冷药外逼，热郁不得发，宜其发之暴如此也。

陈自明《外科精要》云：神仙截法，治痈疽发背，一切恶疮，预服则毒气不入内。真麻油一斤，银石器内熬十数沸，候冷，用酒两碗，入油五盏，通口热服，一日用尽，缓则数日服之。吴安世云：吾家三世用之，无有不验。又闻猎者云：凡中药箭，急饮麻油，药毒即消。郑学谕德甫屡用之甚验。

《续名医类案》

薛立斋

一男子，患痈肿硬疼痛，发热烦躁饮冷，脉沉实，大便秘，乃邪在脏也。用内疏黄连汤疏通之，以绝其源。先投一剂，候行一次，势退一二，再进一剂，诸症悉退。乃用黄连消毒散。四剂而消。

一男子脓熟不溃，欲针之，补以托里。不信。乃服攻毒药，反致恶心少食。始悟而用针，更以六君子汤，加藿香、当归，四剂少可。再以加味十全大补汤，数剂而敛。凡疮脓熟，不行针刺，脓毒侵蚀，轻者难疗，重者不治。老弱之人或偏僻之处，及紧要之所，若一有脓，宜急针之，更以托里，庶几无变。

一男子患毒作痛，服寒凉药，痛虽止，而食愈少，疮亦不溃。以六君子汤而食进，再以托里药，溃之而愈。大抵疮疽之症，寒热虚实，皆能作痛。热毒之痛者，以寒凉之剂折之。寒邪之痛者，以温热之剂散之。因风而痛者，除其风。因湿而痛者，导其湿。燥而痛者，润之。塞而痛者，通之。虚而痛者，补之。实而痛者，泻之。脓郁而闭者，开之。恶肉侵蚀者，去之。阴阳不和者，调之。经络闭涩者，利之。慎勿概用寒凉之药。况血脉喜湿而恶寒，若冷气入里，血即凝滞，反为难瘥矣。

《续名医类案》

冯楚瞻

赵翁，年七十二，右颊肿硬，连及颐项耳后一片，坚实不热不

痛，已两月余。诸治不效，渐至口内出脓，牙噤不开，饮食少进，精神日衰，脉则洪大而空。知血气大亏，阴寒所聚，所谓石疽是也。不得阳和，何以外解。若内溃日久，穿喉破颊，不可疗矣。乃用猪脂捣烂，入肉桂细末，葱头、食盐杵匀，厚敷患处（数药可法）。以脂膏治血肉，同气相应也。葱能透窍，盐能软坚，桂能行血，油能浸润皮肤。内则空心生脉饮送八味丸，食远以参、芪、归、芍、苓、术、薄、桂、银花、角刺之类，使阳回则阴寒自解，血气冲和，自能逐毒。三五日后，冰硬者热软，漫肿者高耸，木者疼痛，紫者红活，饮食日进，血气渐长。毒既外出，久凝久瘀之血肉，消者消，脓者脓，不再旬而愈。

《续名医类案》

张景岳

一儒者，年近三旬，素病耳，发必溃脓，至是益甚。自耳根下连颈项，上连头角，耳前后莫不肿痛。或与散风降火。一月后稠脓鲜血，自耳迭出，每二三日必出盅许，而肿痛全不消，枕不可近。察其形色已大不足，而肿痛则若有余。脉之或急或缓弱。此非实热可知。遂先与六味汤二三剂，元气稍振，继与一阴煎，加牛蒡、茯苓、泽泻，倍加白蒺藜为君，服五十余剂，外用降痛散，昼夜敷治，两月而后愈。盖此症虽似溃瘍有余，而实以肝肾不足，上实下虚，一奇症也（何奇之有）。

张通府耳后发际，患肿一块无头，肉色不变，按之微痛，彼以为痰结。诊其脉软而时见数。经云：脉数不时见，则生疮也，非痰结。仲景云：微弱之脉，主血气俱虚，形精不足。又云：沉迟软弱，皆宜托里。遂以人参、白术、黄芪、当归、川芎、炙草以托里，少加金银花、白芷、桔梗以消毒。彼谓不然。内饮降火化痰，外贴凉药，觉寒彻脑，患处大热，头愈重，饮食愈少。复请治。以四君子汤，加藿香、炮干姜数剂，饮食渐进，脓成刺之。更以十全大补汤，去桂及炙草，贴以豆豉饼，又月余而愈。

胡生耳后寸余发一毒，名曰锐疽。掀痛寒热，烦躁喜冷，此胆经蕴热而然。先用神仙活命饮，一剂势减二三。时值仲冬，彼惑于药有用寒远寒之禁，故不再服。自用十宣散托里之药，势渐炽，耳内脓溃。复请治。视其喉肿闭，药不能下而歿。

一妇人年逾四十，近环跳穴生一毒，尺脉沉紧，腿不能伸。经曰：脾寒移于肝，痈肿筋挛。夫脾主肉，肝主筋，肉温则筋舒，肉冷则筋急。遂与乳香定痛丸，治之少愈，更以助胃壮气血药，二十余剂而消。

一妇人候伤次指，成脓不溃，掀痛至手，误敷凉药，以致通掀，微呕少食。彼以为毒气内攻。诊其脉沉细，此痛伤胃气而然也。遂刺之，服六君子汤加藿香、当归，食时。更服八珍汤加黄芪、白芷、桔梗，月余而愈。一后生亦患此，色黑不痛，其指已死。欲令斩去，速服补剂，恐黑上臂不治。彼不信，另服败毒药，手竟黑，遂不救。一男子亦伤拇指，色紫不痛，服托里药，及灸五十余壮，作痛溃脓而愈。吴举人幼女因冻伤两足，至春发溃，指俱坏。遂去之，服以大补药而愈。又蓝上舍女患嵌甲伤指，年余不愈，日出脓数滴。谓足大指，乃肝脾二经发源之所，宜灸患处使瘀血去，阳气至，疮口自合，否则不治。彼忽之，不早治，后亦劳症而歿。盖至阴之下，血气难到。若女人患此，又多因扎缚致血脉不通，或被风邪所袭，则无气血荣养，遂成死肉。惟当壮其脾胃，行其经络，生其血气则愈。其中成破伤风以致牙关紧急，口眼喎邪者，先以玉真散一二服，然后投以通经生血之剂。

于侍御髀腓患毒痛甚，服消毒药，其势未减。即以槐花酒，一服势随大退，再以托里消毒之药而愈。

立斋曰：余丙子年，忽恶心，大椎骨甚痒，须臾臂不能举，神思甚倦。此天疽危病也。急隔蒜灸之，痒愈甚，又明灸五十余壮，痒遂止，旬日而愈。《精要》云：灸法有回生之功，信矣。大凡艾灸，若未溃则拔引郁毒，已溃则接补阳气，祛散寒邪，疮口自合，其功甚大。

其法用大独蒜，切片如三钱厚，贴疽顶上，以艾炷安蒜片上灸之，每三壮一易蒜片。若灸时作痛，要灸至不痛，不痛要灸至痛方止。大概以百壮为度。脓溃则以神异膏贴之，不日而安。一能使疮不开大，二内肉不坏，三疮口易合，见效甚神。丹溪云：惟头为诸阳所聚，艾壮宜小而宜少。

王大广年逾六十，素厚味，颊腮患毒，未溃而肉先死，脉数无力。此胃经积毒所致。腮颊正属胃经，未溃肉死，则胃气虚极。老人岂宜患此，辞不治。果歿。《内经》云：膏粱之变，足生大疔。受如持虚。

黄履素曰：予座师茅五芝先生公子子京，偶于肾间患一毒，地非要害，直易视之。子京素知医，恐痛伤元气，辄服人参，其毒愈甚，发寒热。乃始延医，又遇粗工，溃后胸满，应服参芪，反不能多服，竟致不能收口而歿。盖痈疽初起，先宜泻毒，而后议补。若补之太早，遂有此祸可鉴也。

邱汝诚面生疽，即买药，铺肆所合神芎散丸予之曰：以此疗。其人怒不肯服，归而告人。人曰：未必非良法也。服之即瘥。盖其人嗜酒，此丸实去酒病云。

彭羨门少宰，传治肿毒初起方。取鸡子，用银簪插一孔，用明透雄黄三钱，研极细末入之，仍以簪搅极匀，封孔入饭内，蒸熟食之，日三枚，神效。

前宁都令李聘说：麦粉不拘多少，用陈醋熬膏，贴无名肿毒，神效（同上）。

《续名医类案》

薛立斋

二守施希录，患项毒，脓已成，因畏针，焮延至胸，色赤如霞，其脉滑数，饮食不进，月余不寐，肢体甚倦。此气血虚而不能溃也。乃针之脓出，即睡觉而思食，用托里药两月而愈。刘玺素虚患此不针，

溃透颌颊，气血愈虚，竟不救。

一妇人项患痛焮痛，发寒热。以荆防败毒散，二剂少愈。以小柴胡汤，加连翘、牛蒡、桔梗，四剂而消。

一男子项患毒，溃而作痛。以参、芪、地黄、芎、归补之而止，更以八珍汤，加黄芪、桔梗、三十余剂而愈。

《续名医类案》

马元仪

沈氏妇，颈项间患瘍痛甚，躁烦发热，昼夜不眠，多方不愈。诊之两脉浮大沉小。此阳明气血交亏之候也。阳明之气，一日一夜五十周于身，而血随之。气虚血涩，则病生焉。况所现皆血虚气衰之症，较之热毒有余者殊矣。用黄芪一两，当归五钱，人参三钱，炙草七分，红花五分，调补气血，四剂而安。

张子和在西华，寄食於夏官人宅。忽项上病一疮，状如白疮，疮肿根坚硬，以其微小不虑也。忽故人见邀，以羊羔酒饮鸡鱼醢蒜皆在焉，张以故旧不能辞，又忘禁忌。是夜疮大痛，不可忍，项肿及头，口开发狂言，目见鬼神。夏君甚惧，欲报其家。张笑曰：请无虑，来日当平。乃以酒调通经散六七钱，下舟车丸百余粒。次以热面羹投之，上涌下泄，一时齐作，各去半盏，明日日中疮肿已平，一二日脓出而愈。

《续名医类案》

朱丹溪

王姑丈七十余，患项疽，脉实而稍大。此因忧闷而生太阳经，治之归头二钱，黄柏一钱五分，黄芪、羌尖、地黄、酒芩、桔梗各一钱，酒连、连翘、防风、生甘草、人参、陈皮、防己、泽泻各五分，白水煎服。

《续名医类案》

柴屿青

夏同司镶黄旗觉罗玮玛德，患对口，人皆谓之落头疽，难治，柴以为无害。服药五十日而愈。后某公亦患前症，亦服药五十日而安。

姚应凤诊一人，项生疮，求治应凤。曰：是天蛇头疮，宿因也，三年头当自落而毙。竟如其言。

《续名医类案》

薛立斋

一男子，肩患毒瘰，饮冷烦躁，便秘脉数而实。以清凉饮二剂少愈，以金银花散四帖悉退。又以十宣散去桂，加天花粉、银花数帖，疮溃而痊。此脉与症皆有余也。

一妇人癸卯冬，失物发怒，缺盆内微肿。甲辰春，大如覆碗，左肩胛亦肿，肉色如故。或针出鲜血三碗许，腹痛如锥，泄泻不止，四肢逆冷，呕吐恶寒，或时发热，绝食已七日矣。其脉洪大，时或微细，此阳气脱陷也。用六君加炮姜二钱，附子三钱。早服至午不应，再剂加附子五钱。熟睡觉来，诸症顿退六七，少进稀粥。再四剂诸症悉退，饮食如故，缺盆始痛，针出清脓二碗许，诸症复至。此虚极也，以十全大补加姜、桂、附各一钱，三剂而安。后减姜、桂、附各五分，与归脾汤兼服，五十余剂而愈。

上舍陈履学之内，先从左肩下一点寒，三日后右肩下发一白疮，肿如瓠盅，红如酒盏。自用消解凉药，一剂不散，次投十宣散四剂，加痛略红，次连投参、芪、丁、桂、防、芷之剂。脓溃后，恶心呕吐，头晕不止，厥逆寒战，鼓牙虚汗，顶平脓清。此投解散凉剂之误，急洗去围药，投以参、芪、归、术、地黄、姜、附大剂，一服，原从左肩下旧寒一点先热起，又进一服，遍肿浮热，肿高脓稠，兼红乌金膏，数日出腐筋，如脂膜大小数片，日进前药二服，参芪投至八钱，逾两月始安。愈后时以劳厥，即投参、芪、归、术、姜、附，大剂乃苏。

一男子肩患毒焮痛，饮冷烦躁，便秘脉数而实。以清凉饮二剂少愈，以金银花散四剂悉退，又以十宣去桂，加天花粉、金银花，数剂疮头溃而痊。

一妇人肩下患毒，脉弦紧。以白芷升麻汤二剂，表症已退，更以托里药，溃之而愈。

一男子素弱，肩患肿，欲内消，服凉药反致作泻少食。以二神丸及香砂六君子汤，加肉豆蔻而泻止食进，又以托里药而肿亦消。

一男子肩下患疽已数日，漫肿微痛，头甚多，皆如粟许，色不变不起发。此气血虚也，诊其脉果然。先以仙方活命饮二剂，杀其大势，更以托里药而起发，疮头虽溃，但流血水，气血尚虚，不能为脓也。彼欲服太乙锭，子谓此药止能攻毒，不能托里，不信，仍服之，至四次，饮食不进，疮色黑陷，呃逆不绝，胃气虚极也，不治。强投温中健脾之剂，不应而死。

一男子肩患毒，肿硬作痛，恶症迭见。用白矾末三钱糊丸，以葱头七茎煎汤调下，肿痛悉去。再服，诸症亦退。更以仙方活命饮二剂，出水而消。此秘方名千金化毒汤。白矾末葱汤调服，因末难服，故易为丸。一方士治疮疽，不问肿溃，先用此药二三服，后用消毒药甚效。常治刍豢之人，用此即退，不和托里药亦愈。盖此热毒为患，血气不亏故也。若因金石毒药发疽者尤效。盖矾又能解金石之毒也。一方用矾末五钱，朱砂五分，热酒下亦效。此药托里固内，止泻解毒排脓，不动脏腑，不伤气血，有益无损，其药易得，其功甚大。偏僻之处，不可不知此方。或虫犬所伤，溶化热涂患处，更以热酒调未服，皆效。

福泉黄吏部肩患毒，发热恶寒，大渴烦躁，似有余之症，其脉虽大而无力，却属不足。用当归补血汤治之愈。

王乔年逾三十，肩患毒。以人参败毒散一剂，更以十宣散去参、桂，加银花、花粉，四剂而溃。因怒动肝火，风热上壅，头面赤肿焮痛饮冷，以荆防败毒散加芩、连、薄荷，二剂不应。急砭患处出黑血盞

许，仍以一剂，势退大半。再进人参败毒散，四剂而愈。夫病有表里上下之殊，治有缓急攻补之异，若不砭刺，毒气结于内里，药不能及，脓肿日甚，使投峻利之药，则上热未除，中寒已作，必伤命矣。

一上舍肩患疽，脉数。以槐花酒一服，势顿退。再与金银花、黄芩、甘草，十余服而平。槐花治湿热之功，最为神速，若虚寒之人，不可过剂。

《续名医类案》

王洪绪

姚氏女，年二十九，小产月余，左肩手搭处，先发一毒，周尺有五。半月背添一毒，上下长一尺三寸，上阔下尖，皆白陷。十日后始延治，势甚笃。连服阳和汤三剂，能起坐。五剂自能便溺。十二剂其续发者全消，先发之搭手亦消，剩疮顶如棋子大，不痛而溃，四日收功。后云背上如负一版，转舒不快，以小金丹十丸，每日二进全愈。

《续名医类案》

薛立斋

进士申天益，臂患痈，寒热头痛，形气虚弱。此手足阳明经风热邪之症。用桔梗升麻汤二剂，外邪顿散。用托里消毒散二剂，肿痛顿退。乃用补中益气汤调理，形气渐复而愈。

一妇人臂患肿，恶寒不作脓，以十宣散六剂而溃，以托里散数剂而瘳。

一妇人臂肿未成脓，饮食少思，过劳作痛发热，以补中益气汤二剂，痛少止，以补气血健脾胃药而消。

一妇人臂患毒肿，咽喉壅塞，四肢逆冷，发寒热，以五香连翘汤二剂顿愈。以疮科流气饮，四剂而消。

一男子臂患痈，脉弦紧有力，以白芷升麻汤，二剂顿退，又二剂

而消。

一男子臂患痈不作脓，灸以豆豉饼及饮托里药，三十余剂而溃，又月余而瘳。

一妇人患臂痈，疮口紫陷，脓清不敛。彼以为毒未尽，欲服攻毒之剂，谓疮疡之症，肿起坚硬，脓稠者，实也；肿下软慢，脓稀者，虚也。遂用附子饼灸之，及饮十全大补汤，百剂始愈。

西蜀彭黄门太安人，臂痛数年，服活络丹二丸而瘳（可入瘳）。

《续名医类案》

朱丹溪

从叔，平生多虑，质弱神劳，年近五十。忽左膊外侧臃上起一小红肿，大约如栗。曰：慎勿轻视，且先与人参大料作汤，二三斤为好。彼未之信，慢进小贴，数服未解而止。旬余值大风拔木，疮上起一道红线，绕至背胛，直抵右胛肋。曰：必大料人参，少加川芎、陈皮、白术等补剂与之。后与此方，两阅月而安。

东垣曰：尹老家素贫，己酉岁十月，初寒，形志皆苦，于手阳明大肠经分出痈，初有癰疽，其臂外皆肿痛，先肿在阳明，左右寸脉，皆短，中得之俱弦，按之洪缓有力。此痈得自八风之变。以脉断之，邪气在表，其症大小便如故，饮食如常，腹中和，口知味，知不在里也。不恶风寒，止热躁，脉不浮，知不在表也。表里既和，邪气止在经脉之中。《内经》曰：凝于经络为疮痈，其痈出身半已上，风从上受之。故知是八风之变为疮者也。宜治其寒邪，调其经脉中血气，使无凝而已。以白芷升麻汤疗之，一服而愈。炙甘草、升麻、桔梗、白芷、当归梢、生地黄、生黄芩、酒黄芩、连翘、黄芪、肉桂、红花，右咬咀，水酒各大盏半，同煎服愈。

《续名医类案》

薛立斋

一男子，胸患痛，肿高焮痛，脉浮而紧。以内托散煎服二剂，表症悉减，以托里消毒散四剂而消。

一男子素弱，胸患痛，饮食少而倦。以六君子汤加芎、归、黄芪，脓成针之，更以托里药而愈。

一男子胸患痛，焮痛烦燥，发热作渴，脉数而实。时季冬，谓此热毒内蓄也，须舍时从症。欲治以内疏黄连汤，彼以时当隆寒，乃杂用败毒药，愈炽。仍求治，投前汤二剂，后去二次，诸症悉退。以金银花散加连翘、山梔四剂，出水而消。大抵症有主末，治有权宜，治其主则末自退，用其权则不拘于时，泥于守常，必致病热危甚。况杂用攻剂，动损各经。故丹溪云：凡疮发于一经，只当求责本经，不可干扰余经。罗廉甫云：守常者，众人之见；知变者，智者之事。知常而不知变细事，因而取败者多矣。

一男子胸患毒，焮痛喜冷，脉洪数。以黄连解毒汤二剂顿退，更以金银花散六剂而消。

一少妇胸膈间溃一窍，脓血与口中所咳相应而出。以参、芪、当归加退热排脓等药而愈。（余按：此因肺痿所致。原注。）

张都宪夫人性刚多怒，胸前作痛，肉色不变，脉数恶寒。经云：洪数之脉应发热，而反恶寒，疮疽之谓也。今脉洪数，则脓已成，但体丰厚，故色不变，似乎无脓，以痛极始肯用针。人数寸，脓出数碗，遂以清肝消毒药治之而愈。设泥其色而不用针，无可救之理矣。

琇按：肝脉挟胃贯膈。又曰：是所生病者，为胸满。故胸之痛疽本由于肝也。

杨百户胸患毒，肿高焮赤，发热，脉热大，小便涩，饮食如常。齐氏曰：肿起色赤，寒热疼痛，皮肤壮热，头目昏重，气血之实也。又云大便硬，小便涩，饮食如故，肠满膨胀，胸膈痞闷，肢节疼痛，身热脉大，精神昏塞，脏腑之实也。遂以黄连内疏汤二剂，诸证渐退。更以

荆防败毒散加芩、连、山栀四剂，少愈。再以四物加芩、连、白芷、桔梗、甘草、银花数剂而消。

一男子胸肿一块，半载不消，令明灸百壮方溃。与大补药不效，复灸以附子饼而愈。

《续名医类案》

张路玉

谈仲安，体肥善饮，初夏患壮热呕逆，胸膈左畔隐痛，手不可拊，便溺滞数，舌上滑苔，食后痛呕稠痰，渐见血水，脉来涩涩不调。与凉膈散加石斛、连翘，下稠腻极多。先是医作肺病治，不效。张曰：肺病必咳嗽，吐腥秽痰。此但呕不嗽，洵为胃病无疑。下后四五日复呕如前，再以小剂调之，三下而势甫平。后以保元、苓、橘平调二日而痊。先时有李姓者患此，专以清热豁痰解毒为务。直至膈畔溃腐，脓水淋漓，缠绵匝月而毙。良因见机不早，悔无及矣。

琇按：是症最难别白，即《内经》所谓内有里大脓血之症也。吾乡一名医自患此，同道诊之，不知为痈也。杂进参、附、丁、桂之剂，久之吐出臭脓，乃省，已无及矣。

《续名医类案》

薛立斋

一妇人胁患痈，未成脓，恶寒脉紧。以十宣散加柴胡二剂，表症悉退，更以托里散数剂，脓清而愈。

一男子近胁患疽，肿而不溃，投大补之剂，溃而已愈。后患弱症而歿。

一上舍年愈四十，因怒胁内作痛不止。数日后外结一块三寸许，漫肿色不赤，按之微痛。此怒气伤肝，致血伤气郁为患。以小柴胡汤对四物，倍用芎、归、黄芪、贝母、肉桂治之。彼谓丹溪云：肿疡内外皆壅，宜托里表散为主。又云：凡疮未破，毒攻脏腑，一毫热药，

断不可用。况此症为气血凝滞，乃服流气饮，愈虚，始信而复求治。视之虚症，并臻诊之，胃气更虚，彼欲服薛前药，曰：急者先治。遂以四君子汤加酒芍、炮姜四剂，少得。更加当归又四剂，胃气渐醒。乃去姜又加黄芪、芎、归、肉桂数剂，疮色少赤，并微作痛。又二十余剂，脓成针之，却与十全大补汤，喜其谨疾，又两月余而瘳。夫气血凝滞，多因营卫之气弱，不能运散。岂可复用流气饮以益其虚？况各经气血多寡不同，心包络、膀胱、小肠、肝经多血少气；三焦、胆、肾、心、脾、肺少血多气。然前症正属胆经少血之脏，人年四十以上，阴血日衰；且肝症俱属不足，肿疡内外皆壅，宜托里表散为主，乃补气血药而加以行散之剂，非专攻之谓也。若肿焮痛甚，烦躁脉大，辛热之剂不但肿疡不可用，虽溃瘍亦不可用也。凡患者须分经络气血，地部远近，年岁老幼，禀气虚实及七情所感，时令所宜而治之。常见以流气十宣二药概治结肿之症，以致取败者多矣（此案与旧案东侍御一则正同，而引之发明最为紧要，而旧案节之，故重录于此）。

《续名医类案》

马元仪

沈氏妇左肋患肿疡，长五寸许，治已两月，发表托里，剂多功少。诊其两脉，弦数兼涩。肿处低陷作痛，寒热，经行不止，口燥难食。此症颇危，必得之劳郁且怒。邪热结聚厥阴之位，劳卫不行周身，火邪独彻上下，表敛俱所不宜。用生首乌一两，滋其内燥；柴胡一钱，疏其气郁；枳壳、桔梗各一钱，舒通肺气，以制肝木；杏仁、苏子各二钱，调气化痰，以清上焦；丹皮一钱，清其血；半夏曲一钱，和其中。两剂寒热减而经止，患处焮肿，溃出稠脓，饮食少进。疡医以溃后当行大补，投芪、术之属，复致疮口内陷，食少。曰：痈疽已溃当补，此其常耳，今两脉迟涩，迟则气阻，涩则血滞，郁而得补，其郁弥甚。始犹肝木自伤，既乃转戕脾胃。以（缺）不循常度，分肉不温，经隧不行，而欲疮之敛也，其可得乎？夫荣卫不通须以血药和之，当

归、桃仁、红花、延胡索是也；白术、枳壳一补一泻，所以推陈气而致新气；干姜暖胃而和血；楂肉消滞而和中。服二剂，复大溃出稠脓碗许，食进神旺而安。

《续名医类案》

张子和

襄陵马国卿，左乳二肋间期门穴中发疮，硬而不溃，痛不可忍。疡医皆曰乳痈，或曰红丝漏，或曰觑心疮。使服内托散百日，又服五香连翘汤数月，皆无验。张曰：此马刀也，足少阳胆经之病。出《灵枢十二经》以示之，其状如马刀，故曰马刀，坚而不溃。乃邀之于食肆中，使食水浸汤饼，稍觉缓。次日先以沧盐上涌，又以凉剂涤去热势。约十数行，肿已散矣。

朱葛黄家妾左胁病马刀，憎寒发痛已四、五日矣。张曰：此足少阳胆经病也。少血多气，坚而不溃，不可急攻，当以苦剂涌之。以五香连翘汤托之，既而痛止，然疮根未散。有一医者过见之曰：我有妙药可溃而为脓，不如此何时而愈？即经毒药，痛不可忍，外寒内呕血不止，大便黑色，饮食不下，号呼闷乱，几至于死。再求治，张曰：胁间皮薄肉浅，岂可轻用毒药？复令洗去，以凉剂下之，痛立止，肿亦消。

《续名医类案》

朱丹溪

李兄，年四十余而面稍白，神气劳甚，忽胁下生一痈肿如桃。一人教用补剂，众笑且排。于是流气饮十宣散杂面进之。旬余召视之，曰：非惟不与补药，抑且多得解利，血气俱惫，不可为矣！已而果然。

立斋曰：一男子因怒左胁肿一块，不作痛，脉涩而浮。此肝经邪火炽甚而真气不足为患，宜培养气血为主。乃用草药敷贴，遂致不救。

一男子因劳发热，胁下肿痛，脉虽大而按之无力。此气血虚，腠理不密，邪气袭于肉里而然也。河间云：若人饮食疏，精神衰，气血弱，肌肉消薄，荣卫之气短促而涩滞，故寒薄腠理而痈肿也。当补之以接虚怯之气。遂以补中益气汤加羌活四剂，少可，去羌活又十余剂而愈。又一男子年二十，遍身微痛，腰间作肿痛甚。以前药加茯苓、半夏并愈。

一朝士腹肋间病疽经岁。或以地骨皮煎汤淋洗，出血一二升。家人惧，欲止之，病者曰：疽似少快。更淋之，出五升许，血渐淡乃止。以细糠贴之，次日结痂愈（同上）。

《续名医类案》

薛立斋

一童子，腋下患痈久不敛。脓清脉大，倦怠懒食，少寐自汗口干。以内补黄芪汤及豆豉饼灸之，两月而愈。凡疮溃而清，或疮口不合，或聚肿不赤，肌肉寒冷，自汗色脱者，皆气血俱虚也，非补不可。

一男子腋下患毒，咳逆不食，肠鸣切痛，四肢厥冷，脉细。以托里温中汤二剂，顿愈。更以香砂六君子汤、二神丸，而饮食顿进，以十全大补汤二十余剂而敛。

里中有周七者，少年，曾患毒左肋下。得一异方，用糯米炊饭，乘热入盐块，夹葱管少许，捣极烂如膏，贴患处辄消。至中年腰间忽生一毒，热如火板，硬痛不可忍，伛偻局踖，自分必死。屡药不效，急思前方，如法贴之，未几大便，去粪如宿垢，甚多，硬者渐软，数日而起。

薛立斋《心法》云：河南张承祖年逾二十，腋下患毒十余日，肿硬不溃，脉弱时呕。谓肿硬不溃脉弱乃阳气虚，呕吐少食乃胃气弱，先以六君子汤加藿香、砂仁治之。彼谓肿疡时呕当作毒气攻心治之，溃瘍时呕当作阴虚补之。曰：此丹溪大概之言也，即诸痛痒疮皆

属心火之意。假如赤肿痛甚，烦躁脉实而呕为有余，法当下之；肿硬不痛不溃，脉弱而泄为不足，法当补之。亦有痛伤胃气或感寒邪秽气而作呕者，虽肿疡尤当助胃壮气。彼执不信，用攻伐之药，病愈甚。复请，诊其脉微细而发热，谓热而脉静、脱血脉实、汗后脉躁者皆难治，后果然。夫肿疡毒气内侵作呕，十有一、二；溃疡湿气内侵作呕，十有八、九，岂可混为一途？

朱文鼎母因忿郁，腋下结一核二十余年。因怒加肿痛，完谷不化，饮食少思。东垣云：泻利不止，饮食不入，此肠胃虚也。遂以六君子汤加砂仁、肉桂、干姜、肉豆蔻，泻虽止而脓清，疮口不合，气血俱虚也。以十全大补汤月余而愈。

一男子产逾五十，腋下患毒疮，口不合，右关脉数而渴。此胃火所致，用竹叶黄芪汤，遂止。再用补气药而愈。尝治午后发渴或发热用地骨皮散亦效。

《续名医类案》

薛立斋

一妇人，素血虚，发热咳嗽。服痰火之剂后吐脓血，面赤脉数，其热甚危。此脓成而气血虚也。用八珍汤补元气，桔梗汤治之而愈。

一妇人感冒风寒，或用发表之剂，反咳嗽喘急，饮食少思，胸膈不利，大便不通，右寸关浮数，欲用疏通之剂。薛曰：此因脾土亏损不能生肺金，若更利之，复耗津液，必患肺痈矣。不信，仍利之，虚症悉至。后果吐脓。乃朝用补中益气汤，夕用桔梗汤，各数剂，吐脓渐止。又朝仍用前汤，夕用十全大补汤，各五十剂。喜其善调理，获愈。

一妇人咳嗽妇痰，胸膈作痛，右寸关浮滑，项下牵强。此脾胃积热之痰，非肺患也。以二陈、山栀、白术、桔梗治之安。

一妇人素血虚内热，时咳。甲辰孟冬，两尺浮洪，以脾不健请治。曰：防患肺症。丙午孟春果咳嗽，左右寸脉洪数，肺痈也。脓已成，右寸脉仍洪数。乃心火克肺金，夏令可忧。用壮水健脾之剂，稍

愈。彼遽自忽，不事调摄，果殁于夏令。

喻嘉言治施眉苍，肺痿喘嗽，吐清痰，肢体软痿，不能举动，脉来虚数。以蛤蚧二十枚，酒浸，酥炙，人参、黑参各十两，蜜丸，时时噙化。不终剂而痊

《续名医类案》

孙文垣

初阳侄妇，先时咳嗽，诸治无功，嗽急则吐。用碧玉散二钱，白汤调下，立止。半年复咳嗽，胸背隐隐疼痛，常内热，吐出桃红脓甚多，且腥秽，右肋并乳胀痛。诊之，脉洪数，大便燥，肌瘦骨立。此肺痈症也。用贝母、茜根、白芍各一钱，知母、麦冬、山梔、紫菀各八分，桑皮、当归、丹皮、杏仁各七分，苡仁一钱五分，甘草、葶苈各五分，服之甚安，但稍停即发。或云：肺窍中痰积瘀血尚多，未能即去，宜缓图之，俟脓尽当愈。孙谓：丹溪虽有此言，亦不可执。设不以药消化之，必俟其自己。恐岁月深而有他变，且中年之人，何能当此？莫若清热润肺，消痰化瘀久服，或早愈也。或又谓：久嗽伤肺宜补。每补必增热、加痛、加咳，而脓转多。仍以依法治之，二年良愈。

《续名医类案》

张露玉

陆去非肺痿，声嘶吐痰，午后发热，自汗，左脉弦细，右脉虚濡。平昔劳心耽色所致。先与生脉散合保元汤，次与异功散加黄芪并姜、枣与都气丸，晨夕间进。调补半月，热除痰止，月余方得声清。

孙起伯肺胀，服耗气药过多，脉浮大而重按豁然，饮良不人，幸得溺清便坚（金土未意）。与局方七气丸，每剂用人参三钱，肉桂、半夏曲、炙甘草各一钱，生姜四片，四剂霍然。盖肺胀实症居多，此肺虚大，不当以寻常论也。

一尼肺胀，喘鸣肩息，服下气止嗽药不应。渐至胸腹胀满，脉得

气口弦细而涩。此必劳力气上，误饮冷水伤肺，肺气不能收饮所致也。遂与越脾汤减麻黄加细辛、葶苈，大泻肺气而安。

一酒客严冬醉卧，渴饮冷茶，肺胀喘咳，脉得气口沉紧搏指。与小青龙去白芍加葶苈、半夏一剂而痊。则知肺胀喘满，当以葶苈为向导也。非实症未可轻投。

《续名医类案》

喻嘉言

陆令仪母，平日持斋，肠胃素槁，天癸已绝，复淋漓不止。治之久痊。值秋月，燥金太过，湿虫不生，人多病咳，而血虚津槁之躯，受伤独猛，胸胁紧胀，上气喘卧，寐不宁，咳动则大痛，痰中带血而腥，食不易入，声不易出，寒热交作。申酉二时，燥金用事，诸苦倍增，脉时大时小，时牢伏，时弦紧，服清肺药进退。告以肺病将成，高年难任。以葶苈大枣泻肺汤先通肺气之壅，即觉气稍平，食少入，痰稍易出，身稍可侧，大有生机。乃曰：未也。因见来热太急，不得已取快一时，暂开者易至复闭，迨复闭则前法不可再用矣。今乘其暂开，多方以图，必在六十日后，交立冬节方是愈期。盖身中之燥与时令之燥胶结不解，必俟燥金退气，肺金乃宁。后六十日间，屡危屡安，大率皆用活法斡旋。缘肺病不可补，而脾虚又不能生肺，肺燥喜润，而脾滞又艰于运食。今日脾虚不思饮食，则于清肺中少加参、术以补脾。明日肺燥热盛咳嗽，则于清肺中少加阿胶以润燥。日复一日，扶至立冬之午刻，病者忽自云：内中光景大觉清爽，可得生矣。奇哉！天时之燥去而肺金之燥遂下传大肠，五、六不一大便，略一润肠，旋即解散，正以客邪易去耳。至小雪节康健，加餐倍于曩昔。盖胃中穴虚已久，势必复其容受之常，方为全愈也。

《续名医类案》

薛立斋

一男子神劳，冬月患咳嗽，服解散之剂，自以为便。曰：此因肺气虚弱。腠理不密而外邪所感也。当急补其母，是治本也。始服六君子汤，内去参、术，反加紫苏、枳壳之类，以致元气益虚，生肺病而殁。

一武职因饮食起居失宜，咳嗽吐痰，用化痰止嗽之药。时仲夏，左尺洪数而无力，胸满而赤，吐痰腥臭，自汗。曰：肾虚水泛为痰而反重亡津液，得非肺病乎？不信，仍服前药。翌日，吐脓，脉数，右寸为甚。用桔梗汤一剂，数脉与脓顿减；又二剂，将愈，佐以六味丸而痊。

一男子咳嗽喘急，发热烦躁，面赤咽痛，脉洪大。用黄连解毒汤二剂，少退；更以梔子汤四剂而安（此肺病将成未成之候）。

一男子患肺痿，咳嗽喘急，吐痰腥臭，胸满咽干，脉洪数。用人参平肺散六剂及饮童便，诸症悉退；更以紫菀茸汤而愈。童便虽云治虚火，常治疮疡焮肿疼痛，发热作渴及肺痿、肺病发热口渴者尤效。

一仆年愈三十，嗽久不愈（病久故可用湿），气壅不利，睡卧不宁，咯吐脓血，甚觉可畏，其主已弃之矣。与宁肺散，一服少愈；又服而止大半；乃以宁肺散汤数剂而痊。所谓有是病必用是药。若疑前散性湿而不用，何以得愈。

上舍毛体仁素阴虚，春初咳嗽，胸中隐痛，肾脉洪数，肺脉洪数而时不见。曰：内当结痈。先用六味地黄丸料一剂服之。翌日来，谓曰：昨得良剂，嗽愈六七，务求一方到监调理。曰：阴虚火炎，患痈之症，第因元气虚弱，未能发出。因其易忽，薛不能治。乃别用降火化痰等剂，愈甚。月余复请，诊之，脉洪滑而数。曰：脓已成矣，当请常治之者同议，针之且免内溃之患。仍不决。又月余，请视，他医已先开，疮孔偏上，兜脓不出，仍内溃，脉愈洪大。曰：脉洪滑而数，其

舌青黯，内脏已坏，无能为力矣。后果然。

一男子咳嗽，两胁胀满，咽干口燥，咳唾腥臭。以桔梗汤四剂而腫脓，以排脓散数服而止。乃以补阴排脓之剂而瘳。

一男子咳而脓不止，脉不退，诸药不应，甚危。用柘黄丸，一服少愈，再服顿退，数服而痊。柘黄一两为末，百齿霜（即梳垢）二钱，用糊为丸，如梧子大，每服三、五丸，米饮下。柘黄乃柘树所生者，其色黄，状似灵芝，江南最多，北方鲜有。

一妇人吐脓，五心烦热，口渴胸闷。以四顺散三剂，少止；以排脓散数服而安。排脓散：黄芪、白芷、五味、人参。四顺散：贝母、紫菀、桔梗各一钱半；甘草七分；作一剂，水煎，食远服。

一男子因劳咳嗽不止，项强而痛，脉微紧而数。此肺病也。尚未成脓。欲用托里益气药，彼不信，仍服发散药，致血气愈虚。吐脓不止，竟不救。经云：肺内主气，外司皮毛。若肺气虚则腠理不密，皮毛不泽，肺受伤则皮毛错纵。故患痼痿肠痈者，必致皮毛如此，以其气不能荣养而然也。亦有服表药，见邪不解，仍又发表。殊不知邪不解者，非邪不能解，多因腠理不密而邪复入也。专用发表则腠理愈虚。邪愈易入，反为散症矣。宜诊其脉，邪在表者，止当和解而实腠理；乘虚复入者亦当和解兼实腠理，故用托里益气之药。若小便赤色，为肺热所传，短少为肺气虚。盖肺为母，肾为子，母虚不能生子，故也。亦有小便频者，亦为肺虚不能约制耳。

一男子面白神劳，咳而胸臆隐痛，其脉滑数。以为肺病，欲用桔梗汤，不信，服败毒药，至咳嗽愈甚，吐痰腥臭，始悟。乃服前汤四剂，咳嗽少定；又以四顺散四剂而脉静；更以托里药数剂而愈。大抵劳伤血气则腠理不密，风邪乘肺，风热相搏，蕴结不散，必致喘咳。若误汗、下过度，则津液重亡，遂成斯症。若寸脉数而虚者，为肺痿；数而实者为肺疽；脉微紧而数者，未有脓也；紧甚而数者，已有脓也。唾脓自止，脉短而而白者，易治；脓不止，脉洪大而面赤色者，不治。使其治早可救，脓成则无及矣。《金匱方论》：热在上焦者，因咳

为肺痿。得之或从汗出，或从呕吐，或从消渴、小便利数，或从便难。又：被下药快利，重亡津液，故寸口脉数，其人燥咳，胸中隐隐时痛，脉反滑数，此为肺痈，咳吐脓血，脉数虚者为肺痿，数实者为肺痈。

一童子气禀不足，患肺痈，吐脓腥臭，皮毛枯槁，脉浮，按之涩，更无力。用钟乳粉汤治之。

一男子患之，形症皆同，唯咽喉或作痒，痰多胁痛，难子睡卧，用紫菀茸汤治之而病愈。

一弱人咳嗽，日晡发热，夜间盗汗，脉浮数而紧。用人参五味子汤数剂，顿退；以紫菀茸汤月余而痊。

一男子患肺痿，咳嗽喘急，吐痰腥臭，胸满咽干，脉洪数。用人参平肺散六剂及饮童便，诸症悉退；更以紫菀茸汤而愈。童便虽云专治虚火，常治疮疡，肿焮疼痛，发热作渴及肺痿、肺痈发热口渴者尤效。

一妇人患肺痿咳嗽，吐痰腥臭，日晡发热，脉数无力。用地骨皮散治之，热止；更用人参养肺汤，月余而安。

一男子前病肺痈，后又患咳嗽，头眩吐沫，饮食少思，小便频数，服解散化痰药不应。诊之脾肺二脉虚甚。谓：眩晕唾涎属脾气不能上升，小便无度乃肺气不得下降，尚未成痈耳。投以加味理中汤四剂，诸症已退大半，更用钟乳粉汤而安。河间曰：金匱云肺痿属热。如咳又肺痿，声哑声嘶咯血，此属阴虚热甚然也。《本草论》治肺痿吐涎沫而不咳者，其人不渴，必遗尿，小便数，以上虚不能制下故也。此为肺中冷，必眩，多涎唾。用炙草、干姜，此属寒也。脉痿，涎唾多，心中温温液液者，用炙甘草汤，此补虚劳也。亦与补阴虚火热不同，是皆宜分治。故肺痿又有寒热之异也。

《续名医类案》

赵以德

一妇人，年二十余，患肺痈，胸膺间患一窍，口中所咳脓血与窍

相应而出，以人参、黄芪、当归补气血剂加退热排脓等药服之，不一月而安。

治肺癰目击神效，其法用百年芥菜卤久窖地中者，数匙，立起。此卤嘉兴府城中大家多藏之。

广笔记：鱼腥草不住口食之，治肺癰吐脓血，神方也。正名截草，兼治鱼口。

《续名医类案》

薛立斋

陆司厅子仁，春间咳嗽，唾痰腥秽，胸满气促，皮肤项强，脉数。此肺疽也。盖肺系在项，肺伤则系伤，故牵引不能转侧。肺者，气之本，其华在毛，其充在皮，肺伤不能摄气，故肋胀气促而皮肤纵。东垣云：肺疮之脉微紧而数者，未有脓也；紧甚而数者，已有脓也。其脉来紧数则脓已成，遂以人参、黄芪、当归、川芎、白芷、贝母、知母、麦冬、萎仁、桔梗、防风、甘草兼有蜡矾丸及太乙膏治之，脓尽脉涩而愈。至冬脉复数。经云：饮食劳倦则伤脾。脾伤不能生肺金；形寒饮冷则伤肺，肺伤不能生肾水；肾水不足则心火炽盛，故脉来洪数。经云：冬见心脉而不治。果殁于火旺之月（凡肺疽愈而复作，多不治。余常治三人：一间三年，两间一年，皆复作而殁）。

周国用年愈三十，患咳嗽项强气促，右寸脉数。此肺疽也。东垣云：风生于胃，呼气不入；热攻子荣，吸气不出。风伤皮毛，热伤血脉，风热相搏，血气积留于肺，变成疮疽。诊其寸脉数而虚者，脉痿也；数而实者，肺疽也。今诊脉滑，此疽脓已成。以排脓托里之药及蜡矾丸治之，脉渐涩而愈。锦衣李大器亦患此，吐脓，而赤，脉大。谓：肺病脉宜涩，面宜白。今脉大而赤，火克金也，不可治。果殁。

一男子年愈四十，喘咳肋痛，胸满气促，右寸脉大。此风热蕴于肺也。尚未成疮，属有余之症。意欲以泻白散治之。彼谓肺气素怯，不然之。乃服补药，喘咳愈甚。两月复请视之，汗出如油，喘而不休。

此肺气已绝，安用治？后果歿。夫肺气充实，邪何从袭？邪气既入，则宜去之，故用泻白散，所以泻肺中之邪气也。邪气既去，则真气自实矣。

《续名医类案》

姚应凤

某叟患胀满。诸医多云：膈症。应凤曰：此肺病耳。令病者闭目，取一大盂水向病者顶上倾之，病者陡大惊，亟举刀直刺心坎，泻脓血数碗而愈。人问之，应凤曰：心尖下垂，水泼而惊，惊则心系提，吾刀可入也。

沈夫人患嗽血，昼夜不休。应凤曰：肺虚痿不虑溃，至第二叶尚可生也。先投洗肺汤，已令食猪肺数十斤，遂愈。

《续名医类案》

薛立斋

上舍周一元，腹患痛三月不愈。脓水清稀，朝寒暮热，服四物、知柏之类，食少作泻，痰涎上涌；服二陈、枳实之类，痰涎愈甚，胸膈痞闷。问故，曰：朝寒暮热，血气虚也；食少作泻脾肾虚也；悉因真气虚而邪气实也。当先壮其胃气，使诸脏有所禀而邪自退矣。遂用六君加黄芪、当归数剂，诸症渐退；又用十全大补汤，肌肉渐敛；更用补中益气汤调理而痊。

从侄孙年十四而毕姻。乙巳春年二十四，腹中作痛，用大黄等药二剂，下血甚多，胸腹胀满，痰喘发热。又服破气降火药一剂，汗出如水，手足如冰。薛归诊之，右关洪数，左关尤甚。乃腹痛也。虽能收敛，至夏必变而成瘵症。用参、芪各一两，归、术各五钱，陈皮、茯苓各三钱，炙草、炮姜各一钱，二剂，诸症稍退，腹始微赤，按之觉痛。又二剂，作痛。又二剂，肿痛，脉滑数，针出脓瘀。更用大补汤，精神饮食如故。因遗精，患处色黯，用前药加五味、山萸、山药、骨

脂、吴茱萸等剂，疮口渐敛，瘰症悉具。其脉非洪大而数即微细如无。惟专服独参汤、人乳汁少复，良久仍脱。曰：当备后事，以俟火旺。乃禱鬼神，巫者历言往事如见，更示以方药，皆峻利之剂，且言保其必生。敬信服之，后果歿。经曰：拘于鬼神者不可与言至德。而况又轻信方药于邪妄之人耶！书此以警后患。

一男子腹患痢，肿硬不溃，乃阳气虚弱，呕吐少食，乃胃气虚寒。法当温补脾胃；假如肿赤痛甚，烦躁脉实而呕，为有余，当下之；肿硬不溃，脉弱而呕，为不足，当补之；若痛伤胃气或感寒邪移气而呕者，虽肿疡犹当助胃壮气。不信，仍服攻伐药，而呕愈甚。复请治，脉微弱而发热。曰：热而脉反静，脱血脉反实，汗后脉反躁者，皆为逆也。辞不治，果歿。

秋官钱可容腹患痢，焮肿作痛，烦渴饮冷，大便不通，脉沉数实。此热毒蕴于内。用清热消毒散加大黄二钱，一剂诸症悉退，但形气顿虚。用托里消毒去银花、白芷，倍加参、芪、归、术而安。

毛砺安侧室肚患痢月余矣。色黯不肿，内痛作呕，饮食不人，四肢逆冷，其脉或脱绝或浮大，杂用定痛败毒之药。曰：此气血俱虚而作痛，内决无脓，不治之症也。强用大温补之药二剂，痛止，色赤。饮食少进。谓：但可延日而已。人皆以为有脓，复强针之。又用大补之剂，始生清脓少许。众仍以为毒结于内，用攻脓保其必生，殊不知乃速其死耳。惜哉！

一男子腹患痢，肿硬木闷，烦热便秘，脉数而实。以黄连内疏汤一剂，少愈；以黄连解毒汤二剂，顿退；以金银花散四剂，疮头出水而消。

一男年逾三十，腹患痢肿，脉数喜冷。齐氏云：疮疡肿起坚硬，疮疽之实也。河间云：肿硬木闷，脉数喜冷，邪气在内也。遂用清凉饮倍用大黄三剂，稍缓；次以四物汤加芩、连、山栀、木通四剂而遂溃。更以十宣散去参、芪、肉桂，加金银花、天花粉，渐愈。彼欲速效。自服温补药，遂致肝腹俱肿，小便不利。仍以清凉饮治之，脓溃数

碗；再以托里药治之，愈。东垣云：疮疽之发，其受有内外之别，治之有寒温之异。受之外者，法当托里，以温剂。反用寒药，则是皮毛始受之邪引入骨髓。受之内者，法当疏利，以寒剂。反用温补托里则是骨髓之病上彻皮毛，表里通溃，共为一疮，助邪为毒，苦楚百倍。轻则几殆，重则死矣。

一男子素好酒色，小腹患毒，脉弱微痛，欲求内消。谓：当助胃壮气，兼行经活血药佐之可消，不宜用败毒等药。彼欲速效，自用之，病热果盛，疮亦不溃，饮食少思。迨两月余，复请治。诊其脉愈弱，盗汗不止，聚肿不溃，肌寒肉冷，自汗色脱。此气血俱虚也，故不能发肿成脓。以十全大补汤三十余剂，遂成脓，刺之反加烦躁，此亡阳也。以圣愈汤二剂，仍以前药百贴而愈。

刘贵患腹痛，掀痛烦躁作呕，脉实。河间云：疮疡者火之属，须分内外，以治其本。若脉沉实者，先当疏其内，以绝其源。又云：呕啰以烦，脉沉而实，肿硬木闷或皮肉不变，邪气在内，宜用内疏黄连汤治之。然作呕脉实，毒在内也。遂以前汤，通利二、三行，诸症悉去。更以连翘消毒散而愈。

一人患腹痛，脓熟开迟，脉微细，脓出后疮口微脓，如蟹吐沫。此内溃透膜也。凡疮疡透膜，十无一一生。虽以大补药治之，亦不能救。此可为待脓自出之戒也。

黄师文云：男子服建中汤，妇人服四物汤，往往十七、八得，但时为之损益耳。有男病小腹一大痛，其诸弟侮之曰：今日用建中汤否？师文云：服建中汤。俄而痢溃。盖小腹痛本虚，其热毒乘虚而入，建中汤既补虚而黄芪且溃脓也。

《续名医类案》

薛立斋

一弱人臀痈，脓成不溃。以十全大补汤数剂始托起。乃针之，又二十余剂而愈。此症弱人宜补气血为安。

一人臀痈焮肿痛甚。此邪毒壅滞。用活命饮、隔蒜灸而消。后因饮食劳倦，肿痛复作，寒热头痛。此元气虚而未能复。与补中益气汤，频用葱熨法，两月而愈。

一男子臀肿一块，微痛，脉弦紧。以疮科流气饮四剂而消。

昆庠吴转之父患此，内溃肿胀，发热口干，饮食少思。此脾虚弱也。先用六君子加芎、归、芪数剂而溃；又用十全大补汤倍加参、芪；五十余剂而愈。

一男子硬痛发热。此膀胱气虚而湿热壅滞。用内托羌活汤，二剂热痛悉退；后用托里消毒散而溃；又用托里散四十余剂而敛。

一男子臀痈，肿硬作痛，尺脉浮紧，按之无力。以内托羌活汤一剂，痛止；以金银花散四剂，脓溃而愈。

一男子臀痈肿硬痛甚。隔蒜灸之，更服仙方活命饮二剂，痛止肿消；以托里消毒散加黄柏、苍术、羌活，疮头溃而愈。

一男子臀痈作脓而痛。以仙方活命饮，二剂痛止；更以托里消毒散，脓溃而瘥。

一男子臀痈不作脓，饮食少思。用六君子汤加芎、归、黄芪，饮食渐进；更以托里消毒散，脓溃而愈。

一男子溃而脓清不敛。以豆豉饼灸之，更饮十全大补汤两月余而痊。凡疮不作脓，或不溃，或溃而不敛，皆气血之虚也。若脓清稀，尤其虚甚也。

一男臀痈，脓水不止，肌肉渐瘦，饮食少思，胃脉见弦。以六君子汤加藿香、当归数剂，饮食渐进；以十全大补汤及豆豉饼灸之，两月余而敛。

一弱人臀漫肿，色不变，脉滑数而无力。此臀痈也。脓将成，尚在内，欲治以托里药，待发出而用针。彼欲内消，服攻伐药，愈虚。复求治，仍投前药，托出，针之，以大补药而愈。凡疮毒气已结不起者，但可补其血气，使脓速成而针去，不可论内消之法。脓成又当辨其生熟浅深而针之。若大按之乃痛者，脓深也；小按之便痛者，脓浅

也。按之不甚痛者，未成脓也；按之即复起者，有脓也；按之不复起者，无脓也。若肿高而软者，发于血脉；肿下而坚者，发于筋骨；色不相变者，发于骨髓也。此条旧案已收，因无后段发明，故录之。

一男臀痈腐溃，肌肉不生，用药敷之四沿，反硬。诊之，脉涩而弱。此气血不能营于患处，故敷凉药反硬。乃气血受寒凝结，而非毒也。用大补药愈矣。

一人患臀痈用五爪龙连枝捣汁，酒漉服，日进四五次，脓从大便出。未成脓者内消，如有头，以查敷上，立散。治鱼口极效。

曹水部文兆年逾四十，臃肿患毒已半月，余头甚多，状如粟许，内痛如赖，饮食不思，怯甚，脉歇至。此元气虚，疽畜于内也。非灸不可。遂灸二十余壮，以六君子汤加藿香、当归数剂，疮势渐起，内痛顿去，胃脉渐至。但疮色尚紫，瘀肉不溃。此阳气尚虚也。燃桑柴灸之，以补接阳气，解散其毒。仍以煎药加参、芪、归、桂，色赤脓稠，瘀肉渐腐，取去，两月余而愈。夫邪气沉伏，真气怯弱，不能起发，须灸灸而兼大补。投以常药，待其自溃，鲜有不误者。

沈侍御患臀肿痛，小便不利，彼谓关格症。以艾蒸脐，大便赤，不利。以降火分利之药治之，不应。诊其脉数脓成，此痈患也。遂针之，出脓数碗许，大便即利。五日阴囊肿胀，小便不行。仍针之，尿管大泄，气息奄奄，细汗不止，溃处愈张。复用大剂参、芪、归、术之药，犹缓；俾服独参汤至二斤，气稍复。又服独参膏至兼以托里药，两月余而平。大抵疮疡脓血之泄，先补气血为主，虽有他病，当从未治。

滕千兵年逾五十臀患痈，脓熟不开，攻通大肛，脓从大便而出。辞不能治，果毙。丹溪云：臀居小腹之后，阴中之阴也。道远位僻，血亦罕周，中年后尤虚患此。况脓成不刺，欲不亡，得乎？

《续名医类案》

薛立斋

一弱人，谷道前结核如大豆许，劳则肿痛。先以十全大补汤去桂枝、车前、麦冬、酒炒黄柏、知母，少愈；更服制甘草，渐愈。（即国老膏）仍以四物、车前之类而消。

一男子患此，痃肿发热。以龙胆泻肝汤二剂及制甘草四剂而溃，再用滋阴之剂而愈。若脓未成，以葱炒熟敷上，冷则易之。隔蒜灸之亦可。数日不消或不溃，或溃而不敛，以十全大补汤加柴胡稍为主，间服制甘草，并效。若不保守，必成漏矣。

一男子患悬痃，服坎离丸及四物、知柏之类不应。脉浮洪，按之微细。以为足三阴之虚，用托里散及补阴八珍汤，愈。又用六味丸、补中益气汤，调补化源，半年而痊。大凡疮疡等症。若肾经火气亢盛，致阴水不能生化而患阴虚发热者，宜用坎离丸，取其苦寒能化水中之火，令火气衰而水自生。若阳气衰弱，致阴水不能生化而患阴虚发热者，宜用六味丸，取其酸温能生火中之水，使阳气旺而阴自生。况生此症，属肾经精气亏损者十有八、九，属肾经阳气亢盛者十无一、二，然江南之人患此者，多属脾经阴血亏损，元气下陷。须用补中益气汤升补阳气，使阳生而阴长。若嗜欲过多，亏损真阴者，宜用六味丸补肾经元气，以生精血，仍用补中益气汤以培脾、肺之生气而滋肾水。经云：阴虚者，脾虚也。但多认为肾经火症用黄柏、知母之类，复伤脾、肺，绝其化源，反致不起。惜哉！

通府张敬之患悬痃久不愈。日晡热甚，作烦渴而喘。或用四物汤、知柏之类，病益其，肢体倦，少食，大便不实，小便频数。问何故？曰此肺虚之症，前药复伤而然。遂用补中益气加茯苓、半夏数剂，饮食渐进，症渐减。更加麦冬、五味，调理乃痊。经曰：脾属太阴，为阴土，而主生血。故东垣云：脾虚元气下陷，发热烦渴，肢体倦怠等症，用补中益气汤，以升补气而生阴血。若误认为肾虚火盛，而用四物、知柏之类，反伤脾胃生气，是虚其虚矣。况知柏乃泻阳损阴之剂，若

非膀胱阳火盛而不能生阴水，以致发热者，不可用也。

《续名医类案》

魏玉横

江云溪兄，初春患痔，即令服一炷汤加减。不信，致卧月余，后遂成管。冬月复患悬痈，初时如大豆，半月来大如鸡卵，按之甚痛，行动有妨。幸未服药，脉之惟左关尺略大而数。此脓尚未成也。仍与一炷汤加减：大生地、麦冬、北沙参、甘杞子、生米仁、薏仁、丹皮、蒂丁等，令服八剂。二剂知，四剂消其半，八剂完而全愈。

《续名医类案》

薛立斋

尚宝鲍希传，足发热，服四物、知母、黄柏之类。年余患悬痈唾痰，作渴饮汤，其热至膝。更加芩、连、二陈，热痰益甚。问故？曰：此足三阴亏损，水泛为痰，寒凉之剂伤胃而甚耳。遂先用补中益气，夕用六味丸，间佐以当归补血汤，半载乃愈。

上舍刘克新，溃后作痛，发热口干，小便赤色。自用清热清毒之药不应。左尺洪数。此阳气盛而阴气虚也。先用四物汤加知母等诸剂，泻其阳气，使阴自生，数剂诸症渐愈。后用益气汤、地黄丸，补脾肺，滋肾水而愈。

一儒者小便赤涩，劳则足软，肿痛发热，口干舌燥，食少体倦，日晒益盛。此气血虚而未能溃也。遂用八珍加麦冬、山药、倍用制甘草，数剂诸症悉退。但患处肿痛，此脓内凝也。又五剂，脓自涌出；又五十余剂而疮口将完。又因劳役，且停药，寒热作渴，脓多肿痛。用补中益气汤加炒梔，二剂少愈；又以八珍汤加麦冬、五味，百余剂肿痛悉去。喜其慎起居，节饮食，常服补中剂而安。但劳则脓出一二滴。后感于他言，内用降火，外用追蚀，必其收敛。致患处大溃，几至不起，仍补而愈。

一男子肿痛，小便赤涩。以加减龙胆泻肝汤加制甘草，二剂少愈；以参、芪、归、术、知、柏、制甘草，四剂而溃；更以四物汤加知、柏、参、芪、制甘而愈。

一男子脓清不敛，内有一核。以十全大补汤加青皮、柴胡、制甘草，更以豆豉饼灸之，核消而敛。

一男子久而不敛，脉大而无。以十全大补汤加五味、麦冬，灸以豆豉饼，月余而愈。

一老人年余不敛。诊其脉尚有湿热，以龙胆泻肝汤，二剂湿退。乃以托里药及豆豉饼灸之而愈。

一男子肿痛发热。以小柴胡汤加黄连、青皮，四剂少愈；更以加减龙胆泻肝汤而消。

一男子脓不溃，胀痛，小便不利。急针之，尿脓皆利。更以小柴胡汤加黄柏、白芷、金银花，四剂痛止；以托里消毒四剂而愈。常见患者多不肯用针，待其自破。殊不知紧要之地若一有脓，宜灸针之，使毒外发，不致内溃。故前人云：凡疮若针烙，毒结无从而解，脓瘀无从而泄。又云：宜开户以逐之。今之患者反谓地部紧要，而不用针，何其悖哉！

一男子脓熟不溃，脉数无力。此气血俱虚也。欲治以滋阴益血之剂，更针之使脓外泄。彼不从，仍用降火败毒药。致元气愈虚，疮势愈甚。后溃不敛，竟至不救。夫悬痈之症，原系肝肾二经阴虚，虽一于补，尤多不治，况脓成而又克伐，不死何俟？常治初起肿痛或小便赤涩，先以制甘草一、二剂及隔蒜灸，更饮龙胆泻肝汤。若发热肿痛者，以小柴胡汤加车前、黄柏、柏、芎、归；脓已成即针之；已溃者，用八珍汤加制甘草、柴胡梢、酒炒知柏；小便涩而脉有力者，仍用龙胆泻肝汤加制甘草；小便涩而无力者，用清心莲子饮加制甘草；脓清不敛者，用大补之剂，间以豆饼灸之；久而不敛者，用附子饼灸之并效。

一男子患此，掀痛发寒热。以小柴胡汤加制甘草，二剂少退；又

制甘草四剂而消。大抵此症属阴虚，故不足多。此患寒凉药不可过用，恐伤胃气；惟制甘草一药不损气血，不动脏腑，其功甚捷，最宜用之，不可忽也。

马铭鞠治谈公武患跨马痈，外势不肿，毒内攻，脓多，疮口甚小，突出如指大一块，触之痛不可忍，多饮寒剂，外敷凉药，毒内攻胃气俱损。令尽去围药，洗净疮口，但用一膏药以护。其方用大剂黄芪、山药、生地、白芷、牛膝、米仁、银花，杂以健脾药，十余剂脓尽；再数剂肉长，突出者平矣。后服六味丸斤许，精神始复。

《续名医类案》

薛立斋

一妇人拗中赤肿胀痛。此脓内作，用托里消毒散加柴胡，数剂溃而脓清寒热。乃气血复虚，用托里散而寒热止；用十全大补百余剂而痊。

一妇人腹拗肿痛，小水不利，时或胸乳作痛，胁腹作胀。此肝火气滞，四物加柴胡、青皮、元胡索、木香而愈。

一妇人拗中作痛，小腹痞闷，小便不利，内热体倦，饮食少思。此肝火内动，脾胃受伤也。用加味归脾胃汤、柴胡清肝散而安。

一妇人拗中胀胀，小腹作痛，服下血之剂，其痛益甚，更吐泻少食。此肝腹复伤，用六君子汤加升麻、柴胡而愈。

一妇人两拗肿痛，腹内一块不时上攻，月经不调，一便不利。此肝脾气滞而血伤，以四君加芎、归、柴胡、山梔而愈。

后因郁怒，前症复作，兼胸满腹胀，盗汗。此肝木甚而伤脾土也，用加味归脾汤下芦荟丸而痊。

一妇人小腹内作痛或痞闷，两拗肿痛，内热寒热，胸膈不利，饮食不甘，形体日瘦。此肝气滞而气伤也。朝用补中益气汤，夕用芦荟丸，渐愈；更用六味丸全愈。

一妇人两拗肿痛，小腹痞胀，白带时下，寒热往来，小水淋漓。

此肝气滞而血病，用龙胆泻肝汤，渐愈；又用加味道遥散、六味地黄丸，全愈。

一妇人患前症，胸胁胀闷，或小水不利，或时腹痛。此肝火气病，先用龙胆泻肝汤以清肝热；又用加味道遥散以生肝血；六味地黄丸以滋肾水而愈。

一妇人患前症，内热作渴，饮良不甘，肢体倦怠，阴中作梗，小便赤涩。此脾经郁结，肝经湿热。用加味归脾汤而愈。后因怒气复作，小腹胀痛。用小柴胡加山栀、芍、归，痛止；又用加味道遥散而愈。

一妇人小腹痞闷，潮热内热，体倦懒食。此肝火动而脾血伤也。用八珍加柴胡、山栀、胆草而安。

一妇人阴中如梗，两脇肿痛，热寒不食，小便频数，小腹重坠。此肝脾郁怒所致。先以补中益气加茯苓、山栀、车前子、青皮以清肝火，升脾气；更以加味归脾汤调理脾郁而愈。

一妇人小腹内如有所桔，两脇并入门俱肿，小便淋涩，经候不调，内热作渴，饮食少思，腹内如鸡卵而渐大，脉洪数而虚，左关尤甚。属肝胆郁结之症也。用加味归脾汤，肝火退而脾土健；间以逍遥散下芦荟丸而愈。

一男子患便毒，焮肿作痛，大小便秘，脉有力。以玉蝎散二剂顿退；更以龙胆泻肝汤四剂而愈。

一男子已溃而痛不止，小便秘塞。此肝火未解也。以小柴胡加黄柏、知母、芍、归，痛止便利；更以托里当归汤而疮敛。若毒未解而痛不止者，须用活命饮。

春元凌待之虚而服克伐药，几致危殆。用托里健脾药而愈。秀才王文远因劳枯之患，服小柴胡汤及表症散，后用托里药，脓成针之而旬日愈。又胡判官脓清脉弱，以大补药而已愈。因新婚复发，自用连翘消毒散，致泻利不止，竟致不救。可见此症属不足者多矣，非补不可。大抵便毒属肝经，初起坚硬，肝主筋故也。五七日后当

赤软，脓成故也。若尚坚硬，乃元气不能腐化，往往人见坚硬，只欲内消，反服攻散药，多致虚虚之祸。前此治者，即其验也。

《续名医类案》

薛立斋

黄吏部谷道前患毒，痃痛寒热，此肝经湿热所致，名曰悬痃，属阴虚症。先以制甘草，二服顿退；再以四物加车前子、青皮、甘草节、酒制知柏，数服而消。

一男子岁逾五十，患悬痃，脓清，肝肾脉弱。此不慎酒色，湿热壅滞也。然脓清脉弱，老年值此，何以收敛，况谷道前为任脉发源之地，肝经宗筋之所，辞不治，后果死。当治此痃惟润水制甘草有效，已破者兼十全大补汤为要法。

柴屿青以省覲舟行，舟人患骑马痃，哀号痛楚。怜而治之，先用大归汤十余剂，外贴回生膏，日令其以药水勤洗。继惟十全大补汤，因贫人，若无力购参。携有扁党参，给以半斤，始备药。又用玉蟾生肌散、人参末敷患处，调理月余而愈。

《续名医类案》

魏玉横

宋复华兄因劳顿患左拗肿痛，渐如鹅卵。或与发散，转甚。已半月，足冷过膝，面赤手亦冷，恶寒夜热，口苦食懒，脉极弦数。曰：此肝虚火甚也。与生地、杞子、沙参、麦冬、丹皮、萸仁、归身、红花，间入川栋、川连、羚羊、牛蒡，数剂寒热退；又十剂其肿硬及诸症渐愈，惟小块如豆大，未消。彼以要务奔走劳碌，复肿，数日大如李，其色赤而软，已成脓。再与前药，即自溃而愈。此症俗名一石米疮，言百日后自愈也。即遇先辈如立斋，其治法或未能如是。虽然余非有过古人，第知为肝肾病，则不杂入他药耳。

《续名医类案》

薛立斋

一妇人，素清苦，因郁怒患前症。或用败毒寒凉之药，反哺热内热，自汗盗汗，月经不行，口干咽燥。此郁气伤脾，因药复损。先以当归汤数剂，后兼逍遥散，五十余剂而愈。

《续名医类案》

陈自明

一男子患便毒坚硬，与神仙太乙丹一粒，服之去后二次，痛止，不日而消。

《续名医类案》

薛立斋

一男子患此，未作脓，小便秘涩，以八珍三剂，少愈，以小柴胡汤加泽泻、山栀、木通二剂而消。

一男子肿痛发寒热，以荆防败毒散二剂而止；以双解散二剂而消。

一男子脓未成，大痛。服消毒托里内疏药不应，诊之脉洪大，毒尚在，以仙方活命饮，一剂痛止，又一剂而消。

一男子肿痛，日晡发热。以小柴胡汤加青皮、花粉，四剂痛止热退，以神效瓜蒌散四剂而消。

一男子肿而不溃。以参、芪、归、术、白芷、皂角刺、柴胡、甘草节，数剂而溃；以八珍汤加柴胡，数剂而愈。

一男子溃而肿，不消且不敛。诊之脉浮而涩。以豆豉饼灸之，更以十全大补汤，月余而愈。

一男子溃而痛不止，诸药不应，诊之脉大，按之则数。乃毒未解也，以仙方活命饮而止，又二剂而敛。

一男子服克伐之药以求内消，致泻利少食。以二神丸先止其

泻，以十全大补倍加白术、茯苓，数剂而消。大抵此症多患于劳役之人，亦有内蕴热毒而生者。须辨虚实及成脓否，不可妄投药饵。常见治此症者，既用大黄之类下之，求内消或脓成令脓从大便出，鲜有见其痊也。人多欲内消者，盖恐收口之难也。若补养血气，不旬日而收矣。何难之有？若脓既成，岂有可消之理，如再用克伐之剂，反为难治。

一男子不慎房劳，患此肿痛。以双解散一服通之，其痛即止；更以补中益气汤数剂而脓，针之，以八珍汤加五味子、麦冬、柴胡三十余剂而愈。大抵便毒者，血疔也。俗呼为便毒，言于不便处肿毒，故为便毒也。乃足厥阴肝之经络及冲任督脉，亦属肝之旁络，且气血流通之道，今壅而肿痛，此则热毒所致，宜先疏导其滞，更以托里之剂，此临症制宜之法也。

一老妇肿痛，脓成未作，小便涩，肝脉数。以加减龙胆泻肝汤加山栀、黄柏，四剂而消。

张德俊灸便毒，亲曾取效。云：屡以灸他人，皆验。以细草或软篦一茎，随所患左右手量，中指自手掌尽处横纹量起，通三节至指尽处为则，不量指甲，集断欲。将此草于手腕横纹量起，引草向臂当中，草尽处即是穴。麦粒大灸三壮。肿散痛止，即时安。

缪仲淳亲试治便毒，甚验。绵地榆四两，白酒三碗，煎一碗，空心服，虽肿者亦愈。加穿山甲同患处者二片，土炒，引经更妙。

黄履素曰：余家有女流患便毒，两拗肿痛，不能起。疡医用败毒药十余贴，以围药逼之出脓，肿痛愈甚。予查薛氏《外科枢要》，此症皆因郁怒伤肝得之，治用加味归脾汤加逍遥散间服，遂遵用之。不三剂，肿痛减半，六剂而起。

《续名医类案》

孙文垣

吴翁，年七十有三，偶坠马，左胁作痛，随治而愈，后半年忽左

胯肿痛，增寒作热，诸治罔效。或作疝气，投荔枝、大小茴香、川楝、橘核之类，痛不可忍，至欲引绳自绝。诊之六脉浮而洪数，左尺尤甚。验痛处红肿如匏，按之烙手。此便毒也，非因近色而得。盖胯属厥阴肝经，肝为血海，乃昔时坠马，恶血消之未尽，畜于经络，化而为脓。年高气虚，又为香燥克伐，故痛且剧。今其色青中隐黑，脓成久矣。乃令外科针之，出青黑脓五六碗。此俗名石米疮也。乃用内托十宣散，参芪三钱，后加至五钱，一日两进，两月而愈。

《续名医类案》

薛立斋

一男子年逾二十，稟弱。左腿外侧患毒，三月方清，脓水清稀，肌肉不生。以十全大补汤加牛膝，二十余剂渐愈；更以豆豉饼灸之，月余而痊。

滁州市侍御婢甲患毒，痛甚，服消毒药，其势未减。即以槐花酒一服，势随大去；再以托里消毒而愈。

丁兰年二十余，股内患毒日久，欲求内消。诊其脉滑数，知脓已成。曰：气血虚不溃。遂刺之，脓出作痛。以八珍汤治之，少可，但脓水清稀，更以十全大补汤加炮附子五分，数剂渐愈。仍服十全大补汤三十余剂而痊。

一僧患股内肿一块，不痛不溃。治以托药二十余剂，脓成刺之，作痛。谓：肿而不溃，溃而反痛，此气血虚甚也，宜峻补之。彼云：痛无补法。曰：正气不足，不可不补，补之则气化而痛邪自除。遂以参、芪、归、地、白术治之，两月而平。

一男子腿内患痛，漫肿作痛，四肢厥逆，咽喉闭寒，发寒热，诸治不效。乃邪郁筋络而然也。用五香连翘汤，一剂诸症少退；又服之，大便行二次，诸症悉退而愈。

一男子先腿痛，后四肢皆痛，游走不定，至夜益甚。服除湿败毒之剂不应。其脉滑（湿痰）而涩（瘀血）为患。以二陈汤加苍术、羌活、桃

仁、红花、牛膝、草乌治之而愈。凡湿痰湿热及死血流注关节，非辛温之剂，开发腠理，流通壅道，使气行血和，焉能得愈？

上舍李通甫腿患疮作痛，少食作呕，恶寒。此痛伤胃气，用六君子汤加当归，四剂疼痛少止，饮食加进；又以十宣散加白术、茯苓、陈皮，数剂脓成，针而出之，又以前散去防风、白芷，数剂而痊。

一老人腿患痈自溃，忽发昏瞀，脉细而微。此气血虚极也。以太初之剂而苏。

一男子患腿痛而不红肿，内亦便利调和。用托里荣卫汤数剂而消。

一男子内股患毒，肿硬痛甚，不作脓。隔蒜灸五十余壮，势退七、八；以仙方活命饮，四剂而脓成；用十宣散六剂，脓溃而愈。凡疮或大痛，或不痛麻木，灸最良。

一男子腿内侧患痈，未作脓而肿痛。以内托黄芪柴胡汤，二剂少愈，又二剂而消。

一男子腿外侧患痈，漫肿大痛。以托里黄芪酒煎汤，二剂少可；更以托里散数剂，溃之而愈。

一妇人腿痛久而不愈，疮口紫陷，脓水清稀。以为虚。彼不信，乃服攻毒之剂，虚症蜂起。复求治，令灸以附子饼，服十全大补汤百余剂而愈。凡疮脓清及不敛者，或陷下，皆气血虚极也，最宜大补，否则成败症。若更患他症，尤难治疗。

一男子腿痈内溃，针之脓出四五碗，恶寒畏食，脉诊如丝。此阳气微也。以四君子汤加炮附子一钱服之，寒少止；又四剂而止。以六君子汤加桂数剂，饮食顿进。乃以十全大补汤及附子饼，两月而愈。

一男子患腿痈兼筋挛痛，脉弦紧，用五积散加黄柏、柴胡、苍术治之而痊。

一男子腿痛兼筋挛骨痛，脉弦紧。以大防风汤，二剂挛少愈；又二剂而肿消，但内一处尚作痛，脉不紧。此寒邪已去，乃所滞瘀浊之

物欲作脓，故痛不止。用托里药数剂，肿发起，脉滑数，乃脓已成矣。针之，用十全大补汤，月余而安。

一男子右腿赤肿焮痛，脉沉数。用当归拈痛汤，四肢反痛。乃湿毒壅遏，又况下部，药难达，非药不对症也。遂砭患处，去毒血，仍用前药，一剂顿减，又四剂而消。

丹溪诊东阳李兄子，年逾三十，形瘦肤厚，连得忧患，又因作劳，过于色，忽足腿外侧腠上红肿，其大如栗。一医问其大府坚实，与承气汤两贴，不效，又一医教以大黄、朱砂、生粉草、麒麟竭，又二、三贴。半月后召视之，曰：脉实，大事去矣。后果歿。

《续名医类案》

马铭鞠

江都尹子，九岁患腿痛，治弥月，热渐盛，按之坚如石。幸儿气厚，可内消。用牛膝、米仁、地榆、生地、牛蒡、银花、连翘、甘草，补剂加微药利之，即稍宽；过两剂加汗微汗，其势益宽；至数剂，取穿山甲末五钱，半入煎，半调药送下。儿善饮，令一醉。自此顿消，半月地下行矣。初一医欲开刀，遇马中止。凡外科宜以开刀为戒。

《续名医类案》

薛立斋

一男子患腿痛，脓已成，针之出二碗许。饮以托里药，一剂大发热，更以圣愈汤，二剂而止。翌日恶寒不食，脉细如丝。以人参一两，熟附子三片，姜、枣煎，再服而愈。但少食不寐，更与大初黄芪汤而平。

一男子腿肿，发热畏寒，以补中益气汤治之。彼以为缓，乃服芩连等药，热愈甚。复请治与人参养荣汤二十余剂而溃；更以参、芪、归、术、炙草、肉桂，又月余而敛。夫火之为病，当分虚实，芩、连苦寒，能泻心肺有余之火。若老弱或饮食劳倦而发者，此为不足，当以

甘温之剂治之。未尝有实热而畏寒，虚热而喜寒者，（考按：二语却未然）。此其验也。

《续名医类案》

李用粹

庠生奚易思令正，发热腹痛，呕恶不食，六脉沉郁，面黑如薰，用解郁调中之剂，前症渐愈。若感怒气，应必复发。半载以来，形神憔悴，小便涩痛，小腹重坠，延予治之。予曰：症瘕痞块，多属中脘，发则形象可求，痃癖两症，帖在脐旁，发则攻冲而痛，数症皆水道通利者也。今小水涩滞，少腹重坠，必身皮甲错，绕脐生疮，此系下焦肝火久郁不舒，已成小腹痛也。非予专门，应疡科调治，庶可奏效。延医治之，果如予言。越数日而痃溃，脓色稠紫，服托里养荣等剂，月余而康。

《旧德堂医案》

北山友松

住吉社僧北之坊年六十余，痃发于背之上下二处。上乃风门、肺俞、厥阴俞、魄户、膏肓之际，下乃胞育、居郛之次，大四寸余。摄泉二州名医，邀之殆遍。补以参芪，则妨碍饮食；托以十宣，则疮口作痛；艾灸桑烙，其病越笃，因请予求治。脉之左沉弦有神，右沉滑流利。闻其为人，性直确，少言笑，常患气滞，或腹胁痞满，或大便秘难等候云。记得陈鹤溪云：凡痃疽不问虚实寒热，皆由气郁而成。经云：气宿于经络，与血俱涩而不行，壅结为痃疽。不言热之所作而后成。痃者，乃因七情有所郁而成也，治之以远志酒、独胜散云云。闻其性格，察其脉色，遂投和剂三和散。全用原方分目，每帖二钱，加香附五分，水一盏煎六分，去滓温服，不拘时候焉。或问前医累用参芪补托，亦未见功，师用此药，当得甚事？予曰：“正由是也。此僧乃如陈鹤溪所言之候，而医不先用行气解郁，乃用补托太早，所以壅

结于上下二处，虽用艾灼，疮色不活，用补便作痛耳。《和剂》谓此方，主治五脏不调，三焦不和，心腹痞闷，胁肋腹胀，诸气壅滞，肢节烦痛，背痛肋痛，有妨饮食，手足微肿，肠胃燥涩，大便秘难等症。故试数贴，观其可不矣。”服五帖，二便通顺，次服五帖，饮食有味。再服五帖，疮色红活，而不疼痛。再服五帖，痞满渐宽。更服五帖，胸胁大通畅矣。僧喜曰：“自服先生灵药，不特今患得痊，乃觉旧疾亦脱体耳。”因渠年老，恐香燥过剂，消耗阴血，改用参、归、芪、术等物，便觉举动不安。复用三和散，加当归加川芎之数，连服二十余帖，稠脓滚出，而疮口自平满焉。记得丹溪先生云：独胜散，治气郁血滞，而诸疮愈后常服半年尤妙。此皆施于体实气郁之人，予见吴兄厚味气郁，而形实性重，年近六十，患背疽，医与他药，皆不行，唯香附末饮之甚快，始终只此一味，肿溃恃此而安。然此等体实，而又病实乃瘥，千百而一见者也。今此老僧与吴氏元气大同，熟不谓其脓既泄，气血乃虚，只宜纯补哉。

丰州青木氏女，患痰盛发热，项生一物，如橘大，掀肿疼痛，咽干口渴。一医与清凉散合二陈汤，治十余日并无寸效，不食三日矣。请予诊，左寸关弦数，右大数。予曰：“此方宜矣，但二陈汤未可也。原用清凉散加山豆根、桔萎仁、枯黄芩三帖，而痰退热止。仍以清凉散为末，醋调敷患处，明日其肿即退，举家神之。

坂阳柴米小仓店年六旬许，患背痈。其痈初发时，先于七椎之傍，重著而痒，使婢爬之，其痒不已。因取艾灸之而不觉痛，因求外科处治。外科艾灸贴敷，初如豆大，三两日如掌大，五七日小盆大，至十余日乃发肿。上自三椎，下自一二椎。其阔六七寸许，其肿不高，亦不光泽。法眼元真疑是疽，初用化毒，次内托复兼用独参汤五七钱许。病者胸腹腹胀，妨碍饮食，且手背足趺微肿。其子恐生亦症，冀请予诊。脉之轻缓重紧，予投和剂熟料五积散去麻黄加人参，每服三钱，生姜、大枣各三分，羌活、黄柏各二分，水一盂半，煎一盂，去滓温服。或问其所以，予曰：“东垣先生曰，《生气通天论》云，

营气不从，逆于肉里，乃生痈肿。《阴阳应象论》云，地之湿气，感则害人皮肉筋脉。是言湿气外伤，则营气不行。营卫者，皆营气之所经营也。营气者，胃气也，运气也。营气为本，本逆不行，为湿气所坏，而为疮疡也。此邪不在表，亦不在里，唯在其经中道病也。已上《内经》所说，俱言因营气逆而作也。遍看疮疡论中，只言热化为脓者也。盖有言湿气生疮，寒化为热，而为脓者，此疮疡之源也。宜于所见部分，用引经药，并兼见证中分阴证、阳证，先行营气，是其本也。标本不得，则邪气不伏，言一而知百者，可以为上工矣。由是言之，肿发不高，亦不光泽，虽多服参芪补托，其脉仍缓或紧者，乃湿气所坏，而为疮疡。寒化为热，而为脓者也。经所谓治病必求其本，吾故用之，欲成其事也。”或唯然。于是使服三十余帖，其疮将愈时，加黄芪倍人参，又三十余帖收功。

《北山医案》

高锦庭

高某某，郁痰已久，坚硬无情，兹诊脉弦数，寒热时作，项间漫肿焮红，咽喉亦痛，妨于饮食。此系复感风温使然，法当先治其标，后图其本。

牛蒡 薄荷 大贝 石斛 连翘 杏仁 元参 丹皮

《谦益斋外科医案》

中神琴溪

盐屋喜兵卫者，年弱冠，背七椎旁发巨疮，根盘七寸许，疾痛如割，寒热往来，口渴，大便不利，精神厌厌无聊，来请治。其脉洪数。即与浮萍汤，酒下龙门丸一钱。四日来报曰：“暴泻十数回，由是神气虽稍清豁，疮更益痛。”即遣门人关大岩代省之，还告曰：“患上焮灼殆类痈。”先生曰：“否，痧毒已不日脓当成矣。”仍与前方。居五日，复省之。脓果成，割之寸许，刺入五分，脓血溢出，痛楚顿忘。因

托之外医，不出数日，而自来谢，诸症全退，唯患处余脓滴耳。

《生生堂治验》

王孟英

昔在海门，有同事樊姓者，肩上患痈，医进荆防败毒散而寒热大作；又进仙方活命饮、外敷三黄散四五日，侠脊焮肿作痛，红晕满背，脊间高如覆碗；又饮内疏黄连汤、外涂铁箍等散，更日服蜡矾丸，至十朝黑陷，声嘶呕恶，汤水亦不能沾，十一朝昏晕不苏。前医皆云毒盛无可挽回，招之不至矣。有故游击杨公朝栋之孙忘其名，善治痈疽，因不识字，人皆轻之。樊证濒危，不得已邀彼来视。笔曰：此非阴证，被寒凉遏抑所致。用吾药而患处能高起者，尚可救。乃出药敷疮上，越日果高起。杨复视曰：能从吾言，此疾可生。第一不许服药，第二不许忌口。缘现在粒米不进，必停药三日，使胃中宿药渐消，自能进食。既能食，正宜投其所喜，岂可强禁其口，而再绝其胃气哉？如此则百二十日可以收功。后竟如其言而愈。至所用之药，留心揣测，终莫能识。然此证若于初起时，内以点舌丹汗之，顶上以蟾酥丸或白降丹泄其毒，使有出路，必无横溃决裂之祸。寒凉日进而胃闭不纳，蜡矾频服而声嘶作呕，酿成败证。设无杨公，人亦但知其死于病，恶知其死于药乎？举世梦梦，良可深悼。

张德祥令孙患行程蹇，多医不效。上至小腿，肿如瓠，气喘声嘶，不食者九日，烦躁恶近人，近则热不可当。多医聚讼，或决之立毙，或决之成废。邀余往，已暮，执烛视之，近烛则痛如锥刺，乃父恐余用刀，屡述群医之说。余晓之曰：汝不欲此子之生，余不敢言。既邀余来，是欲其生也，岂可随声附和、袖手旁观耶？今之外科皆乡愿也，抄写成方，虚应故事，并无真知灼见；更可恶者，造作疑似之言，簧惑病家，有如奸胥猾吏造案，虽咎陶听之，犹以为杀无可宥。要知脚跟之皮，厚于牛领，不能下溃，必至上穿足面，则不可救矣。言未已，病者曰：怪道数日来骨缝锥痛难忍。其妻跪求请教，而一家数十

日犹执不可。余曰：吾岂挟仇而欲害彼，若决之而毙，吾偿其命可也。众皆咋舌不敢言，遂决之，出脓半盞，敷贴已，余至外厅晚膳，未毕，内报熟睡矣，如之何？余曰：觉来要啜粥矣。既而果然。三日后吃饭，四十日收功。然人情畏痛苟安者多，故庸医之言易于入耳。病无去路，上溃足面，腐及内外踝，而迁延以死者，比比也。

《归砚录》

费伯雄

某。鱼肝痈红肿硬痛。急宜消散化湿。

焦茅术一钱 赤芍一钱 防己二钱 泽泻二钱 角针八分
炙甲片打，一钱 黄柏三钱 生草节八分 川牛膝二钱 银花三钱
陈皮一钱 桑枝四钱 陈酒一两

某。温毒殊大，今虽初破，溃脓特多，四围红肿，胀而赤痛，便溏，防其延烂致重。

前胡一钱 鳖血炒柴胡一钱 赤苓三钱 煨葛根一钱半
煨木香五分 赤芍一钱 法半夏一钱 炒枳壳一钱 橘红八分
炒银花三钱 苏梗三钱 桔梗一钱 熟苡仁四钱 大贝三钱
荷叶三钱 茅根四钱 桑枝三钱

复诊：温邪蕴络，寒热，热甚咳嗽，使溏溲赤，耳下加温毒，破溃脓胀，绕及头颅。宜内外兼施。

前方去赤芍、柴胡、桑枝。加苏子、车前、猪苓。

某。胁痈硬肿，皮色微红，内兼寒热，势难全消。

归尾三钱 柴胡一钱 连翘二钱 赤芍一钱半 青陈皮各一钱
甘草节一钱 桃仁泥二钱 炙甲片一钱 全瓜蒌三钱 银花三钱
炙乳没各一钱 茅根四钱 葱白三个 陈酒一两

某。湿热瘀凝，右足季中穴位硬肿作痛，近日又复箕门处疼痛，防成流注。

当归尾三钱 炙甲片一钱 川黄柏二钱 花槟榔一钱

赤芍一钱半 炙乳没各一钱 草节一钱 桃仁泥二钱 生苡仁四钱
柴胡一钱 怀牛膝二钱 陈皮一钱 羚羊片一钱 连翘二钱
泽兰一钱 钩钩后入,三钱 鲜石斛三钱 桑枝五钱 茅根四钱

复诊:委中毒,经治硬疼不减,势有酿脓之虞。

前方加角针一钱

《费伯雄医案》

浅田惟常

上佐翁(谓长泽道寿)隐栖西山。一日诊京师商人痼疽曰:宜曰服人参五钱。后五日诊曰,未见参效,恐不治。病家告实曰:服参一日不过二钱五分。翁曰:贱命重财,无益矣。苟欲生则服参,宜今日五钱,明日六钱,又明日七钱,渐次相进。商如其言,七日病果愈。友松曰,用参将息适宜,可谓得补托之真诀矣。

《先哲医话》

陈莘田

仲春失血,阴伤未复,初夏即起海底悬痈,溃孔成漏,滋水滴淋,绵延三月,阴液更伤,形肉渐削,乍寒乍热,咳呛白沫,舌红苔薄,脉来细数,怯机显著,恐不克收局耳。

生地 白芍 地骨皮 川贝 麦冬 北沙参 阿胶 茯神
生甘草

《枫江陈莘田先生外科临证》

过铸

陈某,患膝盖痈,年逾六旬,久而不敛,四围起肛,患处转紫黑色,烂至四寸许,纳少而委,顿自知不起,抬来求治。余曰:“此是平时饮酒积热,并受升药之毒所致。”当用八珍加薏米、革薢、葛花、枳椇、车前子之类。外合蟾蜍以提其毒,掺龙象散(象皮二两三钱厚

者为佳，用大块礞砂一钱三分八厘铜锅炒黄色，趁热研末，用一两五钱入药，龙骨二两三钱火烧冷透研筛净末用一两五钱，乳香、没药俱去尽油、赤石脂三两火煨五次入冷水五次，研末用净二两，朱砂水飞，轻粉、儿茶、血竭各二两，雄黄精一两五钱，各研细末）以收其口，十余日口已缩至寸许。其亲串某偕疡医造其家，为之诊视，密为其子曰：“脉有歇止，高年见此，非佳兆也。”其子趋而问余”余曰：“无虑，无虑，歇止之脉余早知之，老年有此，病将愈矣。当此阴阳渐长之际，将愈未愈，故有此象。”周慎斋曾详言之，惟吐血见歇止者不治。其子闻余言，心始安，未几即痊。

《过氏近诊医案》

王旭高

某。风毒内攻入脑，走入耳窍，疼痛出脓，脓出不爽，盘及耳后颈间硬肿不消，此盘耳痈也。已延两月，症无头面，牙关不痛，恐滋蔓骨槽等变，殊非易治。

羚羊角 元参 磁石 甘菊花 细生地 牛蒡子 制僵蚕
菖蒲 钩钩 葱白头

《王旭高临证医案》

马文植

某。努力伤气，气虚不统，上则咳嗽，下则梦遗精滑，败精瘀浊阻滞精道，会阴穴按之微硬，两月以来，既不加肿，亦不破溃，正气大伤，不能托毒化脓。劳动短气，少腹隐痛，中损显然。将来外患破溃，定成海底漏也。拟元阳汤加味，俾正气充足，或破或消，庶可免久稽之患。

炙黄芪 潞党参 冬术 冬草 茯神 五味子 白芍 小茴炒
炒枣仁 当归 牡蛎 熟地 苡仁 桂圆肉 煨姜 红枣

复诊：悬痈俗名海底漏，斯处为气血交会之经，属至阴之分，故

湿热得与浊精凝结，已经两月，僵块漫肿，难消难溃，必赖正气充旺方可托毒化脓。叠进扶正化毒，漫肿收束，硬处亦软，成脓之象也。拟原方培托。

黄芪 党参 当归 白术 白芍 甘草 枳壳 僵蚕 两头尖 槐角

《外科集腋》

余听鸿

壬午，余治琴川兴福卖糕团者肋骨生痈。疡科谓外肺痈，开刀出毒，四十余日疮口不敛，时流稀脓，家窘，听其不治。余诊之，脉来虚弦兼数，呛咳白痰，咳则稀脓流出，渐成疮劳。幸里膜未穿，与蜡矾丸先护里膜，进以金匱旋复花、千金苇茎汤，旋复、新绛、枇杷叶、生冬西瓜子、薏米、淮山药、石斛、生扁豆、茯苓、川贝、鲜荷梗、橘叶、鲜百合、毛燕之类，肺胃并治。服三十剂，咳减纳增，脓出渐少而厚。先以提脓末药提之，再以生肌等药慎之，两月余而愈。所以缓治平淡，久则自然有功。再服毛燕月余，咳止，疮口平复。如此症或医药寒凉温补乱投，或病家性急不信服药，每弃而治者多矣。

外症与内症看法虽异，其理则同，从中有假热假寒，最难明察。譬如伤寒之戴阳，寒极似热，面红目赤，口燥假渴，索饮冷水，仲景有通脉四逆加猪胆汁汤、白通加人尿猪胆汁汤。如温病之热深厥深，陷入营分，肤冷肢厥，喜热饮不喜凉饮，反用紫雪丹、至宝丹、犀角地黄、白虎、竹叶石膏等汤。此皆内科之假寒假热也。外科亦然，有一种皮色泛红、阴分不足，虚阳外越，服温补肿势渐平，红色渐退。亦有色白坚硬，平塌不起，外显虚象，乃是火毒凝结，气血不能通畅，一服凉散，皮色即红，肌肉渐松。此外症之假寒假热也。此等症最易误治，然细心者断不至误治，究竟有元气脉息见症虚实可凭。余忆十余年前，余姨岳母素有便血，本属早寒多郁，后起悬痈，生于谷道之前溺道之后，先起块作痛。即至孟河诊之，皆云湿热，服

苦参、黄柏、薏仁、革薢等苦寒渗利。数剂后日见其。再覆诊，服数剂卧床不起，症势日剧。着余妇代看之，云：皮色泛红，光亮如梨，按之甚热。用田螺水磨番木鳖，调冰片搽之稍安，干则更痛，再搽。后邀疡科诊之，曰：悬痈溃后为海底漏，死症也。合家惊惶。正在岁终有事，无可如何。余曰：素有便血，本属脾虚，虽有肝气兼湿热，肝络系于二阴，补中益气汤最宜。此方之升麻、柴胡，即是疏肝之品，当归是养肝之品，东垣先生曰：治脾不若治肝。木气条达，土气自舒。参、草甘温助脾，白术、陈皮调胃祛湿。余将补中益气本方加茯苓泄其已阻之湿，大剂三服，痛减红退而肿收。再服两剂，而饮食渐增，肿退尽，痛亦止。后服归脾汤五六剂，平复如故。至今十余年，强健如昔。所以补中益气汤人皆云升清，不知东垣先生方中有疏肝扶土之妙。鄙言以为何如。若依疡科用苦寒淡渗利湿清热，此症决致不起。

《余听鸿医案》

陈莲舫

陆。痰痈势难全消，以冀收小溃脓为幸。

全瓜蒌 天虫 小青皮 广陈皮 生甘草 夏枯草 嫩射干
生黄芪 冬桑叶 川石斛 大力子 川贝母 角针 荷梗

《莲舫秘旨》

俞道生

竟雄。癸丑年七月。阳明湿热之邪，蕴遏既久，溷入血分，由养生路循经上达，键痈胀，口不能开，烂断血管，血液淋漓，职是故也，脉弦滑，右盛于左，舌苔灰黄腻，可知余热犹未清流澈，热则涨而上升，故左项耳中，似觉胀闷耳，治以清降，使循环之血，升降调和，庶免复溢之虞。

真川连 1.5 克 赤茯苓 9 克 生白芍 4.5 克 碧玉散 9 克，锡包

黑山梔 9 克 肥知母 4.5 克 福泽泻 6 克 鲜芦根 24 克
湖丹皮 4.5 克 新会络 4.5 克 制半夏 4.5 克 丝瓜络 三十

复诊：按脉右部弦滑，舌苔灰黄化薄，键痈腐烂流血之后肌肉渐生，然阳明湿热之邪，一时遽难清彻，由养生路升腾于咽喉与上腭正当其冲，是以发生糜点累累颇多，再以清理。

处方同前，除川连、山梔、知母、泽泻、芦根、丝瓜络，加广藿梗 6 克 绿豆衣 9 克 西瓜翠衣 9 克 鲜竹茹 4.5 克
川石斛 9 克 枇杷叶 三片（去毛绢包）。

三诊：键痈去血过多，营阴必伤，而阳明胃家之火，一时未能尽降，智牙牙缝近复泄脓，口开未利，此病之余波也，脉虚数，舌苔灰黄化净，再拟养阴清化，俾阴旺则火自降耳。

处方同前，除广藿梗、制半夏、绿豆衣、碧玉散、西瓜翠衣、枇杷叶，加西洋参 4.5 克 苋麦冬 9 克 桑寄生 9 克 象贝母 9 克
生甘草 1.5 克 胡桃肉 三枚。

四诊：键痈业已痊愈，开合未利，盖血脉循环之道，尚未调达也。惟病经多日，元气必虚，脉虚弦，舌尖脱液，再拟扶元养血，清化余热，以善其后。

条参须 3 克，另炖冲入 云茯苓 9 克 焦白芍 4.5 克 炒归身 9 克
带壳砂仁 2.4 克，后入 广桔络 6 克 焦谷芽 12 克 骨碎补 4.5 克
炒冬术 4.5 克 桑寄生 9 克 生牡蛎 12 克 炒红枣 四枚

《俞道生医案》

贺季衡

张男。足趾痈肿痛已将成脓，兼之风疹丛发，寒热交争，脉滑数，舌心浮黄。风湿热已入血分，清解为先。

荆芥一钱五分 羌独活各一钱 京赤芍二钱 酒炒黄柏一钱五分
生甘草八分 川牛膝一钱五分 大贝母四钱 粉丹皮二钱
净蝉衣八分 地肤子四钱 桑枝四钱

朱男。悬痈已久，宗筋结硬，大如鸡卵，皮外无色，脉滑，舌红。酒湿与败精积于下焦所致，溃则防成海底漏。

当归尾二钱 京赤芍二钱 淮牛膝二钱 川黄柏一钱五分
泽泻二钱 牵牛子二钱炒 大贝母四钱 桃仁泥二钱 云茯苓三钱
两头尖十四粒

二诊 县痈自溃，脓出颇多，结硬未消，间或寒热。将来防成漏厄。

当归尾二钱 淮牛膝二钱 京赤芍二钱 炙甲片三钱
大贝母四钱 桃仁泥三钱 甘草梢八分 角针三钱 赤苓四钱
香独活一钱 牵牛子二钱

三诊：悬痈脓水日少，余硬未消，脉沉滑右数，舌苔滑白。湿热未消，当再通化。

当归尾二钱 淮牛膝二钱 京赤芍二钱 大川贝四钱
生苡仁五钱 黑料豆四钱 泽泻二钱 川黄柏一钱五分 炒白术二钱
炙甘草五分 净车前四钱 灯芯十茎

《贺季衡医案》

张山雷

叶左。腹皮痈，针溃得脓，余肿尚坚，法宜清化。

瓜蒌皮6克 焦枳实2.4克 楂肉炭9克 象贝母9克
制半夏6克 鲜竹茹6克 焦栀子6克 炒丹皮4.5克 陈皮4.5克
花槟榔3克 砂仁壳1.2克 大腹皮9克

郑左。盆疔痈，脓犹未透，四围已束，中心已耸，痛犹不甚。脉左甚弦，舌苔薄滑，仍须清化。

瓜蒌皮4.5克 象贝母6克 灸鸡金4.5克 广木香2.1克
炒枳壳1.8 陈皮4.5克 楂肉炭6克 丝瓜络4.5克 冬瓜子打，9克
制香附6克 带壳春砂仁打，2粒

《张山雷专辑》

范文甫

镇海杨姓。患背痛，久治不愈。口烂如大碗口，出脓甚多，其中爬虫千万条，痒不可忍。余见之，无法可想，趁小轿欲返。其中一抬轿者问病人缘由，余告以虫多无治可治，捕之不暇。该人曰：何不用五倍子煨炭，研细，捣黄糖如泥，当膏药敷之。日一、二换，虫即死于黄糖之中，痈亦可渐愈。余即如其法试之，极效。二日后，虫不知何处去了，痈亦见瘥。

鸿章兄。本属寒包火之喉证，前医想用寒凉之剂解之，无效。反致热邪入里，毒气无所可泄，则留子经络，发为背痛。身热甚，牙关硬而不开，昏睡抽搐。脉弱而数，数则为热盛，弱则为元气不足。热毒倒可勿虑，有方以制之，元虚之至，以何物扶之？此实是难上加难之题目。

羚羊角 9 克 犀角 1.5 克 板蓝根 9 克 鲜大生地 各 24 克
地丁草 24 克 桃仁 18 克 冬瓜子 24 克 制乳香 4.5 克 牛膝 9 克
生甘草 3 克 皂刺 9 克 象贝 9 克 西党参 9 克 竹茹 30 克
鲜芦根 60 克，代水

二诊：已成脓，望其速溃。

穿山甲 9 克 生甘草 3 克 乳香 9 克 花粉 9 克 皂刺 9 克
银花 24 克 没药 9 克 陈皮 4.5 克 归尾 9 克 赤芍 9 克 象贝 9 克
知母 9 克

三诊：脓出甚多，精神渐爽，热毒见退。但元气太虚，脉细而数。

大生地 12 克 生黄芪 12 克 归尾 9 克 白芍 9 克 麦冬 9 克
皂刺 9 克 银花 9 克 生甘草 3 克 炒白芷 3 克

四诊：好多，尚需调养。

天冬 12 克 麦冬 12 克 生地 24 克 白芍 9 克 当归 9 克
党参 9 克 甘草 3 克 黄芪 60 克 银花 9 克 地丁草 12 克

《范文甫专辑》

翟竹亭

南门内赵洪范之妻，患三里发，十三日，迎余往治。诊得阳明脉洪数有力，疮形如酒杯，疼痛非常，日夜恸哭，以手按之，坚硬如石。此证乃胃经之实热邪火，经曰“诸痛痒疮，皆属于心。”当急泻胃经之火毒，以保筋腐骨折之虞。外擦以琥珀蟾酥散，令毒不能走散，急速溃出脓血，以免内攻。遂用二花大黄汤，服一帖大便泻下三次，疼痛稍减，又服一帖，又泻三次，疼去七八。待四日，疮已大熟，用利刀挑破，流出尽是黑血，毫无脓意。书云“实而疼甚内是血”。信不虚也。外上黄灵药，每日二次，后服二花解毒汤六、七帖，病已。

二花大黄汤

金银花 12 克 大黄 15 克 黄连 10 克 木通 6 克 生地 10 克
花粉 6 克 连翘 10 克 蒲公英 10 克 紫花地丁 10 克 丹皮 6 克
当归 10 克 红花 3 克 白芍 10 克 芒硝 6 克 防风 10 克 乳香 6 克
甘草 6 克 水煎服。

城内银子井黄姓翁，七十岁，患承山发。邀余往治，见躺卧于床，满面通红，疮大似盘，腐肉肿有寸余，绝无脓意。诊其脉洪数有力，审其形亦无败象，年虽老病却有余。内服仙方活命饮，外上白降丹，以膏盖之，每日一次。三日外腐肉脱尽，正脓以生，遂换红升丹，每日两次。二十余日，病去五六，改服十全大补汤。二月外共服药二十四帖，遂获平复。

邑东宋湾宋国选，年近七旬，患少腹痛。迎余往治，病已月余，命似悬丝，后事已备。伊云：“自知难愈，只因幼乏子嗣，五十方生一子，现十余岁，老妻五十余，其它无人。倘余不起，留下孤儿寡母，虽有几亩薄田，必不能守，将来不知留流何所。每念及此，肝肠寸断。祈先生大施仁兹，万一得愈，合家不散，德戴二天矣。”余问曰：“出恭如何？”伊云：“每逢出恭用力，疮口出血如注，大概约有一茶盅许。”诊其脉幸有力有神，许其可治。遂用十全大补汤服之，外上红

升丹，化腐生肌，提脓拔毒，以膏盖之。由此饮食日增，精神日强，疮口渐敛，大便时亦不出血。共服药二十帖，调治月余，诸症全瘳。

《湖岳村叟医案》

张汝伟

胡润庠，年四十，黟县，脐痈，经开刀后，已有十五六天，脓出不畅，孔深寸许，口径如银元大。加之满身发出红色小瘰，面色萎黄，胃呆不欲食。此湿热郁以血分，毒不外透，拟托里透脓法。

生绵芪 炒路党 蒲公英 败酱草 连翘壳 大贝母 生淮药 生熟苡米仁各三钱 生甘草八分 丝瓜络钱半

二诊：服托里透脓方两剂后，孔已浅，而口径收小不少，脓泄亦多而浓厚，胃气亦醒，小瘰大大减少，宜再与清营泄化。

绵黄芪 炒赤芍 当归须 苡米仁 大贝母 忍冬藤 细生地 木猪苓各三钱 黄柏炒，钱半 生甘草一钱

本证始末：胡君是卡德路长丰当店主，向由伟治。因余不治疡科，故此症起后，即至医院诊治，开刀后，溃腐疼痛，已半月余，不堪其苦。嗣改中医外科治，最后仍至余处诊。幸得前后二方，共服五剂，外掺去解丹。腐脱脓净，痛止肌生，仅十又一日。外科之病，由内而发，外敷药固然重要，内服方亦须注重，如不开内服方，亦一缺点。

方义说明：前后所书二方，不外一托里黄芪汤老方加减，无甚精义，不过因日久正亏，方可用，若初起，则宜于角针、姜蚕等的透达矣。

《临症一得》

李用粹

遂安令曹绿岩长君安初，少年嗜饮，真元素虚，己亥秋丁，内艰悲恸太过，内火燔灼，肾水干涸，肌肉顿消，咳咯脓血，腥秽异常，延

予商治。六脉洪大，重按虚豁，右寸独数，此上盛下虚之候。夫上盛者，赫曦过极，肺中之假阳旺也。下虚者，涸流衰竭，肾家真阴虚也。阴虚则火独发，坎宫津液上腾救母，浸浸炽灼反成稠痰，浊阴胶结于清虚之脏，久而肺热叶焦腐化为痈，若不求而治，则肾阴愈虚，邪火更旺，痈将溃也。法当先清上焦痰火，保定肺气，以麦冬、沙参、紫菀、贝母、橘红、茯苓、甘草、桔梗、瓜蒌霜等五更时服。复用六味汤加麦冬、五味大剂，临卧服，以滋化源。数贴而痰清嗽减，一月而精充神复。越三载，因惑于邪术，广图婢妾以自娱，前症复发，卒至不救。

《旧德堂医案》

郑重光

程其相兄令眷，咳嗽二旬，先医作伤风治不效。又医作肺寒，以桂枝、干姜、细辛治之益甚。又一医作痰火治颇安。最后延余，诊其脉三部皆涩，不浮弦，非风也；不细紧，非寒也；不滑数，非火也；每日寒热汗出，鼻有清涕，咳嗽不能卧，右身不能着席，痰涎甚多，又非虚损。初诊未得病情，即前医痰火颇安之药，姑以应之。及出门后，追思其症，应属肺痈。令人取回前药，问所吐痰涎，气味腥甜否，彼令侄追至黄师石兄宅中，答以腥甜。余曰：“几误矣！此肺痈将溃也。”易用苡仁、贝母、甘、桔、桑、杏、麦冬、白芨、银花、防风。服后臭脓大出，间吐鲜血，脉方现数。因前痈未溃，肺胀大，脉反涩而不出，故不数也。病人素阴虚，臭脓去后，便有发热、盗汗等症，易用熟地黄、山药、茯苓、丹皮、紫菀，兼补肾阴，时当酷月，少加人参、五味、合欢皮以救肺金，迨秋气清凉，方获口完咳止。隔年因多食椒姜，其痈复溃，亦如前法治之而愈。

式武族侄令眷徐氏，年将三十，平素嗜烟。因内热复恣生冷，性又畏热，夏初伤风，未经发散，肺脏寒热素伤，外风未散，郁而为肺痈，初不知服何药，痈已成。始迎诊视，则咳喘不能卧，寒热互作，项

强不能转侧，脉浮大而数，此肺痈将溃矣，告曰：“肺上生疽。”彼尚不信，用苡仁、贝母、甘、桔、葶苈、防风、桑、杏、瓜蒌等药，服三、四日，大脓一出，皆粉红淡血有黄色稠脓，但腥不臭耳。他医谓非肺痈，果痈则隔幔犹臭，今不臭，非痈也。不知此病因风、因冷而伤肺，非火热刑金之证，乃肺疽，故不臭也。医治十余日，脓尽肿消，不甚咳嗽，彼以为脱然而愈矣，遂畏热露卧檐阶，夜受风凉，次日大热大喘，犹秘不言。至第三日，手足抽搐，头痛如破，汗出不止，周身痛极，颈项后仰，角弓反张，昏厥下利，询之再三，始言其故。余后知为破伤风也，外患疮疡，破伤风寒，角弓反张，尚为不治，今内痈伤风，则更难治矣。已备棺衾，求余格外治之，遂以桂枝、细辛、赤芍、附子、炮姜、茯苓、甘、桔，先治风寒，仿小青龙治法，如此药不易方，服七日，身方柔软，汗泻稍宁，略有生机。忽又发喘，不能平卧，腹胀如鼓，两足肿硬，又成水蛊，此平素饮冷之故。遂朝服金匱肾气汤一剂，桂、附各一钱以水，午用人参、白术、炮姜、茯苓、苡仁、五味子、甘、桔补中保肺。盖病者中寒，麦冬、贝母清润之药，一片不能入剂，倘误用之，则泻不止故也。肿消喘定之后，肾气汤易为丸，参术煎药，计服百剂，然后痈完咳止。嗣后不能断烟食，冷饮肿病，每年必发，皆以温肺温胃而愈，此肺痈变证。治病必须图活，因病制方，不宜固执也。

吴虞能兄得肺痈证，自不知，而医亦不识也。正月半后，招余往诊，则围被抱火，身坐火箱，犹畏寒甚。但云咳嗽不能卧，寒热时发，胸背胀痛。初医先云伤风，继云肺寒。用桂枝、细辛、干姜、二陈等药，已十余日矣。诊其脉，两寸涩而数。以手按其胸背，则内痛甚，口出腥臭腐气。此肺痈将溃，故作寒热，非真寒，乃内痈作脓之寒也。令其去火，急平肺排脓，使痈早溃，免传他叶。用苡仁、贝母、桔梗、甘草、防风、桑、杏、地骨皮、金银花、白芨。四剂，则黄白臭脓日吐两碗，因嗜烟酒，肺素大热，幸不气虚。脓尽之后，现阴虚细数之脉，发热盗汗之证，此盖金病不能生水，纯用六味地黄汤去泽泻，加

苡仁、贝母、麦冬、沙参、紫菀、五味等药。百剂方获完口，乡居数月，静养而康。

《素園医案》

高锦庭

张某某，伏暑三候已外，湿郁化火之邪，从汗而出，不能化清，留于肺胃之络，乳旁结肿，渐见红色，势必结脓外泄，此外肺痈也。所幸卫分之邪渐清，胃口尚健，可以收功。但络间之疡，必致旷日持久，慎无欲速，欲速则变生。

六君子汤 制蚕 蝎尾 酒炒

二诊：读书人心营素虚，加以诵书伤气，此肺络本伤，病后所以余邪入络也。今既穿溃，脓色尚正，但咳吐俱关肺气，一动一作，脓必外泄，调理之难，概可见矣。是非用补法，加意自摄不可，惟明理者自揆之，庶几可收功。

拣真条参 上黄芪 冬术 炙草 制首乌 归身

三诊：前方十剂，饮食倍增，滋味之物，以养阴化气，不独药之补气也。疡势渐见脓稀，然不足恃也。此病所忌外感风寒则生咳，内动肝火则亦咳，咳则疡必鸱张，须平心气，慎风寒，以保内外，百日之内，可以无虑。少君固自识机宜，无须老夫饶舌也。

前方去 首乌 加淮山药 白芍 炒熟地

四诊：补气养营，脓渐见干泄，动作又觉有神，从此可望完复，然百日正引完满之期，当局尤宜加意慎调，慎无轻忽。

黄芪 四君 四物 海参 猪脊髓胶为丸。

《谦益斋外科医案》

黄凯钧

徐，五一，右胁闪痛，咳呛腥痰，内痈之象。

苡仁 桑皮 地骨皮 橘红 茯苓 杏仁 党参 白术 甘

草

六服竟愈。

《肘后偶钞》

何书田

肺阴内伤，咳吐脓血，兼之大肠下注，肛热便闭，作痛不止。由产后络伤太阴、阳明，脏腑两损矣。即外科所谓肺痈、肛痈兼证。殊难调治。

生地 石膏 麦冬 兜铃 麻仁 洋参 知母 川贝 花粉
柿饼

外科肠痈方

生黄耆 洋参 川贝母 知母 麻仁 羚羊角 沙参 甜杏
仁 远志 黄芩

复诊：先天单弱，胎前失血，产后渐成虚怯，本已难治；近兼脾泄，土不生金。润燥两难，不可治也。

党参 沙参 山药 薏苡仁 橘白 洋参 蛤壳 茯苓 川
石斛 桑叶

二复：肺痈小愈，咳呛不已，时欲吐血；脉细数，大便不结。已来本元之候，殊难奏效。

龟板 沙参 山药 桑叶 川斛 红枣 洋参 川贝 云苓
莲肉 橘白

《箬山草堂医案》

林佩琴

本。老年嗜饮热火酒，致热毒熏肺，发疮生痛，咳吐秽脓，胸右痛，不利转侧，脉左大。初用桔梗汤去芩、姜，加连翘、山栀，四服咳稀痛止。仍宜排脓解毒，用桔梗、银花各一钱 贝母钱半 生薏苡五钱

当归、甘草节、广皮各一钱二分 白芨 生芪各一钱 甜葶劳炒七分。

数服脓稀疮痍皆平。

《类证治裁》

抱灵居士

芦湾李。十岁。咳嗽咽痛，发热不恶寒，无头痛，溺赤，唇红，口干舌黄，吐痰腥臭，嚼黄豆不腥，脉细滑，此肺痈也。或以发表之药不应；以十六味桔梗汤去归、防、枳壳、瓜蒌、葶苈一剂，热咳减；以地骨、桑皮、天麦冬、瓜蒌、川贝、生芪、甘桔、灯心一剂，食冷梨三个，作呃，咳热更甚，脉小疾；以甘桔、连翘、牛子、知母、川贝、地骨、百合、杏仁、茯苓、灯心二剂，又以薏苡当茶服之，热减咳退，盗汗，进食，泻黑粪；以凉膈散去硝、黄，合导赤散加桔梗、瓜蒌二剂好，日中潮热咳嗽；以小柴胡汤合导赤散加花粉、桔梗二剂，热退，咳止，午潮热，舌苔黄厚，溺清；以二陈汤加芩、连、枳、柴胡、川贝、灯心二剂，五更咳甚，脉弦细；以紫菀膏一剂，泻二回，咳好，早咳黄痰，潮热，手冷；以六君子汤用玉竹加川连、枳实、神曲、生姜三剂，饮食大进，日中潮热，盗汗；以生熟地、柴胡、地骨、黄芩、寸冬、生芪、茯苓、术、甘桔、川贝三剂，热汗皆止，舌黄全退，间日潮热盗汗吐痰；以二陈汤加枳桔、白术、百合、柴胡、紫菀、玉竹、生姜六剂而愈；以参苓白术散去西砂、加紫菀、寸冬、百合为丸服。冬月咳热，以六君子汤加黄连、枳实、桔梗三剂好；以紫菀膏一丸，泻黑粪而全愈。

张么，咳嗽，以荆防败毒、华盖之类不应，咳欠胸痛不眠，喜冷饮，不恶寒，唇红，舌黄，脉涩，痰如米粥，味甜，乃脓也，嚼生黄豆不腥，为肺痈也。以桔梗杏仁煎一剂，薏仁米代茶服之，夜得眠二时；又加葶苈一剂，夜咳，呕脓甚，胸隐痛，出热汗，食减；以十六味桔梗汤三剂，日食鲤鱼汤咳减，脓稀，日晡五心热，盗汗，人倦，脉濡；以四顺散加牛蒡、知母、地骨、生芪、黄连、灯心一剂，盗汗止，人健。因食鸡，夜咳甚，呕发热，以导痰汤加生芪、黄连、桔梗、寸冬、竹茹一剂，热退，咳减，舌尖泡，心痛；又一剂，五更咳甚；以枳桔二陈汤加

知母、贝母、黄连、连翘、紫菀、竹茹、白术二剂，日咳止，夜咳一次，五更咳几口。饮薏苡汤则止；又得薏苡仁根苗煎汤代茶，咳全止；以六君子汤加枳、桔、黄连、连翘、知母、贝母四剂，半夜不咳，二更咳几口，嚼黄豆有腥，咳白沫无脓。日食李、杏子多，五更干咳甚，以六君子汤加枳实、黄连六剂，早晨呕苦水，咳痰；以六君子汤加黄连、枇杷、竹茹、生姜一剂而愈。

《李氏医案》

费伯雄

某。痢久发热，咳嗽吐脓腥秽，此肺络大伤之故。

鲜百部三钱 鲜石斛三钱 夜合花三钱 女贞子二钱
南沙参三钱 杏仁泥三钱 象贝三钱 萎皮仁各三钱 天冬二钱
云苓二钱 橘红一钱 薄荷一钱 竹叶二十张
金丝荷叶去背白毛，三张

某。肾水久亏，肝阳上扰，肺金受克，呛咳痰腥，已成肺痈。宜壮水柔肝，清养肺气为治。

天麦冬去心，各一钱半 鲜百部三部 橘红一钱 女贞子二钱
生石决打，六钱 南沙参四钱 合欢花三钱 生苡仁四钱 象贝母三钱
甜杏仁去皮、尖，三钱 瓜蒌皮三钱 川部金二钱 炙桑皮三钱
金丝荷叶去背白毛，三张

复诊：肝火犯肺，致成肺痈重症。拟壮水柔肝，清养肺气。

原方加牡蛎、淮药、北沙参、川贝、蜜炙、百部、怀牛膝、梨、莲子、早莲。

某。小儿肺痈，症势甚笃，姑拟清肃。

蒸百部 合欢皮 生苡仁 陈橘红 石决明 瓜蒌皮 麦门冬
桑白皮 南沙参 怀牛膝 象贝母 甜杏仁 竹叶

《费伯雄医案》

张乃修、

陈，左，肝郁气滞，病从左胁作痛而起，加以火灸络热动血，屡进阴柔之药，阴分固赖以渐复，然湿热由此而生，发为浊症。湿热逗留，风邪外触，遂致咳嗽。先以燥药伤气，致气虚不能鼓舞旋运，饮食悉化为痰。又以柔药滋其阴，酸寒收湿，痰湿之气，尽行郁遏。以致痰带腥秽，色尽黄稠，黄为土色，是湿痰也。今内热咳嗽，痰仍腥秽。脉数濡弦，左部虚弦，舌苔薄白而滑。此气阴两亏，而湿热逗留之象，从实变虚，从假变真，殊难措手。前人谓因虚致病者，补其虚而病自除，因病致虚者，去其病而阴自复。八年之病，虽有成例所遵，恐鞭长莫及耳。拟导其湿热下行，而不涉戕伐，俾得熏蒸之焰息，即所以保其阴气之消耗也。

光杏仁 冬瓜子 生薏仁 炙桑皮 枇杷叶 云茯苓 青蛤散 泽泻 青芦管

杨左，大病之后，湿热未清，熏蒸肺胃，咳嗽痰黄，不能着卧。恐成痲痿重症。

冬瓜子 枳实 瓜蒌霜 光杏仁 旋复花 炒竹茹 生薏仁 郁金 制半夏 茯苓 枇杷叶 青芦管

二诊：泻肺之湿热，喘减能卧，痰稠转稀。但咳热未除。前法再冀应手。

杏仁泥 海浮石 生薏仁 瓜蒌霜 冬瓜子 郁金 橘红 盐水炒 茯苓 桔梗 水炒竹茹 枇杷叶 青芦管

《张聿青医案》

王旭高

某。肺病咳吐脓痰，肺叶已伤，势属重候。

羚羊角 冬瓜子 桔梗 葶苈子 苡仁 生甘草 桃仁泥 野苡根 川石斛 芦根

又：痰臭虽减，咳嗽未除。

羚羊角 川贝母 杏仁 苡仁 桃仁 桔梗 苏子 甘草
冬瓜子 芦根 野菱根

《王旭高临证医案》

柳宝诒

顾。咳引左胁作痛，痰色瘀紫，气息腥秽。瘀阻肝肺之络，为暑热所蒸，所津血为臭腐。脉象软数，舌色干红。脏阴已伤，而瘀热未化。仿内痈初溃例，用苇茎汤加味。

生苡仁 冬瓜仁 桃仁 鲜南沙参 瓜蒌皮 桑白皮 粉丹皮 连翘 归须 忍冬藤 川贝 枇杷叶 青芦根 鲜藕煎汤代水

《柳宝诒医案》

余听鸿

常熟鼎山高渭荣，春初咳嗽，至仲春痰中带血，味兼腥秽。延他医治之，进牛蒡、豆豉、枳壳、厚朴等，服后逾甚。邀余诊脉，细数无力，咳嗽痰血味臭，曰：肺痈将成。胸有隐痛，络瘀尚未化脓，尚有壅塞，肺叶所坏无几，急速开提，使脓外出，不致再溃他叶，拟桔梗甘草汤、金匱旋复花汤合千金苇茎汤。因其脓成无热，用芦头管干者一两，煎汤代水。服三剂，每日吐血脓臭痰一茶盏，至四日脓尽而吐鲜血，臭味亦减，未尽。将前剂去桃仁、桔梗，加枇杷叶、绿豆皮等，服五六剂，血尽。再进以金匱麦门冬汤、千金甘草汤等，加沙参、石斛、百合等清肺养胃而愈。再以甘凉培土生金，调理一月，强健如故。

后有常熟白龙港某，与高渭荣为友，二人酒肆中回，同日咳嗽，亦生肺痈，至高渭荣病愈往探之，即邀余诊之。脉已伏，脓血甚臭，倾吐满地，裸体卧床，用扇扇之，口中闹要吃西瓜饮冷水。他人摸

之，体若寒冰。众人询问何如。余曰：肺已烂尽，一身之阳气，俱从外泄，危在顷刻，卢扁再生，亦无治法。至夜而歿。仲景谆谆告诫，成脓不救，使人早治。然将成未成时，不治必死，治不得法，亦多死。

长田岸有孩六岁，正吃饭，被母打一下，大哭，饭正满口，有饭粒呛入肺窍中，后即咳嗽，无寒热，饮食二便如常。就余诊，服肃肺清散之品五六剂，见有寒热，饮食渐减。又停半月来诊，见痰中血丝，色殷而少，胸中隐痛，服苇茎汤合疏开气法，罔效。细询其病之始末。其母曰：吃饭大哭，呛咳而起，咳嗽月余，见血后口中臭秽。余细视血中有白点微黄，脓也。余思食物呛入肺管，壅塞为痛，将灯心刺鼻孔使其喷嚏，吹以皂角末。后得嚏，痰血稍多，再将旱烟喷之，使其咳更甚，咳甚大哭作呕，呕血块两枚，如蚕豆大，兼脓痰。余将血块拈起剥开，中有白色朽腐如饭米形，服以苇茎汤合金匱旋复花意，另服皂荚丸，一日一粒。服药三剂丸三粒，脓血清楚。再服麦门冬汤加枇杷叶、沙参、石斛之类而愈。故人饮食之间，不可多言喜笑，倘有物呛入肺管成肿，医不能知，自亦不知，酿成大患，可不慎欤。此孩幸是藜藿农家，听医所为，若绅宦之家，娇养柔嫩，即医肯尽心施治，病家未必信，即病家信，医家亦未必肯独任劳怨，治病之弊如此。故治病误于医者固多，病家自误者亦少。余治肺病，以宗金匱法为最多，芳香金石之品，从来未敢轻试。

某寺和尚，冬温咳嗽，每日饮橄榄、芦根汤，数十日，咳呛日久，痰臭不出。就诊于余。脉右寸关数大而硬，时有鼓指。余曰：喉中痰少而臭，脉见右大鼓指，肺病已经成脓，急宜开提，使脓倾出，免溃他叶，以甘草、桔梗、千金苇茎法。服后吐出臭腻黄色脓痰碗余。因其脓出太多，气短纳少。余曰：久咳脓多，肺叶败坏，欲痿之势，进炙甘草汤。他医见之，曰：此是酒劳，被其误治，先服桃仁，后服姜、桂，皆非治法。不知古人立方，有奇偶佐使。后延他医治之，迁延月余，吐脓不止而歿。

《余听鸿医案》

方耕霞

吴。口中辟辟燥，胸中隐隐痛，咳嗽痰秽，此肺病也。仲师谓脓成者殆。而亦有不尽然者。今谷食杳然，形瘦骨立，肺肾生化之源已绝，秋分在迳，殊属可虑。

蛤粉炒阿胶 马兜铃 白梗米 甜杏仁 枇杷叶 川贝母
生草 金石斛 百合 糯稻 根须

《倚云轩医话医案集》

凌奂

吴，肺病已成，咳吐脓血，气逆痰稠，右肋引痛，脉右弦滑兼数，治宜清肃上中。

生米仁 真川贝 连翘 青芦梗 甜瓜仁（如无以冬瓜子代）
炙紫菀 经霜桑叶 陈年芥菜卤 白杏仁 炙冬花 银花露 冬
瓜煎汤代水

如初起去川贝、紫菀、冬花、芦梗、芥菜卤、加桃仁、苦桔梗、川郁金、全栝萎、芦根。

肺痿宜从金水双亏法。

《凌临灵方》

巢渭芳

乌龟墩，老妇，七十一岁。素体丰肥，春感时风，呛咳气短，痰臭夹红，脉细坚。葶苈子、桃仁、花粉、川石斛、瓜蒌皮、生苡仁、南沙参、生草、光杏仁、蛤黛散、紫菀、麦冬、款冬花、梨。

复诊：去葶苈，加白蜜、通草，调治半月而愈。

太平桥，某左，三十二岁。咳呛烦热，唾吐臭痰，夹血如脓，脉数肋痛，从肺病治之。炙甜葶苈、光杏仁、天花粉、生草、蛤黛散、银花、

炙紫菀、鲜石斛、生苡仁、大贝母、瓜蒌皮、鲜芦根。服之即效。

《巢渭芳医话》

陈莲舫

遇寺，罗。肺病溃烂，臭脓涌吐，咳呛绵延，脉息弦细，肺叶所伤甚多，并恐血来，治以排解。

马兜铃 冬瓜子 旋覆花 败酱草 益元散 炙桑皮 茅根
北沙参 生苡仁 光杏仁 粉蛤壳 广橘红 川通草 枇杷叶

遇寺，罗。肺病连月，肺烂已伤三四叶，秽气直冲，脓血交吐，气喘胁痛，腐烂尚在鹑张，脉见沉弦带数，治以排脓涤痰。

马兜铃 生米仁 炙桑皮 粉蛤壳 茜草 根 生白芍 冬
瓜子 光杏仁 地骨皮 淮牛膝 番降香 广橘红 茅根

金。肺病溃烂，秽气直冲，痰色青黄红白无一不有，脉弦，治以排脓降逆。

南沙参 羚羊片 青黛拌蛤壳 白茯苓 新会皮 地骨皮
马兜铃 生米仁 生甘草 桑叶 冬瓜子 生藕 川贝母

《莲舫秘旨》

王仲奇

周，小南门，三月十五日。咳呛失血，有秽恶气味，动辄气急，时有汗出，交睫则忽忽谵语，惊惕肢掣，形瘦容晦，脉濡弦数。肺伤叶坏，心神失宁，防变切切。

海蛤粉包，三钱 金钗斛三钱 茯苓三钱 丹参二钱 生苡仁四钱
茜根炒，钱半 冬虫夏草钱半 紫菀钱半 冬瓜子四钱 藕节炒，四钱
枇杷叶去毛布包，三钱 马兜铃炙，钱半

二诊：三月十七日。脓血暨秽恶气味已弭，咳呛未休，气急稍安，汗出略减，汗出之后仍觉畏寒，交睫仍忽忽有谵语，惊惕肢掣较宁，脉濡弦滑数。证属肺坏，前方尚获应机，守原意出入之。

海蛤粉包，三钱 金钗斛二钱 茯苓三钱 马兜铃炙，钱半
丝瓜络三钱 紫菀钱半 桑白皮炙，钱半 生苡仁四钱 甘草六分
地骨皮炒，三钱 茜根炒，钱半 枇杷叶去毛布包，三钱

三诊：三月廿一日。肺为娇脏，乃心之盖，喉即肺系，鼻为肺窍，并通于脑，肺脏既伤，心神弗宁，脑亦失清，咳唾脓血有秽恶气味，动辄气急，时有汗出，鼻失爽利，脉濡弦。清络保肺尚安，梦谵、惊惕、肢掣较宁，仍守原意。

海蛤粉包，四钱 金钗斛三钱 茯苓三钱 桑白皮炙，钱半
川贝母去心，钱半 马兜铃炙，钱半 生苡仁五钱 紫菀钱半
香白薇炒，二钱 地骨皮炒，三钱 冬虫夏草钱半 枇杷叶去毛布包，三钱

四诊：三月卅一日。咳唾脓血有秽恶气味，鼻塞多涕亦有秽恶气味，动辄气急，寐则汗出，或有梦谵、惊惕、肢掣，脉濡弦。仍以肃肺宁心清脑。

海蛤粉包，三钱 金钗斛三钱 茯苓三钱 桑白皮炙，钱半
杏仁去皮尖，三钱 川贝母去心，钱半 马兜铃炙，钱半 紫菀炙，钱半
生苡仁四钱 凌霄花二钱 地骨皮炒，三钱 青龙齿煨先煎，三钱
枇杷叶去毛布包，三钱

五诊：四月十七日 咳唾痰仍黄厚，然不似前之如脓血而秽恶，鼻塞稍通，气急较安，惟入寐仍多梦欠清，或有汗出，脉濡弦。仍肃肺宁心清脑。

海蛤粉包，三钱 金钗斛三钱 茯神三钱 青龙齿煨先煎，三钱
远志肉炙，一钱 桑白皮炙，钱半 山梔炒焦，钱半 香白薇炒，二钱
辛夷一钱二分 凌霄花二钱 条芩炒，钱半 罂粟壳钱半

梁右，辣斐德路。咳唾脓血，气紧作闭，仅向右卧，不能着枕，跗肿面浮，脉濡弦。肺伤叶坏，甚难疗治。

桑白皮炙，钱半 玉苏子二钱 白前钱半 杏仁去皮尖，三钱
甜葶苈隔纸炒，二钱 紫菀钱半 全瓜蒌三钱 马兜铃炙，三钱
款冬花炙，钱半 象贝母三钱 茯苓三钱 生苡仁四钱

枇杷叶 去毛布包，三钱

二诊：咳唾脓血已稍见减，气紧作闭较舒，面浮跗肿仍未尽退，仅能右卧，仍难着枕，脉软弦。肺伤叶坏，守原意以治。

桑白皮炙，钱半 玉苏子二钱 紫菀钱半 甜葶苈隔纸炒，二钱
地骨皮炒，三钱 粉丹皮炒，钱半 象贝母三钱 茯苓三钱 冬瓜子四钱
生苡仁四钱 陈赤豆四钱 马兜铃炙，钱半

《王仲奇医案》

费承祖

安徽按察使卞柳门，呛咳内热，痰味腥秽，将成肺痈。脉来滑数面实。痰热销烁肺阴，清肃无权。

南沙参四钱 马兜铃一钱半 生苡仁四钱 生甘草四分
川贝母三钱 瓜蒌皮三钱 川石斛三钱 鲜百部三钱 牡丹皮二钱
甘菊花二钱 冬瓜子四钱 鲜生茹一钱半 鲜竹沥二两

连服十剂而愈。

苏州朱君季裕，患肺痈，呛咳吐血，痰气腥秽，大便脓血，小溲不利，脘闷腹痛，肺热生痛，脓血上升下注，气失清肃，脉来滑数。予肃清肺热，兼化痰凉血。

马兜铃一钱半 生甘草五分 象贝母三钱 瓜蒌皮三钱
甜杏仁三钱 川石斛三钱 京玄参一钱半 鲜生地四钱
鲜竹茹一钱半 冬瓜子四钱 藕五片

服二十五剂而愈。

四川卓君少梅，患肺痈，兼感风邪。咳嗽痰腥，发热，鼻塞头痛，口渴，舌苔黄腻，脉来弦滑。向来嗜饮，积湿生痰，阴气灼津，肺失清肃，风邪外袭，治节更不能伸。必须表里双解。

淡豆豉三钱 蝉衣一钱 生草五分 象贝母三钱 瓜蒌皮三钱
马兜铃三钱 川石斛三钱 光杏仁三钱 鲜竹茹三钱 冬瓜子四钱
枇杷叶露一两

连进二剂，汗出热退，头痛止，鼻窍通。风邪已解，照前方去豆豉、蝉衣。加南沙参四钱、冬桑叶钱半。服十剂，痰热肃清而愈。

《费绳甫医话医案》

吴鞠通

己卯年，朱詠斋世兄，五十余岁。以二月初受风，与桂枝汤一帖，风解，胆怯不敢去厚衣，因而汗多；初四、初五等日受风温，口渴思凉，脉洪数，先与辛凉轻剂不解，脉又大，汗更多，口更渴，身更热，因与辛凉重剂石膏等一帖，身凉渴止脉静，仍胆怯不去厚衣；初十日，当大内差使，坐夜起五更，衣更厚，途间不敢去皮衣；以致重亡津液，而成肺病。与苇茎汤日二、三帖，服之五、七日不应，脓成臭极，加苦葶苈子五钱，脓始退，未能十分净尽；后十日又发，脓又成，吐如绿豆汁浓臭，每吐一碗余，又与前方加葶苈三钱，服二帖方平。后以补胃逐痰饮收功。再其人色白体肥，夙有痰饮，未病之前，秋冬两季，已在上书房行走，早起恐寒，误服俗传药酒方，本不嗜酒，每早强饮数小杯，次年患此恙之由也。

癸亥三月初八日，王氏，五十八岁。初起喉痹，为快利药所伤，致成肺肿。胸中痛，口中燥，痹仍未痊，不食不寐，痰气腥臭，已有成脓之象，脉短而数，寒热，且移热于大肠而泄泻。难愈之证，勉与急急开提肺气，议千金苇茎汤与甘桔合法。

苦桔梗二两 桃仁五钱 冬瓜仁五钱 生薏仁一两 甘草一两
鲜苇根四两 水八碗，煮成三碗，渣再煮一碗，分四次服。

己巳年冬月，堂伯兄，四十岁。饮火酒，坐热炕，昼夜不寐，喜出汗，误服枇杷叶、麻黄等利肺药，致伤津液，遂成肺病，臭不可当，日吐脓二升许。用千金苇茎汤合甘桔法。

苇根八两 苦桔梗三两 桃仁一两五钱 薏仁二两
冬瓜仁一两五钱 生甘草一两 煮成两大茶碗，昼夜服完碗半，脓去十之七、八，尽剂脓去八、九。又服半剂，毫无臭味。后以调理脾胃

收功。

《吴鞠通医案》

曹沧洲

某左。咳痰气秽且有血，渐成肺病。

鲜沙参七钱 知母一钱半，去心 地骨皮三钱 鲜芦根一两，去节
鲜生地一两，打 川贝母三钱，去心 白杏仁三钱 生石膏三钱
黛蛤散一两，包 冬瓜子一两 白前一钱五分

某左。病逾半月，臭痰脓血并吐，此属肺病。

鲜生地一两 鲜沙参五钱 鲜芦根二两 生石决明四钱
霜桑叶三钱 枇杷叶三钱 川贝三钱 冬瓜子一两 生蛤壳二两
知母二钱 竹茹三钱 甘草五分 丝瓜络三钱

《吴门曹氏三代医验集》

金子久

辛伤子肺，痰入于络，胸胁掣痛，引及腰背，冷热频作，口秽痰臭，脉来滑大，病起匝月，非肺病即胁痛也，当泻肺，参用宣络。

冰糖炒石膏 白芍 川贝母 橘红 生苡仁 丝瓜络 青蛤散 桔梗 桃仁泥 淡甘草 旋复花 芦根

二诊：口秽痰臭，由来月余，胃通于口，痰生子胃，秽气臭气皆属于胃火，火旺乘肺，则清肃之气失司，故咳逆绵延不已，有时骨节酸楚，有时形体畏寒，眠难办纳式微，左脉小，右脉大，仿用千金苇茎汤，参用喻氏救肺汤。

冰糖炒石膏 丝瓜络 生苡仁 白芍 白前 淡甘草 川贝母 青黛拌蛤壳 橘络 桔梗 枇杷叶

《金子久专辑》

丁泽周

闻左。外感风寒，袭于肺胃，膏粱厚味，酿成痰浊，血瘀凝滞，壅结肺叶之间，致成肺病。是以咳嗽气粗，痰秽如脓，胁痛难于转侧，振寒发热，舌苔白厚而腻，脉象浮紧而滑。病来涌急，非猛剂不为功，急仿金鉴射干麻黄汤合金匱皂荚丸，一以散发表邪，一以荡涤痰浊。

净麻黄四分 嫩射干八分 甜葶苈炒研，八分 光杏仁三钱
象贝母三钱 生甘草五分 苦桔梗一钱 嫩紫菀一钱 生苡仁四钱
冬瓜子四钱 川郁金五钱 皂荚末蜜为丸吞服，五分

二诊：前投发散肺邪，荡涤痰浊之剂，得汗寒热已解，咳嗽气急亦见轻减，而痰稠腥秽依然，胸闷胁痛，不思饮食，小溲短赤，苔腻，脉滑数，胶粘之痰浊，蕴蓄之痰湿，结于肺叶之间，一时难以肃清。今宜制小其剂，蠲化痰浊，清肃肺气，毋使过之，伤其正也。

净蝉衣八分 嫩前胡八分 嫩射干五分 生甘草六分 桔梗一钱
光杏仁三钱 象贝母三钱 炙紫菀一钱 生苡仁四钱 冬瓜子四钱
橘红络各一钱 桃仁泥包，一钱

沈左。外感风温，内蕴湿热，熏蒸于肺，肺脏生痼，咳嗽胸膈牵痛，痰臭脓血，身热口干，脉滑数，苔黄，重症也。急拟辛凉清温，而化痰瘀。

薄荷叶八分 冬桑叶二钱 粉丹皮二钱 桃仁一钱 生甘草八分
桔梗一钱 银花五钱 连翘壳三钱 光杏仁三钱 象贝母三钱
生苡仁五钱 冬瓜子四钱 活芦根去节，二尺
鲜金丝荷叶去背上白毛，十张

另单方：金丝荷叶一两 去毛打汁、陈酒一两、杏仁粉五钱
川贝粉五钱，炖温服之。

前方连服三剂，咳嗽脓血均减，身热亦退大半，原方去桃仁及薄荷叶，加轻马勃八分 通草八分。

龚右。咳嗽自去岁初冬起见，至今春益甚，胁肋牵痛偏右，痰多腥臭，形肉渐削，脉象濡数，舌质红苔黄。阴分素亏，木火刑金，湿热互蒸，肺病早成，肺叶已伤，输转无权，惟虑由痈而痿，致人不治之条。

南北沙参各三钱 生甘草五分 生石决四钱 抱茯神三钱
甜光杏三钱 川象贝各三钱 瓜蒌皮二钱 生苡仁四钱 冬瓜子四钱
干芦根去节，一两 金丝荷叶去背上白毛，十张

二诊：前方服二十剂，咳嗽痰臭，均已大减。原方加蛤粉炒阿胶二钱，蜜炙兜铃一钱。

《丁甘仁医案》

王奶奶。肺病已成，漫肿如盆，疼痛不已，胸闷气急，汗多肢冷，脉象濡细。初由风邪痰瘀蕴结肺俞，继则酿脓，肺炎叶举，清肃之令不得可行。颇虑正不支持，至虚脱之变。勉拟扶正托毒，清肺化痰，尽人力以冀天佑。

生黄芪四钱 生草节六分 苦桔梗一钱 抱茯神三钱
炙远志一钱 全当归三钱 京赤芍二钱 大贝母三钱 炙僵蚕三钱
丝瓜络二钱 冬瓜子五钱 瓜蒌皮三钱 水炙桑皮二钱

郑先生。肺病已成，咳嗽痰臭，气喘不能平卧，肺病及脾，清气下陷，腹疼便泄，纳少泛恶，形瘦骨立，脉细如丝，汗多肢冷，阴不敛阳，阳不摄阴，喘脱之变，即在旦夕间矣。勉拟一方，聊尽人事，以冀天眷。

炒潞党二钱 米炒于术钱半 炒怀药三钱 云茯苓三钱
煅牡蛎三钱 花龙骨三钱 生苡仁四钱 冬瓜子三钱 川象贝各二钱
浮小麦四钱 炙粟壳三钱 陈广皮一钱 干荷叶一角

沈左。肺病已成，咳嗽痰臭，面浮肢肿，大便溏薄，舌光红，脉弦数。肺叶已伤，脾土薄弱，脉症参合，已人不治之条，勉方冀幸。

南沙参三钱 连皮苓四钱 炒怀药三钱 川象贝各二钱
水炙桑叶钱半 水炙桑皮钱半 炒扁豆衣三钱 生苡仁四钱

冬瓜子皮各三钱 北秫米包,三钱 干芦根去节,一两 干荷叶二角

另用一茶杯芥菜露,冲一茶杯豆腐浆,炖温服。

《丁甘仁医案续编》

邵杏泉

肺胃痰热内蕴,咳嗽吐痰臭秽,防成肺病。

芦根 桃仁 苏子 象贝 橘红 苡仁 冬瓜子 杏仁 竹茹 款冬

二诊:肺病已成,吐痰臭秽而见血。此温痰久郁所致,喘变可虞。

芦根 桃仁 石膏 桑叶 沙参 苡仁 冬瓜子 鲜地 枇叶

三诊:肺病之势略完,但舌垢不化,总不足恃。

芦根 桃仁 生石膏 杏仁 桑皮 苡仁 冬瓜子 鲜地 枇叶

四诊:肺病之势大衰,咳嗽大减,仍从前治。

芦根 桃仁 生石膏 地骨皮 甘草 川贝 苡仁 冬瓜子 桑皮 梗米 沙参 杏仁

《三折肱医案》

傅松元

程少丰者,暑症退后,伏热未清,因食物不慎,致余邪流连上焦,气蒸肺脏,至秋转为咳嗽,引起膈痛,痰涎多而臭恶,且热蒸肌表,咳则小有汗,不能食,按其脉,两寸浮紧滑急。余曰:“此为肺病,宜先清泄上焦。”乃用石膏、牛蒡、羚角、连翘、桔梗、贝母、甜瓜子、鲜薏根、苇茎等二三剂,咳吐血痰日二三碗,后竟叶如猪肺之成块者,二茶杯,身热仍不解。改用鲜沙参、鲜生地、元参、麦冬、光杏、萎皮,前方中除去石膏、羚角、甜瓜子、牛蒡子,又三剂,表热虽退,不

思谷食，肺块虽无，而痰尚红色。又改用北沙参、白芨片、鲜蕤根、蕤苡仁等，二三剂，痰少红止，咳稀食进。历进十九日，后以保元益肺滋养，如燕窝、阿胶等调理弥月而痊。

《医案摘奇》

贺季衡

江男。肺病秽痰复退，鲜血复来，午后更衣，猝然汗出如雨，逾二时甫止，右脉沉伏，舌苔复形滑白无神。肺气大伤，胃又告败，殊防暴脱，姑用生脉散加味挽之。

西洋参二钱 生黄芪四钱 陈橘皮一钱 太子参四钱
川百合四钱，炒 清阿胶二钱 生牡蛎八钱，先煎 五味子八分
云神四钱 大麦冬三钱 炙甘草八分 太阴元清石四钱，先煎

孙男。肺病用糯米姜枣汤，温养肺气，寒热止，大汗收，咯红亦已，胃亦渐复，便溏亦实，舌白亦化，边紫兼蓝，右脉未起，痰难吐，呛咳气移。可见肺气虽略固，而湿浊仍未清。其小水欠禁者，以肺虚及子也。犹在畏途。

南北沙参各四钱 太子参三钱 淮山药四钱，炒 清阿胶二钱
陈橘皮一钱 炒苡仁五钱 肥玉竹五钱 生黄芪三钱 大麦冬二钱
青蛤壳五钱，先煎 生诃子肉一钱五分 冬瓜子四钱

汪女。肺病将近两月，呛咳痰秽，两胁痛，不得平卧，内外灼热，自汗下利，咽痛舌碎，脉弦数。肺胃之阴已伤，里热尚重，有胃败及口糜之虑，症属不轻。

西洋参一钱 淡天冬三钱 川石斛四钱 蛤黛散五钱，包
生苡仁五钱 瓜蒌皮四钱 酒子芩一钱五分 马兜铃四钱
大杏仁三钱 大白芍二钱 象贝母三钱 枇杷叶三钱 梨皮四钱

二诊：昨为清肺涤热，呛咳烦扰及痰腥俱减，渐能安枕，惟口舌破碎更甚，不能进谷，灼热下利，自汗气怯，脉弦数。肺胃阴伤，积热化火，且在重身，着手殊难。

西洋参一钱 淡天冬三钱 乌玄参四钱 酒子芩一钱五分
瓜蒌皮四钱 大杏仁三钱 蛤黛散五钱，包 川石斛四钱 象贝母四钱
云苓神各三钱 枇杷叶三钱，去毛炙 灯芯十茎

三诊：今日口舌破碎俱减，舌底尚破烂，呛咳痰腥，烦扰自汗就退，而仍气怯自利，不能纳谷，脉数渐平，舌心尚黄。口舌之火势初退，肺胃之阴未复。属在重身，仍为险候。

西洋参一钱 淡天冬三钱 乌玄参四钱 川石斛四钱
酒子芩一钱五分 肥知母一钱五分 黑山栀二钱 瓜蒌皮四钱
蛤黛散五钱，包 大杏仁三钱 象贝母四钱 白桔梗一钱五分
枇杷叶三钱，去毛炙 梨皮四钱

四诊：日来口舌破腐及咽底赤痛俱退，渐能饮咽，而呛咳更甚，痰腥自汗，气怯自利，脉虚数，舌心浮黄。燥火初退，肺胃之阴大伤。重身者仍为险候。

西洋参一钱 南北沙参各四钱 蛤黛散五钱，包 天麦冬各三钱
旋覆花一钱五分，包 川贝母一钱五分 瓜蒌皮四钱 冬桑叶一钱五分
大白芍二钱 酒子芩一钱五分 枇杷叶三钱，去毛炙 冬瓜子四钱

李男。肺痈。呛咳痰红渐退，秽痰未去，左胁痛，脉沉滑，舌白左腻。属在痢后，湿热未消，与寻常火旺者不同。

南沙参四钱 蛤黛散五钱，包 淡天冬三钱 大白芍二钱
大杏仁三钱 白扁豆三钱 云苓三钱 炙桑皮二钱 陈橘皮络各八分
生苡仁五钱 冬瓜子四钱 鱼腥草五钱

《贺季衡医案》

范文甫

王君。壮热不已，胸痛气急，咳吐腥臭脓痰，状如米粥，此肺痈也。苔黄舌绛，脉滑而数，均是热毒内盛之故。

鲜芦根 60克 冬瓜子 9克 桃仁 15克 米仁 9克 鱼腥草 30克
败酱草 30克

二诊：脓痰腥臭，脉数，内热未彻。

鲜芦根 60克 冬瓜子 15克 桃仁 15克 米仁 15克
鱼腥草 30克 象贝 9克 银花 9克

三诊：痰不少，痰亦减少。前方加南沙参 9克

《范文甫专辑》

曹颖甫

吴冠明。住华成路六号。初诊：肺病已经匝月，咳嗽，咯痰腥臭，夜中热度甚高，内已成脓，当以排泄为主。宜桔梗合《千金》苇茎二汤主治。

苦桔梗五钱 生甘草三钱 生苡仁一两 冬瓜子一两 桃仁六钱
炙乳没各二钱 鲜芦根半斤打汁冲服量入煎 犀黄醒消丸每服三钱开水送下

二诊：原方去桔梗 加葶苈子三钱，炒研 用黑枣去核包麻扎入煎

三诊：果服桔梗泻肺二汤合《千金》苇茎，病势略轻，仍宜前法加减。

生甘草五钱 生白芍五钱 生苡仁一两 冬瓜子一两 桃仁六钱
桔梗五钱 香白芷一钱 炙乳没各二钱 轻马勃五分 败酱草三钱
葶苈子三钱，炒研用枣包扎 犀黄醒消丸每服二钱

四诊：肺病无腥臭之痰，病已出险，但时吐浊痰，胶粘黄厚，当从《千金》皂荚丸法，改汤以治之。盖浊痰不除，咳必不能止也。

牙皂末五分 用黑枣去核包煎

五诊：肺病已经出险，而阴气大伤，宜《千金》黄昏汤。

合欢皮如手掌大一块，用水三碗煎至一碗半作两次服。

陈左。住浦东陆家渡。初诊：肺病，咳嗽，胸中痛，上连缺盆，而所吐绝非涎沫，此与悬饮内痛者，固自不同，宜桔梗甘草汤。

桔梗五钱 甘草五钱

二诊：五进桔梗汤，胸中痛止，而左缺盆痛。此肺藏壅阻不通也，宜葶苈大枣泻肺汤。

葶苈子五钱 黑大枣十二枚先煎

三诊：五进泻肺汤，左缺盆痛止。痰黄厚，时见腥臭，及如米粥样者。此湿邪去，而燥气胜也。宜《千金》苇茎汤。

鲜芦根四两 生薏仁一两 桃仁五十粒 冬瓜子五钱

四诊：服《千金》苇茎汤五剂后，咯出之痰腥臭止，而如米粒者亦除。惟痰尚黄厚，肺痈消，而胃热尚盛也。右三部脉浮滑，不复见沉弦之象，可以无后患矣。

粉前胡三钱 生苡仁一两 桔梗三钱 生草三钱 冬瓜子八十粒
桃仁三钱 杜赤豆六钱 大小蓟各三钱 海藻二钱 芦根五两

拙巢注：服此二三日，全愈。

续发初诊：肺痈愈后，复发。咯痰腥臭，见血，心下痛，咳时气从中院上冲。宜清胆胃之火，防其乘肺。

柴胡三钱 生石膏二两 生甘草三钱 淡芩三钱 肥知母五钱
生苡仁一两 芦根四两 冬瓜仁一两 桃仁三钱 杜赤豆一两
全当归四钱

二诊：肺痈未能断根，咯痰腥臭如昔，但不似米粥样耳。痰不黄而色绿，味酸，咳不甚，脉细数，仍宜桔梗甘草汤，不当攻伐，佐以消毒，以清病原。

桔梗一两 生甘草五钱 冬瓜仁一两 昆布一钱五分 海藻二钱
前胡三钱 大小蓟各钱五分 犀黄醒消丸三钱，另服。

拙巢注：后不复服药，专服犀黄醒消丸，愈。醒消丸系王鸿绪法，马培之颇非议之。然用之而效，则马说不足信也。

辛未七月中旬，余治一陈姓疾。初发时，咳嗽，胸中隐隐作痛，痛连缺盆。其所吐者，浊痰腥臭，与悬饮内痛之吐涎沫，固自不同，决为肺痈之始萌。遂以桔梗汤，乘其未集而先排之。进五剂，痛稍止，诸证依然，脉滑实。因思是证确为肺痈之正病，必其肺藏壅阻不

通而腐，腐久乃吐脓，所谓久久吐脓如米粥者，治以桔梗汤。今当壅塞之时，不去其壅，反排其腐，何怪其不效也。《淮南子》云：葶苈愈胀，胀者，壅极不通之谓。《金匱》曰：肺病，喘而不得眠，即胀也。《千金》重申其义曰：肺病胸满胀，故知葶苈泻肺汤非泻肺也，泻肺中壅胀。今有此证，必用此方，乃以

葶苈子五钱 大黑枣十二枚

凡五进，痛渐止，咳亦爽。其腥臭挟有米粥状之痰，即腐脓也。后乃以《千金》葶苈汤，并以大小蓟、海藻、桔梗、甘草、杜赤豆出入加減成方。至八月朔日，先后凡十五日有奇，用药凡十余剂，始告全瘳。九月底其人偶受寒凉，宿恙又发，乃嘱兼服犀黄醒消丸，以一两五钱分作五服。服后，腥臭全去。但尚有绿色之痰，复制一料服之，乃愈，而不复来诊矣。

《经方实验录》

刘世祯

曹伯闻君之女，名常曼，年七岁，患咳嗽吐痰，日夜时作，午后或夜间发热，而色青白，肌肤减瘦。请余诊治，询知两月前曾患麻证，麻证结束后，诸病继作，切其脉浮数，按之弦，痰气腥臭。余曰：此因麻证治不得法，毒蓄于肺，不治必成肺病，为难治。初用排脓散服四、五剂，脉弦数稍退，咳嗽仍如故，接服竹茹、花粉、桔梗、尖贝等味数剂，脉渐转和平，咳嗽时疏时剧，一日忽衄血颇多。余曰病将解矣，连服清金之品，病遂告痊。

《医理探源》

周镇

徐左，米业。癸丑三月患咳嗽，痰腥带血。诊脉右数，舌红苔白。风热蕴肺，不事清散，烟酒蕴毒，遂成肺病。即拟桔梗、桑皮、象贝母、瓜蒌、黑山栀、冬瓜子、薏仁、杏仁、郁金、葶苈、竹茹、枯黄芩、通

草、茜草。另以鲜戟草一味捣汁，温服。一剂血止，痰红亦稀。原方加减，咳少痰清而痊。

全兰芳，嗜饮酒，日三次。壬戌二月初旬，春寒感邪，外寒里热，咳痰如赭红色，气秽，瘦赤。风邪挟酒热伤肺，痲痿须防。冬甜瓜子各五钱，杏仁霜三钱，单桃仁三钱，薏仁四钱，鱼腥草一两，全瓜蒌四钱，挂金灯一钱，黄芩二钱，知母二钱，碧玉散五钱，黑山栀二钱，浮萍二钱，忍冬藤四钱，茅苇茎二两。二剂。另月石四分，黄荆子八分，研末，莱菔汁调服。咳大减，痰秽色均退，原方出入而痊。

周左，冶工业，住南苏秦。喜饮。壬戌春三月感邪咳嗽，痰秽色黄，右肋作痛，月余见血，肺痲见证。拟冬甜瓜子、光甜杏仁、桃、薏、象贝、兜铃、紫菀、黄芩、竹茹、茜草、鱼腥草、茅苇茎。另月石、生矾、龙脑、薄荷、宝珠山茶，研末服。二剂，痰秽减，血止。

十二日诊：痰黄臭大退，右肋痛亦轻。拟清肺化痰，涤痰宣络。蔓荆子、瓜瓣、薏、茹、新绛、桃仁、桑皮、黄芩、紫菀、白前、兜铃、忍冬藤、鱼腥草、茅根。另月石、竹黄、川贝、雄精，研服。三剂。病者急于往沪，辍药二旬。

五月初一日吐血七口。初二又诊：脉数不靖，身热胸闷，痲脓内溃，恐再冲溢。紫菀、竹茹、银花、茜草炭、瓜瓣、薏仁、兜铃、黄芩、桑皮、象贝、荆芥、杏仁、茅根、藕节。另白及、参三七、宝珠山茶，研末服，二剂。

补六日诊：吐血已止，喘分咳盛，气秽。湿火熏蒸，速宜清肺、降胃、涤浊。甜瓜子、薏、杏、知、芩、紫菀、兜铃、鱼腥草、浮海石、鲜竹叶、茅苇茎、无患子根打汁一杯冲。另白及二钱，剪草八分，研末，调服。二剂。

初八日诊：血未复吐，咳减不退，午睡冒风，溃后身热为险。桑叶、丹皮、条芩、知母、黑山栀、杏仁、碧玉散、银花、瓜瓣、通草、玉泉散、鱼腥草、竹叶、茅苇茎、无患子根汁一杯。另白及、月石、剪草，研末服。二剂。吐出黄涎臭脓甚多。

初十日诊：痰秽不觉，口舌麻木而碎。再清蕴热，兼以解毒。粉沙参、浮石、瓜瓣、薏仁、蔓荆子、百合、元参、兜铃、白薇、石斛、贝母、茅苇茎、天冬、无患子根汁。另合欢皮二两，煎代水。另以化毒丹加白及末、皂荚子末三厘，补肺损以涤余秽。小愈，不知调理，后闻又发，他治。

《周小农医案》

方公溥

翁男。12月17日诊：肺失清肃，咳嗽不扬，痰稠腥臭，脉滑数，唇红，舌苔厚腻，证重防变，急与清肺排脓化痰。

粉前胡 4.5克 光杏仁 9克 玉桔梗 6克 干芦根 15克
全瓜蒌 12克 象贝母 9克 海浮石 9克 生甘草 3克 生苡仁 15克
冬瓜仁 9克 天竺黄 4.5克，打 净银花 12克

12月18日复诊：投以清肺排脓化痰之剂，咯痰较爽，腥臭味渐减，脉象滑数较差，舌苔厚腻，再进一步调理。

处方同前，除干芦根，加活水芦根去节一尺、单桃仁 9克

12月20日三诊：咳嗽减而未净，痰黄腥臭较减，脉弦数好转，舌苔厚腻渐化，再进理肺豁痰。

粉前胡 6克 光杏仁 9克 苦桔梗 3克 活水芦根去节一尺
全瓜蒌打 12克 象山贝 9克 海浮石 9克 生甘草 4.5克
生苡仁 15克 冬瓜仁 15克 天竺黄 4.5克 广桔络 4.5克
单桃仁 9克

《方公溥医案》

刘民叔

朱麟书，男，(上略)自述：我在六月二十日那天上午，身体还是很好的，中午吃了三碗饭，在饭后突觉胃部痛得不得了。当时我以为可能是天热关系，就吃了几粒“仁丹”之后，但胃痛反而加剧。我

就至保健站去看，但诊疗结果，说是胃伤，须要吃食小心，是会好的。但在当天晚，寒热发得很高。第二天我至一位中医吴涵秋地方去看，但诊疗结果，说我不是胃病（因为胃病是没有热度的），是肺炎或是肋膜炎，要等验血后，再作决定。以后我在保健站去就诊好几次，证明是肋膜炎（但里面还没有水），验血结果，白血球为九千八百、X光透视结果，是左肺肋膜增厚，当时在这样情况之下，保健站医师说：只要打链霉素及青霉素。这样不知打了多少针，我是记不清楚了。我曾经至上海医学院及广慈医院去就诊，结果都就是肋膜炎。后又至一个西医徐士林处就诊，结果也说是肋膜炎。但我患病已半月多了，针打脱不少了，但热度每天是有增无减。在这种情况下，我就进入医院治疗（安当医院），但在医院中比在家中的病势还要严重，热度增四十度以上，整天我是失去知觉样的。但里面几个医师诊疗意见是不统一的，一个说变性肺炎，一个说是肋膜炎，直至我出院；几个医师诊断还是没有统一。在医院中我拍了一张X光片子，说左肺阴影影响较深，肺门部圆形影较特别深。我出院后，曾至一个西医处就诊，结果说我是脓胸，绝对不是肋膜炎、肺炎，他说最好进医院治疗。在这天我的胸痛得特别厉害，晚上没有好好的睡，第二天我就到刘民叔医师就诊，病热就一天一天减轻，直到现在我身体已慢慢的恢复，胃口亦好了，已能开始回到工作岗位上去工作了。（下略）

初诊：一九五三年七月十一日 病已两旬，寒热未解，胸膈胀痛，咳逆上气，口苦泛恶，痰臭。方用：金丝草四钱 地骨皮 四钱 桑白皮三钱 桃仁三钱 薏苡仁五钱、杏仁二钱 赤豆五钱 葶苈五钱 郁李仁三钱 鲜苇茎一两

二诊：二十日 胸膈胀痛稍缓。方用：金丝草四钱 桑白皮二钱 桃仁二钱 薏苡仁五钱 赤豆五钱 大戟二钱 葶苈五钱 郁李仁三钱 鲜苇茎一两

三诊：十三日 昨夜先寒后热，如症状，胸膈渐安。方用：

金丝草四钱 桑白皮二钱 桃仁二钱 桔梗二钱 丝瓜络三钱
大戟二钱 旋复花三钱 葶苈五钱 甘遂二钱

四诊：十四日 胸膈胀痛大减。方用：金丝草四钱 桑白皮二钱
桃仁二钱 桔梗二钱 丝瓜络三钱 大戟二钱 甘遂二钱
葶苈子五钱 冬瓜子一两 薏苡仁一两

五诊：十一日 方用：金丝草四钱 桑白皮二钱 桃仁二钱
桔梗二钱 旋复花四钱 大戟二钱 甘遂二钱 葶苈子五钱
芡白子五钱 冬瓜子一两 薏苡仁一两

六诊：十六日 方用：金丝草四钱 桑白皮二钱 桃仁二钱
桔梗二钱 旋复花四钱 大戟二钱 芡白子五钱 甘遂二钱
葶苈五钱 冬瓜子一两 薏苡仁一两

七诊：十七日 能睡眠。方用：金丝草四钱 桑白皮二钱
桃仁二钱 桔梗二钱 枳壳二钱 大戟二钱 甘遂二钱 葶苈五钱
芡白子五钱 薏苡仁一两 冬瓜子一两

八诊：十八日 方用：金丝草四钱 桑白皮二钱 桃仁二钱
大戟二钱 甘遂二钱 芡白子五钱 葶苈五钱 杏仁二钱 桔梗二钱
龙须草五钱 郁李仁四钱

九诊：十九日 胸膈更和，眠食更安。方用：人参叶三钱
金丝草三钱 腊梅花三钱 甘遂二钱 大戟三钱 葶苈四钱
郁李仁四钱 厚朴二钱 大黄五分

十诊：十二日 方用：人参叶三钱 金丝草三钱 腊梅花三钱
甘遂三钱 大戟三钱 葶苈四钱 郁李仁四钱 芡白子四钱
白商陆三钱 橘络二钱 大黄五分

十一诊：二十一日 方用：人参叶三钱 金丝草三钱
腊梅花三钱 甘遂三钱 大戟三钱 葶苈四钱 郁李仁四钱
天竺黄二钱 鬼白五钱 厚朴一钱 大黄五分

十二诊：二十二日 方用：人参叶三钱 金丝草三钱
腊梅花三钱 甘遂一钱 大戟一钱 葶苈子四钱 郁李仁四钱

天竺黄一钱 鬼臼五钱 厚朴一钱 大黄五分

十三诊：二十三日 方用：人参叶三钱 金丝草四钱
腊梅花三钱 甘遂一钱 大戟一钱 葶苈子四钱 郁李仁四钱
鬼臼五钱 橘红四钱 荷花二钱 荷杆二钱

十四诊：二十五日 方用：人参叶二钱 金丝草四钱
腊梅花三钱 甘遂一钱 大戟一钱 葶苈子四钱 郁李仁四钱
鬼臼五钱 橘红三钱 雷丸一钱 芫莩二钱

十五诊：二十七日 诸恙皆瘳。方用：人参叶三钱 金丝草四钱
腊梅花三钱 杏仁二钱 厚朴二钱 郁李仁四钱 橘核二钱
芫莩二钱 荷花二钱 红梅花三钱

十六诊：三十日 据云：已经检查完全好了，不服药可乎？师
曰：须再服四剂。方用：人参叶三钱 金丝草四钱 腊梅花四钱
杏仁二钱 芫莩二钱 葶苈子四钱 郁李仁四钱 桔梗二钱
甘遂二钱 红枣四枚

《鲁楼医案》

孔伯华

王男，七月十八日。湿热上蒸，肺失清肃，咳嗽带红，渐有腐气，
胸膈作痛，肺病初起。脉象洪大而弦数，亟宜辛凉肃化内消之。

生石膏八钱 血余炭三钱 苦桔梗四钱 生甘草三钱
全栝楼八钱 忍冬花五钱 旋覆花三钱，布包 代赭石三钱
忍冬花五钱 旋覆花三钱，布包 代赭石三钱 浙贝母三钱
蒲公英五钱 炒甜葶苈三钱 生黄柏三钱 生知母三钱
藕两，带节七枚 梅花点舌丹两粒，分吞

二诊：七月二十二日。连晋前方药，腐气已无，惟咳喘未除，加
川牛膝三钱、青竹茹六钱、杏仁泥三钱。

《孔伯华医集》

章成之

张男。痰臭时发时休，已历一年有余，但胸膈并不作痛。予葶茎汤加減。

生熟米仁各15克 桔梗9克 鱼腥草30克，后下 苏子12克
马兜铃9克 冬瓜子12克 桑白皮12克 白芍9克 芦根30克
粉甘草6克

康幼。其痰如脓状而臭，迄今半载有余。假使肺部化脓，决不能延长如此之久，其病多在支气管。

苦桔梗15克 甜葶苈15克 浙贝母6克 冬瓜子15克
杭白芍15克 生米仁30克 海蛤壳24克 粉草15克

陆男。自昨日起，咳嗽复作，臭痰较多，恶心，神疲乏力，肩背酸痛，饮食、睡眠尚正常。此为肺痈，西医诊为放线菌化脓症。

黄芪24克 石斛12克 金银花18克 粉草9克 百部9克
黄芩9克 白芨粉15克，分三次吞

另：琼玉膏12克 二冬膏12克 和匀，每服半匙，日三次。

二诊：药后咳嗽稀减，臭痰隔日即消失。今日清晨又有少量痰，自喉至胃部觉隐痛，尤以咳嗽时加重，神疲乏力，胸背疼痛依然。

生芪24克 根花18克 鱼腥草18克，后下 玉竹15克 生草9克
生米仁30克 白芨粉4.5克，分三次吞

另：二冬膏120克 琼玉膏120克 甜葶苈24克 研末和人调匀。每服半匙，日三次。

三诊：臭痰已大减，服药时稍恶心。

生芪24克 鱼腥草15克，后下 雅连3克 甘草6克 党参9克
紫地丁9克 白芨粉4.5克，分三次吞

另：橄榄膏120克 琼玉膏120克 二冬膏120克 甜葶苈36克
象贝母36克 均研末和膏中，每服半匙，日三次。

《章次公医案》

王文选

何某某,男,40岁,农民。1957年9月10日初诊。

自诉半月前感冒,发冷发热,全身疼痛,经他处治疗未愈。继之恶寒发热加重,咳嗽急剧,右胸痛拒按,咳吐臭脓痰,时有血丝。不思饮食,精神倦怠,面垢色萎,脉象两寸细小,两尺浮大,左关弦紧,右关沉缓,舌质红,苔黄腻。病系肺痈。由于寒袭卫分,经久不解,风热郁肺;肝气不平,风火灼肺,瘀结成痈。治当散风热清肺火,解毒排脓。处方:

青贝3克 瓜蒌仁3克 沙参6克 桔梗4.5克 甘草1.5克
白术4.5克 云茯苓6克 青皮4.5克 香附4.5克 厚朴3克
枳壳3克 北柴胡3克 羌活4.5克 白芷4.5克 山栀4.5克
桂枝1.5克 胡黄连3克 苏叶3克

9月14日二诊:服药三剂,恶寒发热顿减,再参以补气,加重解毒排脓,前方加减。方药:

苡米仁6克 茯苓4.5克 白术3克 陈皮4.5克 贝母3克
瓜仁4.5克 柴胡3克 黄芪4.5克 羌活3克 桔梗4.5克
细辛1.5克 杏仁3克 二花3.5克 沙参6克 山栀3克
甘草1.5克 苏叶1.5克 五剂

9月22日三诊:不发冷热,胸痛减轻,臭脓痰量减少,精神亦见好转,脉弦舌滑。病虽减轻转佳,但一时尚难痊愈,嘱患者坚持治疗,勿中途而停药,以误病情而成遗憾。遂以千金苇茎、桔梗散、葶苈大枣泻肺等方化裁,服三十余剂而痊愈。方药:

桔梗4.5克 贝母4.5克 花粉3克 枳壳3克 二花9克
甘草3克 连翘4.5克 芦根9克 瓜蒌仁4.5克 葶苈子3克
桔红4.5克

《中医医案医话集锦》

叶熙春

金，男，五十岁。八月。于潜，咳嗽痰多腥臭，而夹脓血，咳时胸胁作痛，下午身热，脉滑数，舌尖绛，中燥白。仿千金苇茎合白虎法。

鲜芦根 60 克，去节 冬瓜仁 15 克 生苡仁 12 克
生石膏 24 克，杵，先煎 知母 12 克 生甘草 9 克 桃仁 2.1 克，杵
淡子芩 6 克 鱼腥草 18 克 川贝 5 克 白薇 9 克

二诊：前方服后，热退咳减，胸胁之痛亦差，痰少，腥臭尚存。原法增减续进。

生石膏 24 克，杵，先煎 知母 12 克 生甘草 8 克 淡子芩 6 克
川贝母 5 克 天花粉 6 克 鱼腥草 12 克 半枝莲 9 克 冬瓜仁 18 克
桃仁 1.8 克，杵 蒲公英 9 克 忍冬藤 12 克 鲜芦根 45 克，去节

三诊：两进清肺排脓之剂，腥臭之痰，日渐减少，胸痛咳嗽亦差。再清肺热而化痰浊。

生石膏 21 克，杵，先煎 生甘草 6 克 知母 12 克 冬瓜仁 12 克
生苡仁 5 克 桃仁 3 克，杵 鱼腥草 12 克 败酱草 24 克 白薇 9 克
炙前胡 6 克 鲜芦根 30 克，去节

倪，男，四十岁。九月。昌化。平素嗜酒，痰湿内滞，久蕴化热，熏灼肺胃，身热咳嗽，胸胁作痛，痰多腥红，咽喉梗疼，唇舌糜烂，舌紫绛，中剥，脉象弦数。热壅血凝，肺病已成，但体属阴虚，不可忽视。

西洋参 6 克，另煎和入 鲜石斛 15 克，劈，先煎 鲜芦根 2 尺，去节
鲜生地 18 克 败酱草 9 克 丹皮 9 克 桃仁 2.1 克，杵
麦冬 9 克，青黛 0.9 克杵 人中黄 5 克 冬瓜子 15 克 板蓝根 6 克
赤芍 9 克 降香 2.4 克，后下

二诊：前方服后，热退咳减，咽痛见轻，胸胁之疼亦差，痰多腥臭如故。原法出入。

川贝 9 克 鲜石斛 10 克，劈，先煎 鲜芦根 1 尺，去节

桃仁 2.4 克, 杵 冬瓜子 15 克 生苡仁 12 克 鲜竹茹 9 克
板蓝根 5 克 丹皮 6 克 赤芍 6 克 黛蛤散 12 克, 包 麸炒枳实 1.8 克
生赭石 15 克, 杵 橘红 5 克 鲜石斛 9 克, 劈, 先煎

三诊: 两脉已转平缓, 舌质干绛转润, 咳减腥痰渐少, 胸胁之痛不若前甚, 唇舌糜烂, 咽喉之痛亦愈。阴虚渐复, 痰火尚未清撤耳。

扁石斛 9 克, 劈, 先煎 橘红络各 5 克 鲜竹茹 9 克 板蓝根 5 克
赤芍 5 克 桃仁 2.4 克, 杵 青黛拌茯神 15 克 冬瓜子 9 克
粉丹皮 6 克 川郁金 6 克 生苡仁 9 克 生蛤壳 15 克, 杵 川贝 6 克
麸炒枳实 1.8 克 鲜芦根 1 尺, 去节

《叶熙春专辑》

施今墨

冯某某, 男, 59 岁。病历二月, 初患咳嗽, 胸际不畅, 未以为意, 近日咳嗽加剧且有微喘, 痰浊而多, 味臭, 有时带血, 胸胁震痛, 稍有寒热, 眠食不佳, 小便深黄, 大便干燥。舌苔黄厚, 脉滑数。

辨证立法: 外感风寒, 未得发越, 蕴热成痼。治宜排脓解毒, 涤痰清热为主。

处方: 鲜苇根 24 克 桑白皮 6 克 鲜茅根 24 克
旋复花 6 克, 代赭石 12 克同布包 地骨皮 6 克 生苡仁 18 克
陈橘红 5 克 炒桃仁 6 克 冬瓜子打, 18 克 陈橘络 5 克 炒杏仁 6 克
北沙参 10 克 苦桔梗 6 克 仙鹤草 18 克 粉甘草 5 克

二诊: 服药五剂寒热渐退, 喘平嗽轻, 痰减仍臭, 已不带血, 眠食略佳, 二便正常, 尚觉气短, 胸闷, 仍遵原法。

处方: 鲜苇根 24 克 塘瓜萎 18 克 鲜茅根 24 克 干薤白 10 克
旋复花 6 克, 代赭石 12 克同布包 炙白前 5 克 炙紫苑 5 克
半夏曲 10 克 炙百部 5 克 炙化红 5 克 枇杷叶 6 克 炒桃仁 6 克
生苡仁 18 克 苦桔梗 5 克 炒杏仁 6 克 冬瓜子打, 24 克

粉甘草 5 克 北沙参 10 克

三诊：服药六剂，诸证均减，惟较气短，身倦脉现虚弱，此乃病邪乍退，正气未复之故。

处方：北沙参 12 克 枇杷叶 6 克 云茯苓 10 克 南沙参 10 克
半夏曲 10 克 云茯神 10 克 苦桔梗 6 克 炒白术 10 克
三七粉分二次冲服，3 克 炒枳壳 5 克 化橘红 5 克
白芨粉分二次冲服，3 克 冬虫草 10 克 粉甘草 5 克

巩某某，男，47 岁。咳嗽十五年，半年前曾咳血，经某医院检查，诊为支气管扩张。现症：痰量极多，每日约有五百毫升，色黄绿如脓，且有晦暗血色，味腥臭，两胁疼痛，食欲不振。苔黄垢，脉弦数。

辨证立法：内热久郁，浊气薰蒸，痰涎煎熬，腐化如脓，气失宣畅，咳嗽胁痛，拟祛痰清热解毒法治之。

处方：炙前胡 5 克 炙紫苑 5 克 陈橘红 5 克 炙白前 5 克
炙苏子 5 克 陈橘络 5 克 冬瓜子 18 克 白芥子 1.5 克
旋复花 6 克，代赭石 12 克同布包 甜瓜子 18 克 莱菔子 6 克
款冬花 5 克 半夏曲 6 克 枇杷叶 6 克 苦桔梗 5 克
犀黄丸 6 克，分二次随药服

二诊：服药五剂，未见效果，一切如旧，仍拟前法再增药力治之。

处 方：云茯苓 10 克 冬瓜子 18 克 云茯神 10 克
旋复花 6 克，代赭石 12 克同布包 甜瓜子 18 克 花蕊石 6 克
莱菔子 5 克 炙苏子 5 克 钟乳石 12 克 白芥子 1.5 克 炙化红 5 克
款冬花 5 克 炙前胡 5 克 炒远志 6 克 苦桔梗 5 克 炙紫苑 5 克
白杏仁 6 克 犀黄丸 3 克，分二次送服。

三诊：服药四剂，除两胁疼痛减轻之外，余症未见大效，拟用丸药服二十日观察。每日早服气管炎丸 20 粒。午服犀黄丸 5 克。晚服白芨粉 5 克，三七粉 1.5 克。

四诊：服前方丸散二十日，已见效，诸症均有所减，遂又多服十日。痰量减少一半，已无血色及黄绿脓痰，较前略稀，仍有臭味。

处方：1. 大瓜蒌一个剖开，纳入整个半夏，塞满，用线扎紧，外用盐泥封固，灶下火灰煨透去泥皮，研细末每日早、午、晚各服5克。

2. 海蜇皮1斤，荸荠2手，洗净，连皮切碎加水慢火煎熬如膏，早晚各服一汤匙，服完再制，共服一个月。

五诊：服药一个月，痰量每日180毫升左右，咳亦随之减少，但觉心跳头晕拟配丸方服。

处方：云苓块30克 朱茯神30克 化橘红15克 风化硝15克
陈橘络30克 法半夏30克 炒枳壳30克 白杏仁30克
远志肉30克 黛蛤散30克 生龙牡各30克 紫厚朴30克
川贝母30克 款冬花15克 白知母15克 南花粉60克
苦桔梗15克 粉甘草30克

共研细末蜜丸如小梧桐子大，每日早晚各服10克，每日中午服犀黄丸5克。

六诊：服药期间病即减轻，中间曾停服数日，诸证又行加重，现在痰量仍在每日180毫升左右。臭味已除，痰稀色黄，心跳头晕。

处方：每日早服二陈丸10克 午服犀黄丸3克
晚服强心丹16粒。

七诊：服丸药咳减痰少，症状大为减轻，近日天寒，痰量又多，咳嗽亦增，气短心跳，暂用汤剂补充。

处方：吉林参5克，另炖兑服 北沙参12克，米炒 百合12克
酒丹参20克 野於于6克 玉竹15克 云苓块12克 清半夏6克
橘红5克 炒远志6克 炙黄芪15克 橘络6克 炙草3克

八诊：服药六剂，精神好转，心跳、头晕、气短，亦均见效，仍有咳嗽，痰稀白量不多。

处方：每日早服茯苓丸10克。午服犀黄丸6克。晚服气管炎丸20

郑重光

黄美倩翁令媳汪氏，产后腹痛四阅月，真州来郡，借居吴天其翁宅就医。诊脉细数而涩，脐下作痛，午后发热，恶寒咳嗽盗汗，俨然虚损也，而经水或红或淡，犹未止。询真州时道治法，或用大黄、红花、桃仁，或用肉桂、炮姜、附子，遍治不效。渐增发热咳嗽，脉症皆属阴虚，但败浊屡月不止，则非积瘀，又腹痛有形，脉不紧，且已用姜、桂、附子而痛不减，则非寒。余拟其为肠痈，来遽用药，令其看腹皮粗糙否？脐中有臭水否？腹内可有水声，大小二便可坠胀？所下败浊似脓血否？病人答云：“件件皆有”。余曰：“此肠痈，误治无疑也。今已溃，未收口，须两月方愈，不能急效。”病人唯唯，遂以六味地黄汤去泽泻，加人参、苡仁、当归、赤芍、桃仁、肉桂为煎剂，外用六味地黄丸去泽泻，加人参、黄芪，此外科治肠痈之七贤散也，用蜜为丸。如此煎丸并服，一月咳嗽发热先退，又半月，脓血方净，而痛亦止，完口之后，回真州。

《素园医案》

王孟英

富人冯氏者，寒热如疟，溲溺闭塞，少腹隐痛，汗出淋漓，医以为瘵，频饮补剂，日益憔悴。余切其脉细，重按之沉紧而实。曰：此有积瘀而成小腸痈，于法当下。咸谓病久延羸，下恐有害，且素逸处，安有积瘀。余曰：论脉如是，可询病者，曾持重物否。其人以告病者，初不省，既而曰：一月前会携饷方出，遭客至，匆遽复人，越日而寒热作，得毋是耶？药已遍尝而病不去，盍从其治！遂用桃仁承气汤，捣土牛膝根汁和服。次日腹下痛如刀割，殷血从溲溺出。如

是数次，痛良已，病寻愈。

《归砚录》

石芷卿，骤患腹胀，旬日后，脐间出脓。外科视为肠痈，与温补内托之药。遂咳嗽不眠，腹中绞痛异常，痰色红绿，大便不行。乃延孟英商之。脉弦细以数，舌绛而大渴。曰：察脉候，是真阴大虚之证。芪、桂、归、术皆为禁剂。以甘露饮加西洋参、花粉、贝母、杏仁、冬瓜子投之，痰咳即安。而外科谓此恙最忌泄泻，润药不宜多服。孟英曰：阴虚液燥，津不易生，虽求其泄，不可得也，乌可拘泥一偏，而不知通变哉？仍以前法，去杏仁、贝母、花粉，加知母、百合、合欢（皮）为方，并嘱另邀老医朱嵩年敷治其外。如法施之，果渐向安。久之，当脐痈落，如小儿落脐带状，脐内新肉莹然而愈。

《王氏医案》

林佩琴

李氏。寒热脉数，少腹左偏痛引内膈，数日一更衣，左足不伸，此小肠痈也。盖小肠火腑，由气血壅滞经隧，发为痈毒。宜先彻其在里瘀热，则痛势缓而痈内消。用大黄三钱 硝石一钱 归尾钱半 赤芍二钱 桃仁一钱。数服痛减，次用乳香、甘草节、金银花、连翘、当归、木瓜、薏米、牛膝、数服而消。

《类证治裁》

费伯雄

某。产后恶露未尽，瘀滞肠中，以致腹右作痛，坚硬拒按，已延两月。寒热未止，盗汗甚多，小溲有时不利，肠痈已著，脉芤数无力，将有内溃之势。治以攻补兼施。

生黄芪 炙甲片 五灵脂 当归 生苡仁 桂心 煨木香
泽兰 花粉 生大黄

《费伯雄医案》

陈莘田

徐左。气阻于络，挟湿挟痰；右少腹结硬作痛，常常呕恶，势成肠痈重症，冀消为善。

老苏梗 枳壳 旋复花 全瓜蒌 金铃子 广陈皮 姜半夏
炒延胡 小青皮

二诊：作痛稍缓。

广木香 金铃子 旋复花 姜夏 青皮 延胡 瓜蒌 枳壳
广陈皮 赤茯苓

三诊：作痛已止，似消兆。

制香附 新绛 旋复花 生草 归尾 赤茯苓 枳壳 白芥
子 姜半夏 陈皮 全瓜蒌

《枫江陈莘田先生外科临证》

过锦

乡人某，面瘦而色灰白，左脐下板痛，左足屈而不伸，余曰：此小肠痈也。方用：金银花三两，茯苓、薏仁各一两，车前子五钱，刘寄奴、泽泻、甘草各三钱，生，肉桂一钱，水煎服三剂，则小便大通而愈（小孩患此减半服）。按：小肠痈初起关元穴脐下三寸，隐隐作痛，左足渐不能舒，至小便出脓，甚至脓出脐内，则难救矣。盖肠痈必须内消（无论大小肠），然火毒极盛，非杯水可救，必服大剂方能清散。是证由于肾水不足，水衰火旺，火无制则毒结成痈。银花解毒滋阴，以之为君，不致损伤正气，但不能直入小肠，须与茯苓、车前、泽泻、薏仁并用，方能引入。复加肉桂引入膀胱，俾毒由尿化。甘草性缓，寄奴性急，缓急相调，诸药无扞格之虞矣。

《过氏近诊医案》

王旭高

某。盘肠痢腹痛已久，二三日来骤然胀满，连及腰胁，小便茎中亦痛，势已有脓。拟用牡丹汤排脓逐毒，从大肠导下之。所虑饮食极少，胃气不克支持耳。

丹皮 桃仁 皂角刺 冬瓜子 红花 大黄制 延胡索 广橘皮 山楂肉 赤苓 归尾

又：盘肠痢已成脓，不得不从大肠导下之法。

生黄芪 皂角刺 归尾 桃仁 红花 土贝母 金银花 甘草 丹皮 山甲片 冬瓜子 广皮

又：肠内痢脓将足，脉细食少。治以托里，冀其外溃为妙。

黄芪 银花 川山甲 肉桂 当归 赤苓 泽泻 皂角刺 苡仁 广皮 血珀屑

某。湿热积聚，阻于少阳。病起发热，便少腹偏右板痛，足屈不伸，小肠痢也。身热不止，防其成脓。

甘草 桔梗 枳壳 苏梗 赤苓 土贝母 砂仁 延胡索 焦查肉 川楝子 泽兰叶

许。寒气入于厥阴，湿热随经下注。睾丸肿胀，少腹结硬肿痛。防成缩脚小肠痢重症。

川楝子 吴茱萸 枳壳 归尾 焦查肉 橘核 小茴香 革薢 焦黑栀 葱白头

胡。胃脘生痛，脉虚形瘦。初起寒热，延今四十余日，晨必泄泻无度。是中气大虚，不胜攻消之任也。今与内托法。倘仍作泻，则难矣。

党参 木香 法半夏 茯苓 枳壳 砂仁 当归 冬术 干姜 陈皮

《王旭高临证医案》

马文植

某。少腹痛症，有气血凝滞者，有湿热流注小腹者，有寒湿郁结而成者。恙起去夏，少腹板硬，攻冲作痛。少腹乃广肠部位，肝脉游行之所。肝气拂郁，寒邪乘之，肠胃之气化失利，血随气阻，日久正虚，邪凝愈甚，自冬及春，愈形高肿，色红而软，内脓已成，定须外溃。然肠膜受伤，恐粪秽并出，且饮食少进，溲赤便闭，内热舌干脉数，阴伤热郁，倘出脓后胃气不苏，元气不续，深为可虑。若论疡科治法，当补托化毒之剂，然虚不受补，清则碍脾，治当舍外而从内，议调胃育阴，阴充便自通，胃和而食自进矣。

生首乌 淮山药 柏子仁 茯苓 谷芽 北沙参 广皮 当归 玉竹 毛燕

二诊：肠痈外溃，已得微脓，且秽从孔出，浊气外泄，大非所宜，脉象虽和，食虽渐进，惟虑正气与浊气并出，有上下交脱之虑。急当原方加白芍、参须、熟地。

三诊：腑气已通，原方加党参、石斛，去柏子仁、生首乌。

四诊：肠痈溃后，脓少气多，肿平一半，脉静身凉，一夜神安熟寐，是属佳兆。黎明之际，外患复增肿痛，卯时虚气滞于大肠，邪正交攻，肠膜损伤，恐难完固。当阴阳并补，兼以护膜，保无更变乃佳。

潞党参 淮山药 炙甘草 象牙屑 茯苓 当归 广皮 玉竹 大熟地 白芍 参须 黄丝绢

某。正产十日后，气血凝滞，左少腹近胯硬而作痛，腿胯拘挛，大便不畅，已成缩脚痼。急为流气化痰，能即消乃吉。

赤芍一钱五分 五灵脂一钱五分 怀牛膝一钱五分 栝蒌仁三钱 青皮一钱 桃仁一钱五分 丹皮一钱五分 甘草二分 延胡索一钱 川楝子一钱五分 归须一钱五分 苏子四分

另服失笑散一钱五分，开口过口。

二诊：左胯拘挛，硬及半腹，腑气不通。急为消导。

熟军三钱 桃仁研，二钱 五灵脂三钱 炒枳壳一钱五分
泽兰三钱 延胡一钱五分 玄明粉三钱 归须三钱 赤芍一钱五分
蒲黄一钱 山羊血一钱五分 陈酒冲，一两

三诊：硬痛渐松，惟腿胯拘挛，不能转动，瘀阻经隧。仍当宣通。

延胡一钱五分 桃仁一钱五分 秦艽一钱五分 参三七八分
五灵脂一钱五分 怀牛膝一钱五分 归须三钱 赤芍一钱五分
陈皮一钱 泽兰三钱 山羊血一钱 鲜地龙破腹酒洗，三条
炙甲片一钱五分 陈酒冲，一杯

《外科集腋》

余听鸿

余临症五年，遇肠痈数人，始萌未成脓者，或理气消瘀温通，服药而消者，茫不记忆。有一人未能成功，自愧医学不精，刀针手法，缺少师承，听其内溃而死，至今顾影自惭，故录出为后日之戒。余乙酉三月间从孟河至琴川，余友仲鸣徐君过余寓，谈及其店中学生某，住南门外坛上切纸坊内，因腹痛已有三月未愈，烦子过一诊。余往诊之，脉来滑数，一身肌肉尽削，发热，少腹左角作痛，日夜哀号。余细半其少腹按之，少腹左角一处独痛，细按掌下，惟痛处肌肉最热。问其原由，云服热药热物更痛，服凉药凉饮稍舒。余细按其最热处已郁郁有脓，涓涓有声，看其两足，能伸能屈。余曰：此乃内痈。经服药三月，未曾有言内痈者，吴~~某~~、姜~~某~~、~~某~~、桂~~某~~热药过多，煨炼成脓。若脓从大便出，肠必腐坏，若脓从脐出，里膜必穿。如有名手能开，脓从原处而出，可望生机。若脓从大便脐中出者，~~某~~属不救。余写牡丹皮散合活络散毒丹法主之，即辞曰：从速延名~~某~~开之，尚有生机，迟则不救。当日即延著名~~某~~科视之，遂~~某~~更医~~某~~皆束手，延至十余日，脐中溃脓，胃气渐败而逝。~~某~~呼，~~某~~科不能治内痈，听其自溃而不早治，酿成大患，何异援兵任人居危城之中，罗雀掘鼠，不能济之以粮，又不能突围救之，听其自毙乎。余思之，扪心自愧未习

刀针手法，误人性命，所以徐灵胎谓叶天士内科不知外科，得医术之半。余谓内科不能识症，外症不能刀针，一遇内痈，皆如云中观月，雾里看花，挨延日久脓成，听其自溃而死，医者能诿为无过乎。甚矣，医术之难全也。

凡治内痈，妇女较男子更难。余忆在师处，有丹徒某大族新妇，经停三月，皆谓有娠，至四月，少腹作胀而痛，皆云妊娠而挟肝气，服金铃、左金等，痛更甚。后邀吾师，因天雨不愿往，令余代之，坐车十余里，又渡江四五里，喘息未定，宅内请诊脉矣。上楼，楼窗紧闭，病人坐幔中，色不能望，音不能闻，问亦不答，手在幔中伸出，切脉迟紧，重按亦涩。余曰：此血气被寒凝滞。问曰：腹中痛乎。旁人代答少腹左边甚痛。舌又不能看。余又问曰：二便如何，少腹痛处可硬。旁人皆不言，病者羞涩不答，余亦无可如何。尚未午餐，枵腹已甚，手软无力。即请纸书方。余曰：少腹作痛，气滞血凝，日久防成内痈。即用桃仁承气，去芒硝加当归尾、延胡、香附等。闻有妇女在旁唧唧言曰：有妊四月，脉中尚看不出，反言内痈。明知此方决不服矣。饭毕回寓，与吾师述及情由曰：望闻问切，四字皆无，孙真人未诊先问，扁鹊见色知病，如此隔靴搔痒，余实不能。后延他医，皆安胎养血，云产前宜凉，方皆不离黄芩、白术。至经停五月，见寒热，少腹硬肿，后腋穿入腿缝，延外科治之，有曰横痃，有曰便毒，杂药乱投，脓水淋漓，胃气日败而毙。所以病家如此，医家如此，鲜有不误者也。此误不在医家，而在病家。奉劝富贵之家，有病延医，望闻问切，当尽其技，病家受益多多矣。

《余听鸿医案》

巢渭芳

访仙桥，某，三十八岁。体本虚弱，湿火又旺，腹痛右半较甚，延今一月，并不寒热，苔白灰干，腰折不直，此大肠痈也。进化瘀导滞法。当归、生苡仁、粉丹皮、乌药、桃仁、怀牛膝、白芥子、青皮、红花、

赤芍、生草节、银花、两头尖。复诊时未见增损，腰腹之痛如前未减，再宗前方进取。生川军、生草、炙甲片、新会皮、桃仁、赤白芍、银花、通草、白芥子、当归、怀牛膝、象贝母、两头尖，服六剂效。

《集清芳医话》

陈莲舫

张。肠痈蛔虫并出，脓亦直流，险重之至。

败酱草 川楝子 左金丸 制川朴 尖槟榔 广陈皮 冬瓜子 生白芍 小青皮 焦建曲 生米仁 榧子肉

孙。阳明传送失司，寒湿挟滞，腹痛五十余天，满腹坚硬，脉息沉弦，防肠痈成脓，治以通降。

败酱草 草果 佛手柑 花槟榔 白茯苓 福泽泻 焦建曲 新会皮 制川朴 法半夏 生苡仁 川楝子 榧子肉

《莲舫秘旨》

张山雷

张左。脾阳素弱，中气本寒，劳力受寒，中阳不运而经络为滞，外则畏寒冷汗，上则吐逆暖气，下则髂根坚肿，右足不伸。脉细神疲，面色白，舌苔淡滑，此系寒湿乘中，专顾中气，犹虑变端，加以泄泻，更伤其本，证情不为不险。姑先温中健脾，宣络养胃，冀得转机。请明正。

炒贡谿 4.5克 炮姜炭 4.5克 原红花 4.5克 明附片 1.8克
生黄芪 4.5克 生延胡 6克 威灵仙 4.5克 广木香 2.1克
淡吴萸 14粒 桑寄生 15克 川楝子 7粒 川独活 4.5克
带壳砂仁 1.2克 全当归 6克 制香附 9克

二诊：昨授温中宣络，坚块稍化，按之不痛。但自觉少腹胀闷，大便昨早仍泄，小水亦少，面罩焦黑，呕尚不免，脉细且迟，舌底白尖淡，仍宜踵步，以观进退。如内外再有转机，方为幸事。

炒贡露 4.5 克 淡吴萸 1.2 克 川黄连 1.2 克 制半夏 6 克
生鸡金 7.5 克 炮姜炭 1.2 克 全当归 4.5 克 小青皮 4.5 克
广木香 2.1 克 制川朴 1.5 克 陈木瓜 4.5 克 威灵仙 4.5 克
川椒红 7 粒 川断肉 6 克

三诊：中阳不运，缩脚肠痈，两授温养泄化，痛势稍减，漫肿依然，纳谷稍多，仍是泛呕。舌质白苔黄腻，噎噫矢气，且挟食滞。再参疏化是宜。

炒贡露 4.5 克 炮姜炭 1.2 克 楂肉炭 6 克 炒枳壳 2.1 克
全当归 6 克 淡吴萸 2.1 克 西茵陈 6 克 生鸡内金 6 克
生淮山药 9 克 广木香 2.4 克 青皮 4.5 克 陈皮 4.5 克 川独活 3 克
怀牛膝 4.5 克 砂仁 1.2 克

《张山雷专辑》

范文甫

林廷玉。右侧小腹疼痛，右脚不能屈伸，扪之灼热，按之痛甚，身无热，舌质红，脉沉涩。肠痈已成。

淡附子 6 克 米仁 30 克 败酱草 30 克 枳壳 3 克 生大黄 9 克
桃仁 9 克 冬瓜子 24 克

二诊：泻下多次，腹痛减轻。

败酱草 3 克 淡附子 3 克 生米仁 30 克 归尾 9 克 枳壳 3 克

三诊：已瘥多。

皂刺 60 克 禾米 1 杯

四诊：将愈。

党参 9 克 赤白芍各 9 克 冬瓜子 15 克 甘草 3 克 半夏 9 克
陈皮 3 克 茯苓 9 克 枳壳 6 克

朱阿洪。寒结小腹，右肚角间疼痛，行走牵痛。此肠痈之候也。

生米仁 30 克 冬瓜子 24 克 淡附子 3 克 败酱草 30 克

皂刺 12 克 当归尾 6 克

二诊：药后痛瘥不少，守前法。

前方再服。

《范文甫专辑》

魏长春

周荣甫君，年四十一岁。业商。一月二十五日诊。

病名：盲肠痢。

原因：饱食之后，遽作剧烈劳动，致食物侵入盲肠，积久不运腐败，酿成肠痢。

证候：少腹疼痛，已将一月。近日加剧，有红肿发热之象，按之极痛，右腿不能屈伸，脚胫红肿，形寒壮热，面白盗汗，胃呆，吐泻不纳。

诊断：脉数，舌质淡白。脉象数，是盲肠酿脓；舌质白，乃血液受伤，真虚邪实，治颇棘手。

疗法：活血通肠，解毒排脓为主。

炳按：凡大肠生痢，卧时右足屈不能伸。小肠生痢，左足屈不能伸，伸则肠吊痛异常，以此为辨。

处方：当归三钱 生白芍三钱 生甘草一钱 冬瓜仁三钱
米仁八钱 银花三钱 丹皮二钱 杜红花三钱 桃仁三钱
参三七一钱研吞 蒲公英五钱 生黄芪五钱

次诊：一月二十六日。二便通畅，腹痛未已，潮热略退，昨寐尚安，足胫酸软。脉缓，舌红，前方既已奏效，仍宗原加减。

次方：银花三钱 生甘草一钱 蒲公英五钱 桃仁五钱
杜红花三钱 生黄芪五钱 丹皮二钱 赤芍三钱 当归尾三钱
枳壳一钱 淮牛膝三钱

二诊：一月二十七日。脉缓，舌红，热退，胃强，腹痛较瘥，腿胫屈伸已利，脚面溃烂，毒从外泄，病势减轻。用扶元败毒法。

三方：生黄芪五钱 防风一钱 炒白术三钱 当归三钱

生米仁八钱 川牛膝三钱 丹皮二钱 银花三钱 生甘草一钱
白芷二钱 杜红花三钱 木瓜二钱

四诊：一月二十九日。脉缓，舌红。胸腹满痛，脚面溃烂流脓，寒热未尽，肠道传导失职，积滞未清。用宣通法。

四方：陈皮一钱 制半夏三钱 带皮苓四钱 生甘草一钱
参三七一钱 香附二钱 川楝子三钱 元胡索三钱 炒白芍三钱
泽泻三钱 当归三钱

效果：服后，寒热退，脚上脓水减少，渐痊。

炳按：盲肠痈。亦当清热化毒，润大便为要。

徐阿荣，年三十五岁。业弹花匠。四月八日诊。

病名：肠痈。（炳按）实是肠炎，肠痈足不能伸。

原因：弹花为业，杂食油腻面点，积滞为病。腹痛，医治不效，西医断为盲肠炎，非割不治。病家以患病七日，深恐元气不支，惧不敢剖，改延余诊。

炳按：盲肠乃肛门内直肠，接大肠下口。

证候：少腹右角，疼拒按，内热甚炽，自汗，呕吐酸苦水，口渴欲饮，便秘七日，小溲短赤，音低气促。

诊断：脉滑数，舌满铺黄厚。食物积于盲肠酿脓。西医必须手术剖割，中医用破积导瘀败毒之方，得效颇多。

疗法：考金匱治肠痈有二方。一为大黄牡丹皮汤，一为薏苡附子败酱散。今宗二方之意，拟桃仁承气汤合王氏解毒活血汤加减。

处方：桃仁六钱 生大黄三钱 元明粉三钱 炙甘草二钱
柴胡二钱 当归四钱 赤芍三钱 杜红花三钱 参三钱一钱
连翘三钱 全瓜蒌五钱 郁李仁肉三钱

搽方：另用元明粉三钱 三黄散四钱 尿浸石膏三钱

共研细末，和蜜调匀。敷少腹痛处，以消其炎。

次诊：四月九日。昨服药后，大便未解，小溲稍长，色赤。脉象软缓，舌红苔黄铺。音低，烦躁不宁，腹痛稍缓，用破瘀导滞法。

次方：当归五钱 赤芍三钱 生甘草二钱 银花四钱 枳壳一钱
全瓜蒌五钱 冬瓜子三钱 丹皮二钱 参三七一钱

三诊：四月十日。昨解大便紫黑，小溲稍长，脉缓，舌红苔黄。腹痛已减，呕差口渴，神倦欲寐，余毒未尽也。

三方：当归四钱 生白芍四钱 大生地五钱 生甘草三钱
冬瓜子三钱 生米仁八钱 玄胡索三钱 川楝子三钱 全瓜蒌五钱
紫草三钱

四诊：四月十一日。脉象弦滑，舌红苔薄，脘闷便闭，微呃欲呕，肢和溲长，用降气通腑法。

四方：旋复花三钱包煎 代赭石五钱 制半夏五钱
白蜜一两五钱冲 川连八分 乌梅二钱 茯苓四钱 淡竹沥一两五钱冲
黄芩三钱 生白芍五钱

五诊：四月十七日。呕吐已止，二便通畅，腹痞，气促自汗。脉弦，舌红苔黄白腻。面色萎黄，微有寒热，用活血通滞之法。

五方：当归四钱 炒白芍四钱 橘皮一钱 全瓜蒌五钱
冬瓜仁三钱 米仁八钱 生甘草一钱 苦杏仁三钱 川楝子三钱
丹皮二钱

效果：服后气平，后用活血扶元之剂善后。

炳按：此证乃肠中发炎起肿，尚未成痈。若成痈，脚必不能伸直，此千病一式。然肠炎肠痈，皆须清肠热解毒，通利二便，其热毒遂从大便出，为必要治法也。不宜误补升提诸药。

《慈溪魏氏验案类编初集》

曹颖甫

陆左。初诊：痛在脐右斜下一寸，西医所谓盲肠炎也，脉大而实，当下之，用仲景法。

生军五钱 芒硝三钱 桃仁五钱 冬瓜仁一两 丹皮一两

二诊：痛已略缓，右足拘急，不得屈伸，伸则牵腹中涌，宜芍药

甘草汤。

赤白芍各五钱 生甘草三钱 炙乳没各三钱

三诊：右足已伸，腹中剧痛如故。仍宜大黄牡丹汤以下之。

生川军一两 芒硝七钱冲 桃仁五钱 冬瓜仁一两 丹皮一两

拙巢注：愈。

史惠甫。初诊：肠痈屡经攻下，病根未拔。昨由姜君用大黄牡丹汤，腹胀略减。以证情论，仍宜攻下，仍用原法加减。

生川军五钱后入 冬瓜仁一两 桃仁八十粒 粉丹皮一两

当归五钱 芒硝三钱冲 杜赤豆四两煎汤后入前药

二诊：昨用大黄牡丹汤，加当归赤豆。所下粘腻赤色之物，非脓非血。此种恶浊久留肠中，必化为黑色之河泥状。服汤后，肠中有水下行，作漉漉声。盖此证肠中必有阻塞不通之处，故谓之痈。痈者，壅也。然则不开其壅，宁有济乎？病根未拔，仍宜前法减轻。

生川军三钱 丹皮五钱 桃仁五十粒 当归五钱 冬瓜仁一两
赤芍五钱 芒硝二钱冲 败酱草五钱 杜赤豆四两煎汤后入前药

三诊：两进加味大黄牡丹汤，肠中宿垢渐稀。惟脐右斜下近少腹处，按之尚痛，则病根尚未尽去也。仍用前法，减硝黄以和之。

粉丹皮一两 冬瓜子一两 生苡仁一两 桃仁泥五钱
败酱草五钱 京赤芍六钱 生甘草二钱 当归五钱 桔梗三钱
杜赤豆四两 煎汤代水

四诊：肠痈近已就痊，惟每日晨起大便，患处尚觉胀满，恐系夙根未除。然下经多次，血分大亏，时时头晕，脉大，虚象也。当以补正主治，佐以利下焦水道。

大川芎一两 全当归五钱 大熟地四钱 春砂仁一钱
赤白芍各三钱 猪苓三钱 明天麻四钱 陈皮三钱 泽泻二钱
生白术五钱 冬葵子五钱

按：史君服此补正分利之剂后，前之大便时痛者，今已不痛矣。且其前色绿者，今亦转黄矣。惟七分黄之中，仍有三分绿耳。史君

前有遺精宿恙，此时又发。或系本方分利药太重之故欤？惟遺后绝不疲劳，则亦无妨焉。

《经方实验录》

翟竹亭

管守仁年三十二，患腹疼，请余诊疗。诊得关脉犯芤，右腿难伸，少腹右生一疙瘩，大如覆碗，疼痛难忍，日轻夜重，饮食减少，寒热交作。告伊曰：“书云‘大肠痈者，右腿难伸’”。又见芤脉，《脉诀》云：关内逢芤肠胃痈。以脉证合参论，确属大肠肿无疑。急服苡仁大黄汤。脓从大便出者顺，若少腹攻开口者为逆。伊谓余言过缓，急求速愈。赶开封美国医院调治，西医用利刀将疮开四瓣，疮口大似碗许，每日三次洗之，然后上药。此疮开五日后，少腹之上又起疙瘩三枚，大如核桃，遂又尽开之，每日出鲜血碗许，由此饮食大减，凶证齐现，不得已出院。又请中医调治，百方无效，不数日而殒。由此看来，西医精于有形，略于气化，不知阴阳进退消长之机，所以治内生之疮，多不愈也。

《湖岳村叟医案》

孔伯华

某男，十一月十一日。肠痈已久，兼有肝肾气郁之象，右半少腹结痛，数年之久，渐至胀大，脉象弦滑而数，姑予内消化气之品以消息之。

生左牡蛎三钱 台乌药二钱 炒大腹绒钱 旋复花一钱、布包
代赭石一钱 盐橘核四钱 丝瓜络一钱 赤小豆五钱 川楝子钱五分
荔枝核钱五分 三棱一钱 莪术一钱 生枳实一钱 甘草一钱
炒丹皮钱五分 醒消丸五分

二诊：十一月十三日。服前方药后，证象已转，但肠痈太久，不能即消。好者二便渐畅，气机渐和，脉息亦转缓和，再以前方加减略

重攻克之品。

生左牡蛎五钱，布包先煎 炒大腹绒钱五分 土炒台乌药三钱
旋复花钱五分，布包 代赭石一钱五分 盐橘核五钱 赤小豆五钱
湖丹皮钱五分 川楝子二钱 荔枝核三钱 生枳实二钱半
三棱钱五分 莪术钱五分 栝蒌仁四钱，元明粉四分拌 甘草一钱
醋军炭一钱 醒消丸八分（分吞）

《孔伯华医集》

章成之

孙男。大黄牡丹皮汤，仲景本为肠痈而设。盖阑尾炎虽能通便，植物性下剂则不相宜，或者此方用于轻症。假使阑尾周围化脓溃穿，此方不可妄投！病者是轻症。

熟锦纹9克 冬瓜子15克 生苡仁24克 败酱草15克
粉丹皮12克 桃仁12克 白芍12克 生甘草6克 七厘散1.2克
分二次吞服

二诊：仲景治肠痈，用大黄牡丹皮汤治急性者，薏苡附子败酱散治慢性者。病者为慢性，复入当归赤小豆汤。

炮附子9克 败酱草24克 赤小豆30克 苡仁30克
全当归12克 杭白芍15克 粉甘草9克

《章次公医案》

冉雪峰

成某，患腹部右下侧痛，在某医学院附属医院诊察，断为阑尾炎，须行手术，并云已脓，此时行手术已嫌晚，尚带有几分危险。成惧，请予往诊。见其少腹右侧肿硬，拒按，疼痛殊甚，右腿屈不能伸，乍寒乍热，手足泠然汗出，已五日不安寐，不能食，神形俱困，脉滑数劲急，此系肠痈，拟千金苇茎汤、金匱大黄牡丹皮汤合裁加减。方用：鲜苇茎半斤煮水去滓煎药，苡仁五钱，瓜瓣六钱，桃仁、土贝母、

丹皮各三钱，大黄一钱，蒲公英、土茯苓各四钱，没药一钱五分，服二剂后，痛略缓。复诊，去土茯苓加郁李仁四钱，得大便二次，秽浊中微杂血液，痛锐减，身热退，足腿能自伸屈，勉进稀粥牛乳。再诊，前方去大黄、郁李仁，仍加入土茯苓四钱，又三剂，痛止，腰伸能起坐。后以养血调气，和中安中，半补半疏，缓调收功。初诊时，痛剧脉旺，知其化脓不甚，苟果化脓甚，则脉必反弱，痛必反缓，故注重活血消瘀，软坚散结，幸而获愈。

汉口夏某，患少腹右侧痛，羁滞多日，乍寒乍热，呕吐不食，两腿不能伸直，甚或难以转侧，经某医院诊断为阑尾炎，业经化脓。予诊得如上状，证属肠痈，拟解毒消炎，撤热散结，排除脓血，稀释酷厉。方用：当归尾、牡丹皮各三钱，苡仁五钱，土贝母三钱，瓜瓣八钱，牛膝四钱，桃仁、青木香各三钱，三七末八分，甘松、大黄各一钱，鲜苇茎二两煮水煎药。一星期肿痛渐减，寒热渐止（三剂后去大黄）；二星期诸证大减，原方去瓜瓣加赤石脂、土茯苓各四钱，三星期痊愈。越次年，患者将养失宜，感时邪如秋温，伏暑晚发，内外合邪，壮热烦渴，又牵动旧疾，患部肿痛如前，细审系由标证诱发。方用：香薷四钱，苡仁五钱，黄连一钱，厚朴一钱五分，滑石六钱，土贝母、土牛膝各三钱，白茅根、鲜芦根各四钱。三剂标证解三之二，原方去香薷、黄连，加归尾、地龙、青木香各三钱，一星期肿痛锐减；又一星期，内外都解，标本全愈。此病前后同是外有寒热，治本治标，从少从多，贵在权宜。设标本不分，内外混淆，必致并病合病，纠缠难解。惟其后次之病先标后本，所以后次病较前次病为复杂，而后次之愈较前次却更迅速。

《冉雪峰医案》

王旭高

张。怒则肝气逆而血菀于上，章门结块硬痛，寒热脉数，小便短少。症属肝痈，防其内溃咳吐脓血而剧。

紫菀 郁金 新绛 柴胡 天花粉 桃仁 旋复花 当归
穿山甲 忍冬藤 降香 青葱管

《王旭高临证医案》

余听鸿

丁亥六月，余治常熟大河镇某姓妇，早寡，上有老姑七十一岁，两代孀居，携子耕读安居，不料有某暗侵其产，事至成讼，幸邑尊剖断如神，产业保全。结案后左胁肋及少腹脐旁作痛，大便秘结，小溲不通。他医进以五苓、八正、导赤等渗利之品，罔效。就诊余寓，问病之始末。余曰：肝络系于二阴，肝主疏泄，少腹刺痛，是郁怒伤肝，恐生肝癰，急宜疏肝达下。用川郁金、金铃皮、香附、延胡、柴胡、木香、橘叶、归须、瓜蒌、厚朴合逍遥散等一剂，另服通关丸三钱。大便已通，小溲亦畅。后原方增减服两剂，痛渐愈。因姑有疾，即开船回家。余思此症日久必成肝癰，幸争讼得直，屈有所伸，怒有所泄，肝气尚可展舒，未至酿成大患，否则其害尚堪问乎？

余治胁癰肋癰等症甚多，皆肝之外候也，内治理气消瘀，虫蚁搜络，俱可取效。惟肝之本脏生癰，未曾遇见。忆昔在业师处，旋姓妇素有肝气，丧夫后因立嗣争产不能决，后胁肋刺痛，经吾师治愈。经阻三月不通，觉左肋内由脐旁引痛腰脊，肌肉不变，重按之内觉极痛。吾师曰：此肝癰也。用延胡、柴胡、川楝、青皮、归尾、木香合桃核承气法下之。下紫血片如鸡肝。一剂后痛大减，再进消瘀理气疏肝解郁数十剂，经道痛止而愈。吾师曰：若肝经络脉生癰，当用理气活血之轻药，取其轻可入络。若癰生于本脏，当用破血理气之重药，取药重力专，直攻本脏也。肝为藏血之脏，血壅气阻，叶胀成癰，故速下之，使肝中气血疏通，肿亦可消。治内癰虽属理气消瘀，同一治法，然各脏引经之药，必须用之。倘不用引经之药，反伤他脏气血矣。

《余听鸿医案》

陈莲舫

太平桥，周。肝病咳血，肌灼口渴，满腹攻痛，脉弦且数，治以清养。

羚羊片 制丹参 光杏仁 败酱草 粉蛤壳 橘络 北沙参
生白芍 冬瓜子 茜草根 炙桑皮 藕节 枇杷叶

复方：西洋参 制丹参 光杏仁 旋复花 细香附 橘红
枇杷叶 元生地 生白芍 炙桑皮 白石英 生甘草 藕节

《莲舫秘旨》

叶熙春

毛，男，五十岁。二月。昌化。气滞血瘀，肝络失疏，右肋下胀痛，按之更甚，难以转侧，身热口渴，不时索饮，烦躁不宁。近日来胃纳反而转佳，恐脓已成矣。脉象滑数，舌苔薄黄。拟予化瘀排脓。

赤小豆 30 克，包 酒炒归尾 9 克 酒炒赤芍 6 克 桃仁 5 克，拌
制军 5 克 五灵脂 9 克，包 半枝莲 12 克 蒲公英 15 克 银花 9 克
净乳香 5 克 净没药 5 克 另吞小金丹 1 粒

二诊：肝痈已成化脓之候，身热未退，胁部痛势依然，仍难转侧。继宗前法

赤小豆 30 克，包 酒炒归尾 9 克 酒炒赤芍 6 克 桃仁 5 克，拌
制军 5 克 蒲公英 15 克 炒蒲黄 9 克 银花 9 克 五灵脂 12 克，包
败酱草 15 克 半枝莲 15 克 净乳香 5 克 净没药 5 克
另吞小金丹 1 粒

三诊：两进化瘀排脓之剂，便下黑秽甚多，热势顿减，胁部胀痛渐缓，且能转侧安卧。脓去积瘀未净，再守原法继进。

前方去五灵脂加粉丹皮 5 克继服。

《叶熙春专辑》

余听鸿

邵镜泉，浙江宁波人，年五十余，在常熟设肆。壬午，因遍体络脉抽痛，余为愈之。二三年终日坐一小楼，饱食喜卧，日久胃脘阻硬不舒，延某姓医治之，云湿热，诊十余次，罔效。又延当时盛名之医治之，曰食滞湿热，立方服二十余剂，中脘高突。往苏省就马培之先生诊之，曰：胃脘痛也。当留苏十余日，服药十余剂，待脓成熟，穿针泄毒，可不穿膜腐肠。邵服药两帖，少效，旋常熟，五六日亦不服药，听其脘中高突。吾友松筠张君曰：既上年遍身络痛，是某治愈，何不邀诊？余诊其脉，来疾去迟，关寸见数，胃脘按之甚软，高突如覆杯。余曰：胃脘痛也。内脓已成，即向苏就马君处，或刀或针刺穿，待其毒泄，免穿里膜腐肠胃，若迟则膜穿胃腐不救也。病者以余言太甚，怒色曰：胃若成脓，何以饮食二便如常？口中及大便何以不出脓血？余曰：脏腑不和，疮发于外，营卫稽留，经脉血泣热胜，恐肉腐脓向内溃，腐烂肠胃，若不早开外泄，必贻后悔。病者曰：脏腑未坏，先戳穿肚皮，不敢将命试马君之艺，君勿言之。余曰：忠言逆耳，良药苦口。敬谢不敏。后邀某外科治之无效，经四十余日，回宁波延医治之，不识何症，到宁波府城中请著名外科视之，曰胃脘痈脓成，二百金包治，病者亦愿。不料已经内溃，出头三处，出脓数碗，渐渐胃败而殁。呜呼！医学难全者，即此也！内科不能刀针，尚可饰说，有号称有名外科，一见内痈，刀针手法，毫无把握，聊将膏药敷药敷衍，酿痈成患，往往腐肠穿膜而毙，较内科方药误人何如耶？惟愿后贤于开内痈之法，能潜心考核耳。学内科者，内痈刀针，不能不学。若逢内痈，内外科各相推诿，遣误尚堪问乎？

福山塘谢姓，年逾知命，不咳嗽，吐脓血，不甚臭。余曰：此胃痈也。成脓之后，速达于下，用千金苇茎法，去苇茎，加瓜蒌、丹皮、酒制大黄、甘草。服后人便下脓血甚多。后进冬瓜仁、薏仁、丹皮、甘草、白术、橘白、生扁豆、石斛、竹叶等。待脓尽，服扶胃清热十余剂

而愈。

《余听鸿医案》

俞道生

王小竹。湿热蕴遏阳明，败坏胃中气血，失其下行为顺之常，反上逆而注于肺，咳呛浊痰，吐紫黑之血，其气亦臭，盖胃体生痛，连累于肺也。脉弦数，舌黄黄，午后寒热，头汗淋漓，证属胃痛，非轻恙也，暂拟清化。

姜汁炒川连 1.2 克 制半夏 6 克 酒大黄 9 克 冬瓜子 24 克
桃仁泥 9 克 薏苡仁 15 克 白杏仁 9 克 块茯苓 9 克 生紫菀 4.5 克
碧玉散 12 克，绢包 枇杷叶 五片，去毛绢包 鲜竹茹 9 克，二味煎汤代水

复诊：呕吐止而血清，身热减而汗少，咳呛依旧频频，痰尤腥臭，可知胃中湿浊蕴热上熏于肺，肺失肃降之司，湿为粘腻之邪，挟热则尤易升腾，一时最难清彻，势使然也。脉滑细数，右盛于左，舌苔黄化薄。昨进大黄黄连泻心汤，参入理肺之品，颇合病机，再宗原法化裁之。

处方同前，除酒大黄、桃仁、紫菀、碧玉散、枇杷叶、鲜竹茹，加炒黄芩 4.5 克、制川朴 4.5 克、炙知母 4.5 克、旋复花 6 克绢包、鲜佛手 4.5 克、益元散 12 克绢包。

《俞道生医案》

浅田惟常

一妇人腹痛在脐上一寸许，按之惕然彻痛，脉数，乃断为内痈。餌以鸡蛋，服以黄芪、薏苡剂。后十日，大便秘下脓血。

《先哲医话》

王旭高

缪。病起微寒微热，右肋章门穴酸疼。两月后痛处略肿，食少

便溏，面浮足肿，腰脊酸痛。脉附骨极细而锐。此脾家有湿热瘀伤，症属脾痛。日久正虚胃弱，恐其不克支持。

党参 炙甘草 陈皮 白术 川朴 木香 吴茱萸 干姜
当归 川芎 白芍 六神曲 茯苓 肉果 砂仁

敷方：

官桂 吴茱萸 干姜 川乌 生半夏 独活 乳香 没药
南星 白芥子 当归 各一钱，研末。

用陈酒干面调和，炖温，敷痛处。

《王旭高临证医案》

柳宝诒

苏。少腹痛硬有形，左腿酸痹，小溲梗痛，此属瘀阻营络，奇经之气，窒而不行。宿瘀不去，则新血不能归经。故近因癸期淋数，潮时亦淋漓而痛。脉象涩数，内热少纳，舌色薄灰满布。瘀血上熏，将成内痈。急与疏瘀导热，冀其通泄，乃有松机。

生地 丹参 丹皮 归尾 赤芍 大小蓟各 牛膝 红花炒
金铃子 延胡 木通 橘核络各 降香 炙乳没各 真西珀 苡米

另：小金丹陈酒化开，益母草汤送下。

二诊：改方去川楝子、延胡，加桃仁、泽兰。

三诊：内痈已溃，右少腹仍觉刺痛。营气内损，余毒未净。再与和营化毒，养血托脓。

细生地 全当归 赤芍 丹皮 银花炭 甘草 瓜蒌皮 广
陈皮 砂仁 苡仁 枳壳 白薇 鲜藕

《柳宝诒医案》

马文植

伍左。外症有发于外者，有发于内者，发于外者，人所易知，生

于内者，人所不知。据述右肋之间，先隐隐作痛，月余之后，即吐似脓似血，内夹稠痰者，成碗盈盘，胁痛，右关滑大之脉即平，以愚见度之，似属痈生于内。至于用药调治，内外本无二理，此时惟有气血兼培，脾胃并顾，留方备末，不识高明以为然否？还祈酌裁。

黄芪六钱 全当归三钱 扁豆四钱 甘草二钱 大白芍一钱
陈皮一钱 建莲五钱 生熟谷芽各二钱

复诊：细察所吐之物，红黄相间。或浓或淡者脓也，稠白如蛋白，牵连不断者痰也，如果纯是红脓，成碗成盆而出，岂不畏乎？所幸多半是痰，小半是脓。脓固热聚于胃而成，痰由食不化精所致。脓也、痰也，皆是胃中浊物，去则邪有出路矣。然宜渐少，不可渐多，渐少则真元易复，常多恐气血愈亏。人身有恙，自然全藉乎药，欲求无变，还须调养得宜，否则往往有由轻变重，重变棘手者不少。广成子曰：无摇尔精，无劳尔形，乃可长生。此二者，不特养生之妙法，亦治病之良方，昨投气血兼培、脾胃并顾之剂，夜卧颇安，脉亦收敛，脓与痰所吐亦少。今以原方加重分两，稍兼顺气豁痰。

黄芪 当归 扁豆 甘草 白芍 陈皮 建莲 川贝 山药
生熟谷芽

清晨独参汤先服

《外科集腋》

陈莲舫

潘。膈痈，内溃外溃皆可，惟内溃尤凶。若消为幸，如成均险。

麻黄 白芥子 生甘草 新会皮 当归须 光杏仁 大力子
生米仁 小青皮 熟地 沉香屑 竹沥夏 丝瓜络。

汪。内脏毒生于内而穿于外，寒热作痛，蒸脓之候。

生黄芪 郁李仁 光杏仁 焦米仁 炒归尾 生甘草 牛蒡子
火麻仁 瓜蒌仁 小青皮 西赤芍 皂角针。

嘉兴，某。内痈已成，自腕攻胁，绕腰攻胀。病实未除，大便而

无次序，或为进结，或为滞血，脉象沉弦。郁邪未清，气液两虚，治以和养。

败酱草 川楝子 左金丸 旋复梗 炒槐米 白茯苓 广陈皮 冬瓜子 生白芍 西洋参 晚蚕砂 丝瓜络 粉草藓 白木耳

《蓬斋秘旨》

孔继炎

族叔震青公之子，与予为十世兄弟。病咳嗽数月矣，渐渐发热，日夕尤甚。延医诊视，皆言阴虚，遍用养阴补肾之药皆不效。比予见时，杖而行，扶而起，两足俱肿，形神惫甚。震青公谆嘱善治，意甚惨切。予问：弟病起自何时？得于何因？震青公曰：去岁秋冬之交，咳嗽始作，风寒劳逸，大约皆有，亦难确指其来由。近来咳嗽渐减，病乃日进，每逢过午，热必加甚，或一日之间寒热迭作，兼之满腹串痛，饮食减少。予乃诊之，其脉洪大而数，右手尤甚，谓震青公曰：此内痈之症，非阴虚之脉也。曩来医家何得作阴虚治？震青公曰：咳嗽何以知非阴虚？予曰：若果阴虚，似此形神，脉已为沉数，为细数，为弦数，为短数，甚则虚数、促数，不得洪数并见矣。洪大之脉明系有余，形歉而见有余之脉，非外邪内陷，何以得此？盖此病之始起也，必系风寒外感。风，阳邪也。寒虽阴邪，郁久亦从阳化。两阳合邪，熏灼肺甲，咳嗽安得不作？然为风寒之咳嗽，历久终有减时，以外邪亦游衍之物，不能长踞肺甲也。为阴虚之咳嗽，至死亦不少衰，以内热乃骨蒸之病，势且伤尽肺金也。此病数月以后，咳嗽见减，明系风寒之邪舍肺而他徙。此时若用解散，如转流民，徙迁客，指顾可去，易于反掌。而又以其发热之故，认为阴虚而用补，补药一投，外邪永无出路，乃愈郁而愈热矣。不知其过午大热者，非阴虚亏损之验，乃邪转阳明之征也。至寒热迭作者，亦非真元内亏阴阳相乘之故，乃邪犯少阳进退互拒之为也。不然，饮食亦减少矣，凉无内因繁

饪之邪。而现在之满腹串疼究系何物？阴虚病中几曾见其症候哉？震青公曰：此子现在足肿，医家皆以为虚，吾亦谓然。予曰：阴虚不能丽气，孤阳四溢而作肿，洵有是理。然阳不亲下而亲上，势必先浮于头面，否则兼见于四末。今面不肿，手不肿，惟两足独肿，此殆地黄、归芍之属，未能补养真阴，先已滋出湿气。湿气流注，必出于足，《经》所谓浊邪居下也，不得指为阴虚之确证。曰：然则何以知其为内痈？若果生痈，尚可治否？予曰：此亦以其脉症卜之也。风寒之邪，先已从阳化热，洪数之脉又属亢阳独旺，阳盛则烁阴，其变何所不至？若气血津液偶有结聚不流之外，内痈必从此生矣。喘咳胸痛，吐唾腥粘，则肺痈也。心下作疼，手不敢触，则胃痈也。少腹肿痛，便数如淋，皮肤甲错，则肠痈也。今咳嗽既未全止，串疼又复满腹，知其痈生何处？从何施治？然独幸其串疼无定所也，或者毒犹未聚，结尚未成，先以清凉散其浊热，使从二便解去，大势既不全消，宁不稍就轻减乎？此平稳之治，不可缓也。乃疏方，用银花四两，菊花二两，花粉、黄芩、芍药、木通各两许，服方四剂，热清嗽止，饮食亦进，腹中不疼，而腹外之皮则大肿矣。震青公复使延予，予喜曰：皮肤作肿，热已外达，即生疮疖亦复何害？复减前方，服数剂，竟安然无恙面愈，月余遂健。

《孔氏医案》

孔伯华

郝男，二月十五日。肝胃并热，渐有内痈之势，咳嗽颇盛，吐红味腐，舌赤苔黄，脘皖尚无痛楚，脉大而数兼滑，亟宜辛凉内消肿溃。

生石膏两，研先煎 忍冬花六钱 旋复花三钱，布包 川牛膝三钱
赤小豆六钱 蒲公英六钱 代赭石三钱 生桑皮三钱 酒丹皮二钱
青竹茹两 鲜茅根两 炒稻芽三钱 甜葶苈二钱 血余炭三钱
全栝蒌八钱，元明粉钱并 益元散四钱，布包

梅花点舌丹四粒

郭妇，六月初七日。前后两阴之际为瘀浊所注，渐成内痈，三月前曾下瘀腐后，经尚未下，腰际肛门痛楚颇剧，脉弦大滑数，宜内消法试服。

赤小豆两 黄花地丁四钱 紫花地丁四钱 槐实三钱
生山甲一钱 忍冬花五钱 生川牛膝三钱 地榆三钱 制乳香五分
湖丹皮三钱 酒炒雅连钱 川黄柏三钱 杜仲炭三钱 炒知母三钱
川草薢四钱

《孔伯华医集》

疽

薛立斋

侍御朱南皋患鬓疽。肿痛发热，日晡尤甚。此肝胆二经血虚火燥。用四物加元参、柴胡、桔梗、炙草而愈。又因劳役发热，畏寒，作渴自汗，用参、芪、归、术、炙草、陈皮、五味、麦冬、炮姜而瘥。

州守胡适器，年七十，有少妾，患前症。肿焮作痛，头目俱胀，此肾水不足，肝胆火盛血燥。用六味丸料四剂，疮头出水而愈。二年后，七情失宜，饮食劳役，仍肿痛烦热喘渴，脉洪大而虚，用补中益气以补脾胃；用六味地黄以补肾肝而愈（如此症而纯用温化源之药，非先生不能，不如江案之可法也）。

《名医类案》

东垣

一男子，于左大腿边近膝股内出附骨疽，不辨肉色，漫肿，皮泽坚硬，疮热甚大，其左脚乃胫之髀上也，更在足厥阴肝经之分（阴包穴），少侵足太阴脾经之分（血海穴）。其脉左三部细而弦，按之洪缓，微有力。用生地一钱，黄柏二分，肉桂三分，羌活五分，归稍八分，土

瓜根三分，柴胡梢一钱，连翘一钱，黄芪二钱，作一服，酒二盏，水二盏，煎至一盏，去滓，空心热服。

一老人年七十，因寒湿地气，得附骨痛于左腿外侧，足少阳胆经之分（中渚穴），微侵足阳明分（阴市穴），阔六七寸，七—小尺，坚硬漫肿，不辨肉色，皮泽深，但行步作痛，以指按至骨，大痛。与药一贴，立止（照前案方）。再日，柔软而肿消，与内托黄芪酒煎汤愈。

《名医类案》

孙彦和

一人，年逾五旬，季夏初，患右臂膊肿盛，上至肩，下至手，指色变，皮肤凉，六脉沉细而微。此乃脉症俱寒，疡医莫辨。孙视之，曰：此乃附骨痛，开发已迟。以燔针启之，脓清稀解。次日，肘下再开之，加呃逆不绝，孙与丁香柿蒂散两服，稍缓。次日，呃逆尤甚，自利，脐腹冷痛，腹满，饮食减少，时发昏愦。于左乳下黑尽处灸二七壮（千金当妙法），又处托里温中汤，用干姜、附子、木香、沉香、茴香、姜活等分，咬咀一两半，欲与服。或者曰：诸痛痒疮疡皆属心火，发当盛暑之时，用干姜、附子可乎？孙曰：法当如是。《内经》曰：脉细、皮寒、泻利、前后饮食不入，此谓五虚。况呃逆者，胃中虚寒极也。诸痛痒疮疡皆属心火，是言其常经也。此症内外相反，须当舍时从症，非大方辛热之剂急治之则不能愈。遂投之，诸症悉去，饮食倍进，疮势温，脓色正。复用五香散数剂，月余平复。吁！守常者，众人之见；知变者，智者之事。如常而不知变，奚以为医？

南司马王荆山腿肿作痛，寒热发渴，饮食如故，脉洪数而有力。此足三阳经湿热壅滞，用槟苏败毒散一剂而寒热退，再剂而肿痛消，更用逍遥散而元气复。两月后，因怒肿痛如锥，赤晕散漫，用活命饮二剂而痛缓；又用八珍加柴胡、山梔、丹皮而痛止。复因劳役，倦怠懒食，腿重头晕，此脾胃气虚也。用补中益气加蔓荆子而安。

一膏粱酒色之人，患四日而入房，两臀硬肿，二便不通（不可为

实)。肾开窍于二阴，此属肝肾亏损。用六味丸料加车前、牛膝而便利；用补中益气而肿硬消。

一上舍内肿如锥，外色如故，面黄体倦，懒食，或呕，痛伤胃也。用六君汤以壮脾胃，更以十全大补以助其脓，针之，用前汤，倍加参、芪、芎、归、麦冬、五味、远志、贝母而疮敛。

《名医类案》

丹溪

一壮年，骶骨疼，以风药饮酒一年，乃防风通圣散去硝黄，加生犀角、浮萍，与百余剂。成一疽，近皮革脓出而愈。后五六年其处再痛，朱曰：旧病作无能为矣，盖发于新娶之后，多得香辣肉味，若能茹淡，远房劳，犹可生也。出脓血四五年，沿及腰背皆空，又三年而死。此纯乎病热者。

一女髀枢穴（无考）生附骨疽，在外侧廉少阳之分，始末悉用五香汤、十宣散。一日，恶寒发热，膈满，犹大服五香汤，一夕喘死。此升散太多，阴血已绝，孤阳发越于上也。

一少年天寒极劳，骶骨痛，两月后生疽，深入骨边，卧二年，取刺骨而安。此寒转热者也。

《名医类案》

东垣

一人，因饮酒太过，脉沉数，脑之下项之上有小疮，不痛不痒，谓是白疮，慢不加省，二日后，觉微痛，又二日，脑顶麻木，肿势外散，热毒熾发，又三日（七日矣），痛大作。一医以五香边翘汤。又一医云：此疽也，然而不可速疗，须四月可愈。果如二子言，可畏之甚也。乃请东垣视之，谈笑如平时，且谓疮固恶，可无虚耳。且膏粱之变，不当投五香，疽已七八日，当先用火攻之策，然后用药。午后，用火艾炷如二核许者攻之，至百壮，乃觉痛，次为处方云：是足太阳膀胱

之经，其病逆，当反治。脉中得弦紧（阴），按之洪大（阳）而数（阳中之阴），且有力，必当伏其所主而先其所因，其始则同，其终则异。可使破积，可使溃坚，使气和则已，必先岁气，毋伐天和。以时言之，可收不可汗，经病禁下（太阴经不可下），法当结者散之，咸以软之。然寒受邪（紧脉）而禁针，以诸苦寒为君，为用甘寒为佐，酒热为因，用为使，以辛温和血，夫辛以散结为臣，三辛三甘，益元气而和血脉，淡渗以燥湿，扶持秋令，以益气泻火，以入本经之药以和血，且为引用。既以通经，以为主用，君用芩、连、黄柏（君）、生地黄、知母（佐）酒制之，本经羌活、独活、防风、藁本、防己、当归、连翘（和血散热）以解结，黄芪、人参、生甘草（补元）、陈皮（佐）、苏木、泽泻（使）、桔梗配诸苦寒者三之一，多则滋荣气补土也。生甘草泻肾之火，补下焦元气；人参、陈皮以补胃；苏木、当归尾去恶血；生地、归身补血；酒制汉防己除膀胱留热；泽泻助秋令；去酒之湿热，必以桔梗为舟楫，乃不下沉（此方可通治太阳经毒）。服后疽当不痛大折，精气大旺，饮啖进，形体健，投床大鼾，日出乃寤，以手扣疮，肿减七八矣。李疑疮适透喉，遽邀视之，惊喜曰：疮平矣。不五七日，作痂而愈。

东垣又曰：凡疮皆阴中之阳，阳中之阴，二症而已。我治此疮，阳药七分，阴药三分，名曰升阳益胃散，胜十宣也。老人宜之，亦名复煎散。

陈录判母年七十余，亦冬至后脑出疽，形可覆面大。疡医诊视曰：俟疮熟以针出脓。因怒笞侍妾，疮辄内陷凹一韭叶许，面色青黄不泽，四肢逆冷，汗出身清，时复呕吐，脉极沉细而迟（温补无疑，身不然而清可想）。盖缘衰老之年，严寒之时，病中苦楚，饮食淡薄，已涤胞脓之气，独存瘦瘁之形，加之暴怒，精神愈损，故此有寒变也。病与时同。速制五香汤一剂，加丁香、附子各五钱，剂尽疮复大发，随症调治而愈。《内经》曰：凡治病必察其下，谓察时下之宜也。诸痛疮疡，皆属心火，言其常也。如疮盛形羸，邪高痛下，始热终寒，此反常也，固当察时下之宜而权治。故曰：经者，常也；法者，用也；医者，意

也。随所宜而治之，可收十全之功矣。

《名医类案》

石出

一人，形肥色紫，年逾五十，颈项少阳之分痈肿如碗。诊之，脉浮小而滑。曰：少阳多气少血之经，宜补。若用寻常驱热败毒之药，痈溃之后，难免他患。遂煎参芪归术膏一二斤用茶调服，无时。盖茶能引至少阳故也。旬余，痈溃而起。

《名医类案》

丹溪

一妇，年将七十，形实性急而好酒，脑生疽才五日，脉强，紧急且涩。用大黄酒煨细切，酒拌炒为末，又酒拌人参炒，人姜煎调一钱重，又两时，再与，得睡而上半身汗，睡觉，病已失。此内托之法也（按案：此案已见疮疡门）。

一人患脑疽，面目肿闭，头脉如斗。此膀胱湿热所致，以黄连消毒散二剂，次以槐花酒二碗，顿退。以指按下肿即复起，此脓成也。于颈颞肩颊各刺一孔，脓并涌出，口目始开。更以托里药加金银花、连翘，三十剂全愈。（正治法）

《名医类案》

薛己

阎老翟石门子，耳中作痛，内服外敷，皆寒凉败毒，更加项间坚硬，肉色如故，痈连于胸，寒热欲呕，饮食少思。薛视之，肿虽坚而脉滑数，此脓内溃也，虽属手三阳热毒之症，然其元气已伤，寒凉凝结，不能外溃。先用六君子汤、补中益气各二剂，调补脾胃，升发阳气，患处赤软，针出脓秽甚多，仍服数剂而愈。

一武职河南人，年逾五十，患脑疽内溃，热渴，头面肿胀如斗，

胸背色焮如涂丹，烦热便秘，此表里俱实。时虽仲冬，若非苦寒之剂，内疏外泄不救。遂针周顶出脓，及用清凉饮，内加大黄五钱，再用消毒散而愈。（正治）

一人脑患疽，发热口渴。医用苦寒药，脓水益多，发热益甚，面目赤色，唇舌燥裂，小便淋痛，昼夜不寐（阴虚），死在反掌。请薛治之。乃以加减八味丸料（从治）加参、芪、归、术、麦冬、甘草煎服之，熟睡半日，觉来诸症悉退，不数剂而疮愈。薛曰：病虽愈，当固其本元。彼不经意，且不守禁，次年患中风，后患背疽而歿。

锦衣叶夫人患脑疽，口干舌燥，内服清热，外敷寒凉，色黯不焮，胸中气噎，症属阳气虚寒。彼疑素有痰火，不受温补。薛以参、芪各五钱，姜、桂各二钱，一剂顿然肿溃，又用大补药而愈。

一妇冬患脑肿痛，热渴，用清热消毒溃之而愈。次年三月，其舌肿大，遍身发疔如紫葡萄，不计其数，手足尤多，乃脾胃受毒。各刺出黑血，服夺命丹七粒，出臭汗，疮热益甚，便秘二日，与大黄、芩、连各三钱，升麻、白术、山梔、薄荷、连翘各二钱，生草一钱，水煎三五沸，服之。大小便出臭血甚多，下体稍退，乃磨入犀角汁再服，舌本及齿缝出臭血，诸毒乃消，更以犀角地黄丸而愈。

一男子素善怒，左项微肿渐大如升，用地黄补中益气而愈。

《名医类案》

薛立斋

一男子患脑疽，其头数多，痛不可忍。先服黄连消毒散不应，更以忍冬酒服之，即酣睡觉，而势去六七，再四剂而消。又一男子所患尤甚，亦令服之，肿痛顿退，但不能平，加以黄芪、当归、瓜蒌、白芷、甘草节、桔梗，数剂而愈。

举人潘光甫，年四十。患脑疽焮肿，诊其脉沉静，谓阳症阴脉，断不起，已而果然。盖疮疡之症，虽属心火，尤当分表里虚实。果元气充实，内有实火者，寒剂或可责效。若寒凉过度，使胃寒脾弱，症

变阴或结而不溃，溃而不敛，阴阳乘戾，水火交争，死无日矣。

一老妇患脑疽，禀壮实，溃而痛不止，脉实便秘。与清凉饮二剂而痛止，更以消毒托里药而愈。

一老人患此，色赤肿痛，脉数而有力。与黄连消毒散，二剂少退，更以清心莲子饮，四剂而愈。

一男子患之，肿痛脉数，以黄连消毒散，二剂少退，以仙方活命饮，二剂而止。再以芎、归、白芍、银花、知、柏而溃，又以托里药而愈。

一男子头项俱肿，虽大溃，肿痛益甚，兼作泻，烦躁不睡，饮食少思，其势可畏。诊其脉，毒尚在。与仙方活命饮二剂，肿痛退半，与二神丸及六君子汤，加五味、麦冬、枣仁四剂，诸症少退，饮食少进，睡亦少得。及与参苓白术散，数服饮食顿进，又与十全大补汤，加银花、白芷、桔梗，月余而瘥。

一老人而赤肿痛，脉数而有力，与黄连消毒散二剂，少退，更与清心莲子饮，四剂而消。

一妇人患此症，脓熟不溃，胀痛欲呕，饮食少思，急针之，与托里药而愈。一妇人患之，不甚痛，不作脓，以托里消毒散，脓成针之，补以托里药而愈。

一老人脓清兼作渴，脉软而涩，以为气血俱虚，用八珍汤，加黄芪、五味子。彼不信，乃服降火之剂。果反作呕少食，始信。服香砂六君子汤四剂，呕止食进。乃投前汤，月余而愈。

一男子未溃，兼作渴，尺脉大而无力的，以四物汤加知、柏、麦冬、黄芪，四剂而渴减。又与加味八味丸，渴止疮溃，更用托里药兼前丸而愈。

一男子肿痛脉数，以荆防败毒散，二剂而痛止，更以托里消毒药而消。

一男子痃肿疼痛发热，饮冷，脉洪数。与凉膈散二剂而止，以金银花散四剂而溃，更以托里药而愈。

一老妇稟实，溃而痛不止，脉实便秘，以清凉饮二剂而止，更以托里消毒药而愈。

一男子肿硬不作脓，惟疮头出水痛甚，以仙方活命饮二剂，痛止而脓成，针之，更以托里药而愈。常治脓清，补而不应，及不痛，或木闷坚硬者，俱不治。

一男子脓将成，微痛兼渴，尺脉大而无力。此阴虚火动之症。彼谓心经热毒，自服清凉降火药愈炽。复求治，乃以四物汤加知、柏、五味、麦冬、黄芪，及加减八味丸，渴止疮溃，更以托里药兼前丸而愈。《中藏经》云：痈疽疮肿之作，皆五脏六腑畜毒不流，非独荣卫壅塞而发。其行也有处，其主也有归。假令发于喉舌者心之毒，皮毛者肺之毒，肌肉者脾之毒，骨髓者肾之毒。发于下者，阴中之毒，发于上者，阳中之毒。外者六腑之毒，内者五脏之毒。故内曰坏，外曰溃。上曰从，下曰逆。发于上者得之速，发于下者得之缓。感于六腑者易治，感于五脏者则难治也。观此则疽发于脑者，乃膀胱督脉阴气不足，阳火炽甚而出也。岂可专泥于心火，而不滋益阴气耶？

一男子耳后漫肿作痛，肉色不变，脉微数。以小柴胡汤加芎、归、桔梗，四剂肿少起。更以托里消毒散数剂，脉滑数，此脓已成矣，宜针之。彼畏而不肯用。因痛极，始针之，出脓碗许。以托里药，两月余始愈。凡疮不起者，托而起之，不成脓者，补而成之，使不内攻。脓成而及时针之，不数日即愈矣。常见患者皆畏针痛而不肯用，又有恐伤良肉而不肯用，殊不知疮虽发于肉薄之所，若脓成，其肿亦高寸余，疮皮又厚分许，用针深不过二分。若发于背，肿高必有三四寸，入针止于寸许，况患处肉已坏矣，何痛之有？何伤之虑？怯弱之人及患附骨疽，待脓自通，以致大溃，不能收敛，气血沥尽而亡者多矣。

一男子素不慎起居饮食，掀赤肿痛，尺脉洪数，以黄连消毒散二帖，湿热顿退。惟肿硬作痛，以仙方活命饮二帖，肿痛悉退。但疮头不消，投十宣去桂，加银花、藁本、白术、茯苓、陈皮，以托里排脓。

彼欲全消，自制黄连消毒散二帖，反肿硬不作脓，始悟。仍用十宣，加白术、茯苓、半夏，肿少退。乃去桂，又四剂而脓成，肿势亦退。继以八珍散，加黄芪、五味、麦冬，月余而愈。夫苦寒之药，虽治阳症，尤当分表里虚实，次第时宜，岂可始未悉用之。然焮肿赤痛，尺脉数，按之则濡，乃膀胱湿热壅盛也，故用黄连消毒散，以解毒除湿。肿硬作痛，乃气血凝滞不行而作也。遂用仙方活命饮，散结消毒破血。其疮头不消，盖因热毒熏蒸，气血凝滞而然也。宜用甘温之剂，补益阳气，托里以腐之，况此症原属督脉经阴虚火盛而出，若不审其因，专用苦寒之剂，使胃寒气弱，何以腐化收敛，几何不致于败耶。凡疮之易消散，易腐溃，易收敛，皆气血壮盛故也。

汪太常太夫人，年逾八十，脑疽已溃，发背，继生头如粟许，脉大无力，此膀胱经湿热所致。夫脉无力，乃血气衰也。遂以托里消毒药数服，稍可，更加参芪之剂，虽起而作渴，此气血虚甚。以人参、黄芪各一两，当归、熟地各五钱，麦冬、五味各一钱，数服渴止而不溃。以前药，加肉桂，十余剂，脓成针之，瘀肉渐腐，徐徐取去，而脓犹清不敛。投以大剂十全大补汤，加白敛、贝母、远志，三十余剂，脓稠而愈。凡患者气质素实，或有痰，不服补剂，不知脓血出多，气血并虚，岂不宜补。尝治疮，阴用参芪大补之剂，阳书败毒之名，与服之，俱不中满，疮亦有效。虚甚者尚加姜、桂及附子也。

一男子患脑疽，肿高作痛，肿处敷药，痛虽止而色变黯，肿外作痛。仍敷之，肉色亦黯，喉内作痛。不悟此为凉药所误，反尽颈敷之，其颈皆溃而死。

《续名医类案》

朱丹溪

元杜清碧，学道武夷，至婺源，病脑疽，自治不愈。朱往视之曰：何不服防风通圣散。清碧曰：服数四矣。朱曰：盍以酒制之。清碧

乃悟。服不尽剂而愈。自此心服丹溪。

《续名医类案》

窦材

一人，病脑疽，六日危笃，不进饮食。窦曰：年高肾虚，邪气滞经也。令服救生汤，即刻减半。夜间再进一服，全安。

一老妇脑后作痛，憎寒拘急。窦曰：此欲发脑疽也。急服救生汤，三服全愈。

《续名医类案》

薛立斋

一男子，患鬓疽，掀肿作痛发热，以小柴胡汤加连翘、金银花、桔梗，四剂而消。

一男子因怒后鬓际肿病，发热。以小柴胡汤，加连翘、银花、花粉、桔梗，四剂，根畔俱消，惟疮头作痛。以仙方治命饮二剂，痛止脓成，针之。更以托里消毒药而愈。

一男子头面掀肿作痛，时仲冬，脉弦紧，以托里温经汤汗之而愈。

一男子肿痛，寒热拘急，脉浮数，以荆防败毒散，二剂，表症悉退，更以托里消毒散，溃之而安。

一男子脓熟不溃，胀痛，针之而止，更以托里消毒散而愈。凡疮脓熟不溃，属气血虚也。若不托里，必致难痊。

一男子作脓掀痛，发呕少食，以仙方活命饮，一剂而止。以六君子汤，加当归、桔梗、角刺，溃而愈。

一男子脓清不敛，以托里散，加五味、麦冬而敛。

一老人肿痛发热，脓清作渴，脉软而涩，此血气俱虚也，欲补之。彼见作渴发热，乃服降火剂，果作呕少食，复求治。投六君子汤四剂，呕止食进，仍用补药，月余而愈。夫患者脏腑气血上下，各有

虚实，况阴症似阳，阳症似阴，岂可以发热作渴，而概用寒凉之剂。常治患者正气虚，邪气实，以托里为主，消毒佐之。正气实，邪气虚，以攻毒为主，托里佐之。正气虚，邪气实，而专用攻毒，则先损胃气。宜先作仙方活命饮、托里消毒散，或用灸法。俟邪气退，正气复，更酌量治之。大抵正气夺则虚，邪气胜则实。盖邪正不并立，一胜则一负，其虚不待损而自虚矣。若发背脑疽疔毒及患在四肢，必用灸法，拔引郁毒，以行瘀滞，尤不可专于攻毒。诊其脉而辨之，庶不有误。

一男子肿焮痛甚，发寒热，服十宣散愈炽。诊之脉数而实，此表里俱有邪也。以荆防败毒散，加芩、连、大黄，二剂少愈，更以荆防败毒散，四剂而消。大抵疮疡之症，肿焮痛甚，寒热往来，或大便秘结，小便淋漓，心神愤闷，恍惚不宁，皆邪热之实也，岂可补哉。东垣云：疮疽之发，其受之有内外之别，治之有寒温之异。受之外者，法当托里，以温剂，反用寒剂，则是皮毛始受之邪，引入骨髓。受之内者，法当疏利，以寒剂，反用温剂托里，则是骨髓之病，上彻皮毛，表里通溃，共为一疮。助邪为毒，苦楚百倍，轻则危殆，重则死矣。

赵宜人年逾七十，患鬓疽已溃，焮肿痛甚，喜冷，脉实，大便秘涩。东垣云：烦躁饮冷，身热脉大，精神昏闷者，皆脏腑之实也。遂以清凉饮一剂，肿痛悉退。更以托里消毒药三十余剂而平。若谓年高溃后，投以补剂，实实之祸不免矣。

维扬俞黄门年逾三十，冬月鬓患毒，肿焮烦躁，便秘脉实。此胆经风热壅上而然也。马氏云：疮疡之症，热壅而不利者，大黄汤下之。遂以一剂，便通疮退。更以荆防败毒散二剂，再以十宣散去桂，加花粉、银花，数剂而愈。大宗伯罗公耳后发际患此焮痛，脉紧数，以小柴胡汤加桔梗、牛蒡、银花，四剂而愈。

《续名医类案》

薛立斋

高举人，年逾三十，夏月热病后患颐毒，积日不消，气息奄奄，脉诊如无，饮食少思，大便不禁。《脉经》云：脉息如无似有，细而微者，阳气衰也。齐氏云：饮食不入，大便滑利，肠胃虚也。遂以六君子汤加炮姜、肉桂，溃而脓水清稀。就于前药，每服加熟附子一钱，数剂食进，脓亦渐稠。再以十全大补汤，用酒芍加白敛，月余而痊。

《续名医类案》

薛立斋

府庠彭碧溪患腰疽，服寒凉散毒之药，色黯不痛，疮头如铺黍，背重不能安寝，耳聩目白，面赤无神，小便频涩，作渴迷闷，气粗短促，脉浮数，重按如无。先用滋水之药一剂，少顷便利渴止，背即轻爽。乃砭出瘀血，以艾半斤许，明灸患处。外敷乌金膏，内服参、芪、归、术、肉桂等药。至数剂，元气稍复，自疑肉桂辛热，一日不用，手足并冷，大便不禁。仍用肉桂及补骨脂二钱，肉豆蔻一钱，大便复常，其肉渐溃。更用当归膏以生肌肉，八珍汤以补气血而愈。

锦衣傅允承母，年逾七十，腰生一瘤，作痒异常，脉浮数，反恶寒。曰：此疮疽症也。未溃而先弱，何以收敛？况大便不通，则真气已竭，治之无功，因恳请，不得已用六君加藿香、神曲数剂，饮食渐进，大便始通。更用峻补之剂，溃而脓清作渴。再用参、芪、归、地、麦冬、五味，渴止。彼喜曰：可无虞矣。曰：尚难收敛，先日之言也。彼疑，遂速他医，卒致不起。

举人顾东溪久作渴，六月初腰患疽，不慎起居，疮溃尺许，色黯败臭，小便如淋，唇裂口渴。七月终请治，左尺洪数，左关浮涩。谓：先渴而患疽者，乃肾水干涸，虚火上炎，多致不起。今脓水败臭，色黯不痛，疮口张大，乃脾气败而肌肉死也。小便如淋，痰壅喘促，口干裂，乃脾肺败而肾水绝也。左尺洪数，肾无所生也。左关浮涩，肺

克肝也。况当金旺之际，危殆速矣。二日后果歿。盖此症既发于两月方歿者，乃元气虚不能收敛也。若预为调补，使气血无亏，亦有得生者。

一男子腰患毒，脓熟不溃，针之脓大泄，反加烦躁。以圣愈散汤四剂而宁，更以人参养荣汤加麦冬、五味两月而愈。此人后患湿气，遂为痼疾。凡疮脓血去，多痰，口难合，尤当补益，务使气血平复，否则更患他症，必难治疗。慎之！

一男子腰中患疽，发而不溃，其气血止能发起，不能培养为脓也。投大补药数剂而溃，又数剂，脓出尚清。乃服参芪归术膏斤余，脓少稠；数斤渐稠，肌肉顿生。凡大痈疽藉气血为主。若患而不起，或溃而不腐，或不收敛及脓少或清，皆气血之虚也。宜大补之，最忌攻伐之剂。亦有脓反多者，乃气血而不能禁止故也。若溃后发热作渴，脉大而脓愈多，属真气虚而邪气实也。俱不治。常见气血充实之人患疮，皆肿高色赤，易腐溃，而脓且稠，又易于收敛；怯弱之人多不起发，不腐溃又难于收敛。若不审察而妄投攻剂，虚虚之祸不免矣。若患后当调养，若瘰癧、流注之症尤当补益也。否则更患他症，必难于措治。慎之！

有人腰间生一毒瘤，红肿未破，皮痛不可忍，俯躬而行。一人取新杀牡猪肝，切片如疮大贴上，外以布缠定，一对昼其病良已，肝色变黑，臭不可近，弃之地，犬不食。下有小指大一点，尚硬，乃肝小未贴满所致，竟亦无他（《奇疾方》张在玉谈）。

《续名医类案》

薛立斋

昆山张举人元忠，孟秋患腰疽，疮头如大豆粒，根大三寸许，微肿略赤，虚症悉具。用桑枝灸患处，服活命饮一剂，肿起色赤，饮食仍少，用香砂六君子汤四剂，食渐进，后用大补药，脓虽成而不溃。乃每剂加附子一片，二剂后脓自涌出，旬日而愈。

陆氏女初嫁患腰痛，不肿，脉沉滑，神思倦怠。此为内发七情之火、饮食之毒所致。以托里药一剂，下瘀脓升许。陈良甫曰：疮未溃内陷，面青唇黑者，不治。果殁。

《续名医类案》

薛立斋

举人于廷器腿患流注年余，出腐骨少许。午前畏寒，午后发热，口干唾痰，小便频数。以为足三阴亏损，朝用补中益气汤，夕用六味地黄丸料加归、芪、五味各三十余剂，外用豆豉饼，诸症渐愈。又以十全大补之类，喜其慎疾而愈。

一儒者患附骨疽，失于调补，疮口不敛，日出清脓少许，已而常出三腐骨，其脉但数而无邪。此气血虚，疮结脓管而不能愈。经以乌金膏，日服十全大补而愈。

上舍王廷璋患前症，三年未愈。肢体消瘦，饮食难化，手足并冷，大便不通，手足阴冷。此阳气虚寒，用补中益气汤、八味丸及灸其患处而愈。

一男子臂患流注，出腐骨三块尚不敛。发热作渴，脉浮大而涩。乃气血俱损，须多服生气血之剂，庶可保全。彼惑于火尚未尽，仍用凉药。内服外敷，几危，始求治。其形甚瘠，其脉愈虚。先以六君子汤加芎、归日余，饮食渐进。以八珍汤加肉桂三十余剂，疮色乃赤。更以十全大补汤，外以附子饼灸之，仅年而瘥。《医林集要》云：骨疽乃流注之败症也。如用凉药则内伤其脾，外冰其血。脾主肌肉，脾气受伤，饮食必减，肌肉不生。血为脉络，血受冰则气不旺而愈滞。宜用理脾健脾，则肉自生而气自运行矣。又有白虎飞，留连周期或展转数岁，冷毒朽骨出尽自愈。若附骨腐者可痊。正骨腐则为终身废疾矣。有毒自手足或头面肿起，或兼疼痛上至颈项骨节去处如痲痹贯珠，此风湿流气之症也，宜以加减小续命汤及独活寄生汤治之。有两膝肿痛起或至遍身骨节疼痛者，此风湿痺，又名历节风，宜

用附子八物汤治之。又有结核在项腋或两乳傍或两腋软肉处，名曰瘰癧痼，属冷症也；又有小儿宿痰失道，致结核于颈项、臂膊、胸背之处，亦冷症也，俱用热药敷贴。已上诸症皆缘于肾，肾主骨，肾虚则骨冷而为患也。所谓骨疽皆起于肾，亦以其根于也。故用大附子以补肾气，肾实则骨有生气而疽不附骨矣。

《续名医类案》

张景岳

一人，年三十余，素多劳。忽患环跳酸痛，数月后大股渐肿。曰：此附骨疽也，当速治。与活命饮二贴，未效而肿益甚。因混投清火解毒，遂致呕恶发热，饮食不进，势甚危。复求治，与参芪内托散大加炮姜数剂而呕止食进，其肿软熟。知其脓成，针之，脓不多。复与九味异功煎，遂大溃，且瓣瓣出脓，溃者五六处，腿肉尽去，止存皮骨矣。溃后复呕，发热不食。以十全大补汤、九味异功散相间与之，热渐退，食渐进，然足筋短缩，但可坚膝仰卧，左右挨紧，毫不能动，动则痛极，自分已成废人。凡用十全大补三十余剂，人参三斤，乃肉生筋舒如故。

一人年近三旬，素不节欲，忽环跳穴酸痛月余。张曰：此最可畏，恐生病毒。不信。或谓：筋骨痛常事耳，不过风热使然。与散风清火药，至半年后果微肿。复求治。曰：速用托补以救根本，尚不迟也。又不信。谋之疡医曰：岂有肿疡未溃遽可温补邪？复用清火消毒之剂，及大溃而危。再延视，则脉症俱败，悔无及矣。

一膏粱子年三旬，素耽酒色，亦患前症。令早服药，执拗不从。及肿而脓成，令速针之，不步。偏信庸流，数以苦寒解毒之药。不知脓已成，犹何毒之可解？但有愈久愈深，直待自溃，元气尽去，不可收拾耳。

《续名医类案》

王肯堂

一人患附骨疽，脓熟不能泄溃而入腹。精神昏愤，粥药不人，医无所措。诊之脉细如蛛丝，气息奄奄。曰：无伤也。用针刺其腹，脓大泄，然皆清稀，若蟹吐沫。在法为透膜不治，用参、芪、附子，加厥阴行经之药，大剂饮之。又服八味丸，食大进升余，肉数离，旬日而平。所可治者，溃瘍之脉洪实者死，微细者生。病脉相合，故可治也。刺腹者脓不泄，必内攻。按之知其疮深，即刺无害，所以不透膜。八味补肾，肾气旺而上升，胃口开而纳食。凡泄脓既多，刀圭之药其何能？济迁延迟久，且有他患，故进开胃之药，多食肉以补之，肌乃速生，此治溃瘍之大法。

一男子腿根环跳穴患，痛彻骨外，皮如故，脉数而滞滑。此附骨疽脓将成也。用托里药六剂，肿起作痛，脉滑数。其脓已成，针之出碗许，更加补剂，月余而瘳。

一男子患附骨疽，肿硬发热，骨痛筋挛，脉数而沉。用当归拈痛汤而愈。

《续名医类案》

薛立斋

地官孟卿环跳穴患疽，内服外敷皆败毒寒剂。因痛极刺之，脓瘀大泻，疮口开张，其色紫黯，右关脉浮大。此胃气复伤不能荣于患处也。以豆豉饼、六君子汤加藿香、砂仁、炮姜数剂，由是胃气醒而饮食进，患处暖而肌肉渐生。再以十全大补汤而愈。

大尹都承庆患附骨疽，内痛如锥，外色不变，势不可消。喜其未用寒剂，止因痛伤胃气而不思饮食。用六君子汤治之，饮食少进；更以十全大补二十余剂而脓成。针去，仍以大补汤倍用苍、芪、归、术，加麦冬、五味、远志、贝母，数服脓渐止而疮亦愈。

一儒者左腿微肿，肉色如故，饮食少思。此真气虚而湿邪内袭

也。盖诸气皆秉于胃，法当助胃壮气。遂用六君加藿香、木香、当归数剂，饮食渐进。更以十全大补，元气复而愈。

一儒者两腿肿痛，肉色不变，恶寒发热，饮食少思，肢体倦怠，脾气不足，湿痰下注也。以补中益气加半夏、茯苓、白芍，二剂寒热退而痛消。又十余剂，脾胃壮而形体健。

一男子因负重、饮食失节，胸间作痛，误认为疮毒。服大黄等药，右腿股肿，肉色如故，头痛恶寒，喘渴发热，脉洪大而无力的。此劳伤元气，药损胃气而然耳。补中益气汤四剂，又用十全大补汤数剂，喜其年少而愈。

一妇人患附骨疽，久而不敛，至腿细短软，脉来迟缓。以十全大补汤加牛膝、杜仲及附子饼炙之，两月余而愈。丸脓溃之后，脉涩迟缓者，易愈。以其有胃气故也。脉来细而沉，时直者，里虚欲变症也。若烦痛，尚未痊也。洪实粗散者，难疗，以其正气虚而邪气实也。

一妇人环跳穴作痛，肉色不变，脉紧数。此附骨疽也，脓未成。用内托黄芪，酒煎汤，加青皮、龙胆草、山梔，数剂而消。

一妇人患附骨疽久不愈，脓水不绝，皮肤瘙痒，四肢痿软。以为虚，欲补之。彼惑为风疾，遂服祛风药，竟致不起。陈无择云：人身有皮毛、血脉、筋膜、肌肉、骨髓以成其形；内则有心、肝、脾、肺、肾以主之。若随情妄用喜怒劳佚，致内藏精血虚耗，使皮、血、筋骨、肉痿弱，无力以运动，故致痿痹，状与柔风、脚气相类。柔风、脚气皆外所因，痿则内藏不足所致也。

山西曹主簿年逾四十，夏间患附骨疽，服托里药而愈。至秋饮食少思，痰气壅盛，口舌生疮。用八味丸治之而愈。

一老人腿患附骨疽，肿硬大，按方痛，口干脉弱，肿聚不溃，饮食少思。谓：肿下而坚者，发于筋骨；皮色不变者，发于骨髓。遂以参、芪等药托之，三十余剂，脓虽熟不穿。谓药力难达，必须针刺。不听。至旬日方刺之，涌出清脓五、六碗许。然衰老之人，气血不足，养毒又久，竟不治。大抵疮疽旬日不退，宜托之；有脓刺之；有腐肉

取之；虚则补之，此十全之功也。

王上舍患附骨疽，畏针不开，臂膝通溃，脉数发渴，烦躁时嗽，饮食少思。齐氏曰：疮疡烦躁时嗽，腹痛渴甚或泻利无度，此恶症也。脓出之后，若脉洪数，难治；微涩迟缓，易治。遂刺之，脓出四、五碗许。即服大剂参、术、归、术，翌日脉稍敛；更以八珍汤加五味、麦冬、肉桂、白敛三十余剂，脉缓脓稠，三月而愈。

《续名医类案》

中神琴溪

山科农家右卫门，年四十余，背右旁发疽，经八寸，犹无痛，其色紫黑，寒热往来，口干咽渴。其人素嗜酒，而甚惮医药，故唯以斗酒凌其疾苦。家人皆恐为之毙，要之欲令医药。虽百端谏之，然不肯服。曰：“宁与生乎汤药之苦，不如死乎糲藁之甘。”家人皆计穷而诉之先生，先生诊之，脉弦实，按背疽淳热如火，曰：“余能从汝所好而治之。”乃与龙门丸二三百丸，日令服五十余丸。戒曰：“必有下利，莫以有惮恐也。”渠喜，始服先生之言，后数旬来谢曰：“初从服丸药，气宇方开。居十日，脓成则破出之。又服前丸，食饮日进，稼穡负载，愈于畴昔云。”

《生生堂治验》

高锦庭

周某某，背疽坚肿不透，腕中湿浊不运，大脓未见，胸痞啰恶，脉细数而软，拟开达上焦。

川朴 郁金 香附 半夏 陈皮 枳壳 茯苓 杏仁

二诊：大脓虽透，瘀腐未脱，寒热未退，胸痞啰恶，湿浊不运故也。仍从苦泄宣通。

黄连温胆汤去甘草 川厚朴 苏梗 瓜蒌仁 香附

三诊：舌苔已化，症热已定，寒热未除，大便尚难，拟通腑泄热。

川连 厚朴 半夏 广皮 黑栀 香附 丹皮 谷芽

另更衣丸

胡某，脑疽蔓肿无情，身热脉弦数，嫩红不透，面色惨淡。此火郁于中，兼挟伏暑，当与发之。

柴胡 豆卷 川芎 制蚕 首乌 甲片 大贝 花粉 夏枯草

郑某，气虚顶陷，血虚根散，疮头流血，纯乎气不收摄也。况神识模糊，转动不能自由，此七恶中之最忌者。《疡症论》云：“气血虚者，首尾必须补托。”目下邪已内陷，补法已晚，奈何？

珠黄散 人参钱半，煎汤送服

范某，偏右脑疽已经两候，脓泄而痛不减，肿热蔓延，毒郁不化之兆。虑其毒陷神昏，且以宣化解结法。

豆卷 牛蒡子 杏仁 连翘 制蚕 角刺 菊叶 桑叶 竹叶

薛某某，枕疽初起，未及满候，根不松，顶不突，尚未见脓，邪未透达，必有加重之虑，宜清营泄热。

鲜首乌 羚羊角 竹茹 夏枯草 山栀 丹皮 银花 天虫 桑叶

汪某，脑疽坚肿不退，根板不化，火毒内壅，先泄营热，参以散解。

羚羊角 羌活 角针 决明 山栀 丹皮 银花 芦根

二诊：左脉弦数，右稍平，头痛偏左，肝阳上冒，脑疽尚未透脓，大便旬日不通，急宜行府泄热。

前方去羌活、角针，加瓜蒌仁、黄芩、枳壳。

三诊：通府泄热，便行脓大泄，夜不安寐，气血已衰，宜扶正托里。

洋参 黄芪 当归 茯神 枣仁 丹皮 砂仁 谷芽

四诊：腐虽渐脱，新肉淡白，此气血两衰之故，宜扶正法。

归脾汤去术、木香 加参条。

顾某，脑疽几及三候，根盘板滞，脓水清稀，神识时糊，脉虚细数，此正气虚不化毒，毒气反陷于里，姑拟扶正托毒，望其转机为幸。

生黄芪 洋参 当归 赤芍 连翘 银花 丹皮 菖蒲

二诊：脑疽最怕三陷变局，谓火陷、虚陷、干陷也。兹疡经三候，忽面赤喘促，肢冷汗出，全属少阴失藏，真阳外越，势有孤城失守之虞。王先生同议回阳救逆，希图幸于万一。

人参 川熟附 干姜 北五味 白芍 茯神 当归 炙草

按：用温药以救脱，舍病治人，急则治其本也。

周某某，对口疽几及两候，脓稀根硬，烦躁恶心，湿浊壅滞于里，毒火不能外泄，渐有神昏之变。

川连 半夏 连翘 山梔 枳壳 郁金 竹茹

二诊：色脉合参，内陷之机难免。

犀角地黄汤 调下珠黄散

陈某某，对疽初起，根坚未化，脓未透泄，其势日张，现在寒热日作，急宜清解。

鲜首乌 元参 丹皮 连翘 银花 黑山梔 枳壳 夏枯草

缪某某，对疽及候，顶虽高肿，根坚散漫，寒热交作，有日张之热。

羚羊角 鲜首乌 炙甲片 角刺 制蚕 黄芩 夏枯草

王某某，对疽脓未透彻，用方急于补托，毒火不能外泄，而反弥漫于中，致增胸痞恶呕之患。子和云：“虚而不补无害，实而补之祸生。”虚者不补尚藉谷气以滋培，实者补之仅助邪威也。《经》云：“营气不从，逆于肉里，乃生痈肿。”又云“膏粱之变，足生大疔。”是疡门扼要之言。兹疡经旬日，近不更衣，脉滑数，苔白腻，皆湿热壅遏之象，拟以苦辛宣达，冀其表里开达，庶免邪陷神昏变端。

泻心汤合温胆汤 杏仁 瓜蒌仁

二诊：苦辛相合，能降能通，今呕平便解，和中解毒为是。

半夏 豆卷 黄芩 银花 连翘 黑山栀 蒺藜

三诊：腐脱新生

半夏 银花 云苓 陈皮 丹皮 甘草 黄芩 谷芽

沈某某，疡发极大，而根盘平塌，脓水清稀，四围小疔周攒，此百鸟毒也。脉来虚细，时作呃逆，遍体肌肤浮肿，乃正虚不能化毒，毒气散漫周身。症已阳变为阴，须用温热之药发之，然亦危矣。

人参 五味 生黄芪 肉桂 麦冬 炙草 丁香 柿蒂 藿香

二诊：色脉合诊，恶疑俱全，势到临崖，明知难挽，与其坐而待亡，不如背城决战。古人有言：尽人事以待天，求无遗憾焉耳。

制洋参 大熟地 生绵芪 鹿角 官桂 炙草 丁香 柿蒂

外用 炙乳香 艾叶 硫黄 好陈酒煎滚，以鼻嗅其热气能止呃

另黄芪 防风 桃叶 三角风一两，煎汤一桶，熏患处

三诊：呃逆稍止，便泄仍然，疡脓清稀，烂孔深大，势尚险笃。姑仿孙彦和治王伯禄背疡，舍时从症例，用托里和中法，备商。

制洋参 上黄芪 大熟地 官桂 炙草 煨木香 茯神 归身 川芎 丁香 柿蒂 诃子 面包肉果 生熟谷芽

煎汤代水

四诊：恶疑渐减，便是佳兆，但疡腐未能骤脱，脾胃未能更复，仍宜刻刻留意，庶可望登彼岸。法以和温和补，兼参养阴。

制洋参 黄芪 茯神 麦冬 山药 炒扁豆 新会皮 白芍

五诊：恶疑虽平，善处未见，气血大伤，峻补不复，终为逆修。然舍补更施何法？虑人参价贵，绵力无多。一暴十寒，无济于事。倘中道而止，则前功尽弃，奈何奈何？！

十全大补汤去桂加枣仁 荷蒂

六诊：症势日就干痿，药力不能骤振，有日薄西山，孤城失守之象，鼓衰力竭，奈何奈何？！同文澜先生勉拟峻补真元，以图恢复，事之成败，只可听天。

王孟英

发背之极大者，所谓竟体发也。平湖郭湘屏患此证，始医者进犀角、黄连，致成黑陷，后医者投桂、附而作淋渴，饮食不进。或断三日，或断一旬，更医数辈，技穷莫措。令郎肖屏茂才求余往视。被问曰：曾见此大证乎？余实未尝见如许大证，欲安其心，慰之曰：吾所见有大于此者，不足畏也。为取去腐肉碗许，病者即觉如释重负。其子请用十全大补，余晓之曰：尊翁之所以绝粒者，正坐补托之故，胸次宿药未消，今再峻补，生机绝也。俟三日后，宿药消尽，胃气自苏。此证本由湿热郁蒸而成，寒凉以遏之，温补以锢之，宜其滋蔓日甚也。今惟导赤散驱其湿热下行，至溺清则止。越五日复视，已能自起，在床沿叩谢救命。凡百八十餘日而全愈。在百日之间，曾患牙疳，与竹叶石膏汤而安。其人至今尚在。设依立斋上渴下淋而用十全、八味，安有生理？隐良甫云：既溃一毫冷药不可进，其可泥乎？

癸丑四月，桐乡屠甸镇张德祥令正，年八十一岁，患脑铄，医者皆云必死。余视之，疮已溃烂不堪，不卧者二十三日，不饮食者五日，平素体肥，肌已削尽，两耳绝不闻声，脉象弦数。性不喜药，一病至此，亦未尝一药也。诸医皆谓不服药以至于是，余谓溃败至此，尚可挽回者，幸未服药耳。但须从我言，行我法，则五、六十日可以收功，盖疮口已深，须开一孔泄其脓血，若不从我言，则下延及喉，虽有神丹，不可救矣。病家唯唯。遂开一孔，去黑血盞许，脓亦相等。明日头重如失，两耳能听，且进粥碗许。越五日复视，腐肉下半脱尽，新肉已生，细视上半黑处，尚未全死，用物挑起其皮，入药于内，令其每日抽换，果得粘连。凡九十日全愈。其满头之发皆白，而烂处复生之肉，新发皆黑。此人至今尚健，益信享高年者不服丸散。嗣有于某等十余人，余悉治愈。是此证并无死法。曩上海望族王辑庭

少嗣君，年六十一岁，患此证。素识医者谓曰：少忍痛，当为去之。不听，逾旬渐大，适道署延苏州陈某治疾，乃赫赫一时者，遂请视之。进以人参、鹿茸等药，疮已势甚，犹曰未也，乃杀鸡煎汤，煮药以进，一服而口眼皆合，头重如山，证随以败。凡富贵之家，死于此者甚多。始则畏少痛而逆忠言，继则慕虚名而被惨杀，非死于病，实死于医。愿天下人少察狂瞽之言，毋蹈前车之覆。

屠甸镇王某，先患疔毒，旋生背疽，高肿不红，医巫术尽，家破而病日剧。延余往视，肌肉全消，面无人色，脉至断续如丝，按其疮，虚软漫肿无红，证已七十六日矣。流泪被面，声言救命，音细如蜂，深堪悯侧，殊难措手。合家痛哭，而求设法。余索其方视之，先则犀角、牛黄，继则参、芪、归、术之类，皆谓内有瘀血，虚不化脓也。余静坐筹思，七十馀日之瘀血，既不化脓，亦不消散，乃脾胃被伐，气弱难溃，内肌尽腐，皮厚难穿，日久力穷，势濒于殆。若不决则必死，设决之面斯须毙命，又当如何？乃谓其父曰：此证内肉尽腐，外皮甚厚，脓无出路，以致背重如山，肌肉日消，面脓日多，势必消尽而后已。吾今筹一死里求生之法，汝可导我复视。其父从之。因细按其皮，略无薄隙可乘，不得已久按以乱之，卒然一刺，得大脓四大碗，幸不毙命，随以粥食调之。越五日复视，已能披衣起坐矣。以上数证，皆所谓养痍为患也。古人原有刀针不可轻用之戒，盖为手法不精，或轻浅之证，及脓未成时而言也。以决之之法，诚不易易，即辨脓亦甚难，脉诀洪滑为脓成，而此证脉至如丝，刺脓至四大碗，脉岂可凭乎？然此证若诊于三十日内外，未始非洪滑也。惟医家误信补托可使自溃，孰知欲托其脓者，反能化肌肉以为脓，脓日多则气血日少，尚欲寻其洪滑之脉，安可得乎？昧者犹譬刀针为蛮法。呜呼，此与谈性命而废武备，寇至不战，委而去之者，何以异耶？须知此脓不刺，必与此身同就木而已。余见如此毙命者，指不胜数，故愤而为之，岂好为痿医哉！至腿上附骨疽，迁延补托，而脓随身敛者，则尤多也。

潘氏子肋下肿溃，竅孔甚巨，孔中作声，如婴儿啜泣。余曰：是名渊疽，法不得治。其母哀请曰：是子少孤，婚又未久，一脉之传，惟此而已。余闻之惻然，乃曰：但善调摄，更量力以行阴德，万分一得不死，专事医药，不足恃也。母子唯唯受教。余乃日夜属思，以谓证属太虚，固当补益，但疽孔作声，则内膜已破，气从旁出矣。非护其膜，补亦徒施！以人参、白术、乌梅炭、白芨、白蜡、象牙屑、猪脊髓和为丸，令日三服，以固气；仍捣诸药，益以生肌之品，制若粘饼，塞疽口，丝绵裹青铅罨其外，大膏药盖之，阔布缠缚其体，三日一易：复用参麦、六味加龙、蛎等品，煎汁饮之。如是二十餘日，其声渐除，三月餘而口敛。余初经治，不望其果奏效也。

镇洋郑秀才颈下出水，涓涓不绝，已数年矣。医谓串病。余视之，溃口三、四，皆甚深奥，曰：此古所谓蚁痿也。用穿山甲炙存性研傅，果瘳。

《归砚录》

茅家埠翁嘉润，患腰疽，愈而复发者五年，费用不资，诸疡医治之不效。盛少云嘱其求治于孟英，切其脉，弦细以数。曰：子之幸也。此内损证，外科恶（乌）知乎？与大剂甘润滋填之药，匝月而痊，至今不发。

李燕标参戎，于癸夏将赴都，馆于石北涯家，项后患疽，外科金云不治。孟英荐老医朱嵩年疗之渐安。孟英偶诊其脉，谓北涯曰：李证有可愈之机，脉难久享其年。北涯惊问所以？孟英曰：左尺坚抟，真阴已伤。非善象也！既而告痊北上，今春果卒于京。

《王氏医案》

费伯雄

某。肩下痰注发，将及半载，势已成脓。宜托毒和营。

归尾 甘草 赤芍 大贝 乌贼骨 陈皮 半夏 银花 骨碎补 炙甲片 陈酒

某。先患疟邪，继之发为渊疽肿硬，三月以来，胁下胀痛不松，寒热不解，脘痞食少，脉形神色皆欠。然外患势有溃脓，防窜内膜，内恙已久，亦属缠绵，均非易治之候。

鳖血炒柴胡一钱 小川朴一钱 砂仁一钱 连皮苓四钱
省头草一钱 佛手八分 大腹皮二钱 半夏曲二钱 青陈皮各一钱
生熟谷芽各三钱 煨草果八分 车前子三钱 苏梗叶各八分
生姜一片 茅根四钱

某。伏兔疽已溃，脓水或多或少，乃痈疽之大症也。脾胃既弱，食少嘔恶。拟六君子汤多服可效。

西洋参元米炒一钱半 炙甘草三分 云苓三钱 煨葛根二钱
煨木香五分 藿苏梗各一钱半 淮山药三钱 制半夏一钱半
熟谷芽三钱 大砂仁研后入，一钱 淡竹茹一钱 生姜三片 荷叶三钱

某。右足臃疽破烂多载。近因奔劳，患处大发，腐肉已去，惟疼甚，身热不解。宜和营清化。

当归一钱半 赤苓一钱 陈皮一钱 赤白芍各一钱 生草五分
丹皮参各二钱 柴胡一钱 天花粉三钱 银花三钱 生苡仁四钱
草薢三钱 钩钩后入，三钱 羚羊片先煎，一钱 桑枝一两 红枣五枚
茅根一两

某。臃疽久延，近腹旁起栗子样破烂痒痛。宜清解风湿。

焦苍术八分 小生地三钱 细木通一钱 黄柏三钱 丹皮二钱
净蝉衣一钱 赤苓三钱 知母二钱 苦参一钱 荆芥一钱 生草八分
草薢三钱 生首乌四钱 防己二钱 生苡仁四钱 茵陈二钱
豨莶草三钱 黑芝麻三钱 桑枝一两

复诊：加海桐皮、炙乳没。

《费伯雄医案》

李铎

参军吴元丰女，年十八岁，右足跟生琉璃疽，形如枣栗，自用红

灵丹、太乙膏敷贴，拔出清水作痛。此女形肥，体质素禀薄弱，又当近出阁之时，其家畏请外科，恐其妄施针割，致成大患，召余诊治。余审其所流清水，不能成脓，用大剂温补托脓、宣通壅滞之剂，外用白降拔毒散敷之得脓，二三日脓尽，用生肌定痛散敷之而愈。余素不谙外科，因向年曾为治其虚邪附身殊效，深知为赋禀不厚，气血壅滞，凝注足跟而成。按足跟乃肾经所过之地，依法施治，故获捷效。

高参 黄芪 熟地 当归 安桂 青木香 川芎 白芷
乳没_煨 炙草

疽疾属于外治，而究其病情，即内外兼理，毫无差错，诚一通百通耳，_{寿山}。

刘某，年三十五，少腹之旁坚块如石，不红不肿，痛引腰腿，憎寒壮热，状若伤寒，脉息沉弱，病名缓疽，乃由肝脾气积寒凝而成。若非急用攻消之法，久则必有溃瘍之患。议与山甲内消散。

山甲_炒，三大片 归须 大黄 丑牛 木鳖_{去壳，切} 僵蚕 枯
萎根 牛膝 柴胡 青皮 香附 甘草

服二帖，去大黄、木鳖，加乳香，再服数剂果消。

《医案偶存》

汪廷元

洪燕庭姻翁先生年近古稀，从西省至安庆店中，筹画劳神，又以千年健膏烧酒，日饮之。乃到扬州，即觉浑身不快，微发寒热，背起白头小疙瘩，四旁淡红晕如碗大。予按：疽发于背最重，此偏对心发，半阴半阳症也。头不高耸，亦不甚痛，脉数而无力。外科洪鲁沂翁欲予用温热之药，予辨之曰：“据脉症确属于虚，然近日多饮烧酒，其性猛烈，又见胁痛、苔黄、潮赤、脉数。乃血虚气弱，非关寒邪阻滞。肉桂等不可轻投。今只宜托里和营，保无它虑”。拟用炙黄芪、白术、当归、川芎、甘草、茯苓、金银花、白芷，服后患处渐红肿作

痛，及潰脓，水清稀和。高年元气大惫，非重用参、芪，不能奏绩，易用人参、黄芪、白术、当归、白芍、熟地、炙甘草、茯神、枣仁。即以此出入，脓转稠粘，腐化新生。不两月而痊愈。

《广陵医案摘录》

陈莘田

范，疮发未透，毒结于腋，盘坚散大，顶不高尖，疽症也。面浮腹胀，大便秘滞，虑延疮厥重候，法当和中托里。

芪皮 茯苓 当归 陈皮 白芷 于术 米仁 乳香 丹皮
二诊：腋疽已溃，脓出未畅，仍当清解托毒。

芪皮 乳香 甲末 甘草 土贝 当归 白芷 角针 桂枝
花粉

刘，鬓疽已成，风毒所致。

牛蒡子 草节 大连翘 制蚕 草决明 池菊 土贝母 赤芍 白桔梗

二诊：鬓疽虽溃而脓毒未化，余肿未消，法当清解托毒。

羚羊角 赤芍 生草 连翘 芪皮 制蚕 桔梗 银花 当归 防风 土贝母

《枫江陈莘田先生外科临证》

过铸

上虞葛君仲华之女儿，背生一粒椒，痒而不痛，根脚木硬。医内用败毒散，外敷金黄散。数日后，毒外驰而漫肿，其大如盘。邀余往诊，其入年近六旬，疮色白而平塌，时或作呕。先以黄狗下颊散内服外敷，日服二次，连服两日，出臭汗数身，再服大剂，以杀其势。方用：忍冬藤三两 银花更好，生黄芪、元参、生甘草各五钱，天花粉、蒲公英各三钱，附子一片 酒水各半煎服，先用白矾三钱研末冲服，稍停服药，恐其吐也。此系余家秘诀，消毒最易。下颊散仅敷一次下颊难觅故

也。后以**乌龙膏**（木鳖子去壳、半夏各一钱，陈小粉四两，草乌五钱）围之，渐渐收小至三寸而溃。掺以**龙象散**，月余收攻。自余医后，始终未尝觉痛，无不讶为神奇。余曰：非神奇也。时医喜用太平方时人以吃不好吃不坏者，谓之太平方。分量重者，不过三四钱，若承气、陷胸等汤目为忌剂，而不敢用，其实吃不好即吃坏矣，辨证未明，用药无君、臣、佐、使，投以平淡之品，不求有功，但求无过，是谓优容养奸，其害有不可胜言者。病家每喜此等医，即至不起亦不咎其优容之过。庸医杀人，杀之于不觉。噫！可慨也。

黄狗下颏连舌连皮劈下，以瓦覆炙之，煨至青烟尽而黑色如炭为止，带白色则过，性无用矣。见乞丐已杀者，买来制用，若特杀则反招不祥，慎之。寒豆一名豌豆，俗名小寒豆白敛各等分，三味共研为细末，空心黄酒调服五钱，患处用此散以香油调敷取验，以服药后出臭汗及熟睡为准。

龙象散 走方匠名此散曰金不换，象皮二两三钱厚者为佳，用大块硝砂一钱三分八厘，铜锅炒黄色，趁热研末，用一两五钱入药、**龙骨**二两三钱，火烧冷透研，筛净末用一两五钱、**乳香**、**没药**俱去尽油 **赤石脂**三两大煨五次入冷水五次研末用净二两

朱砂水飞 **轻粉** **儿茶** **血竭**各二两 **雄黄精**一两五钱 各研细末如尘，秤准，和匀，再研收入瓷瓶封固，泻气则不效，愈陈愈灵。临用时每药末一两外加麝香、冰片各六分同研匀，掺膏药上贴之。

杭城葵巷范安夫母，患偏对口，左右各生一疽，初起红肿疼痛。延陈姓医治之，始用寒凉之品。嗣因溃而无脓，重用皂角枣渍后禁用，遂致凹陷、干枯，根脚四散，自发际漫延至肩，而且疮色青紫，周围现无数小疮，便闭脉洪溃后忌洪，神昏欲睡。此因误治，阳变为阴，有内闭外脱之象。余用起陷大剂。范家感陈医言，未服，隔日益剧。陈医束手，令祷于神，以冀祐病家。复业请余。曰：“此证有朝不及夕之危，诊而不服药，子病何济？”病家云：“此时不再惑矣。”余照前方益之。用金银花三两，当归、党参、生黄芪、蒲公英、鲜赤首乌各一两，白芥子、生甘草各三钱，制附子、肉桂各一钱，元参、白术各五

钱，生熟谷芽各五钱煎汤代水，白茄蒂七个一剂而大便通张景岳云：便结无胀意者，非实邪不可攻。且大肠居下流，最难独治，必须清肺气而滋肾水。重用元参、当归，所以通大便也。当归、黄芪活血益气，所以能起陷也，然非重用不效。胃口醒，再剂而疮突脓稠。后乃减去附子、肉桂各五分，连服二十余剂。稍有损益，不外前方上掺入将丹。渐渐收口，新肉已长至九分。因亲串来，讲谈劳神，疮口忽肿胀，新肉转白色，胃口顿减。改服人参养荣汤，外以露蜂房炙透研末掺之此药须预备，必逼火，隔数月，方可用，是方得之走方医，专治对口久不收斂者，初时不宜用。复以软绵作小枕，睡时垫于患处，俾内外之肉粘连一片。始终四十余日，已痊愈矣。

徐灵胎云：寒药误入，杀之于不觉知。为寒药所误，尚可挽回。若大热之药，又当酷暑，偶有不合，恶象立见，甚至七窍流血而死。若非见证明确，胸有把握，何敢率投。

《过氏近珍医案》

王旭高

刘。偏脑疽自右延及于左，三候有余。偏右穿溃脓少，偏左木肿未腐，头顶平塌，根脚散蔓。此气虚不能引血化腐成脓，托毒外出，高年殊虑内陷。至舌苔白腻，大便闭结，在疡科指为火毒内闭，湿热上蕴，而用内疏黄连等法。阅倪先生方案，谓内夹杂气，邪伏膜原，引用达原、三消数剂，异想超出寻常。今大便已通，舌苔稍化，然右脉软弱，胃气残惫，疡不甚肿，色不甚红，深恐阳变为阴。大凡外疡起发脓腐，须赖元气承载。所谓元气者，卫外捍御之气、胃中冲和之气、三焦升降之气也。亏则脓腐不克依期，从此生变。故黄芪为外疡托毒之圣药，即兼别症，再参他方。古法有攻补兼施、补泻同用者。拙见欲托毒，必扶正。

生黄芪 当归 赤苓 陈皮 藿梗 法半夏 香附 谷芽

又：脑疽将四候，起发脓俱迟。欲问真消息，阴阳各半推。阳多方是吉，阴长便生危。顶不高兮根不束，皮不腐兮脓不足。凡此皆

因气血衰，顺逆安危有结局。乃若疮流鲜血，即为变陷之端；况夫年逾六旬，尤宜加谨为要。兹当补托，佐以疏通。补其正而托其毒，疏其气而通其壅。俾胀满宽而加谷，期阳毒化而收功。聊以解嘲，非敢说梦。

黄芪 当归 制僵蚕 皂角刺 陈皮 川朴 赤苓 法半夏
香附

某。对口生疽，足根发疗，此二处皆属太阳膀胱之络。湿热内聚，风热外侵，勿得轻视。

羌活 防风 连翘 归尾 革薢 乳香 没药 土贝母 银花 甘草梢 桑枝

刘。肾俞漫肿色白，脉虚微热，此肾俞发也。属三阴亏损，湿热入络，气血凝滞而生。最为淹缠。姑与消散法。

当归 防风 杜仲 秦艽 金狗脊 丹参 广皮 革薢 独活 胡桃肉 桑枝

《王旭高临证医案》

马文植

某。肝脾郁结，气与痰滞，石疽坚肿，咽肿喉痹牙紧，颈酸项胀。厥少不和，经络壅塞，七情致伤之病，调治非易。脾胃又弱，便溏，食入则呕吐，慎防脾败。姑拟扶土和中，冀其纳谷为幸。

焦白冬术 枳实二分同炒 佩兰 木香 枳壳 砂仁 陈皮 潞党参 藿香炒 半夏 郁金 谷芽 炙甘草 茯苓 金橘叶

二诊：呕吐已止，饮食加增，石疽肿亦较退，似有转机，但牙紧未松，喉痹未舒，脉沉弦涩。阴伤木郁痰气凝痹于上，尚在险途，未为可恃。姑从原法治之。

党参 冬术 川芎 当归 半夏 砂仁 陈皮 枳壳 佩兰 广郁金 白芍 橘叶

三诊：石疽肿硬稍松，七情致伤之病，究难消散。因日来饮食加

增，精神稍复。姑拟原方进治。

党参 当归 清半夏 佩兰 冬术 白芍 陈皮 炙草 川芎 茯苓 大贝 老姜 橘叶

四诊：日来精神饮食倍增，石疽坚硬肿胀亦见收束，是万亿之幸也。宜香贝养营汤主之。

党参 当归 白芍 陈皮 白术 川芎 茯苓 大贝 清半夏 香附 炙甘草 牡蛎 红枣 橘叶

五诊：热日见起色，宗前法进治。

生地 蒲黄炒 当归 陈皮 大贝 白芍 潞党参 川芎 茯苓 香附 清半夏 牡蛎 远志 金橘叶 红枣 姜

六诊：石疽肿势稍加，且作胀痛，肝火复升。宜和荣化坚，兼舒肝郁。

前方去生地、远志，加夏枯草。

七诊：石疽复肿，又复作吐，心胸懊恼。肝胃气逆，极虚之体，攻补两难，症在险途。姑拟香砂六君子汤加味主之。

当归 党参 冬术 佩兰 广皮 谷芽 木香 砂仁 清半夏 炙草 生姜 枣

水塔口，李左。背脾痰注，下午寒热。当化痰和荣。

当归 云苓 蚕沙 法半夏 赤芍 防风 白芥子 柴胡 桂枝 陈皮 陈酒

复诊：痰注已消，惟肩臂尚痛，仍化痰和荣。

当归 生黄芪 云苓 蚕沙 秦艽 羌活 法半夏 白芷 陈皮 赤芍 白芥子

维扬，陈左，三十五岁。痰之为病，缘脾胃气弱，水谷之精不归正化，变饮生痰，由胃旁流于胁，右肋作痛，时作时止，业已有年。气痰凝积，结为窠囊，于是攻注背之胃脘，漫肿作痛，成为痰注。外溃数月，脓多而肿不消，左旁皮现红紫之色，又将破头。神羸面色皓白，短气乏力，动则作喘，足肿至膝。气血两虚，肺脾肾三脏皆亏。外

恙内空过大，且通于胃腑，极难完固。拟调脾肾，兼养胃生阴之法，内府安和，而外患可冀收口。

台参须一钱 西洋参米炒，一钱 苡米三钱 炒白芍一钱五分
煨牡蛎三钱 黑料豆三钱 肥玉竹三钱 杏仁泥二钱 当归一钱五分
炒於术一钱 云苓三钱 广皮盐水炒，八分 毛燕绢包，三钱
红枣三枚

二诊：原方去杏仁，加霍石斛三钱 佩兰一钱五分

三诊：进养阴清托，虚阳渐平，呛咳胁痛亦减，似有转机。宗前法。

原方去佩兰、杏仁，加川贝一钱五分、百合五钱

四诊：疮患脓已大减，精神渐复，脉犹带数，阴中之热未清，咳嗽咯痰不爽。仍培气血，以和肝肺。

原方去苡米，加米炒麦冬一钱五分、炙生地一钱五分。

五诊：叠进育阴清热，咳嗽短气、胁痛跗肿均已大减。内热不清，外疡脓色稠黄，脓乃血化，阴气大伤，小渡频数，气分亦弱。拟养阴清热为主，而益气佐之。

原方去麦冬、石斛，加金樱子(绢包)一钱五分，淮山药三钱、丹皮(炒)一钱五分、功劳子三钱。

六诊：原方去功劳子，加党参二钱、女贞子三钱、川杜仲二钱。

七诊：原方去女贞子，加沙苑三钱、法半夏一钱五分、海螵蛸一钱五分。

丸方：

琥珀(研)二钱 象牙(镑，焙研)二钱 黄蜜三钱 枯矾二钱
黄蜡三钱 朱砂一钱 人指甲(砂拌炒)一钱 炙乳没各一钱

上药为细末，将蜜煎至金黄色，已熔化，再入上药搅匀为丸，如绿豆大，每服七粒，然后再加。

八诊：原方去法半夏，加别直参二钱、茯神二钱、五味十粒、桃肉二枚(过口)。

又膏方：熟地六两 归身三两 炒白芍二两 百合三两
五味一两 杜仲四两 别直参三两 黄肉四两二钱 淮山药二两
沙苑三两 於术三两 炙草六钱 黄芪三两 茯神三两 广皮一两五钱
桂圆肉三两 红枣四两 麦冬二两

上药煎汁三次，去渣，用冰糖四两收膏。

九诊：外患脓已大减，内膜未能完固，卧则脓水自流，是症本通于胃之脉络，极不易治。仍培气血，以补内膜。

大生地三钱 山萸肉一钱五分 百合三钱 炒白芍一钱五分
生黄芪三钱 象牙屑煨，三钱 杜仲三钱 当归一钱五分 麦冬一钱五分
别直参二钱 炙草二分 云苓二钱 黄丝绢一块

十诊：肺属金主气，最娇之脏。金寒则嗽，金热亦嗽。因咳而发外疡，未能完口，而咳又作，脾虚积饮生痰，肺气大伤，痰不易出，峻补从缓。暂宜养阴肃肺，兼化痰湿。

北沙参三钱 紫菀一钱五分 杏仁二钱 象贝二钱 女贞子三钱
大生地三钱 萸皮三钱 款冬一钱五分 茯苓二钱 制半夏一钱五分
麦冬二钱 枇杷叶一钱五分 冰糖三钱

十一诊：饮邪咳嗽，冬时即发，业已有年。兼之溃疡日久，阴伤气弱，肾气不收，咳而作喘，下午为甚。痰稠而膩。咯不易出，痰实气虚最怕喘。急扶正化痰，兼纳肾气。

别直参二钱 潼沙苑三钱 广皮六分 海螵蛸三钱 甜杏仁二钱
生地炭三钱 上沉香二分，人乳磨 法半夏一钱五分 炙草三分
当归一钱五分 川杜仲三钱 山萸肉一钱五分 葡萄肉去皮，过口，二枚

某。毒发肝肾，透于太阳，色紫顶平，根不收束，脉至细弱无根，转侧不能轻便，腐而不化，按之板硬，毒甚正虚，凶多吉少。凡实症可攻可散可消，至于虚症，护托于十日之前，收功者多，及其毒势散，虽托亦无及矣。坐视不援，固非仁者之心，然马到临崖，收疆惟恐已晚。勉方以应主人之命，自问学浅，不胜重任，还祈速请高明诊治。

川芎二钱 当归一两 西洋参五钱 荆芥二钱 黄芪二两
银花二两 红花五分 甲片一钱 草节二钱 陈皮二钱 木香七分
赤苓三钱 羌活一钱 角刺三钱

复诊：昨投大剂护托透解之法，色转红活，略能高耸，根亦稍聚，脉数亦稍减，舌苔亦稍净，惟胸腹满闷如前，按之中空。此气火毒邪，盘踞于中，所云实者可攻可逐，虚者可托可解，邪正本不两立，正虚则邪进，正旺则邪退，内外一理，并非臆说。昔观云：脉虚症虚，首尾必行补法。又曰：半月之后，脓少不腐、顶不高、根不束者，为极虚之症，治当大补，得全收敛之功，岂逛语乎？余非好奇好异，死读古书，不敢不遵古人之训，仍用前法。

川芎二钱 全当归一两 西洋参八钱 荆芥二钱 红花五分
上绵芪二两四钱 甲片一钱 生甘草一钱 广陈皮二钱 木香八分
厚杜仲三钱 川贝母一两 砂仁一钱 扁豆五钱 银花二两四钱
羌活一钱 角针三钱 炒谷芽一两五钱

刘巷，刘左。中发背偏右，已将半月，形长八寸，木硬，疮头平塌，尚未得脓，根盘散漫，发热口干，汗出渴饮，痰多作恶，舌苔腻黄。肝脾积热，痰浊聚于胃腑，防其内陷。急清热化毒和中，希疮根收束为要。

南沙参 酒芩 云苓 银花 绿豆 橘红 赤芍 枳壳 法半夏 连翘 川贝母 甘草 竹二青

二诊：原方去酒芩，加左金丸三分、当归。

三诊：发热嘔恶已减，惟脓未来，疮头未起，根盘散漫不收，胸闷未舒，胃为浊阻。故谷食不旺，不能托毒，仍和中托里。

原方去绿豆、枳壳，加川朴八分、佛手五分、姜一片。

四诊：嘔恶已愈，胸闷未舒，背疽脓出不畅，顽腐阻隔，内腐而外不溃。脾元弱，胃气不苏，仍和中托里。

原方去佛手、川朴、左金丸、竹二青，加南沙参、枳壳、栝蒌仁、郁金。

某。肝气夹痰，凝滞蔽骨，发为痰疽。已溃一头，肿硬不消，又将破溃，脉来两尺弦数，血营已亏，阳明痰气不清。宜养营和胃，兼化痰软坚之治。

当归 清半夏 陈皮 茯苓 瓜蒌皮 郁金 大贝 牡蛎
苏梗 佛手 外敷海浮散

二诊：蔽骨疽肿硬较松，脓亦较厚。仍宜和营化坚。

前方去苏梗，加泽兰、连翘、藕节。

《外科集腋》

余听鸿

余思肾俞发皆属虚症，实症则百无四五，或其人正气本实，或膏粱煎爆辛辣，饮食不节，瘀血积于肾经膜外，或有之，然余未见也。忆昔年在梁溪，遇王君者香邀余诊视，脉来虚数，咳嗽多痰，肾俞发平塌已溃两孔，脓稀粘腻，脂水淋漓，他医专以甘凉治肺止咳。余曰：水亏木旺，木叩金鸣，肾虚则水泛为痰，当先治肾。寒凉温补宜并用，一清相火，一通肾阳，坎离既济，阳随阴长，阴随阳生。以肾气丸加知、柏、猪脊髓为丸，每日三服，每服二三钱。另服甘温补剂，戒以屏劳绝欲，戒酒辛炙。至百日后，此痼肌肉已平，疮口已合，胃气甚旺。后竟宴客纵欲，豪饮无度，旧疮复发，红肿，疮口溃裂。经疡科服牛蒡、银花等寒凉之品，疮色更红高突，以致胃惫面红汗出，痢下腹痛而歿。肾俞发将及一年，服滋补而瘳，因其纵欲阴伤，龙雷外越。余未见龙雷之火而暴雨能制之者，服寒凉则虚阳更熾，戕脾胃生生之气，岂有不死者乎？

孟河巢姓，巨富也。疽发背，大如覆盘，长尺余，阔七八寸，延沙达周先生治其外，延费士源先生治其内。士源，吾师之祖也。时正酷暑，疡症已溃，治之匝月，去腐生肌，颇为顺手，疮沿渐平，尚有尺馀嫩红肉如珊瑚样。费先生所投之剂，皆和胃利湿清暑，极平淡之方。沙先生谓士源曰：君主治内。巢某年近耳顺，气血已虚，当服补

药。何以数十剂皆系清热利湿之品，肌肉安能生乎？费笑曰：君虽疡科名手，内科尚欠功候。患者早食莲子、红枣一碗，午食海参、煨肉一碗，胃气如此，其生肌长肉之功，胜于补剂多矣。况方书所载，膏粱厚味过度，湿热痰滞，壅阻聚热而成痈疽，《内经》云：膏粱之变，足生大疔是也。又兼时正长夏，暑热湿三气熏蒸，每日为之利湿清热，尚恐不及，若再服温补，聚湿聚热，必致胃呆气滞，热闭神昏，疮肉泛紫塌陷，功败垂成矣。沙先生深佩服之。共服药百余剂，未服一剂温补而痊。孟河沙达周先生，疡科名重一时，尚未讲究内科，几致误治。幸费先生执定主见，始克成功。所以习外科者，不可不习内科也。

《余听鸿医案》

沈祖复

西门桥下温姓，壮热面油，脉洪舌绛，右臂红肿作痛。外科章某曰：“此流注也！”用温药桂枝、当归等。道生堂高君介绍先生诊视，已有一医用藤黄涂之，先生曰：“此系热毒，名曰：火炎症，用解毒剂。”是时神识尚清，既而胸前又多一红肿处，复延章医，仍谓流注。先生以为不然，决其热毒内走，势必毒陷神昏而死。至下午果暴殁。

《医验随笔》

巢崇山

某。先出多骨，上面肿消而下面复肿，多骨又将出也，脉细弦，颊车微紧。宜通补气血，搜风败毒。

生黄芪 桔梗 甘草 苋麦冬 川石斛 大川芎 红枣 防风 大贝母 新会皮 僵蚕 当归 钩钩

二诊：补虚托毒，多骨已出，颊车微和，肿热亦消，脉小数，胃口颇佳。再从前法。

生黄芪 新会皮 赤芍 毛姜去毛 麦冬 甘草 大贝母

红枣 当归 防风 藿梗 丝瓜络 熟地黄 大川芎 炙僵蚕

《玉壶仙馆外科医案》

巢渭芳

杨金全，患偏对口，腐及两耳下，肌肉黑陷。层层剪开去腐之后，将有转机，不料收口到十之六、七，因冒风发热，兼梦泄一次，以致头肿色暗，疮口晦滞不红，势甚危险。以荆防败毒散加和营药两剂而愈。

《巢渭芳医话》

陈莲舫

袁。骨瘤疽腐烂，见筋露骨。幼年并无因果，证属前冤，例在不治。

炙龟板 生白芍 黑料豆 桑椹子 北沙参 连翘 石决明
生甘草 女贞子 新会皮 肥玉竹 藕节

西安兄。痰疽发，眼细中空，要紧治病。疮之内膜，反不清楚，脉息弦细。治以疏化。

生首乌 生黄芪 元生地 川石斛 象贝母 连翘壳 黑料豆 石决明 新会皮 白茯苓 桑椹子 肥玉竹 稻穗。

陈。期门痰注，眼细如针，中空如斗，咳呛射脓，脓出无度，旧虚新感，白痞又发密密，恐淹淹进怯。

西洋参 川石斛 左秦艽 左牡蛎 大丹参 新会皮 丝瓜络 桑椹子 黑料豆 银柴胡 生白芍 炒夏曲 生甘草 稻叶金。焠肩疽，不红不肿，治以宣托。

煨葛根 白桔梗 小青皮 大力子 角针 飞滑石 生黄芪 炒赤药 生甘草 炙甲片 当归尾 法半夏 丝瓜络 荷梗

罗。发背溃腐，关节之间能分界限，幸甚，脉迟，治以温托。

熟附子 潞党参 生黄芪 甘杞子 生甘草 广陈皮 鹿角

霜 生白芍 小青皮 川石斛 白桔梗 角针

《蓬舫秘旨》

王靖

商人某，不知姓名，亦西人，在质库为经纪。秋后疽发于背，延医治之未效也。一日其弟专车到门叩头迎余。问何病，则曰：背疽。余以医疡甚污秽，辞以不能外科，宜请专门名家治之。其弟曰，已请疡医数辈，俱曰阴症不能治，念兄弟零丁，千里投商于京，兼获利无多，倘有不测，骸骨亦难归里，请君一视以决之，必不可为，亦不怨也。余以情词哀切，至，则肿俞处，溃烂口如茶碗大，不红、不肿、不痛，肉色带青，流出粘黄水，非脓、非血。而病人昏昏欲睡，精神全元。余曰，疡医谓是阴症，良不谬。然转阴为阳，尚有方术，何竟无知之者？其弟急请之，余曰：此病余实不能动手，况此时外治亦无益，须建中提气，觉肿痛则有望矣。乃开补中益气汤，重用参芪，并加桂附干姜命服之。越二日，其弟又来曰，家兄疽已红肿，精神顿生，饮食小进，请施外治。余辞曰，外治则吾不能，宜仍请前外科家治之，彼能动手，必无虑矣。乃延前疡医敷药去腐，凡二日一洗涤，半月后疮合而愈。

《醉花窗医案》

袁焯

金平卿令堂，年逾五旬，体素胖，今年六月，疽发背。先由西医刘某医治多日，溃烂甚深而不能生长肌肉，遍身发生小疖，形如豆大，其痛异常，手臂动摇，腿亦颤动，不能起坐，彻夜不寐，西医见之却走，称为‘不治之症’，并断其死期不能出一星期之外。金君闻之大恐，适予为其公子治喉症，乃邀以诊治。并云聊尽人子之职分而已。其意盖深以病势之危，恐终不能起耳。予诊其脉洪大不柔，左手寸部尤觉大硬，舌光赤无苔，亦无津液，盖高年阴液大亏，孤阳独

炽，外症出脓后，津血益伤，加以西医治法，祇知消毒防腐，而不知培养气血为根本之图，宜乎愈治愈坏，变症百出也。其时亦有夏君子两同诊，遂共商治法，用复脉汤去桂枝、姜、酒，加枣仁、茯神、黄芪、熟地、枸杞子、鸡子黄等药，加重其剂。黄芪、熟地、干地黄、党参、枣仁、茯神等，均用五钱，余药亦均用三、四钱，鸡子黄一枚生冲和服。接服三剂，夜间稍稍能睡，背部患处亦稍见新肉，而脉息亦较软矣。接服至十剂，患处新肉日见增高，遍身小疔亦均出脓而消，舌色亦淡，饮食亦稍能进，手臂、两腿亦均不动摇矣。惟精神疲弱，时欲睡眠，脉息转虚滑，仍以原方减轻其剂，又服十剂，患处肌肉渐平，而腰以下又发一痈，出脓碗许，仍以前方培养气血，越数日，病人忽不能安寐，自欲奔走，几类发狂，舌仍光赤，盖脓出后阴液复亏，虚火复炽也，乃以原方去参、芪，重用干地黄、柏子仁、枣仁、麦冬加莲子心，两剂而安，复以培补气血之药，服至一月始瘥。

冯懋轩君令堂，年近六旬，今年六月患发背，由西医徐君医治，将及一月而溃烂不收，汗多头晕，大便溏泻，精神疲弱，西医以有内症，嘱延内科诊治。予诊其脉皆虚软无力，胸闷作恶，咳嗽心悸，头晕汗多，舌苔少。盖高年气血已亏，外症出脓血既多，饮食又多日不进，气血大虚，阴阳欲脱之候也。危险甚矣！乃以大补元煎，生脉散出入为方。潞党参、麦冬、枸杞各二钱，五味子三分，枣仁、山药、炒熟地炭各三钱，黄芪、陈皮、佛手各一钱，接服两剂，汗渐少，饮食稍进，但咳嗽心慌。原方去陈皮、佛手、黄芪、党参，加百合、茯神、柏子仁、西洋参、杏仁、贝母，又服三剂，精神较有起色，惟心虚呛咳，舌燥无津，左手心热，鼻孔亦觉有热气外喷。此高年阴液素亏，肝肺之津液俱涸，则燥从中生，必润以濡之，始能有济。乃复定一方，北沙参、麦冬各一钱五分，燕窝、百合、地骨皮、枣仁、柏子仁各二钱，牡蛎三钱，并嘱其另煨燕窝汤，日服二次，间以母鸡汤与饮。又念外症与内症有密切之关系，乃令其解去绷带，详为检视。据冯君言，自服煎药后，肌肉已日见增长，不似从前之迟迟无进步矣。然患处溃烂

之地，仍长有三寸，宽二寸，皮能掀起，全无脓垢，而西医所用之药，则海碘仿一味而已。予谓外症此时宜速换生肌药，海碘仿只能杀菌防腐，却无生肌之力。外症一日不收口，则内症必受影响，盖内外虽殊，而关系腑腑气血则一。冯君赴之。遂与徐君婉商换药，而煎药服数剂后，咳呛燥热等症俱退。仍以原方接服半月，燕窝汤亦常服。于是精神饮俱有起色，而外症亦渐痊矣。是病也，其始得力于参、芪、熟地，后得力于燕窝及诸清润之药。而惜乎今之业西医者，只知守他人之成法，而不肯取中国医书，以研究之也。

《丛桂草堂医案》

曹沧洲

某石。肝肾不足，郁火湿热下隐，发为翻花疽，延腐出血，痛不成寐，脉右大左细，此外症中之内症也，未易奏功。

玄武板四钱，水炙 细生地四钱 醋炒归身一钱半 带心连翘三钱
炒赤芍三钱 土贝四钱，去心 川牛膝一钱半 忍冬藤五钱
五茄皮一钱半 丝瓜络一钱半 粉萆薢三钱 远志炭七分，去心
合欢皮三钱

某左。一诊：偏玉枕疽痛楚，红晕散蔓，舌白脉数，头重，重症勿忽。

生鹿角一钱半 老苏梗一钱半 紫草一钱半 白当归三钱
广木香一钱 远志一钱 制蚕三钱 赤芍三钱 角针七分 泽泻三钱
土贝四钱 半夏曲三钱 茄子蒂四钱 丝瓜络一钱半 合欢皮三钱

二诊：偏玉枕疽，势正鸱张，大肿且僵，红晕散漫，舌白，昨曾身热，脉细濡，重症勿忽。

苏梗 生芪皮 当归头 生鹿角 远志 紫草 赤芍 制蚕
角针 土贝 忍冬藤 泽泻 茄子蒂 合欢皮

三诊：偏玉枕疽十一日，偏左仍坚木，红晕不化，右边亦然，脉细数，舌白，胃呆，急宜解开心胸。

生鹿角 生芪皮 苏梗 枳壳 当归头 紫草 木香 茯苓
皮 赤芍 远志 制蚕 角针 半夏曲 土贝 合欢皮 茄子蒂
泽泻

四诊：偏玉枕疽，红晕未退，大脓化而未透，腐脱未尽，脉细，舌白，胃呆，正虚邪重勿忽。

生鹿角 制香附 川石斛 生芪皮 川萆薢 建曲 广木香
潞党参 赤芍 茯苓 茄子蒂 全当归 土贝 泽泻 制蚕
合欢皮

某左。初诊：心肝郁火，挟湿热聚于督脉及太阳部分，由偏背疽散为搭手，界限未定，脓泄不畅，腐肉未化，脉细数，气血不充，毒郁深沉，惟有补托攻毒一法，以冀毒从外达，逐渐化腐化脓为幸。

潞党参三钱 赤芍一钱半 合欢皮四钱 制蚕四钱
茄子蒂十七只 生芪皮五钱 朱茯神五钱 土贝五钱 角针一钱半
生谷芽五钱，包 炒谷芽五钱，包 白当归五钱 远志肉一钱，炒
广木香一钱半 紫草二钱

二诊：偏背疽转成搭手，气血不足，未能顶高根收，迭次攻托，脓泄尚能渐渐转多，界限三面未定，腐肉液化不足，脉濡细带数，舌白腻，拟补托之中兼顾痰湿，内外兼治，以防别生枝节。

潞党参三钱 朱茯神五钱 土贝五钱 白芷五分 茄子蒂十七只
生芪皮五钱 陈皮一钱 丝瓜络一钱半 制蚕四钱 炒谷芽五钱
白当归五钱 制半夏一钱半 木香一钱 角针一钱半 川石斛四钱

三诊：疮腐十去八九，脓泄也渐转少，下面袋脓之肿尚有僵伏，此余毒不清也。舌垢渐化，脉状软，病情从阴转阳，尚有火毒逗留，大便不下，时易口干，宜补气养阴以治本，疏远润肠以治标，以冀日起有功。

潞党参四钱 生地炭五钱 炙鸡金三钱 生谷芽五钱
熟谷芽五钱，包 生西芪三钱 忍冬藤四钱 白当归四钱 火麻仁七钱
朱茯神五钱 熟地炭七钱 春砂仁四分，拌 合欢皮四钱

夜交藤四钱 鲜霍斛七钱，打如泥 生牡蛎一两

四诊：疽腐全脱，脓泄日少，拟补气养营以助生肌，和阴泄热以解余毒，参入助运醒脾，俾胃气来复，以冀早奏全功，脉状濡软，口易干，新肉易红，药后之外，尤宜悉心静养。

潞党参四钱 秋石三厘，拌 生地炭五钱 春砂末四分，拌
归身四钱 白芍三钱 左牡蛎一两，盐水煨 川石斛五钱 朱茯神五钱
合欢皮四钱 淮山药三钱，炒 炒丹皮一钱半 甘草节四分
忍冬藤四钱 生谷芽五钱，包 制冬术一钱半

《吴门曹氏三代医验集》

杜钟骏

扬州皮市街，马源兴老东马某，年六十外，病笃，棺衾悉具，冥镬已焚，托友来邀，一决死期远近。按其六脉，沉细欲绝，视其舌苔，厚腻而滑，头面赤肿庞然，两日俱合，俨然大头瘟也，不进汤水已数日矣。予曰：脉病相反是戴阳症，非大头瘟也。第不知何以致此，详询得病始末，索阅逐日方案，因悉先患脑疽，经京口某外科包治，溃脓之后，日进羚羊、生地、石膏清寒等剂，历四十余日，法未稍变，脓泄肿消之后，疮口渐合，尚有一孔，仅流清水。一日，忽寒热大作，某医曰：外症已愈，此系新感时邪，应请另延方脉治之。方脉某曰：此系春瘟，投以辛凉轻散，服后寒热未退而头面红肿。历更多医，皆曰大头瘟，迭进普济消毒饮、银翘散并生地、元参、麦冬、石膏、羚羊等剂，外敷大黄、靛青、并底泥等药，肿势益剧，危象毕现，奄奄待毙。谓其二子曰：尊翁之病，非大补气血不足以回垂绝之阳。爰订十全大补汤加干姜、附子等品，外以回阳玉龙膏敷之。惟时病家亲朋问病者纷集于厅室，见予之方莫不惊诧，以为头面红肿如火，反进大热大补之剂，速其死矣。予谓二子曰：他医有法可救则请从他医，如其束手则予法尚有一线生机之望，如不谓然，不用亦无妨也，请还我方，免贻口实。二子泣曰，决计服之，死亦无憾。予去后，二子聚

亲友而谋之，咸曰：与其坐而待毙，不如仰药而亡。乃以一剂分两服进之，次日肿消一半，再进肿消大半，三剂面肿全消而脑疽疮口流脓矣，舌苔化而脉神起。是日日中忽发狂笑不止，议者以为药太补太热，毒气归心，病家亦以为疑，诘问所以，予亦莫名其故，沉思久之，忽悟《内经》有心气虚则恐，实则笑不休之文，因谓之曰：心阳久越在外，得桂附之大力追回，心气暴实，所以发笑。乃以朱砂、茯神、丹参、琥珀四味进之，一服笑止，仍以十全大补加减调理，未逾月而全瘳。

《药园药案》

丁泽周

唐左。天疽肿硬，位在左耳之后，症由情志抑郁，郁而生火，郁火挟血瘀凝结，营卫不从，颇虑毒不外泄，致有内陷之变。急与提托，冀其速溃速腐，得脓为佳。

银柴胡一钱 全当归二钱 京赤芍二钱 川象贝各二钱
陈广皮一钱 生草节八分 炙远志一钱 炙僵蚕三钱
炙甲片一钱五分 皂角针一钱五分 琥珀蜡矾丸开水化服一粒

二诊：前投提托透脓之剂，疮顶红肿高活，有溃脓之象，是属佳兆。惟恙从七情中来，务须恬愉虚无，心旷神怡，胜乞灵于药石也。

生黄芪三钱 全当归二钱 京赤芍二钱 紫丹参二钱
生草节八分 银柴胡八分 生香附一钱 皂角针一钱五分
川象贝各三钱 炙僵蚕三钱 笋尖三钱 琥珀蜡矾丸开水化服一粒

三诊：疽顶隆起，内脓渐化，旋理调护，可保无虑矣。

全当归二钱 京赤芍二钱 银柴胡八分 生草节八分
川象贝各三钱 炙僵蚕三钱 陈广皮一钱 半夏曲二钱 制首乌三钱
香白芷六分

柯左。脑旁属太阳，为寒水之府，其体冷，其质沉，其脉上贯巅顶，两旁顺流而下。花甲之年，气血已亏，加之体丰多湿，湿郁生痰，

风寒侵于外，七情动于中，与痰湿互阻于太阳之络，营卫不从，疽遂成矣。所喜红肿高活，尚属佳象，起居调摄，尤当自慎。

生黄芪三钱 青防风一钱 生草节八分 苦桔梗一钱
陈广皮一钱 仙半夏二钱 大川芎八分 大贝母三钱 炙僵蚕三钱
羌活一钱 小金丹陈酒化服一粒 外用金箍散、金黄散、冲和膏，陈醋、白蜜调，炖温敷。

二诊：脑疽偏者较正者难治，前方连服三剂，根盘略收。疮顶高突，有溃脓之势。今症位虽偏，形势尚佳，所喜疮顶起发，胃纳健旺，人以胃气为本，有胃则生，书有明文。再拟消托兼施法。

生黄芪三钱 全当归二钱 京赤药二钱 陈广皮一钱
仙半夏三钱 生草节八分 大贝母三钱 苦桔梗一钱
炙甲片一钱五分 皂角针一钱五分 笋尖三钱 炙僵蚕三钱
香白芷八分 外用金箍散、金黄散、冲和膏。

三诊：叠进提托之剂，得脓甚畅，四围根盘渐收，调养得宜，生机有庆。

生黄芪三钱 全当归二钱 京赤药二钱 紫丹参二钱
陈广皮一钱 仙半夏三钱 云茯苓三钱 制首乌三钱 生草节八分
红枣二枚

外用九黄丹、海浮散、阳和膏。

钱左。脑疽三日，红肿寒热，外邪客于风府，蕴热上乘，邪热相搏，血瘀停凝。法当疏散。

荆芥穗一钱五分 青防风一钱 全当归二钱 京赤药二钱
大贝母三钱 炙僵蚕三钱 羌活一钱 大川芎八分 香白芷八分
外用金箍散、冲和膏，陈醋、白蜜调，炖温敷。

二诊：投剂后，得大汗，热退肿减，再用和解。

全当归二钱 京赤药二钱 大川芎八分 生草节八分
苦桔梗一钱 大贝母三钱 炙僵蚕三钱 晚蚕砂包，三钱 丝瓜络二钱
香白芷六分 万灵丹入煎，一粒 仍用金箍散、冲和膏。

郑左。肝疽生于左肋肋，漫肿而硬，按之疼痛，大如手掌。此气阴两亏，肝郁挟痰湿凝结，营卫不从，有酿脓之象。宜消托兼施，消未成之毒，托已成之脓也。如脓从外泄则吉，破膜则危。

生黄芪六钱 生草节八分 川象贝各三钱 皂角针一钱
全当归三钱 苦桔梗一钱 炙僵蚕三钱 陈广皮一钱 生赤芍三钱
银州柴胡一钱 炙甲片一钱

外用十将丹、平安散、阳和膏。

二诊：前投益气消托之剂，肝疽肿硬疼痛，较前大减，可望消散。惟神疲肢倦，形肉消瘦，脉象濡软，气血两亏，痰湿未能尽化。既见效机，仍守原意出入。

生黄芪六钱 云茯苓三钱 川象贝各二钱 杜赤豆一两
全当归三钱 生草节六分 紫丹参二钱 生苡仁四钱 生赤芍三钱
陈广皮一钱 鲜荷叶一角

何右。天疽匝月，色黑平塌，神糊脉细，汗多气急，阴阳两损，肝肾俱败，痼症中之七恶已见，虽华佗再世，亦当谢不敏也。勉方冀幸。

吉林参二钱 生黄芪六钱 血鹿片八分 生於术二钱
清炙草八分 云茯苓三钱 炮姜炭五分 川贝母三钱 大熟地四钱
五味子六分 左牡蛎四钱 半夏曲三钱

二诊：服药后，神清思食，脉象弦硬，此系孤阳反照，不足恃也。勉宗前法，以冀万一。原方加熟附片一钱。

宋左。中发背腐溃，得脓不多，大似覆碗，肉坚肿，疮顶深陷，临晚寒热不壮，纳谷减少，舌苔薄腻，脉象虚弦。背脊属督脉所主，脊旁为太阳之经，督阳已衰，太阳主寒水之化，痰湿蕴结，营血凝寒，此阴疽也，势忽轻视。急拟助督阳以托毒，和营卫而化湿，冀其疮顶高起，脓毒外泄，始能入于坦途。

生黄芪五钱 朱茯神三钱 陈广皮一钱 鹿角胶一钱五分
紫丹参三钱 仙半夏二钱 大贝母三钱 生草节五分 全当归三钱

红枣四枚 生熟谷芽各三钱

洗药方

全当归二钱 生草节六分 独活二钱 大川芎二钱 石菖蒲二钱
鲜猪脚爪劈碎，一枚煎汤洗之。

外用九黄丹，海浮散，阳和膏。

二诊：中发背腐溃，得脓不多，大如覆碗，疮顶不起，四围肿硬色紫，纳食减少，舌苔薄腻，脉象濡滑。少阴阴阳本亏，痰湿蕴结太阳之络，营卫凝滞，肉腐为脓。前投助阳托毒和营化湿之剂，尚觉合度，仍守原意出入。

生黄芪六钱 朱茯神三钱 陈广皮一钱 春砂壳八分
生草节四分 紫丹参三钱 炙远志肉一钱 全当归三钱
生熟谷芽各三钱 鹿角胶三钱 仙半夏三钱 大贝母三钱 红枣四枚

三诊：中发背腐溃，腐肉渐脱，脓渐多，四围肿硬略减，舌苔薄腻，脉象虚弦而滑。少阴阴阳本亏，痰湿凝结太阳之络，营卫循序失常，仍拟助阳益气，化湿托毒，冀其正气充足，则脓自易外泄。

生黄芪六钱 朱茯神三钱 全当归三钱 生草节四分
紫丹参二钱 陈广皮一钱 春砂壳八分 炙远志肉一钱
炒赤芍一钱五分 仙半夏二钱 红枣四枚 鹿角霜二钱 大贝母三钱
生熟谷芽各三钱

外用九黄丹，呼脓丹，海浮散，阳和膏。

四诊：中发背腐肉渐脱，脓亦多，根脚肿硬亦收，苔薄腻，脉虚滑。少阴阴阳两亏，痰湿稽留太阳之络，营卫循序失常。饮食喜甜，中虚故也。再拟助阳益气，化湿托毒。佐入和胃之品。

生黄芪六钱 云茯苓三钱 全当归三钱 光杏仁三钱
紫丹参二钱 炙远志肉一钱 陈广皮一钱 红枣五枚 生草节四分
仙半夏三钱 春砂壳八分 鹿角霜二钱 川象贝各二钱
生熟谷芽各三钱

五诊：中发背腐肉渐脱，得脓亦多，根脚肿硬亦松，惟胃纳不

旺，脉象左虚弦右濡滑。少阴阴阳两亏，蕴毒痰湿，稽留太阳之络，脾胃运化失其常度。再拟益气托毒和胃化湿。

生黄芪四钱 全当归二钱 仙半夏三钱 鹿角霜四钱 红枣五枚
紫丹参二钱 云茯苓三钱 陈广皮一钱 炙款冬一钱五分
生姜一片 生草节四分 炙远志肉一钱 春砂仁一钱
生熟谷芽各三钱

六诊：中发背腐肉已去其半，得脓亦多，根脚肿硬亦松，胃纳不旺，脉象左虚弦右濡滑。少阴阴阳两亏，蕴毒痰湿留恋，一时未易清彻。再拟益气托毒，和胃化痰。

生黄芪四钱 生草节四分 仙半夏一钱五分 紫丹参二钱
抱茯神三钱 陈广皮一钱 全当归二钱 鹿角霜三钱
生熟谷芽各三钱 杜赤豆五钱 红枣五枚

洗药方

全当归三钱 生草节三钱 石菖蒲一钱五分 猪脚爪劈碎，一枚
紫丹参三钱 生赤芍三钱 蜂房窠二钱 煎汤洗之。

外用：红肉：上补天丹、海浮散。腐肉：上桃花散、九黄丹。外贴阳和膏。

七诊：中发背腐肉已去其半，得脓亦多，四围根脚渐平，纳谷不旺，临晚足跗浮肿，牙龈虚浮，脉象左濡弦右濡滑。气血两亏，脾胃不健，余毒蕴湿未楚，再拟益气托毒，崇土化湿。

生黄芪四钱 抱茯神三钱 全当归二钱 紫丹参二钱
陈广皮一钱 冬瓜皮三钱 生白术一钱五分 生草节四分
焦谷芽三钱 红枣五枚

外用海浮散、九黄丹、补天丹、九仙丹，阳和膏。

八诊：中发背腐肉十去七八，四围根脚，亦觉渐收，牙龈虚浮，临晚足跗微肿，脉象左虚弦不柔，右濡滑。气血两亏，浮火易升，脾弱清气下陷，余毒留恋。再拟益气托毒，崇土化湿。

生黄芪四钱 抱茯神三钱 淮山药三钱 冬瓜皮三钱

紫丹参三钱 全当归三钱 生白芍一钱 红枣五枚 生草节四分
陈皮一钱 生熟谷芽各三钱

外用海浮散、桃花散、九黄丹、补天丹，阳和膏。

九诊：中发背腐肉已去七八，根脚亦平，脓水亦少，惟纳谷不香，牙龈虚肿，面部虚浮，脉左虚弦右濡滑。气血两亏，津少上承，脾胃不健，运化失常。再拟益气托毒，理脾和胃。

生黄芪四钱 云茯苓三钱 大贝母三钱 冬瓜子三钱
紫丹参二钱 陈广皮一钱 佩兰梗一钱五分 红枣四枚 全当归二钱
生草节四分 生熟谷芽各三钱

外用桃花散、九黄丹、补天丹，阳和膏。

十诊：中发背腐肉已除，新肉已生，纳谷衰少，口舌糜点，牙龈肿痛，妨于咽纳，便溏似痢，苔腻布，脉象左虚弦右濡滑。此乃气阴两亏，无根之火，易于上升，脾胃不运，湿浊留恋，人以胃气为本，再拟和胃运脾，宣化湿浊。

炒淮药三钱 炒扁豆衣三钱 佩兰梗一钱五分 藏青果一钱
云茯苓三钱 新会皮一钱五分 谷麦芽各三钱 干荷叶一角
野蔷薇花露二两 香稻叶露二两，二味后入

龙脑薄荷一支，剪碎泡汤，洗口舌糜腐处，再用珠黄散搽之。

十一诊：中发背腐肉已去七八，新肉已生，便溏似痢亦止，惟口舌糜点碎痛，牙龈虚浮，妨于咽饮，纳谷减少，苔薄腻，左脉弦象略缓，右部濡滑。此气阴两亏，虚火挟湿浊上浮，脾胃运化无权。人以胃气为本，再拟和胃清宣。

炒淮药三钱 川象贝各二钱 通草八分 佩兰梗一钱五分
云茯苓三钱 陈广皮一钱 炒谷麦芽各三钱 香稻叶露三两
蔷薇花露三两，二味后入

十二诊：中发背腐肉虽去七八，新肉生长迟迟。皆由正气亏虚，不能生长肌肉，口舌糜腐碎痛，牙龈腐烂，妨于咽饮，谷食衰少，苔粉腻，虚火挟湿浊上浮，脾胃生化无权，还虑正虚不支，致生变迁。

再拟和胃清化。

真芦荟八分 甘中黄五分 赤茯苓三钱 京玄参一钱五分
胡黄连五分 活贯众三钱 川象贝各二钱 通草八分
生熟谷芽各三钱 蔷薇花露三两 香稻叶露三两，二味后入

《丁甘仁医案》

宋先生。中发背腐肉已除，新肉已生，纳谷衰少，口舌糜点，牙龈肿痛，妨于咽饮，便溏如痢，苔腻布，脉象左濡弦，右濡滑。此乃气阴两亏，无根之火易于上升，脾胃不运，湿浊留恋。人以胃气为本，再以和胃运脾，宣化湿浊，尚希明正。

炒淮山药三钱 云茯苓三钱 炒扁豆衣三钱 新会皮一钱
炒谷麦芽各三钱 佩兰梗一钱五分 藏青果一钱 干荷叶二角
野蔷薇露·香稻叶露各二两，二味后入 龙脑薄荷一支，剪碎泡汤洗口，舌糜烂处用珠黄散搽。

二诊：中发背腐肉已去八九，新肉已生，便溏如痢亦止，口舌糜点碎痛，牙龈虚浮，妨于咽饮，纳谷减少，苔薄腻，左脉弦象略缓，右部濡滑。此气阴两亏，挟湿浊上浮，脾胃运化无权。人以胃气为本，再宜和胃清宣。

炒淮山药三钱 云苓三钱 川象贝各二钱 陈皮一钱 通草八分
炒谷麦芽各三钱 佩兰梗一钱五分 野蔷薇花露三两
香稻叶露三两，二味后入

三诊：中发背腐肉虽去八九，新肉生长迟迟，皆由正气亏虚，不能生长肌肉。惟口舌糜腐碎痛，牙龈腐烂，妨于咽饮，谷食衰少，苔粉腻。虚火挟湿浊上浮，脾胃生气无权，还虑正气不返，致生变迁。再宜和胃清解。

真芦荟八分 京玄参一钱五分 甘中黄五分 川象贝各二钱
胡黄连五分 通草八分 赤苓三钱 活贯仲三钱 生熟谷芽各三钱
野蔷薇花露三两 香稻叶露三两，二味后入

《丁甘仁晚年出诊医案》

葛左。脑疽腐溃，根脚虽收，腐肉未脱，气虚不能托毒外出，痰湿蕴结不化，宜益气和营，化湿托毒。

生黄芪六钱 全当归二钱 生草节六分 抱茯神三钱
炙远志一钱 苦桔梗一钱 大贝母三钱 炙僵蚕三钱 鹿角霜三钱
香白芷四分 紫丹参二钱 琥珀蜡矾丸一钱，吞服。

另 用：全当归三钱，大川芎一钱五分、生草节一钱五分、
石菖蒲一钱五分、鲜猪脚爪一枚劈碎，煎汤洗之。

外用九黄丹、补天丹、黑虎丹、阳和膏。

陈左。脑疽七天，顶虽溃未曾得脓，根脚肿硬疼痛，日晡寒热，
湿邪凝结督阳之络，血凝毒滞，症势非轻，拟和营托毒。

生黄芪四钱 全当归二钱 生草节八分 苦桔梗一钱
川桂枝五分 京赤芍二钱 大贝母三钱 炙天虫三钱 陈广皮一钱
白茄蒂五枚

上黑虎丹，贴退消膏，敷用金箍散、冲和膏。

二诊：脑疽腐溃平坦，根脚散漫，肉色紫暗，气虚肝郁，挟痰湿
蕴结督经，血凝毒滞。症势非轻，姑拟和营托毒。

生黄芪四钱 全当归二钱 紫丹参二钱 生草节六分
苦桔梗一钱 大贝母三钱 炙僵蚕三钱 鹿角霜三钱 陈广皮一钱
白茄蒂一钱

琥珀蜡矾丸一钱，吞服。

外用阳和膏、九黄丹、黑虎丹。

如意散、蟾皮、金箍散以红茶白蜜调敷。

寿左。上搭手腐去新生，口燥亦减，姑拟益气生新，调理脾胃。

生黄芪四钱 紫丹参二钱 生草节六分 抱茯神三钱
怀山药三钱 川石斛三钱 全当归二钱 川象贝各二钱 陈广皮一钱
丝瓜络三钱 红枣四枚

外用三妙膏、桃花散、海浮散。

罗左。股阴疽肿硬疼痛，日晡寒热，虑其增剧，姑拟祛瘀消解。

京赤芍二钱 荆芥穗钱半 青防风一钱 全当归二钱
泽兰叶钱半 杜红花八分 生草节六分 炙甲片一钱 嫩桑枝三钱
大贝母三钱 炙乳没各八分 炙僵蚕三钱

吴童。环跳疽又发，脓水不多，疮旁又肿，良由两天不足，痰湿瘀凝，营卫不从，拟阳和汤加减。

净麻黄先煎去白沫，三分 大熟地四钱 肉桂心四分
白芥子炒开，二钱 怀牛膝三钱 炮姜炭四分 陈广皮一钱
紫丹参二钱 鹿角胶三钱

二诊：流注破溃已久，内已成管，左髀部漫肿疼痛，症属缠绵，以丸代煎，缓图功效。

净麻黄二钱五分 大生地四两 怀牛膝一两五钱 炮姜炭五钱
肉桂心五钱 陈广皮一两 白芥子二两 鹿角胶二两 生草节一两
生黄芪二两

上药共研细末，加鹿角胶和透，炼蜜为丸。每早晚各服一钱五分。

吴左。鹤膝疽已久，漫肿疼痛，皮色不变，难于步履。两天本亏，风邪痰湿稽留络道，营卫闭塞不通，姑拟益气祛风，化湿通络。

生黄芪五钱 全当归二钱 西秦艽二钱 怀牛膝二钱
晚蚕沙包，三钱 海桐皮三钱 木防己二钱 陈木瓜二钱 白茄根二钱
川独活七分 生苡仁四钱 藏红花七分 油松节切片，二钱

贴阳和膏

二诊：两天本亏，风邪痰湿稽留络道，营卫痹塞不通，左膝漫肿痹痛，不便步履，防成鹤膝，仍宜益气祛风，化湿通络。

生黄芪四钱 全当归三钱 怀牛膝二钱 西秦艽二钱
云茯苓三钱 生苡仁四钱 木防己二钱 广陈皮一钱 杜红花八分
虎胥骨炙酥，二钱 松节切片，二钱

陈右。甘疽成漏，脓水淋漓，气血两亏，不能托毒外出，症势缠绵，姑宜培养气血，拔管托毒。

生黄芪六钱 生潞党参三钱 生甘草六分 全当归二钱
紫丹参二钱 苦桔梗一钱 大贝母二钱 抱茯神三钱 象牙屑焙，三钱
红枣四枚

拔管以七仙条，须痛二刻钟即止，至第三日自出。

徐小。甘疽虽愈，根株未除，大腹微满，皆由两天不足，健运不能如常，再拟培养两天，加以伤风，佐入祛风化痰之品。

怀山药三钱 炙远志一钱 霜桑叶三钱 苦桔梗一钱
抱茯神三钱 嫩前胡钱半 光杏仁三钱 象贝母三钱 福橘络一钱
冬瓜子三钱 陈葫芦瓢三钱

潘左。中搭手破溃，得脓不多，四围肿硬疼痛，已见轻减，宜和营托毒。

生黄芪五钱 生草节八分 云茯苓三钱 全当归二钱
紫丹参二钱 生苡仁四钱 大贝母三钱 忍冬藤三钱 飞滑石三钱
丝瓜络二钱 杜赤豆一两

罗右。少腹疽已成，内已溃脓，肿红疼痛，湿热瘀凝，营卫不从，虑其增剧，姑拟和营托毒。

生黄芪四钱 紫丹皮二钱 生草节八分 全当归二钱
京赤芍二钱 忍冬藤三钱 连翘壳三钱 大贝母三钱 通草八分
飞滑石三钱 泽兰叶钱半 丝瓜络二钱 杜赤豆一两

退消膏上黑虎丹、九黄丹。

张左。蜣螂疽漫肿疼痛，不能屈伸，肢节酸痛，脾弱生湿，湿郁生痰，稽留络道，宜理脾和胃，化湿通络。

生白术二钱 云茯苓三钱 陈广皮一钱 仙半夏二钱
紫丹参二钱 大贝母三钱 生赤芍二钱 炙枳壳一钱 杜红花八分
陈木瓜二钱 嫩桑枝四钱

小金丹一大粒，研细末化服。

顾小。疔痰破溃，蜣螂疽漫肿疼痛，形寒潮热，大腹胀满，内外夹杂之症，非易图功。

生白术钱半 连皮苓四钱 炒怀药三钱 陈广皮一钱
大腹皮一钱 干蟾皮酒洗，钱半 炒香附二钱 鸡金炭钱半
使君肉三钱 陈葫芦瓢三钱 六君子丸包煎，三钱

谈左。蜣螂疽生于手指，漫肿疼痛，不能屈伸，脾弱生湿，湿郁生痰，稽留络道，营卫不从，宜理脾和胃，化湿通络。

生白术钱半 云茯苓三钱 仙半夏二钱 陈广皮一钱
炙枳壳一钱 生赤芍二钱 大贝母三钱 炙僵蚕三钱
风化硝后入，五分 嫩桑枝四钱 山慈菇片八分

钱左。痧后蕴毒留恋，挟痰瘀凝结，耳后发肿硬疼痛，耳内流脓，稍有咳嗽，宜清解消散而化痰瘀。

薄荷叶八分 熟牛蒡二钱 荆芥穗钱半 熟石膏二钱
生草节八分 苦桔梗一钱 忍冬藤三钱 连翘壳三钱 大贝母三钱
炙僵蚕三钱 生蒲黄包，三钱 杜红花八分 板蓝根钱半
万灵丹一大粒，化服。

童左。颊车疽虽溃，得脓不多，根脚肿硬疼痛，痰瘀凝结，营卫不从，姑拟和营托毒。

全当归二钱 京赤芍二钱 紫丹参二钱 生草节八分
苦桔梗一钱 忍冬藤三钱 炙僵蚕三钱 连翘壳三钱 大贝母三钱
山慈菇片八分 丝瓜络二钱 杜赤豆一两

张右。颊车疽成漏，脓水淋漓，宜益气和营，化管托毒。

生黄芪四钱 全当归二钱 生草节六分 抱茯神三钱
炙远志一钱 苦桔梗一钱 紫丹参二钱 大贝母三钱 陈广皮一钱
红枣四枚 象牙屑焙，三钱

宋左。肋疽漫肿疼痛，已有三月之久，内已酿脓，肝郁挟痰湿凝结，症势非轻，姑拟消托兼施。

生黄芪五钱 全当归二钱 生草节六分 抱茯神三钱
炙元志一钱 苦桔梗一钱 大贝母三钱 炙僵蚕三钱 炙甲片一钱
陈广皮一钱

外贴阳和膏。

此症针破后有似脓非脓之油腻者，是内隔膜已坏，不治也。

二诊：肋疽漫肿疼痛，已延三月之久，内有酿脓之象，宜益气托毒，健运太阴。

生黄芪四钱 紫丹参二钱 生草节八分 赤茯苓三钱
生白术二钱 陈广皮一钱 六神曲三钱 炒扁豆衣三钱 大贝母三钱
炒赤芍二钱 炒谷芽三钱 炒苡仁三钱 金香附钱半 干荷叶一角

《丁甘仁医案续编》

曹惕寅

金业公所韩介眉君，绍一病者，持函来诊，谓其贫病交迫，嘱为尽力治之。望其形色，虽不甚憔悴，惟疲惫不堪。询之知患对口疽。启视之，大骇，自脑至背漫肿而硬，其坚如石。针刺刀划，既不痛楚，又无血液。上半身板木强直，自觉如有重负。脉来沉细，舌苔白腻，面色恍白。一派气血寒凝之象。问其曾服寒药否？答曰：“曾请疡科医治，谓为湿热深重，非大苦大寒不足以荡涤之。起病迄今，四旬余矣。一诊之后，无力再医，乃至迁延。”余曰：“君疾不医尚可，医则愈误病机。夫患疽之原，营气为湿热所阻，络气为之闭塞，非重剂温热，不能使气血流通，腐化毒解。今以寒剂治之，是南辕而北辙，徒增其害耳，致毒气不能外泄，转乎内而伤筋伤络，散漫不已。故表面一若粗厚肌肉，殊不知内中痛苦，非可言喻也。”因为处二方，一内服，一外敷。内用生芪皮、鹿角霜、全当归、制蚕、角针、茄蒂、茵脚、橘红、米仁、丝瓜络、泽泻。外用红花、王不留行、苏叶、当归、木瓜、木香煎汤热敷疮疡四围，及一切僵木处。复用红升黑虎膏及敷冲和散，并以刀法划破死肌。阅数日后，头项渐能转动，揭膏视之，热气上冲，臭秽不堪，渐知痛楚。仍如前法治之，历十余日始得顽肌全消，腐肉化尽，得显露光红新肉。掺以八宝生肌散，贴以清凉膏，佐以培养气血药品，如党参、熟地、归身、川贝、白芍、料豆衣、茯神、盐

半夏、川断、楮芽。遂以此法完功。治疽之不可用凉药，实为一定不易之旨也。

林姓夫妇同患上搭手，均溃数头，根脚板木，形势巨大，按之无脓，并云已服小金丹，六神丸等。而仍窜发，两肩臂僵不能动，深以不验为憾。余曰：“痈始伏硬块，由渐而大，高肿毒化，溃脓便愈，即时于法可消。疽之初起，仅为一脓窠，而内部已僵膜满布，营气阻遏，湿热凝聚。于法只可温托化湿、解毒和营，最忌香散。今尔等以治痈之法治疽，宜其毒气散漫，半体僵肿。”急用冲和散以紫苏、茄蒂煎汤，调和热敷四围，并贴黑虎膏，内服芪皮、苏梗、当归、制蚕、角针、紫茸、米仁、泽泻、茄蒂、香茵脚。药后疡势高肿，散漫之势亦定。即于前方去芪皮、角针、香茵脚、茄子蒂，加连翘、银花藤、赤芍。一二剂，均脓泄肌敛，平复如常。余如疔疮初起，亦同一脓窠，更不宜服香窜攻散之品，易使毒陷昏迷，俗名走黄。惟疔宜寒凉，疽宜温通，斯大相悬殊处。至若治痈宜因势而变化之。初起僵硬宜温，渐次红肿宜凉，反是旨以治之，则危殆立见矣。

唐君省之之太夫人年六旬余，患上搭疽。王君祥熙之太夫人亦六旬余，患对口疽。均属肿平软漫脓稀，为疮家恶候。且俱见纳少肢麻，神疲倦语等象。余以病者年高体令，深恐正不胜病辞之。病者坚欲余诊，乃勉为之立方，苏梗三钱、制蚕三钱、角针一钱、芪皮四钱、当归三钱、赤芍三钱、米仁四钱、橘皮一钱、半夏三钱、茄蒂钱半、茵脚钱半。三剂之后，始转肿起坚硬脓稠。复以冲和散敷之，及黑虎膏贴之。又以恶苦不愿服药，乃专事外法，并用红花、当归、苏叶、木瓜敷之。未及半月，即得腐脱完口。

《翠竹山房诊暇录稿》

傅松元

顾哲甫者，六里桥榨油厂之主人也。一日邀余至其家，见其家人多拭泪，余问谁病？答云哲甫。导入其室，则哲甫扶坐在床，喘嗽

不休，汗下如雨。左右云：“左肩背高肿甚于右，肉色不变，亦不觉痛，惟咳嗽引起腋痛，不发热而食量大减，今六日矣。请外科医诊视云是流注，开三刀，皆鲜血，插降药三条，外贴膏药，服其药一剂，因刀口痛不可忍，即起膏药，抽去药条，但服药后，喘咳益甚，自汗不休，今日复请来诊。刀口已闭，肿处仍不痛，开方已持往肆中撮药，昨方诸亲友云恐误治，故请先生决之。”余见昨服之方为阳和汤，今喘逆将脱，势不可为，其家定欲开方。余曰：“此为肺疽，病在内而形诸外，非流注也，昨晚流注之方，安得不变喘脱？治恐无及矣，故从尔请试之，不识近地有薏苡之根乎？”曰有。余嘱令速取，迟恐不救。乃为书葶苈、苏子、光杏、贝母、沙参、桔梗、白前、通草、甜瓜子、鲜薏根一方，少顷前方之药至，观其方，乃用川乌、草乌各二钱。余大惊曰：“此杀人方也，若服之，可立而待毙。”明日复诊，知其服余方后，胸中格格不相安，旋即吐出痰涎一盆许，喘遂平，汗渐止，食已进，肩背之肿，亦复无形，惟稍有嗽，神倦脉弱。余曰：“此邪去正虚，宜与沙参、麦冬、桑皮、薏苡、甜杏、橘白等理虚利肺之方。”三剂而安。

《医案摘奇》

俞道生

季刚。环跳疽，内容甚大，脓水源源，身中气血两端被其日渐消耗，而虚阳因之易动，里急咽红，相继发生，在所难免矣。脉虚细数，舌根尚黄，虚中挟有湿热，拟圣愈汤加减，参以化湿之品。

米炒党参9克 土炒白术4.5克 附子1.5克，同炒 大生地9克
云茯苓9克 白归身9克 真川牛膝9克 福泽泻6克
安桂0.9克，同炒 炒白芍4.5克 焦谷芽12克 左牡蛎15克
五花龙骨12克 核桃三枚

复诊：环跳疽，脓去颇多，气血大为消耗，无如血分湿热尚未廓清，挟虚阳以升腾，以致午后潮热，热则喉中窒塞不舒。盖上升之

气，自肝而出，肝无营养，雷火浮越也。脉细数，重按无力，舌根浮黄，再拟调气养血，潜阳化湿，必得虚热肃清方无它变。

处方同前，除党参、白术、附子炒生地、归身、牛膝、安桂炒白芍、谷芽、胡桃，加直条参须3克（另炖冲入）、生晒於术4.5克、夜交藤9克、细白薇4.5克、淮山药9克、姜汁炒大生地9克、黑锡丹2.4克（吞下）。

三诊：环跳疽溃久不敛，脓水流注于尾闾之右偏肿痛，皮色如常，欲溃不溃，蔓延及于腰际，浮肿作痛，午后寒少热多，发有定候，脉虚细数，舌根浮黄，血分湿热流滞下焦，肾虚失于排泄，元亏正不胜邪，故缠绵至于若是也。再拟扶元养血助肾，以滤其毒质。

米炒党参9克 生有芪9克 白当归9克 白茯苓9克
炙狗脊9克 盐水炒淮牛膝9克 盐水炒泽泻9克 鹿角霜9克
淡苡蓉9克 功劳叶9克 酒炒丝瓜络三寸 东垣肾气丸4.5克，吞下

四诊：环跳疽孔大且深，一时骤难长敛，而脓水流注于尾闾之右偏，漫肿而平势，欲外溃惟元气大亏，脓熏未透，非可以朝夕期也，脉仍虚细数，舌苔黄花脱，再拟扶元养血佐以托脓。

处方同前，除泽泻、鹿角霜、苡蓉、功劳叶、丝瓜络、肾气丸，加鹿角胶4.5克、牡蛎粉炒珠9克、稀莖草9克、炒川芎4.5克、川桂枝尖1.5克、生草节1.5克、鲜桑枝一尺许。

《俞道生医案》

贺季衡

孙女 井口疽自溃，疮口深大，时常寒热，胃呆食少，脉弦数，舌红。血热肝旺，兼胃有积热使然，完口不易。

当归二钱 大贝母四钱 粉丹皮二钱 生黄芪三钱 连翘二钱
京赤芍二钱 中生地五钱 炒苡仁五钱 蒲公英五钱 天花粉四钱
生甘草八分 红枣三个

李女 井口疽初起，左乳上高突有形，痛掣肩肘，脉弦细，舌

红。风邪痰湿入络之候，溃后极难完口。

当归二钱 白芥子一钱五分炒 块苓四钱 京赤芍二钱
刺蒺藜四钱 青防风八分 橘络八分 西秦艽一钱五分 海桐皮四钱
丝瓜络二钱炙 炒竹茹一钱五分 荷叶筋一团

陆男 脑疽两候，虽已得脓，而疮顶平塌，界限不清，四围漫肿，两旁俱及耳根，迭经寒热，脉小数而滑，舌苔浮白。气虚痰盛，湿火凝结督阳之络而来，势属阴多阳少。亟为温补本元，以化湿毒。

路党参三钱 生黄芪三钱 新会皮一钱 当归三钱
香白芷一钱五分 京赤芍三钱 炒白术二钱 炙甘草八分
姜半夏一钱五分 生姜两片 红枣三个

二诊 脑疽虽已得脓，而疮顶仍平塌，四围漫肿，并不甚痛，兼之寒热作恶，食少神疲，脉虚数，舌红苔白。气虚痰盛，不能化阴为阳。仍当温补化毒，兼运中阳。

路党参三钱 炒白术二钱 上肉桂八分 新会皮一钱 当归三钱
生黄芪三钱 大砂仁八分 姜半夏一钱五分 白芷八分
京赤芍二钱 生姜两片 红枣三个

何男 下搭延已一月，根脚散漫，疮顶不高，频起蜂窠，脓出不畅，脉濡细而滑，舌左滑白。气血暗亏，内陷可虑。亟为温托，冀得厚脓乃吉。

生黄芪三钱 当归三钱 角针三钱 京赤芍二钱 川桂枝八分
淮牛膝二钱五分 炒白术二钱 大贝母三钱 甘草节八分
川黄柏一钱五分 生姜两片 红枣三个

李男 下搭初起，未成先溃形如粟米，四围赤脚，寒热迭作。势有腐溃之虑。

当归三钱 上银花五钱 京赤芍二钱 天花粉四钱 大贝母四钱
甘草节八分 粉丹皮二钱 净连翘二钱 生苡仁五钱
川黄柏一钱五分 万灵丹三钱过口

张山雷

叶幼。环跳疽自溃，漫肿尚盛，脉数舌滑、先宜清化。

川独活 3克 全当归 4.5克 大腹皮 9克 炒川柏 4.5克
生鸡内金 4.5克 广藿梗 4.5克 生苡仁 6克 川断 6克 红花 3克
陈皮 4.5克

二诊：环跳久溃，腐化且巨。昨授清化，肿势稍减，脉细数，舌滑，本元亦薄，而未可遽与扶元。仍宗宣络行气。

川独活 4.5克 小青皮 4.5克 大腹皮 9克 川断肉 6克
炒建曲 4.5克 全当归 4.5克 怀牛膝 4.5克 生鸡内金 4.5克
广郁金 4.5克 焦苡仁 9克

叶姬。上搭手，内已有脓，恶腐甚盛，泛恶胸闷，脉涩舌腻。先拟开泄。

淡吴萸 0.3克 制半夏 4.5克 炒川芎 3克 西羌活 3克
桂枝 1.2克，同炒 大白芍 4.5克 全当归 6克 川断肉 9克
原红花 2.4克 制香附 6克 陈皮 4.5克 生鸡金 4.5克
砂仁壳 1.2克

包左。背疽大症愈后时或作痒，眠食已安，而肢节酸楚，足跟隐痛，脉弦舌清，明是气营尚亏，足三阴未复。

元地 15克 杞子 9克 萸肉 9克 归身 6克 潞党参 6克
沙参 9克 炙甘草 1.2克 黄芪 6克 陈皮 4.5克 茯苓 9克
枣仁 9克 木瓜 4.5克 木香 1.8克 砂仁 2粒

包左。背疽证虽不甚，形巨势高知痛，犹为顺候。但毒尚未聚，是宜温经提毒，须得脓见方妥。

川桂枝 3克 西羌活 4.5克 姜半夏 4.5克 炒川芎 4.5克
全当归 4.5克 川断肉 6克 原红花 4.5克 生延胡 4.5克
焦谷芽 4.5克 炙鳖甲 3克 广皮 4.5克 广木香 2.4克
壳砂仁打，1.2克

樊左。耳疔外溃，变幻蔓生，耳下肿坚，将有石疽之累。从前药误，一至于此。姑再清肝活络、消肿散结软坚，尽力图维。尚不知果能全绩否也？

生杭药 9 克 怀牛膝 6 克 全当归 4.5 克 玄参 9 克 贯众 12 克
生延胡 6 克 象贝 6 克 法半夏 4.5 克 川柏 4.5 克 条芩 4.5 克
雅连 1.2 克 元明粉 2.1 克 蒲公英 9 克 女贞子 12 克 红重楼 6 克
生锦纹 1.8 克 焦栀子 9 克

张左。上石疽，本是阴虚阳浮，春升木动，宜乎近复加剧。脉左浮弦劲，舌滑少液。治法只宜养阴潜阳，为标本兼顾，庶乎带病延龄。

大元地 1.2 克 炒山萸肉 9 克 条子芩 4.5 克 甘杞子 4.5 克
北沙参 9 克 川石斛 9 克 白薇 9 克 白前 6 克 鲜竹茹 4.5 克
陈皮 6 克 大白芍 9 克 晚蚕矢 9 克 甘菊花 6 克 生石决明 15 克
生牡蛎 24 克 生龟板 15 克 生鳖甲 12 克，四味同打先煎
另羚羊水磨冲，1.2 克

《张山雷专辑》

范文甫

王孩。环跳疽初起，右脚不能屈伸，恶寒发热，环跳穴处按痛，形体消削。

大生地 12 克 当归 9 克 川芎 9 克 生白芍 12 克 桃仁 9 克
红花 3 克 生黄芪 12 克 怀牛膝 9 克

姜稽琴。上搭手破口，脓水出，薄而无气，口散漫不敛，疮形平塌，其色灰黯，面色苍白。元神虚损，湿亦未化。

地丁草 30 克 当归 9 克 生黄芪 30 克 炒冬术 9 克 党参 9 克
大生地 9 克 红花 9 克 桃仁 9 克 甘草 3 克 淡附子 3 克

外洗方：白芷 9 克 蜂房 9 克 苏木 9 克 苍术 9 克 赤芍 9 克
归尾 9 克 防风 3 克 蚤休 9 克 川芎 9 克 羌活 9 克

猪肉皮 30 克

二诊：药后见效，疮色转润，疮口渐敛。

前方，外洗方。半月后当可收口。

《范文甫专辑》

曹颖甫

虞师舜臣尝曰：“一二八之前，闸北有一老妇，其子服务于邮局。妇患脑疽病，周围蔓延，其径近尺许。启其所盖膏药，则热气蒸蒸上冒。头项不能转侧。余与余鸿孙先生会诊之，三日不见大效。四日诊时，天色已晚，见病者伏被中，不肯出。询其故，侍者曰，每日此时恶寒发热汗出。余乃悟此为蓄蓄恶寒，翕翕发热之桂枝汤证。即用桂枝五分，芍药一钱，加姜草枣轻剂投之。次日，病大减。遂逐日增加药量，至桂枝三钱，芍药五钱，余三味亦如之，不曾加他药。数日后，竟告全愈云。”

《经方实验录》

翟竹亭

西门内王姓小儿，五岁患于背发，屡治不愈。邀余诊视，见小儿手背筋骨尽露，所流俱是臭水，并无脓意，小儿体极瘦弱。伊母又云：“大便日泻三、四次不等，夜间疼痛不止。”余诊其脉，六脉皆虚细无力，此因久病失于调补。疮科又属破漏之证，如同居家，每日非用钱十串不能过活，若仅有进款五串，不止日贫，且有冻馁之虞。此儿之疮，三月内臭水淋漓，非虚乎？饮食减少，非虚乎？大便滑，非虚乎？由此思之，臭水无脓者，正见元气亏损，不能化毒之明证。今治法宜先服十全大补汤以壮气血，气血壮自然化毒变脓，外上红升丹，提脓拔毒。各外科书皆云，有脓则生，无脓则死，此千石不易之旨。伊父母闻余论深以为然，遂服十全大补汤，五贴后，疼痛稍止，似乎有脓。又投五贴，泄泻不止，饮食大增，脓变稠黄，臭气已去，生

机日多，脱去危险。此证自余治，始终四十二天，共服药三十帖而愈。倘若不从内治，全恃外治之法，恐终不免亡。常见有患疮者，连年不愈，外科家不问新旧虚实，满口谓毒气不尽。至于用药，轻者凉血解毒，重者硝黄乱投，犹言宜清内毒，竟使元气日消，毒气日盛，不死不休。如此而死者，不胜屈指，皆因不明《内经》虚实大论之误也。

城内耿顺德，年二十余。患玉枕疽，疮形甚恶，大如瓜菱，疼似火烧，硬如铁石，半月后不溃，诊其脉皆虚细无力。此系督脉受寒湿凝结而成，久之寒化为热，阴变为阳，方能成脓。目今之治，先服仙方活命饮，令其速溃，以免毒气蔓延。伊亦信服。三帖疮已半软，又投四帖，疮已熟矣。用刀取破，脓血各半碗许，上以红升丹，每日两次。共服药十帖而愈。

张显亭患中脱发，屡治不愈，二十余日。迎余诊治，见其疮头大如汤碗，焮肿似盘，疮口深有寸余，腐肉不脱，新肉不生，诊其脉洪盛有力。此系脾胃火毒结聚而生。当先服仙方活命饮三帖以解内毒，外上大金丹，化腐生肌。日有佳兆，三十日而愈。

城内土地阁街马姓妇，年近八十，患正对口，二十余日，请余往治。疮口大似茶杯，脓色稠黄，腐肉尚未脱尽。诊其脉洪而有力，问其饮食，喜凉恶热。伊于问曰：“日夜疼痛不止，何也？”余云：“内经曰‘诸痛痒疮，皆属于心’。汝母年虽老，而禀赋甚厚，又属阳脏之人，以脉证并参，此证非大凉兼泻不愈。”遂用内疏黄连汤，服一帖大泻两次，内热已减，疼已稍止，脉洪而有力，比前略退。原方又投一帖，余症尽除，停药不服，外上大金丹，每日两次，以膏盖之。自诊起日近月余而愈。

内疏黄连汤

皂刺 6克 防风 10克 川羌活 6克 白芷 6克 穿山甲 6克
连翘 10克 当归 10克 乳香 10克 黄连 6克 沉香 3克 花粉 10克
金银花 12克 生地 15克 川大黄 15克 丹皮 10克 栀子 6克

甘草6克 水煎服。

李岗李姓妇，四十岁，患偏对口，月余，迎余往治。见肿势甚大，上至巅顶，下连至脊，坚硬如石，绝无溃意。告伊曰：“正对口属督脉为阳，自下行上，易于肿溃；偏对口属膀胱为阴，由上行下，月余不溃者，纯阴无阳也。有人患此，先将生死置于度外，不误治法，亦有得生者。倘不得治法，服败毒之药，如冰上加霜，不知急令阴变为阳，未有不毙命者。”遂用黄芪托里汤加减，服五剂，疮根日收，焮肿日消，正疮渐长，又生大疼，时轻时重。原方又服五剂，浮肿消净，以指按之，遂按遂起，脓已收矣。用尖刀挑开，红白脓出两碗余，即时轻爽。外上红升丹，每日两次，又服黄芪汤七、八剂，渐渐痊愈。外科一门，不明脏腑经络、阴阳表里，寒热虚实，全恃上药、膏药，有不误人命者，余不信也。

黄芪汤

当归12克 黄芪12克 白芷10克 川芎10克 金银花10克
茯苓10克 白术10克 乳香10克 没药6克 防6风克 油桂6克
炮姜6克 广陈皮10克 川羌活6克 炙甘草6克 水煎服。

关帝庙后张姓妇，五十岁。患背疽二十余日，迎余往治。但见疮口腐烂，其大如碗，臭气难近，脓水清稀，淋漓不止，日夜疼痛，饮食渐减，大便每日三、四次。余告伊曰：“此疮本非败证，因某医不分虚实，妄为攻伐，损伤真元，气血两亏，不能化毒为脓，业已犯着七恶，华佗复生，决无生理。”后闻说伊疮危时，大泻三天，周身尽肿而殁。

万春堂学徒孟生，十八岁，患中脘疽。某医误作痞块治之，服消积破块药十余剂，自觉食减气短，不敢再服，请余诊治。诊得关脉扎，按其胃脘，果有一块，大如碗许，无怪某医作痞块治也。余告伊曰：“此证确属中脘疽无疑。速服托里之药，令疮头回转向外，方是吉兆。若以内破，再不得其治法，恐有烂胃腐肠之忧，悔之晚矣。”伊深信。遂开仙方活命饮加减。服五帖后，中脘穴上肿出一块，大如

覆碗，又服五帖，高三寸余，按之大软，脓与熟矣。用尖刀刺破，红白脓交流不已，约五、六碗许。上以红升丹，服气血双补之药，近三十帖，始终无变证，方获痊愈。

仙方活命饮加减

当归 12 克 金银花 6 克 连翘 10 克 皂刺 6 克 白芷 10 克
乳香 10 克 没药 6 克 陈皮 10 克 花粉 10 克 川贝母 10 克
防风 10 克 党参 10 克 炮姜 6 克 茯苓 12 克 粉葛根 6 克
甘草 10 克 水煎服。

邑人张文珍，年六十岁，患背疽。迎余时疮破半月矣，脓水清稀，饮食减少，四肢厥冷，腐肉不脱，新肉不生，大便滑泻，日夜三、四次。看所服药，大概凉血解毒，不但无功，而且加重。此明系年老气血双亏，若不大补阴阳，培养根本，托毒外出，焉有生理？余用内托黄芪汤，服五帖，腐脱新生，泄泻已止。外上红灵药，以膏药盖之，每日两次。共服药十余帖，调理两月，方收口痊愈。

内托黄芪汤

炙黄芪 15 克 乳香 10 克 当归 12 克 党参 10 克 熟地 12 克
白术 10 克 炮姜 10 克 油桂 6 克 陈皮 10 克 川芎 10 克 茯苓 10 克
炙甘草 10 克 水煎服。

李自修，河北长垣人，年三十余，逃荒居杞，卖水为业。忽背上肿起一块，长尺余，宽八、九寸，几乎一背尽满。迎余诊治，余告曰：“此背疽也，又属阴证，近无愈期，非服药三十帖，变阴为阳，始可望愈。”伊不我信，又请某医，对伊曰：“此因闪着，气血不和之证，作疮治误矣。可用酩流酒煎红花洗之当自愈。”洗十余日，毫无一效，日加重甚。日夜哭泣，无奈又迎余治，遂用大补回阳之剂，连服十剂，疮渐起长，疼痛稍减，红肿日甚，此变阳吉兆也。又服五帖，疮已熟矣。用刀刺破，脓出斗余，遂觉轻爽，转动如常，始终调理。二月有余，服药近三十帖，方获十全。方开于后。

党参 12 克 白术 10 克 云苓 10 克 炙甘草 6 克 油桂 10 克

黄芪 15 克 熟地 15 克 当归 10 克 川芎 10 克 白芍 12 克
附子 10 克 炮干姜 10 克 白芷 10 克 陈皮 6 克 山药 10 克
五味子 6 克 没药 6 克 乳香 6 克 金银花 15 克 连翘 10 克 水煎服。

《湖岳村叟医案》

梁月波

郭某某，男，62 岁，天津人，经商。1946 年 7 月 11 日初诊。背部患对心发，初起如粟粒大，红肿焮痛，并觉麻痒。曾经某医院外科手术治疗，术后疮面溃腐，肌肉腐烂如败絮，臭味难闻。疮内有蛆虫二十余条，向疮内深部攒入，奇痒不舒，疮面长约一尺二寸，宽约一尺。疮周漫肿，肤色紫暗。面色黄白，体质肥胖，气短、动则气喘，身感沉重，乏力，纳食减少，大便不畅。脉虚大无力，舌苔黄。

证属正虚毒散，毒邪陷里败逆之危证。急拟内疏黄连汤合补中益气汤加减。内疏黄连汤减薄荷、槟榔、木香、大黄，加党参 15 克、当归 10 克、生黄芪 30 克、白术 10 克、升麻 1.5 克、寸冬 10 克、陈皮 10 克、五味子 9 克、水煎饭后服。日一剂。外先用温汤洗净疮口，取新羊毫毛笔，蘸冰麝化毒散，撒于疮内腐肉上面，少许时，即见蛆虫由腐肉内向外滚落。待疮面蛆虫已净，再撒用轻浮生肌散于红润肌肉上。再敷生肌玉红膏用棉纸封固。另用拔毒架纸膏盖覆疮面。

每日疮面换药一次，五日后精神略增。脉虚略数，舌苔由黄转白。继续用上法治疗。

二诊：患者经治疗半月余，背疮腐肉渐脱落，疮内深处脓水增多，疮口周围肿消，腐肉处用冰麝化毒散加红粉少许，和匀撒于疮面腐肉，以化腐肌。余处仍予轻乳生肌散，并用生肌玉红膏外涂，棉纸封固。内服药如前法。

三诊：一月后，肿处尽消。疮内腐肉已脱，深约二寸余，新肉布满如榴。患者呼吸时疮内肌肉随之向内外摆动。此属将欲透膜之

危象。患者经内服疏解毒热及补托之剂，精神渐复，气短、喘促已减，纳食增多。大便如常。脉虚略滑，舌质红苔白。外治用药如前，内服药于前方内倍党参、黄芪。

四诊：患者治疗两月余，精神已复原，发背腐肉已脱，新肉增多脓少，疮口渐收敛。外用生肌散调玉红膏外涂，棉纸封固。内服补中益气汤收功。共治疗四个月疮口愈合。

刘某某，男，60岁，河北省交河县人，农民。1943年10月21日初诊。患者面色晦暗，喜静、懒言、气短乏力、纳少、形寒体弱。脉沉细，舌苔白滑。脑后发际，偏右侧患偏脑疽，因发病部位与口斜对，又名偏对口。其疽坚硬，根脚散漫，色暗平塌。脖项难转，背沉如石。证属阴寒客于经脉，气滞血凝面发。

急以托里排脓汤加减，方中减银花、连翘、浙贝以温经托里。外以五倍膏外敷，消肿软坚。

二诊：患者经治疗半月后，疮疽变软，渐溃。疮内肉色紫暗，逐渐成为黑腐状，疮流污水臭秽，疮口平塌，背沉木痛。脉沉弱，舌苔白。症势危重，仍用原方继服。急用“面灯灸法”（用湿面捍一略大于伤口之灯碗，覆于疮口，面灯碗内放入适量香油，不宜过多，以免油多外溢）以温经回阳，防毒内陷。油内放置灯心草数根，疮口周围用湿毛巾围敷，以防热油溢出烫伤。点着灯心。每灸至油尽为一壮，连灸二至三壮。初灸时若疮不痛为毒浅，若知痛为毒重，灸至不痛为度。灸后，用生肌散加红粉少许，撒于疮处，再用生肌玉红膏外敷，棉纸封固。

三诊：患者经治疗一个半月后，面色已转红润，纳食增多，背沉已减轻。疮内腐肉已脱，新肉红润。疮口由黑腐转为紫红色。脉油细，舌苔白。此为山阴转阳证。内服药于前方减肉桂，加党参、黄芪各30克以增补气健脾之功。外用生肌散加珍珠研粉、麝香各少许，撒于疮口亲肉处，再用生肌玉红膏外敷，棉纸封固，治疗三月余疮口收敛愈合。

刘某某，男，72岁，山东人，督军。1910年5月就诊。背部患上搭手。初起如粟粒大，微肿，略感焮痛，根大如掌，根脚散漫。曾经私立德、美医院外科住院治疗。手术后，疮流血水，肌肉渐腐臭，病热迅疾，诸药未效，乃请医治。

患者面色皤白，两目无神，语声细微，身觉沉重，不能动转，略能进食，心烦，口渴，二便如常。脉细弱，舌淡苔白。背部右侧肩胛旁患上搭手，疮口直径约一尺六寸长，八寸宽。证属阴证，术后气血大伤，脾胃虚甚，毒滞于内，腐肌不化，难以败脓。急以黄芪内托散服之，以托里化腐排脓。外用生肌散加红粉少许，撒于疮面，以化腐外脱，促使新肉生长。再以生肌玉红膏外涂，棉纸封固。

二诊：治疗半月余，精神倍增，已能进食，觉较前有力，疮内腐肉已脱，新肉增长较慢，用生肌散加珍珠粉、麝香少许，研匀撒于疮内新肉处，余处换药如前。内服药，原方去川芎、皂刺，加白芍10克，改黄芪为30克，白术15克继服，以增强益气内托之功。

三诊：病者面色已转红润，语言清晰，声音洪亮，两目转动有神，纳食如常，脉弦滑，舌苔白，以前法治疗三月余，新肉长平，疮口逐渐平复愈合。

《津门医粹》

张汝伟

鱼右，年五十二，宁波。玉枕疽，溃后肿不退，痛益剧，坚如石，脓水少，已两候矣。脉细弦，苔体白，此督脉有寒，毒不外透，久延防陷。用阳和汤合托里黄芪法。

鹿角霜 生绵芪 炒姜蚕 大贝母 炒赤芍 金银花各三钱
川桂枝四分 皂角刺 绿升麻 生甘草各一钱

本证始末：此余在南京路大庆里诊所之二房东的亲戚。汝本不治疡科，因熟人故，勉为书方。投剂后，坚块软，脓泄畅，敷以“去解”，不旬日而收功，亦快事也。

附录：去解方

陈黄升一两 石膏尿浸，十两 飞青黛五钱，研极细末，磁瓶密封，待用。此方黄升已陈三十年，石膏必用童便浸，一年后用，焙糠煨熟，伏去火性用，方能不痛而效宏。此药汝本贮存极多，“八·一三”常邑沦陷，俱遭灰烬，惜哉。

方义说明：治疡症，第一辨属阴属阳，阳宜清化，阴宜温托。本症坚硬不化，有水无脓，色白不红，均是虚寒之症。所处地位，是督脉所经之处，鹿角在所必用也。

《临症一得》

施今墨

张某某，男，25岁，腰及尾骶处酸楚不适，时日已久。两个月前于左臀部下方生一肿疡，渐破溃出脓，然疮面不红不痛。经某医院检查为腰椎结核所致，为寒性脓疡瘰道破溃。又经中医外科诊断为骨疽。本人畏行手术，遂来求诊。除上述证状外尚有食欲不振，气短令力感等症。苔薄白、舌质淡、脉沉细。

辨证立法：肾气虚损，气血留滞，阴毒结于内，遂成骨疽。病起于腰际，现于臀部下方破溃，阴毒流注所致也。肿疡不红不痛，六脉沉细均是阴证表现。拟培肾元，扶正气，由里托出治之。

处 方：鹿角胶 6克，另烊克 紫河车 6克 炙黄芪 12克
当归身 6克 酒生地 6克 酒熟地 6克 金狗脊 15克 酒杭芍 10克
功劳叶 12克 白薏仁 20克 炒远志 10克 炙草节 6克

二诊：服药十剂，气短乏力均感好转，脓疡破溃面积缩小，脓液亦减少，腰仍酸楚，食欲尚差。

处 方：生鹿角 20克，先煎 真虎骨 10克，先煎 炙黄芪 15克
当归身 6克 金狗脊 15克 野於术 6克 焦内金 10克 厚朴花 6克
玫瑰花 6克 白薏仁 20克 功劳叶 12克 威灵仙 6克
盐地龙 10克 炒远志 10克 炙草节 6克

三诊：前方服七剂，肿疡已消，破溃面缩小三分之二，流出少许粘液，食欲转佳，精神、体力均好，腰腿仍酸楚不适。

处方：真虎骨 10 克，先煎 炙黄芪 30 克 鹿角霜 10 克
金狗脊 15 克 功劳叶 12 克 宣木瓜 10 克 炙草节 10 克 桂枝 3 克
杭白芍 10 克 汉防己 10 克 当归身 6 克 海桐皮 10 克
黑豆衣 12 克，热黄酒淋三次

四诊：服药十剂，溃疡已收口，腰腿酸楚减轻，食睡均佳，体力渐复。拟丸药收功。

处方：每日早服健步虚潜丸 1 丸，晚服虎骨木瓜丸 1 丸。连服一个月。

《施今墨临床经验集》

王孟英

一男子臂肿如腿，酸木而硬，医投消散如故。余与礞蛭丸二服，外敷解散之药于胁间，四面作脓而溃。此亦臂上附骨疽也。治不得法，即难收功。

《归砚录》

费伯雄

某。湿热瘀滞交阻，右腿外侧患成附骨疽，红硬肿痛，兼之浑身风疹，块垒作痒，寒热不解，恐防变剧。

银花四钱 连翘壳二钱 花粉二钱 赤芍一钱半 炒牛蒡三钱
当归一钱半 黄芩一钱 净蝉衣一钱 鸡苏散包，三钱 赤苓二钱
黑山栀三钱 木通一钱 茅根四钱 桑枝五钱

某。大腿附骨湿痰，溃脓之势渐轻，肿亦全退，惟胯内肿疼不松，痛甚如锥刺，恶寒发热，筋强不利，年逾五旬，营液有亏，湿热淹留不化，热痹之象。议先治标病。

参三七切，八分 秦艽二钱 草薢三钱 五加皮三钱 蚕沙三钱

防己二钱 羚羊片先煎，一钱半 防风一钱 生苡仁四钱 炙鳖甲一钱
酒炒独活五分 酒黄芩一钱 鳖血炒柴胡一钱 炒丝瓜络一钱半
怀牛膝一钱半 知母盐水炒，二钱 炙乳没各五分 当归三钱
夜交藤切，三钱 桑枝五钱

《费伯雄医案》

王旭高

陈。本体阴亏，四月间湿热成疡，溃脓而愈。愈后正虚，肝风升动，眩晕跌仆，以致腿股环跳受伤，漫肿色白，而生附骨痰疽。今二便阻塞，少腹胀满，将有肠痈之变。

忍冬藤 丹皮 桃仁 延胡索 鲜首乌 车前子 归身 牛膝 血珀五分，研末，药汁调下

某。环跳臀股之间，从前曾患外疡。今岸水伤筋，受水寒之气袭筋骨之中，臀股胯凹腓腓酸痛，大便燥结，小便不利，气坠尻酸。病在太阳、少阴二经，防发附骨阴疽。

六味地黄汤去山药，加细辛、麻仁、独活、川熟附。

另：东垣资肾丸二钱，开水送下。

渊按：辛、独二味，发少阴之寒从太阳而散，佐附子以温子，六味以补之泄之。

《王旭高临证医案》

巢崇山

某。为国计民生，忘及自己之身，询悉阅州试卷，质讯堂事，甚至夜以继日，虽汗出如洗，置之不问，而以事代食，懵然为饱，于是坎宫之阳越于上，离宫之阴坠于下。然而汗即湿也，阴类也，以阴附阴，无阳施化，先起奔豚，所谓奔豚者，肾之积也，积在少腹，上冲心胸，漉漉有声，犹不为意。迁延而至附骨疽生，数月而溃。溃阳筋，则弛张不能束骨；溃阴筋，则拘挛不能伸舒，此环跳挫突，不堪行坐

之情形也。诊脉虚数，尺不耐按。下部畏冷，上不知寒，此阳气不能交会于阴之明征也。拙拟一法，益阴和阳，舒筋通络。然管窥之见，不足言医，是否有当，尚祈质之高明。

当归二钱 制首乌四钱 大茴香钱半 鹿茸粉五分 大熟地六钱
灵磁石三钱 葫芦巴二钱 川续断二钱 淡苡蓉二钱 龟腹甲六钱
桑寄生二钱 宣木瓜钱半 甜杞子二钱 怀牛膝二钱 扁金斛二钱
高丽参二钱

《玉壶仙馆外科医案》

丁泽周

钱左。腑气已通数次，脐腹胀势大减，口干不多饮，小溲不利，右髋部结块痹痛，痛引腿膝，不能步履，苔白，脉濡小而数，阴液本亏，肝失疏泄，湿热气滞互阻募原，一时未能清楚，痰湿邪风凝结络道，营卫不能流通，防成附骨流疽，内外夹杂之症，忽轻视之。宜化湿祛瘀，疏运分消。

连皮苓四钱 生熟苡仁各三钱 陈广皮一钱 大腹皮二钱
地枯萝三钱 枳实炭一钱 西秦艽二钱 木防己二钱 陈橘核打，三钱
益元散包，三钱 路路通钱半 冬瓜皮三钱 小活络丹一粒（研末冲服）

《丁甘仁医案续编》

张山雷

杨左。气滞血凝，瘀阳结块，形巨而坚，恐为附骨疽，脉弦涩不爽，舌尚不腻。宜和营运滞。

川独活 4.5 克 油当归 6 克 川断肉 9 克 桃仁泥 12 克
怀牛膝 6 克 藏红花 1.2 克 鸡血藤 4.5 克 大腹皮 9 克
带皮苓 9 克 苏方木 4.5 克 桑寄生 6 克

《张山雷专辑》

翟竹亭

西岭寺王之泰，年三十岁，患附骨疽。迎余诊疗，自膝以上，肿如冬瓜，日晡更甚，疼似刀刺，号哭不止。余告曰：“此是纯阴之证，急服大补回阳之药，阴变为阳，即是生机”。伊深信不疑，服十帖后，红肿明亮，阳证渐现。又服五帖，按之已软，大脓已成，用刀刺破，脓血出有斗余，即刻轻爽。又服大补药十余帖，外上红升丹，两月余痊愈，幸无残废，方开于后。

党参 15 克 茯苓 12 克 炙甘草 10 克 熟地 15 克 当归 10 克
川芎 10 克 白芍 10 克 白术 10 克 附子 6 克 川牛膝 6 克
肉桂 6 克 炙黄芪 15 克 金银花 12 克 乳香 10 克 陈皮 10 克
白芷 10 克 香附 10 克 水煎服。

《湖岳村叟医案》

梁月波

赵某某，男，25 岁，河北省交河县人，电车司机。1910 年 6 月初诊。患者右侧环跳穴处初觉肿胀疼痛，皮色如常，身体逐渐衰弱。半月余，痛势渐剧如刺。乃去天津东亚医院就医。经日籍外科医师检查，诊为骨髓炎，建议住院进行高位截肢，患者拒绝手术。乃来求医。患者身体瘦弱，乏力，右侧环跳穴处肿胀，筋骨剧痛。脉滑缓、舌苔白。证属寒湿阻络，气滞血凝，脉络瘀阻。

治法：内服内托羌活汤，减黄柏、连翘、加赤芍 10 克、红花 10 克。水煎食前服，以益气散湿，温经通络。外用活血消肿膏外敷，活瘀通络。

二诊：患者经治疗月余，体质仍虚弱，纳少、乏力，右侧环跳穴肿处微红，但痛势已减轻。脉缓滑，舌苔白。内服药，原方黄芪加至 30 克，肉桂加至 10 克，加牛膝 10 克继服。以增强益气温经通络之功。外用药如前法。

三诊：患者气短、乏力、纳少。患侧肿处肉腐渐溃脓，疮口逐渐扩大，长达一尺五寸，宽六寸。腐烂处深达骨质，脉缓，舌苔白。改服香贝养荣汤，去川芎，香附，加黄芪 30 克，肉桂 6 克，以温补、托里、排脓。疮内撒生肌散，腐肉处撒冰麝化毒散，以化腐外脱。月余后腐肉逐渐脱尽，脓逐渐减少，疮口新肉红润。于生肌散内加麝香，珍珠研粉各少许合匀撒于新肉处，外涂生肌玉红膏，疮口用棉纸封固。经治疗八个月余，患处疤痕表皮与骨部浅表愈合。曾两次去东亚医院复查，证明已康复。

《津门医粹》

薛己

一男子，年将三十，上腭肿硬，年余方溃，半载未愈。内热作渴，肢体消瘦。用补中益气、六味地黄治之，元气渐复，出骨一块。仍服前药，诸症悉去，疮口亦敛。

一男子自十四岁闪足肿痛，服流气饮，外敷寒凉，腐溃而至十六，疮口开张，足背漫肿黯，骨黑露出，形体消瘦，盗汗不止，发热，口舌干燥，天真已丧。用十全大补汤、六味地黄丸各五十余剂，元气渐复，患处渐赤，脱落骨一块，又各服五十剂愈。

一妇人年二十余，素清弱，左手背滑渐肿，二年后溃而脓水清稀，患处色黯，连背发肿，形体愈瘦，内热晡热，自汗盗汗，经水两月一至。朝用归脾汤，夕用逍遥散，患处并肿背，频用葱熨，两月，诸症渐愈，疮出一骨。仍服前药，又三月，前后用三百余剂。喜主母体恤，得愈。

《名医类案》

流痰

王旭高

某。鼓槌多骨流痰，腋孔甚多，手掌及腕皆肿硬，而色紫不痛。已出过多骨，出骨之处已敛，而余外仍肿。此风毒湿热锢结手经。延来五月，收功不易。

当归 防风 苡仁 丹皮 连翘 广皮 生甘草 红花 桑枝

另蜣螂虫炙五钱，研末，掺。

赵。脾虚湿热入络，两手指节手腕皆木肿。此乃鼓槌流痰，不易速愈。

黄芪 白术 防风 秦艽 川贝母 当归 茯苓

《王旭高临证医案》

余听鸿

孟河巢沛三先生，治一横桥开肉铺者，身上流痰十余块，久溃不愈，色紫黑而肉僵硬，不知痛痒，无脓流水，肌肉皆削，胃气索然。患者曰：“我戒口多时，胃气愈败，不知能稍食荤腥否。”沛三先生曰：“思食胃气尚旺，肉鸭亦可食之”。患者曰：“若能开荤，死亦瞑目。”看其病情，系多服寒凉，气血凝结所致。投以金匱肾气汤，月余，肌肉转红，渐软作痒。至两月后，先生再至横桥，有一人体肥貌丰，叩谢。先生茫然，几不识其人，问其原委，从开荤之后，胃日健旺，一方服六十余剂，疮平肌复矣。所以外症以胃气为本，胃以食所喜为补，若各物禁之，再以寒凉克伐戕胃，或温补壅塞助火，则殆矣。孟子云：尽信书，则不如无书。临证变通，方为上工。

壬午后余至琴川，有张姓，身上数十孔，大如钱，色黯肉僵，流水无腥秽味，不知痛痒，肌肉削瘦，人皆谓杨梅疮。余曰：寒凉凝结。

出前医之方，俱苦参、黄柏、木通、翘、梔、芩、连、土茯苓等类。因戒口极净，胃气呆钝。余令其开荤，从先生金匱肾气法。十余剂后，服温通气血之品二十余剂痊。后遇类此者数症，莫不应手，皆食先生之德，故记于此，聊志感仰之意。

《余听鸿医案》

巢渭芳

桥头季某，渭外甥，七岁时患右足面蜈蚣患穿溃，延已五载，上下离开六寸许各一洞口，以银丝穿过，屑屑有声，知生朽骨矣，用药钱穿开洞口，留中段连一寸不破，起出小圆骨一根，长四寸，如竹洞式半面，数日收功。

《巢渭芳医话》

陈莲舫

王。伏兔穴发为流痰，成非旦夕。若穿头溃脓，必致经年。

川独活 桑寄生 全当归 厚杜仲 五茄皮 川草薢 夏竹沥 白芥子 广陈皮 宣木瓜 紫丹参 青木香 丝瓜络

周。筋骨酸痛，此经壅空，虚痰从风转发为流痰。络脉抽搐，势在蒸脓。心悸头眩，腰楚，脉息细弦。属虚少邪多，内因病最淹缠也。

川独活 夏竹沥 杭甘菊 桑寄生 白归身 紫丹参 生白芍 左牡蛎 晚蚕砂 新会皮 厚杜仲 朱茯神 臭梧桐 丝瓜络

倪。气阻流痰，万万不可蒸脓。得能消散，幸之幸之。

旋复梗 宣木瓜 独活 桑寄生 晚蚕砂 沉香屑 新绛屑 白茯苓 粉草薢 冬瓜子 广陈皮 丝瓜络 大力子

《莲舫秘旨》

丁泽周

张右。据述病状，手臂腿足酸痛，胸际一块突起，如栗子大。良由血不养筋，气火挟痰蕴结，热成流痰之象。况怀麟足月，舌质红绛，阴分素亏可知。书云：胎前宜清肝化痰，和营通络治之。然此恙决非旦夕所能图功，姑勉一方。

南沙参三钱 川石斛三钱 炒条芩一钱 川象贝各二钱
瓜蒌皮三钱 海蛤壳三钱 全当归二钱 西秦艽二钱 甜瓜子三钱
鲜竹茹二钱 丝瓜络二钱 嫩桑枝三钱 指迷茯苓丸六钱，包煎

陈海蜃皮二两，漂淡；大萆薢二两，二味煎汤代水。

《丁甘仁医案续编》

贺季衡

马男。腰俞痰肿硬，根脚散漫，并不甚痛，皮色渐赤，疮顶软，已具化脓之象，惟寒热缠绵，退而不楚，谵妄痰鸣，便闭近旬，舌苔板腻满布，脉沉滑，右部不楚，且阳缩三日。此痰在络，而湿邪在中也。内外夹杂，症殊险要。

川根朴一钱 青蒿二钱 炒茅术二钱 大豆卷四钱 大杏仁三钱
炒枳实二钱 半夏曲二钱 新会皮一钱 炒苡仁五钱 大贝母四钱
正滑石五钱 炒竹茹一钱五分 桑枝四钱

朱男。龟背痰已久，脊骨高突，腰俞窜溃两头，项核破溃，呛咳多痰，午后内热，脉数，舌黄。先天不足，痰热入于肺胃两经，极难着手。

南沙参四钱 大杏仁三钱 炒苡仁五钱 川石斛四钱
黑料豆四钱 炒谷芽四钱 元武版八钱，先煎 川贝母一钱五分
地骨皮四钱 净橘络八分 枇杷叶三钱，去毛炙 炒竹茹一钱五分

周男。伏兔痰漫肿色白，腿肉日削，足屈不伸，胃呆面黄，脉细数。脾肾两亏，寒邪痰湿乘虚入络所致。化脓可虑，亟为温化。

潞党参三钱 淮牛膝一钱五分 生黄芪三钱 炒茅术一钱五分
炒白术二钱 块苓四钱 炙甘草八分 白芥子一钱五分，炒 当归二钱
橘皮络各八分 桂枝尖八分 香独活一钱 生姜两片 红枣三个

二诊：取裁阳和汤法，伏免痰漫肿及硬俱减，足屈渐伸，胃呆未复，间或鼻衄。两天本亏，不宜辛温破散。以原方略删温热，少参滋阴之品可也。

潞党参三钱 大熟地四钱 香独活一钱 白芥子一钱，炒
当归二钱 桂枝尖五分 生黄芪三钱 橘皮络各一钱 淮牛膝一钱五分
炒白术二钱 炙甘草八分 桑枝四钱 红枣三个

胡男。痰湿流阻太阴之络，右手小指骨肿突，皮无二色，屈伸不利，手背漫肿。一派蜚螭注之见象，加以向本脾虚其阳，肾虚其阴，立法最难两顾。

别直须一钱 白芥子一钱五分，炒 甘草节八分 威灵仙三钱
块苓四钱 伸筋草四钱 橘络八分 京赤芍二钱 大贝母四钱
炒白术二钱 炒竹茹一钱五分 荷叶筋一团

《贺季衡医案》

张山雷

吴左。肾俞流痰两月，已酿脓，脉细。

香附 4.5克 杜仲 4.5克 独活 1.8克 当归 6克 川断 6克
狗脊 9克 木瓜 4.5克 鹿角霜 6克 谷芽 12克 甲片 9克
川芎 2.4克 陈皮 3克 银柴胡 2.4克 砂仁 1粒

二诊：肾俞流痰，经四月而溃，后又四、五阅月矣。不痛不肿，止有小孔时流清水，脉细弱，舌正红，是宜清养。

全当归 6克 川芎 1.2克 元地 12克 鳖甲 9克 羌活 1.8克
独活 1.8克 川断 9克 杜仲 6克 潞党 4.5克 黄芪 4.5克
白芍 6克 橘红 3克 砂仁 1粒

《张山雷专辑》

范文甫

孙师母。素有痰嗽，近日来右腰间作痛，按之，右腰髂处有肿块。脉右寸关滑弦，尺部较弱，左三部皆较无力，面色滞而无光泽，方书以为有痰、有水之征。细察舌色少红润，此血虚也。西医谓“腰椎结核”，议剖解之，鄙意以为血少之病，再经剖解出血，似太危险。姑用丸药以涤其滞，后急急商补以扶其元。是否，请汪老翁再邀高明教正。

五十味大活络 4 粒

《范文甫专辑》

流注

薛立斋

一妇人因暴怒而腰肿一块，或胸膈不利，或走气作痛。此营气郁滞，与方脉流气饮数剂而止。更以小柴胡对四物加香附、贝母，月余而愈。

一妇人患流注，遇劳必痛，众手按之痛乃止。属气血俱虚。用十全大补汤、六味丸、逍遥散而痊。

一妇人先肢体作痛后患流注，发热恶寒，食少胁胀，月经不调，痰盛喘嗽，五心烦热，健忘惊悸，盗汗无寐。悉属肝脾亏损，气血不足。用十全大补、加味归脾兼服，诸症悉痊。

一妇人素头晕，患流注，月经迟少。此属中气虚弱，用补中益气汤面愈。后因劳仆地，月经如涌。此劳伤火动，用前汤加五味子，一剂而愈。

一妇人患前症，用行气化痰等药，胸膈不利，饮食少思；用疏利之药，大便作泄，中满不食。此脾胃复伤，用补中益气汤加炮姜，脾胃健，饮食进；又用六君子加芎、归，百余剂始全愈。

一妇人毒郁结，肩臂各种如覆杯。此肝脾亏损，用加味道遥散多于补气药。右手脉不足者补气药当多于补血药，切不可发表。

一男子腿患肿，肉色不变，不痛，脉浮而滑。以补中益气汤加半夏、茯苓、枳壳、木香饮之，以香附饼熨之。彼谓气无补法，乃服方脉流气饮，愈虚。复求治，以六君子汤加芎、归，数剂饮食稍进；再用补剂月余而消。夫气无补法，俗论也。以其为病痞闷壅寒，似难于补。殊不知正气虚而不能运行，则邪气滞而为病。经云：壮者气行则愈。弱者则著而为病。苟不用补法，气何由而行乎？（经语在《流注门》尤为青紫）

一妇人溃后发热，以为虚，彼不信，仍服败毒药，乃大发热，竟至不救。夫溃瘍虽有表症发热，宜以托里药为主，佐以表散之剂，何况瘰癧流注乎？若气血充实，经络通畅，决无患者。此症之因，皆由气血素亏或七情所伤，经络郁结或腠理不密，六淫外侵，坠道壅塞。若不审其所因，辨其虚实，鲜不误人。

一男子腿患久而不敛，饮大补药及附子饼，更用针头散经之而愈。

一男子患臂，年余尚硬，饮食少思，朝寒暮热。以八珍汤加柴胡、地骨皮、丹皮，月余寒热少止。继以益气养荣汤及附子饼炙之，两月余脓成。针之，更服人参养荣汤，半载而痊。

一妇人脓溃清稀，脉弱恶寒，久而不愈。服内塞散，炙以附子饼而痊。

一妇人腰间患一小块，肉色如常，不溃发热谓当以益气养荣解郁之药治之。不信，别服流气饮，后针破出水，年余而歿。

一妇人久不敛，忽发寒热，决其气血俱虚。彼反服表散之剂，果大热，亦死。大抵流注之症，多因郁结或暴怒；或脾气虚，湿气逆于肉理；或腠理不密寒邪客于经络；或闪扑，或产后瘀血流注关节；或伤寒余邪未尽为患。皆因真气不足，邪得以乘之。常治郁者开之，怒者平之，闪扑及产后瘀血者散之，脾虚及腠理不密者除而补之，

伤寒余邪者调而解之。大要以固元气为主，佐以见症之药。如久而疮口寒者，更用豆豉饼或附子饼炙之。有脓管或瘀肉者，用针头散腐之，自愈铤子尤效。若不补血气及不慎饮食、起居、七情，俱不治。

一男子元气素弱，将欲患此，胸膈不利，饮食少思。欲治以健脾胃，解郁结，养气血。彼不从，乃服辛香流气之剂，致腹胀。又服三棱、蓬术、厚朴之类，饮食愈少，四肢微肿，兼腰肿一块不溃而殁。盖此症本虚痞，今用克伐之剂，何以不死？况辛香燥热之剂，但能劫滞气，取快于一时，若不佐制，过服益增郁火，煎熬气液为痰，日久不散，愈成流注之症。

一聘士流注久溃，肌肉消瘦，发热作渴，恶寒少食。以六君子加归、芪、附子，服数剂患处遂红活。又服十全大补三十余剂，脓渐稠而愈。后感于人言，谓盛暑不宜用附子。彼又因场屋不遂意，复患前症。专服败毒流气之剂，元气消烁，肌肉日瘦，医以为不治，自分不起。其师滕洗马云：向者病危得附子药而起，今药不应，以致危笃。何不仍服附子药？遂复求治，其脉微细，症属虚寒，并无邪毒。仍用附子药乃得愈。

贾阁老子患流注，脉数作渴，极喜饮冷，脓水清稀，面带赤色。曰：此气血虚而兼火也，治难奏功。彼以为迂，别服燥湿分利之剂两月余，反加烦渴，寒热往来。复邀治，形体已脱。曰：虽治亦无功矣。后果不起。

陈进士遂初年逾三十患腹肿硬，逾年而疮头破，时出血水。此七情所伤，荣气绝于肉理而然，名曰流注。诊之肝脉涩，盖肝病脉不宜涩，小腹正属肝经，须涩脉退用可愈。欲以甘温之剂补其气血，令自消溃，不信，仍服攻伐之药，致气血愈虚，果殁于金旺之月。丹溪云：诸经惟少阳厥阴之生病疽，宜预防之，以其多气少血也。少血而肌肉难长，疮久不合，必成败症。苟不知此，辄用峻利毒药以伐其阴分之血，则其祸不旋踵矣。

一室女背脾结一块，如钅大而不炊，但倦怠少食，日晡发热，脉

软而涩。此虚劳气郁所致也。用益气养血开郁之药，又令饮人乳。精神稍健。彼不深信，又服流气饮，饮食遂少，四肢痿软。乃悔之，复求治。以为决不可起矣。后果毙。

一男子年三十余，素饥寒，患右肋肿如覆瓢，转侧作水声，脉数。经曰：阴虚阳气凑袭，寒化为热，热甚则肉腐为脓，即此症也。按其肿处即起，是脓已成矣。遂以浓煎黄薷六一汤（薷六草一），令先饮二钟，然后针之，脓出数碗，诸虚症并至。遂以大补药治之，三月余而愈。大抵脓血大泄，气血必虚，当峻补之，虽有他病皆宜缓治。盖元气一复，诸病自退。若老弱之人，不同肿溃，尤当补也。

一男子年十九，腰间肿一块，无头色不变，三月不溃，饮食少思，肌肉日瘦。此寒搏腠理，荣气不行，郁而为肿也，名曰湿毒流注。百余剂元气复而肿消。后因劳役怒气，经行不止。服凉血之剂，其血如崩。此因脾气复伤下陷而血从之。朝用补中益气汤，夕用归脾汤而愈。

一妇人禀弱性躁，胁臂肿痛，胸膈痞闷。服流气败毒药反发热。以四七汤数剂，胸宽气利。以小柴胡汤对四物加陈皮、香附，肿痛亦退。大抵妇人性热著不能宽解，多被七情所伤，遂致遍身作痛。或肢节肿痛；或气填胸满；或如梅核塞喉，咽吐不出；或痰涎涌盛，上气喘急；或呕逆恶心，甚者渴闷欲绝，产妇多有此症。宜服四七汤先调滞气，更以养血之药。若因忧思致小便白浊者，用此汤吞青州白丸子，屡效。

一妇人腿患筋牵骨痛，诸药不应。脉迟紧。用大防风汤，二剂顿退，又二剂而安。又一妇人亦然，先用前汤二剂，更服黑丸子而痊。此二患若失治，必溃成败症。

一老人伤寒，表邪未尽，股内患肿发热。以人参败毒散，二剂热止。炙以香附饼，又小柴胡加二陈、羌活、川芎、归身、白术、枳壳，数剂而散。

一男子肩胛患之，微肿，形劳气弱。以益气养荣汤服黑丸子及

木香、生地作饼覆患处熨之，月余脓成，针之，仍服前药而愈。

一男子臂肿筋挛骨痛，年余方溃，不敛。诊其脉更虚。以内室散，一料少愈。以十全大补汤及附子饼灸之而痊。《精要》云：留积经久，极阴生阳，寒化为热，以此溃多成痿，宜早服内塞散排之。

一男子腿患溃而不敛。用人参养荣汤及附子饼，更以补剂煎膏贴之，两月而愈。

通府李廷仪患流注，唾痰气促。自恃知医，用化痰理气等剂，半载而溃。用托里等剂，脓水淋漓，肿硬不消，寒热往来，饮食少思，肌肉消瘦，大便不实，手足时冷，两尺脉浮大，按之微细。曰：此属命门火衰，当用八味丸。不信，乃服参、芪、归、术之类，更加痰喘泄泻。服八味丸益气血，年余而瘥。

一妇人背患流注，内溃胀满。服流气化痰之剂，自汗盗汗，脉大两弱。此元气亏损之症也。与参、芪各一两，归、术各五钱，肉桂二钱，服而针之，至夜半始出稀脓二碗许。翌日大汗，倦甚烦热，手脚自动，气促脉洪大而数。仍用前药加附子一钱，炙草二钱，二剂脉症悉退。又以六君加姜、桂，二十余剂始离床褥。后因劳复，寒热作渴汗出。时仲冬，寝帙气出如雾。用十全大补加桂、附二剂而痊。

一学士年十六，患此二载矣。脉洪大而数，脓清热渴，食少体倦，夜间盗汗，午前畏寒。曰：真气不足，邪气有余，治之无功矣。午前以四君子加芎、归、炙草，午后以四君子加五味、麦冬、参、芪，两月诸症遂可一二。又有用渗利之剂，保其必生者。三月后形体骨立，后竟不救。

一弱人患流注，内溃出败脓五、六碗。是时口眼歪斜。以独参汤加附子二钱，二剂少愈。更以十全大补之剂，月余而痊。大抵疮疡脓血既泄，当大补气血为先，虽有他症，当以未治之。凡痈大溃，发热恶寒，皆属气血虚甚。若左手脉不足者，补血药当用。元戎云：若人饮食疏，精神气血弱，肌肉消薄，荣卫之气短促而涩滞，故寒搏腠理，闭郁而为痈肿。当补之以接虚怯之气。遂以十全大补加香附、

陈皮三十余剂，始针之出白脓二碗，仍用前药倍参、芪及以豆豉饼灸之，渐愈。彼欲速效，内服败毒，外贴寒凉，反致食少，脓稀色紫。喜得精气未丧，仍以前药加远志、贝母、白敛，百剂而愈。

刘文通室年逾二十，腰间突肿寸许，肉色不变，微痛不溃，发热脉大。此七情所伤，气血凝涩于隧道而然也。当益气血，开郁结，更以香附饼熨之，使气血充畅，内自消散，不消虽溃亦无虞。不听，乃服十宣流气药，气血愈虚，破出清脓，不敛而毙。

《续名医类案》

费伯雄

某。邪瘀阻络，致右肩及左腋下红硬作痛，寒热，流注之象，仍防起发。拟消解化邪。

当归枝二钱 生首乌五钱 甘草节一钱 赤芍一钱 银花四钱
炙甲片打，一钱 柴胡一钱 炙乳没各一钱半 陈皮一钱 防风一钱
桃仁泥三钱 乌药八分 皂角针一钱半 葱白头三个 桑枝五钱
茅根四钱 陈酒一两

复诊：肩膊流注，经治已松。仍宜原法。

嫩钩钩后下，三钱 知母二钱 生苡仁四钱 全当归二钱
晚蚕沙包，三钱 新红花一钱 秦艽二钱 川芎八分 海桐皮三钱
羚羊片先煎，三钱 姜黄八分 炙鳖甲四钱 防己三钱 防风一钱
广三七八分 鳖血炒柴胡一钱 夜交藤切，三钱 炙乳没各八分
丝瓜络八分 鲜石斛五钱

某，流注消者已平，溃者将敛，外患本可无虑。不意复兼疟发，寒热不退，以致腹左消而复起，板硬半腹，按之如石。今诊脉来细弦稍数，少阳邪滞交阻不化，势变内痈之险。拟方多酌明眼。

鳖血炒柴胡一钱 姜汁炒川朴一钱 云苓二钱 延胡索一钱
半夏曲二钱 陈皮一钱半 青皮一钱半 苏梗一钱 炙草一钱
焦白芍一钱半 酒芩一钱 煨草果六分 川楝子炒打，三钱 木香五分

檀香一钱 佛手一钱 生姜三片 茅根四钱

复诊：流注经治已松，发热亦减。仍宗原法。

当归二钱 生首乌四钱 炙甲片一钱 赤芍一钱 甘草节一钱
炒枳壳一钱 柴胡一钱 炙乳没各一钱 陈皮一钱 独活五分
桃仁泥一钱半 角针八分

某。流注三处溃脓，势将收口，惟腹旁一处，板硬殊大，消解不应。痰气凝结，脉细弦而数，肝脾两病。拟调肝和脾，佐以化痰理气。

当归二钱 苏梗二钱 川石斛三钱 赤白芍各一钱 广郁金二钱
茯苓二钱 柴胡一钱 炒枳壳一钱 桔梗一钱 大贝三钱
姜皮三钱 省头草一钱 佛手八分 茅根四钱 降香一钱

复诊：痰湿凝结已久，肿硬不消。投剂不效，改阳和汤，以观进退。

生麻黄四分 大熟地四钱二味同捣 炮姜炭四分 香附二钱
白芥子三钱 炙甲片二钱 炙僵蚕四钱 大贝三钱 桔梗一钱

外用黄蜡烊化，摊青布上，加末药数味和入，再用烙铁放炭火中烧热，反复熨黄蜡，使融化，觉热痛甚，停息片刻后，再熏熨之。

某。流注四块，发于太阳少阳分野，硬肿作痛，寒热。消解之。

当归二钱 生首乌四钱 炙甲片一钱 赤芍一钱半 香独活一钱
炒枳壳一钱 柴胡一钱 炙乳没各一钱 大川芎八分 防风一钱
甘草节一钱 陈皮一钱 煨木香八分 桃仁泥一钱半

另用单方：川乌、草乌、生南星、生半夏，加胡椒共研末，烊膏摊贴。

《费伯雄医案》

过铸

无锡鹤子岸陆秉安，患流注，自腰至臀，板硬而紫，而白浮肿，时吐白痰，体瘦而重，不能转侧，苔黄纳少，脉细而数，两目无神，直视良久始转，常流稀脓，延及两年。近则左肩又发硬块，时觉酸痛，

诸医金云不治。余曰：是证初起宜服阳和汤和二陈汤，兼服小金丹，即能消散，今误服寒剂，恶象叠见，势难挽回。既远道而来，不得不勉为图治。方用：生黄芪、当归、冬术各五钱土炒，茯苓白芥子炒、鹿角胶、橘红、续断各三钱，熟地一两，炮姜、麻黄、肉桂各五分，煎至八分，加陈酒两匙，再煎数滚服，日服小金丹一粒。五剂后已能起坐，尚觉腰痛，方加杜仲四钱，盐水炒，制半夏三钱。连服十五剂，虽行走如常，而面色未转。旬日后忽觉少腹板痛，右足难伸。余曰：余毒未清，又生大肠痈矣。宜急治之，遂服：金银花三两，当归二两，地榆、麦冬、元参、苡仁各一两，甘草三钱，生黄芪二钱。三剂愈。或问余曰：患处烙手，前药何以用姜、桂？余曰：遍身如此，非烙手也，内热也，若误为烙手，再用寒剂，必不治矣。

《过氏近诊医案》

杜钟骏

同邑周瑞卿先生曰：痒背患流注化脓而皮色不变，上至肩、下至腰肌内悉肿。某医以针在上游脊背当中刺两眼，下一眼出脓盈盈，肿为之退。次日复肿如初，脓出亦如初。其针眼小而深，脓聚下游左右腰眼之空处，每日出脓盆许，如是者四十余日。其人体素丰腴，以是急不能支，眠食俱废，举室惊惶无惜，急而求予。视其出脓之处，在脊背之中，与腰眼蓄脓之处相距六、七寸远，非挤则脓不能逆流而出，挤后则两腰眼之间杳然深陷。因思此非内服外敷所能为力。思得一法，令其挤脓后，用旧绵垫实腰眼凹处，外用极薄木片加于旧绵之上，以带紧束其腰而扎之。次日，展视腰眼凹处，脓不复胀，脊上疮口但流脓水而已。于是，日日扎之，内服补托之方，未半月而竟收口。此得力于扎法，若徒恃内服，外敷，鲜克有济，脓流不断，势必泄尽一身之脂膏而死，外科全在手法，平时不可不研究也。

《药园医案》

丁泽周

史左。胸膈流注已成，漏管脓水淋漓，延今一载，气血两亏，不能生肌，虑入疮痍一途。

八珍丸三两，每日用生黄芪三钱煎汤，吞服三钱。

戴左。风湿热稽留络道，血凝毒滞，右肘流注，漫肿疼痛，寒热不清。虑其增剧，姑拟疏散消解。

清水豆卷五钱 当归尾三钱 京赤芍三钱 杜红花八分
生草节八分 大贝母三钱 炙僵蚕三钱 忍冬藤三钱 连翘壳三钱
炙甲片钱半 嫩桑枝四钱 指迷茯苓丸包煎，八钱

《丁甘仁医案续编》

马小岩

陶右。大腿流注溃脓颇多，肿不肯退，自起迄今已数月矣。谷纳不旺，脉来细微，内热频频。考书曰：痈溃首重中土。因脾主肌肉，胃主束筋骨，流利关节者也。而刻下已现告困之机，即服药饵，犹恐未能祥微而奈何，患者尚然梦梦，希其不药而欲全痊，正是根不固而求木之长，德不厚而思国之安，岂可得耶？况年逾五旬，气营皆弱，刻届春令万物正萌动之时也。窃虑如舟入江心，难御风波之莫测。姑拟扶土却邪，冀其敦阜来复，庶乎可起床席矣。

潞党参 炙甘草 川断肉 怀牛膝 白茯苓 东白芍 冬白术
当归身 怀山药 大红枣 广陈皮

《青囊术》

傅松元

一日黄昏后，有张姓邀余往治，至则见病者年三十许，农人也。日中恶寒发热无汗，至日夕时，神烦志糊，切其脉细涩而数，是阳症见阴脉之凶候也。虽不渴不食，察其身难转侧。问其有痛处否？答

云：“痛虽无，但身不能动。”余曰：“虽烦而未昏，惟阳症见阴脉，殊非伤寒。”使二人反其身，余以手按其背，摩挲而问曰：“有木处者尔言之。”得膊、胁、股、髀五处，皆略高耸。余曰“此发流注，是外科病。”为其书仙方活命饮，加桂枝。嘱其家明日速请疡科诊治。后知其开刀十一处，卧床半年而愈。

《医案摘奇》

章成之

宋童。此古籍所谓流注，殆为骨结核之类，重症也。

生麻黄 2.4 克 白芥子 6 克 肉桂末 1.2 克，分二次吞 熟地 15 克
鹿角霜 12 克 炮姜炭 3 克 淮牛膝 9 克 独活 6 克 桑寄生 12 克
当归 9 克 威灵仙 9 克 粉草 3 克 小金丹一粒，化服

二诊：古人所谓阴证者，皮色不变而痛在经络骨节间，与痛风终日不休者不同；阴证转动则痛，用药当大补气血。

全当归 12 克 熟地 24 克 巴戟天 9 克 炮附片 6 克
生黄芪 9 克 补骨脂 9 克 鹿角霜 9 克 羌独活各 5 克 桑寄生 12 克
潞党参 9 克 小金丹一粒，化服

按：此属阴症，治宜温补。初诊用阳和汤加味，温阳通络，定痛解凝。二诊重用大补阴阳气血之剂，辅以小金丹、羌独活散结定痛。此类症候多迁延日久，体虚不足抗病，非强壮补益，难以奏效。

陈女。右膝腓肌肉隆起，按之痛，皮色不变，此症古人称为流注，骨结核之类也。面色憔悴，咳而咽痛，两脉细数，端倪露矣。

炙鳖甲 24 克，先煎 生熟地各 12 克 杜仲 9 克 左牡蛎 30 克，先煎
当归 9 克 淮牛膝 9 克 桑寄生 12 克 鹿角霜 9 克
小金丹一粒，化服 健步虎潜丸 60 克，分十次吞服

按：病人虚损之途，以培本为主。面色憔悴，咳而咽痛，两脉细数，为一派阴虚之象，故方中寓以育阴潜阳之意，且咸寒之鳖甲、牡

蛎又有软坚散结之功。

《章次公医案》

疔

薛立斋

上林陈静涵面患疔，脉洪数有力，属邪气蕴结。用清热消毒散，二剂未应。或用黄芪、肉桂等药，二剂反益其势，致耳、目、唇、口俱肿闭，头面如斗。由邪气外实也。前脉按之无力，由元气内虚也。连进托里消毒之药及数砭患处，出黑血碗许。已而，脓与腐肉并溃而出。复用托里之药，疮势渐愈。七日后、复因调护失宜，以致烦渴不食，两尺脉如丝欲绝。急用八味丸料煎服，其脉顿复，手足自温。使非砭以泄其外，托里散以补其内，八味丸以回其阳，则治之失宜，必致不救，慎之慎之。

长洲痒苏子忠鼻梁患之，症属表邪，但气血俱虚，不胜发散。遂用补中益气为主，佐以防风、白芷而愈。

《续名医类案》

薛立斋

一男子，足患疔作痒，恶心呕吐，时发昏乱，脉浮数。明灸二十余壮始痛，以夺命丹，一服肿起，更以荆防败毒散而愈。

一男子患疔，发热烦躁，脉实。以清凉饮下之而愈。

一男子胸患疔，遍身麻木，脉数而实。急针出恶血，更明灸数壮，始痛。服防风通圣散，得利而愈。

一男子左手背患之，是日一臂麻木，次日半体皆然，神思昏愤。遂明灸至二十余壮，尚不知痛。又三十余壮，始不麻。至百壮始痛。以夺命丹，一服肿始起，更用神异膏及荆防败毒散而愈。

一老妇足大指患之，甚痛。令灸之，彼不从，专服败毒药，致真

气虚而邪气愈实，竟至不救。盖败毒散虽能表散疮毒，然而感有表、里，所发有轻、重；体段有上、下；所禀有虚、实；岂可一概而用之耶？且至阴之下，药力所难到，专假药力则缓不及事，不若灸之为良。故下部患疮，皆宜隔蒜灸之，痛则灸至不痛，不痛则灸至痛。若灸之而不痛者，宜明灸之，及针疔四畔，去恶血，以夺命丹一粒，入疮头孔内，仍以膏药贴之。若针之不痛或无血者，以针烧赤频烙患处，以痛为度。或不痛，眼黑如见火光者，此毒气入脏腑也。不治。若患在手足，红丝攻心腹者，就于丝尽处刺去恶血，宜服荆防败毒散。若丝近心腹者，宜挑破疮头，去恶水，亦以膏药贴之。如麻木者，服夺命丹。如牙关紧急或喉内患者，并宜噙一二丸。凡人暴死，多是疔毒，用灯照看遍身，若有小疮即是，宜急灸之，俟醒更服败毒药或夺命丹。人汗入肉，食之则生疔疮，不可不慎。

刘禹锡纂《柳州救三死方》云：元和十一年得疔疮，凡十四日，益笃。善药敷之皆莫知。长药贾方伯教用蜣螂肉，一夕而百苦皆已。明年正月，食羊肉，又大作，再用亦如神效。其法一味贴疮半日许，可再易，血尽根出遂愈。蜣螂心腹下度取之，其肉稍白是也。所以云食羊肉又大作者，盖蜣螂食羊肉故耳。用时便禁食羊肉。其法盖出葛洪《肘后方》也。

《续名医类案》

韩光

疔极神效。正观初，卫州徐使君访得此方：用艾蒿一担烧作灰，于竹筒中淋取汁一、二合，和石灰如面浆，以针刺疮中至痛，即点之。点三遍，其疔自拔，亦大神验。正观中，用治三十余人得差，故录之。

《续名医类案》

缪仲淳

顾博士伯钦内人左耳患疔，时方孕。令先以白药子末，鸡子清调涂腹上护胎；次以夏枯草、甘菊、贝母、忍冬、地丁之属，大剂饮之，一服痛止，疔立拔，胎亦无恙。白药子，疔马病者也。

《续名医类案》

马铭鞠

顾圣符幼弟患髭疔。医者先用火针、围药，肿胀至目与鼻俱隐人肉，牙关紧急。用患者耳垢、齿垢、刮手足指甲屑和匀如豆大，放茶匙内，灯火上炙少许，取作丸。令洗净围药，将银簪挑开疔头，抹人，外用绵纸一层，津湿覆之，痛立止。半日肿半消，目可开。次日服仙方活命饮二剂愈。此法兼可治红丝疔。长洲花承溪指节间患之，得此而痊。又云可治面白疔，未试也。此方传自道人。

《广笔记》云：用陈年露天铁销碾如飞面，将金簪脚挑破毒处一孔，纳铁销末于内，仍将皮盖好。少顷黑水流尽，中有白丝如细线，慢慢抽尽，此疔根也。尽即立愈。又方用甘菊花并根叶捣汁，以酒下之，立消。

《续名医类案》

薛立斋

刘贯卿脚面生疔，形虽如粟，其毒甚大，宜峻利之药攻之。因其怯弱，以隔蒜灸五十余壮，痒遂止，再灸片时乃知痛。更用膏药封贴，再以人参败毒散一服渐愈。夫至阴之下，道远位僻，且怯弱之人，用峻利之药，则药力未到，胃气先伤，虚脱之祸，有所不免，不如灸之为宜。

松江诸大尹唇生一疔已五日，肿硬脉数，烦躁喜冷。此胃经积热所致。先以凉膈散，一服热去五、六；更与夺命丹二粒，肿退二、

三；再与荆防败毒散，四剂而愈。

杨锦衣唇下生疔，脉症俱实而不下。反用托里，致口鼻流脓而死。是谓实实之祸。

马氏室忽恶寒作呕，肩臂麻木，手心搔痒，遂膻闷不自知。其故（与卒然暴者不同）但手有一泡，此乃患疔毒也。令急灸患处至五十余壮，知痛，投以荆防败毒散而愈。古人谓：暴死多是疔毒，急用灯照遍身，若有小疮即是。此毒宜急灸其疮，但是胸腹温者可灸。先君云：有人因剥死牛膻闷，令看遍身俱有紫泡，便急灸泡处，良久遂苏。更以败毒药而愈。

张都宪夫人而生疔，肿焮痛甚，数日不溃，脉症俱实。以荆防败毒散加芩、连治之稍愈。彼以为缓，乃服托里，一剂其势愈甚，痛极。始悟，再用凉膈散，二剂痛减肿溃；又与连翘消毒散，十余剂而愈。

郑氏举家生疔多在四肢，由皆食死牛肉所致。刺去黑血，更以紫金丹服之，悉愈。

王检讨汝和感痘毒，面生疔十余枚，肿痛脉数。以荆防败毒散治之，虽小愈，尚可畏，更以夺命丹一服而痊。

陆宣子，山东名医也。言京师李公子某指甲中生肉管赤色，顷刻长三尺余，垂至地，不能动，动则血眯欲死，诸医束手。公子乃取酒痛饮，引刀自断之，出血数斗，良久复生如初，自分死矣。有乞儿自言能治。召之，肩火蛇至，顾骂诸医者曰：公子蛇头疔也。其管通四肢百骸，绝则又出，若单何能为？盖乞儿初饶于财，尝患此，破家求医不可得。遇一丐，命其妻纳大蛇袴中，穴袴出蛇首握之，与肉管相向。蛇以气吸之，不移时而消。蛇则红丝百道，僵死矣。乃如其法治之，公子亦愈。竟分其产之半与乞儿云。

《续名医类案》·

中神琴溪

柳马场绂小路南近江屋，三郎兵卫父，年七旬余，人中发疔，疔

头紫黑，四边泡兴，唯觉痒而已，总身烦热，口苦咽干。其子来请曰：“吾闻疔疮之为毒也猛剧，少壮之人，尚且可惧，况家翁春秋高，气力甚衰，唯恐其不堪。”先生乃诊之，脉迟，曰：“郭志邃所谓脉证相反者痧也，翁之所患，亦痧而非疔也。今毒所酿，虽才在于寸步间，不速治之以砭石，则毒必陷攻其内，竟至以蔓衍，即殢不旋踵，窘迫如此，老少强弱何别焉？然则安危之机，在今日所任，唯砭石而已矣。他奇方毒药，非所能及。譬之犹蝼蛄之生于园也，其始生才在一枝一叶，速折其枝，剪其叶，则其灾一朝可除，不然则洗洗蕃息至举园死之。”三郎兵卫大悦，托治先生。乃以铍针十字截之，入二步而深血迸出，顷气宇爽然。翌亦刺血滴二合，三四日肿减，诸症尽退。又，建仁寺街四条南道具屋，仁兵卫，行年四十有二，两眉间生一疮。有奇痒，往来寒热，其他食饮无所异，众医皆以为疔。先生脉之短涩，而参伍乱列。曰：“是痧也，可速割去毒血矣。”因引前老人之病以证之，其人不可。明日复往喻之，犹有惮色，为言曰：“然则先试延他医诊视之。”一医视之曰：“形色不变，声音如常，非危证也。”乃帖膏药于疮上，于是愈不信先生。而其夜遽走人来叩门而请，曰：“果如先生之言，今病者通面浑然掀肿，呼吸塞迫，呻吟之声达四邻，众医皆辞去，唯仰先生辱临耳。”辞曰：“毒既炽矣，余往亦莫奈之何。”使人复至，不得已，往见之。脉绝四肢厥，鼻内腐烂，脓血如涌，呼吸之气甚臭，曰：“不可济。”竟不投药而归，讣寻至。

《生生堂治验》

费伯雄

某。手丫疔毒破溃，脓多，掀胀殊甚，内兼寒热，食少。宜托毒佐清阳明。

净银花三钱 生草八分 云苓二钱 赤芍一钱半 花粉三钱
白芷一钱 柴胡一钱 大贝三钱 丹皮参各二钱 广皮一钱
省头草一钱 桑枝五钱 生熟谷芽各三钱 红枣三枚 灯心十尺

又验方：内服白菊花叶捣汁二两，同生甘草、银花、地丁草煎服。

再服消疔泻毒丸：西黄、明矾、巴豆肉、麝香或加蟾酥，再用绿豆粉为丸粟米大，成人吃两丸。

某。螺面疔毒，窜溃一指许，红肿连及手背，寒热，宜清解托毒。

金银花三钱 花粉三钱 生甘草八分 赤芍一钱
丹皮参各一钱半 陈皮一钱 柴胡一钱 白芷一钱 地丁草三钱
大贝三钱 角针八分 桑枝五钱 灯心十尺 茅根四钱

《黄伯雄医案》

过铸

青浦陈君莲舫以医名，遇于运署，纵谈平日所治奇证。陈君云：曾见一人手指脱落，既而逐节脱落，至臂而死，究不知所患何证，治亦不效。嗣后访问，知其人捕鱼为业，该处乡风，厝棺破烂，将骨放坛中，埋于田畔。此人常敲碎坛骨为戏，良由阴谴所致。斯时门下土华梦玉亦在座，私问余曰：“是非脱疽乎？”余曰：“然。方书俱名脱疽，惟《东医宝鉴》则名之脱骨疔。孙真人云：在指则截之，在肉则割之。各方书皆云只有截法可治。余曾治愈数人，俱未用截法。初见其足趾或手指皮色殷紫而硬，或若熟红枣，或痛或不痛，在未发或已发时，类消渴者，即此证也。乘其未曾延开，用隔蒜灸（用大蒜头去皮切三分厚，放疮头，以艾壮于蒜上灸之。三壮换蒜，觉烫即易去。）或神灯照（雄黄、朱砂、血竭、没药各一钱、麝香二分共研末，绵纸裹药三分，作捻长七寸，麻油浸透，点火离疮半寸，自红晕外周围徐照，由处而内将捻猛向外提，引毒外出，不致内侵）。再用金钱花二斤煎浓汤，刻刻饮之，以解其毒。另用极大生甘草嚼烂厚敷，不可间断。再用金银花三两，当归二两，元参、生甘草各一两，连服十余剂。或兼服驱湿保脱汤（苡仁三两，东壁土炒，茯苓二两，桂心一钱，白术一两，土炒，车前子五钱）。外用土蜂房末醋调敷亦效。是证起

于足大趾者最重，余则较轻。若因房术、服丹石、热药而发者，宜加紫背天葵草。”华梦玉曰：“吾师之说，谨闻命矣。一物不知，儒者之耻，况医关生死，不独可耻而已也。今后当潜心探索，多读书以扩见闻。”

泉唐樊学士稼轩，患太阳疔，失治多日，且误食猪肉，致四围绷急，肿连面目，挤之无脓、无血，疔证大忌。余往视，曰：“毒虽外驰，尚未内攻，再迟则不治矣，今则犹可为力也，然若畏痛，终难想法。”学士曰：“我平生最不畏痛”。余曰：“是则易矣”。遂于患处用拇食二指将肉摘起，以刀横刺太阳穴不可直刺，细将恶血挤出，外科以手法为第一，血纸满地，观者骇然。余问曰：“觉稍松乎？”曰：“大松矣。”遂敷以药，并用大剂以解毒。越日往视，肿消大半。仍用手法挤之，内服宋人追疔夺命汤（羌活、独活、黄连、赤芍、蝉蜕、僵蚕、脚莲、甘草节、草河车一名重楼金钱、泽兰、金银花、细辛或减半、防风、青皮各一钱半、葱五根、生姜五片），三日后肿已全消。令门下士华梦玉往治之，旬余即痊。余治面疔，自始至收口，每不逾两旬。

玉书氏曰：方书言病在上者，宜用轻剂，恐其犯人中、下焦也。是证毒重，若此倘泥在不用重剂之说，则杯水车薪，断难见效。明乎引方，可与言医。

己亥夏，余解饷事毕，返浙。行装未卸，泉唐朱侍郎敏生，因患疔甚重，邀余诊治。往视之，业已循衣摸床，脉乱如丝，不省人事。余曰：“脱在顷刻，不可治矣”。其所患之证、部位，一切与学士同，若早治数日，亦无不愈。

《过氏近诊医案》

马文植

唐左。疔毒走黄，从足趾上及于膝，臃肿可畏，倘火毒攻冲入腹，药所难挽。兹以大剂日夜酣饮不辍，三日内得轻减，即有转机，如其加重，便成棘手。

地丁草一两 银花二两 连翘一两 川黄柏一钱 滑石三钱
赤苓四钱 川牛膝三钱 甘菊一两 甘草一钱 大贝母三钱
生矾二钱

复诊：此方两日四剂，而见大效。

原方加归尾二钱、苡仁五钱，共服八、九剂而奏痊。

某。疔生于颧右，色紫板硬，面目浮肿，连及颈项，毒散如此，势在难挽。但坐视不援，究非仁者之心，况为其子者，心甚恳切，焉有不用方之理乎？所开方味，不合时宜，无怨即投，有疑勿服。

川芎二钱 银花二两 黄芪一两六钱 乳香二钱 当归二两
生甘草二钱 郁金一钱 生矾三钱

加鲜菊叶打汁一杯冲服。上药浓煎两碗，日尽饮之，初五一剂，初六一剂。

二诊：疮口流血而脓少，乃是气弱，肝脾失统失藏。拟疔毒清神汤加减，以托毒外出，血去者益气。

川芎二钱 当归一两 上黄芪二两 生甘草二钱 洋参五钱
金银花二两五钱 荆芥一钱 砂仁八分 炒丹皮二钱 净连翘二钱
红花四分 天花粉三钱 木香六分 炒谷芽五钱

加鲜菊叶汁一杯，冲服。

三诊：原方加皂角刺二钱、地丁草五钱。

四诊：数日毒邪幸未内陷，疔根已能渐去，但腐必脱尽无变，方可望有生机。目下全仗气血无亏，调理得宜，稍有不慎，极易生变。

陈皮二钱 鲜菊六钱 生熟谷芽各一两 乳香一钱 川芎二钱
炒丹皮二钱 红花五分 当归五钱 地丁草五钱 花粉三钱
洋参一两 炒荆芥一钱 甘草二钱 连翘二钱 银花一两五钱
砂仁一钱 黄芪二两 广木香六分 郁金一钱 扁豆八钱
大生地六钱

五诊：肿处渐平，腐肉日脱，神情清爽，大便坚固，竟有可生之机。但风寒饮食，须加意小心，倘有不慎生变，神丹莫挽。

川芎一钱 荆芥一钱 香砂仁一钱 丹皮二钱 郁金一钱
 大生地八钱 红花五分 扁豆一两 炒白芍二钱 陈皮二钱
 当归五钱 地丁草四钱 洋参一两 甘草一钱 连翘壳二钱
 黄芪二两 木香八分 上银花二两 乳香一钱 鲜菊五钱
 生熟谷芽各五钱煎汤代水

《外科集腋》

沈祖复

先生邻家女仆阿梅手腕作痛，不能举物。先生细审其腕，见脉门有红丝一条，长二、三寸，蜿蜒游行半臂。此红丝疔也，过肩胛不可治矣。用旧头绳扎止，以银针刺红丝两端，挤出紫血，内服黄连解毒汤而愈。

一妇生手指疔。曾闻业师马征君云：“疔初起，背上有红点，如蚊螫状，其数均奇，非五即七，须银针刺破，挑断其中之丝则疔可以不成。若过三、五日，其毒走散，红点隐去，疔必成矣。”余依法寻得，刺之，果未成。周源按：此法已刊入《周氏集验方》中，甚详。

《医验随笔》

曹沧州

某左。烂皮疔红肿紫滞，起病阳明，伏热与脾湿交炽，至为险重，最虑穿筋烂骨。

上川连五分，水炒 地丁草三钱 银花藤七钱 上穹术一钱半
 丹皮三钱 淡芩炭三钱 鲜生地七钱 车前子三钱 赤芍三钱
 土贝五钱，去心 丝瓜络三钱

某左。虎须疔肿坚根散，刺之僵木，此温毒心火为患也，防走黄勿忽。

上川连七分，水炒 花粉三钱 丹皮一钱半 甘中黄一钱
 鲜生地一两 知母三钱 角针七分 银花四钱 大竹叶三钱

连翘三钱 蚤休三钱 浙菊三钱 地丁草四钱

某右。风火结翻唇疔，疔毒已散，肿硬色紫，壮热，心中烦热，脉数带弦，胸闷，猝变可虑

暹犀角一钱 羚羊角三钱 上川连一钱 大青叶一钱半
蚤休三钱 马勃七分 银花五钱 甘中黄二钱 黑山栀三钱
土贝五钱 地丁草四钱 鲜生地一两 制军五钱 元明粉一钱半

某左。颧疔走黄已极，胸闷昏陷可危。

上川连七分 花粉三钱 蚤休三钱 石决明一两 鲜生地二两
知母三钱 银花五钱 土贝五钱 大竹叶三钱 连翘三钱 浙菊三钱
角针一钱 地丁草四钱

《吴门曹氏三代医验集》

杜钟骏

沈诗言金谷名家也，为吴赞臣中丞之幕友。右小腿里侧起紫疱，肿痛，殆即紫燕疔之类。倩西医治之，以小刀挑破，泄其毒水，掺以药粉；次日，四围起黑，又以小刀刮之，流去血水，仍掺以药粉；又次日，疮口转大而四围之黑依旧复生。于是，日日刮之而黑色蔓延，迄无止境。未及一月，其口面长有六、七寸，阔有二、三寸，悉皆赤烂，毒水淋漓，痛无宁时，眠食俱废，四沿之黑，朝刮而夕又长焉。西医犹谓毒重，非锯去小腿不可，否则有性命之忧。渠甚恐，闻吴东升经我治愈，请吴为介邀予往诊。予曰：年届花甲，气血已衰，湿蕴成毒，有诸内必形诸外，正气不能胜毒，气非补无以化毒生肌，徒恃刀割及药粉收功，犹扬汤而止沸，非徒无益而又害之。订方之顷，沈言：向有湿痰，不受滋补。予曰：有病则病受，无须深虑。渠怀疑不决，竟置而不服，仍延西医，见其烂处筋头发黑，以剪刀去之，血流不止，合宅惊惧，复来求予。予曰：毒藏于内，犹草之有根，不揣其本而齐其末，鲜有不误事者，欲予治此，非大补气血无从着手，前方不服，求我何益。合家齐曰：唯命是听，决不再疑。仍订托里消毒散，

重用归、芪、银花、甘草，外以珠黄十宝丹调当归膏，摊于丹油膏上帖之，翌日，血止脓流；再进前法，腐黑悉退，四沿起白边，新肉日长。遵守前法加减，一月而瘳。

《药因医案》

丁泽周

周左。口角疔顶如粟，根脚肿硬疼痛，湿火蕴结，血瘀毒滞，宜清解托毒。

甘菊花三钱 地丁草三钱 轻马勃八分 薄荷叶八分
生甘草六分 苦桔梗一钱 金银花三钱 连翘壳三钱 生赤芍二钱
大贝母三钱 炙僵蚕三钱 天花粉三钱 草河车三钱

外用太乙膏，上釜墨，膏用朱峰散、酥料。

李右。口角疔顶如粟，根脚肿痛，湿火蕴结，血凝毒滞，虑其增剧，急宜清疏消解。

薄荷叶八分 熟牛蒡二钱 地丁草三钱 生草节六分
生赤芍三钱 金银花五钱 连翘壳三钱 草河车三钱 炙僵蚕三钱

另：外科蟾酥丸，三粒，吞服。

陈左。阳明结火上升，血凝毒滞，人中疔顶如粟，四围肿硬焮痛，症势非轻，急宜清解托毒。

甘菊花八钱 地丁草五钱 薄荷叶八分 熟牛蒡二钱
生甘草节八分 苦桔梗一钱 金银花六钱 生赤芍二钱 连翘壳三钱
大贝母三钱 炙僵蚕三钱 草河车三钱 生绿豆衣三钱

外科蟾酥丸吞服三粒，泻毒丸五粒，另送，大便通后去之。

何右。阴虚体质，肝阳内炽，湿火入络，血凝毒滞，红丝疔起于左大指，连及手臂，肿红焮痛，虑其增剧，急宜清疏消解。

薄荷叶八分 熟牛蒡二钱 甘菊花三钱 地丁草三钱
生草节六分 金银花五钱 连翘壳三钱 大贝母三钱 天花粉三钱
朱茯神三钱 青龙齿三钱 草河车三钱 生绿豆一两

吴左。红丝疔直线已达肘弯，左手大指脂水淋漓，颇虑由外入内，漫延走黄，急宜清火解毒。

甘菊花六钱 紫花地丁五钱 黄花地丁五钱 金银花八钱
连翘壳五钱 生草节六分 大贝母三钱 炙僵蚕三钱 生赤芍三钱
生绿豆一两

《丁甘仁医案续编》

贺季衡

庄男。足跟疔，脓出不畅，四围结硬，逐日寒热，脉沉数，舌心腻黄。湿火尚重，当清泄之。

归须二钱 川牛膝一钱五分 大贝母三钱 净连翘三钱
香独活二钱 紫花地丁五钱 上银花四钱 大豆卷四钱 京赤芍二钱
甘草节八分 半枝莲五钱 桑枝二钱

王女。右手疔毒肿痛，势将成脓，寒热迭作，脉弦滑，舌红。属在重身，姑为清降疏化。

当归二钱 上银花五钱 地丁草五钱 甘草节八分 京赤芍二钱
粉丹皮二钱 川黄连八分，酒炒 酒子芩一钱五分 南花粉四钱
云苓三钱 半枝莲五钱

朱男。托盘疔已溃，肿痛未减，腕闷作恶，脉数，舌红。当化毒排脓。

南花粉四钱 地丁草四钱 上银花五钱 京赤芍二钱 连翘三钱
藿香一钱五分 半夏曲二钱 生甘草五分 左金丸七分 桑枝四钱

张男。大指疔，溃而少脓，余硬未消，入夜痛甚，舌苔腻黄。湿火尚重，疏化为先。

上川连八分 净连翘三钱 京赤芍二钱 牛蒡子四钱，炒
生甘草八分 天花粉四钱 大贝母四钱 地丁草五钱
童木通一钱五分 蒲公英五钱 半枝莲五钱

马男。唇疔九日，唇上结硬，唇角已溃脓，左口角尚结硬，胁左

亦红肿木硬，牙关开阖不利，幸无寒热头重之患，脉滑数。热毒结于肺胃而来，亟为清解泄化，祈其脓畅肿消。

紫花地丁四钱 人中黄一钱五分 上银花四钱 连翘三钱
炒僵蚕二钱 人力子四钱，炒 白桔梗一钱五分 京赤芍二钱
薄荷一钱 南花粉四钱 半枝莲五钱

二诊：唇疔脓出肿消，鼻左余硬尚未化尽，幸胃纳渐复。当再清胃热，以消余坚。

南花粉四钱 白芷片八分 连翘三钱 白桔梗一钱五分
京赤芍二钱 生甘草八分 大力子四钱，炒 乌玄参四钱 大贝母四钱
生竹茹一钱五分 灯芯十茎

王男。左颧疔毒，溃而少脓，迭经寒热，脉滑数，舌黄。风邪湿热交结未透，疏化为先。

紫花地丁五钱 上银花五钱 净连翘三钱 乌玄参四钱
炒僵蚕二钱 白桔梗一钱五分 大贝母四钱 薄荷一钱 京赤芍二钱
生甘草八分 半枝莲五钱

《贺季衡医案》

张山雷

王左。湿热痰火，交结承浆，瘍毒有水无脓，高年得此，甚非轻恙。脉小无神，胃纳锐减，舌浊垢，颈项红肿。治法姑先清化，倘得应手，方是转机。

炒苍术 4.5 克 九节菖蒲 1.8 克 广郁金 4.5 克 炒建曲 4.5 克
象贝母 9 克 蒲公英 9 克 贯仲 6 克 银花 9 克 川黄连 1.8 克
制半夏 4.5 克 生远志 9 克

二诊：下颏痈瘍，肿已大减。但旁有结核，尚是痰湿未净，脉右弦搏，舌尤浊腻。当须泄痰化浊。

炒苍术 4.5 克 九节菖蒲 1.8 克 生远志 6 克 象贝母 9 克
炒枳壳 1.2 克 广藿梗 6 克 佩兰叶 4.5 克 制半夏 4.5 克

西茵陈 6 克 新会皮 4.5 克 带壳紫蔻仁 1.2 克, 拌

《张山雷专辑》

范文甫

陈仁寿。眼角疔, 顶尖而根脚坚硬。

蒲公英 30 克 银花 9 克 苍耳子 9 克 皂刺 6 克 归须 9 克
黄菊花 9 克 桃仁 9 克 赤芍 9 克 紫花地丁 15 克

陈。虎须疔, 误破走黄, 头面甚肿, 壮热脉数。

蒲公英 30 克 生大黄 9 克 黄菊花 9 克 金银花 12 克
地丁草 30 克 元明粉 9 克 苍耳子 9 克 皂刺 9 克

二诊: 见效, 肿略退, 证有减轻, 宗原法。

昨日方加生石膏 30 克、知母 9 克。

三诊: 见瘡, 疔毒已溃, 脓稠黄, 热退些。

赤芍 9 克 野菊花 9 克 皂刺 9 克 山慈菇 9 克 地丁草 24 克
苍耳子 9 克 半枝莲 9 克

四诊: 邪热退, 肿亦渐消, 脓溃是好事。

生大黄 9 克 苍耳子 9 克 地丁草 9 克 黄连 3 克
黄白菊各 9 克 知母 9 克 赤芍 9 克 皂刺 12 克 川郁金 3 克
生甘草 3 克 雄黄 3 克

《范文甫专辑》

瞿竹亭

邑北后屯张清芳之姊, 年五十余, 手小指生一疔, 初起如米、色黄, 此疔发脾经之湿热所生也。余言此证须用针刺疔上, 以白降丹锭插入疔内, 待至尽变黑色, 内服黄连二花汤, 速清解脾经之毒, 或可得生, 倘迟延不治, 恐毒气走散胳膊, 必尽成腐肉, 悔之晚矣。伊云: “如此小恙, 何至危险?” 谓余言之诈也。后十余日, 又邀余往视, 余决意不往, 托余厚友, 碍于人情遂往。至时, 见一只胳膊肉脱大

半，筋露骨存，面目浮肿，饮食大减，大便滑泻，奄奄待毙。余喟然曰：“早听余言，焉有今日。”辞不治。伊子女叩求不已，此时余进退畏难，告伊曰：“此证纵治不敢保全。”伊云：“生则大德难忘，死者不敢归咎。”遂用八珍汤加减，服四帖，外擦玉红膏，后黑色转红活，脉渐调，疼痛稍止。又服十帖，病去六七，始终服二十余帖，调治月余方愈。

八珍汤加减。

党参 12 克 白术 10 克 茯苓 10 克 炙甘草 6 克 当归 10 克
川芎 6 克 白芍 10 克 熟地 12 克 乳香 10 克 白芷 6 克
金银花 15 克 生地 10 克 花粉 10 克 防风 10 克 连翘 10 克
甘草 3 克 水煎服。

西关杨姓妇，二十岁。生一托腮疔，初得寒热大作，呕吐恶心，精神昏愤谵语。迎余往治，见其疔色红紫，以指按之，坚似钉尖，此真疔也。诊其脉，心、肝二部洪数有力，此因肝木太旺，木生心火。经云：“诸痛痒疮，皆属于心。”又云可泻者泻其子。遂用犀角黄连汤加减服之，以泻内毒。先服一帖，大解一次，病无增减，再诊脉仍如故。大黄加至 36 克，大泻三次，寒热已去八九，精神清爽，疼痛尽消，从此消散乌有矣。

犀角黄连汤加减

真犀角 6 克 黄连 10 克 金银花 30 克 连翘 15 克 生地 24 克
木通 6 克 龙胆草 6 克 川大黄 36 克 丹皮 12 克 栀子 10 克
芒硝 10 克 黄柏 10 克 赤芍 12 克 当归 12 克 蒲公英 10 克
地榆 12 克 甘草 6 克 水煎服

田陵寨李某，年六十余，患合谷疔，赴余家诊治。大似高粱籽，色黑如墨，硬似铁石，一手尽肿，上至尺泽穴，俱坚硬。告伊曰：“此证手阳明大肠部位，因大肠久积火毒，尽归于此，必先服药，泻大肠火毒，外用三棱针，将皮疔正顶刺入五分深，再将白降丹锭插入疔内，用膏药盖之，三日外，连疔根尽都拔出，然后再上红升丹，方保

无虑。”伊深信。服黄连解毒汤，三帖肿消完，上白降丹，三日之外，连疗根脱落一块，大如红枣。遂用红升丹每日两次，新肉渐生，饮食大进，二十日遂收全功。

黄连解毒汤

黄连 6克 金银花 15克 玄参 12克 紫花地丁 12克
蒲公英 12克 连翘 10克 栀子 6克 丹皮 10克 薄荷叶 10克
没药 6克 乳香 10克 甘草 6克 水煎服

《湖岳村叟医案》

孔伯华

王男，六月十七日。右手食指疔疮剧痛，彻夜不眠已两天，心烦意乱，食不甘味，时时神志迷离，脉有伏象，治从三阴入手，以达其阳。

寻骨风三钱 炒常山三钱 高良姜二钱 生地榆三钱

王氏三黄丸二钱(分服)

《孔伯华医集》

痰核瘰癧

薛立斋

阁老杨石斋子，年十七，发热作渴，日晡颊赤，脉数而虚。用补阴八珍汤五十余剂，又加参、芪、归、术为主，佐以熟地、白芍、麦冬、五味，脓水稠而肌肉生。更服必效散一剂，痈毒去而敛。

容台张美之善怒，患之。时孟春，或以为肝经有余之症，用克伐之剂，不愈。薛以为肝血不足，用六味地黄、补中益气，以滋化源，至季冬而愈。此症果属肝火风热，亦因肝血不足。若主伐肝，则脾土先伤，木反克土。此症或延于胁腋，或患于胸乳，皆肝胆三焦之经也，亦当以前法治之。

一儒者，缺盆间结一核。薛谓此肝火血燥筋挛，法当滋肾水，生肝血。彼反服行气化痰，外敷南星、商陆之类，渐如覆碗。仍用前药，以滋化源，间与芦荟丸以清肝火。年余，元气复而肿消。

一男子颈间结核大溃，年余不愈。又一男子鬓间一核，初如豆粒，二年渐大如桃。又一妇人左眉及发际结核，年余矣。皆与清肝火养肝血益元气而并愈。此症亦有大如升斗者，治以前药，无不取效。

一妇人瘰癧久不愈，或以木旺之症，用散肿溃坚汤伐之，肿硬益甚。薛以为肝经气血亏损，当滋化源，用六味地黄丸、补中益气汤，至春而愈。引症若肝经风火暴病，元气无亏，宜用前汤（散肿溃坚）。若风木旺而自病，宜用泻清丸；虚者，用地黄丸。若水能生木，亦用此丸。若金来克木，宜补脾土生肾水。大凡风木之病，壮脾土，则木自不能克矣。若用伐肝，则脾胃先伤，而木反克土矣。

一妇患之，恐不起，致少寐，年余病破，脓水淋漓，经水或五十日或两月余一至，误服通经丸，辗转无寐，午前恶寒，午后发热。薛以为思虑亏损脾血，用归脾汤作丸，午前以六君送下，午后以逍遥送下，两月余得寐，半载后经行如期，年余疮愈。

一妇病溃后，发热烦躁作渴，脉大而虚。以当归补血汤，六剂而寒热退，又以圣愈汤（圣愈汤：生地、熟地、川芎、归身、人参、黄芪），数剂而痊。更以八珍加贝母、远志，三十余剂而敛。

一妇人项结核，寒热头痛，胁乳胀痛，内热口苦，小便频数，症属肝火血虚。用四物加柴胡、山梔、胆草（妙方）而愈，又用加味逍遥散而安。

一妇人瘰癧后，遍身作痒（诸痒为虚），脉大按而虚，以十全大补加香附治之而愈。大凡溃后，午前痒作气虚，午后痒作血虚。若作风症治之，必死。

一妇人项核肿痛，察其气血俱实，先以必效散一服下之，更以益气养荣汤补之，三十余剂而消。常治此症，若必欲出脓，但虚弱

者，先用前汤，待其气血稍充，乃用必效散，去其毒，仍用补药无不效。未成脓者，灸肘尖调经解郁及隔蒜灸，金日稍有脓即针之。若气血复而核不消，却服散坚之剂，月经不应，气血不损，须用必效散，其毒一下，即多服益气养荣汤，如不应，亦灸肘尖。如疮口不敛者，更用豆豉饼、琥珀膏。若气血大虚，或不慎饮食七情者，不治。然此症以气血为主，气血壮实，不用追蚀之剂，亦能自腐。但取去使易于收敛耳，血虚而用追蚀，不惟徒治，适以取败耳。

《名医类案》

江应宿

休宁吴氏子，年十七，患瘰癧三年矣。疡医用烂药刀砭破取，疮口甫平，即复肿，累累如贯珠，遍体疮疥，两胁肿核如桃。予诊之，微弦而数，即语之曰：肝肾虚热则生疔矣，当从本治内消（可法可师）。以柴胡、当归、连翘、黄芩、黄连、牛蒡、三棱、桔梗、花粉、红花十余剂，再与黄连、海藻、昆布、干葛、石膏、山梔、龙胆、连翘、花粉为丸，以清其上，更令空心服六味地黄丸，以滋化源（二者兼治，药无遗憾）。未几一料，疔消疮愈，不复作矣。

《名医类案》

李用粹

江右李太宰，讳日宣，有如夫人。自耳至胁忽结核成块，遍延疡科，均以瘰癧治之，反增发热体瘦，口燥唇干，饮食少进。迎家君往诊，脉左关芤而无力。此肝血枯竭不能营养诸筋，故筋脉挛缩，有似瘰癧而实非也。若以败毒清火，消痰化坚之剂投之，则胃气转伤，变症百出矣。当滋养肝血，以濡润筋脉为要。方用四物汤加丹皮、玉竹、秦艽、麦冬等剂，不数服而痊。

《旧德堂医案》

郑重光

吴佩元兄狎妓酣饮，真阴亏，损其本质也。忽两胯结两核，但肿而不红不痛，疡科以鱼口治之。盖因其平素有外色，彼亦自疑，遂甘服五虎毒剂，下之不消，久而自散。缘此伤阴咳嗽，亦属他医所治。后两膝下忽又结两核，亦肿而不痛，就治于余。诊其脉细数无力，上咳嗽而下结核，此真阴虚竭，津枯血少，为火结核也。以《外科证治准绳·结核证》与彼视之，作下部疮疡，用六味地黄汤加沙参、贝母、归、芍、麦冬等十数剂，其核一夜全消。医治一月，嗽亦全止。隔年余，忽大吐血，其素相好之医，斥地黄汤为毒药，吐血者服地黄汤，百不一生，不日阴虚而日虚冷。先以桂枝、归、芍、细辛、木通、甘草、姜、枣、当归四逆汤治之，血不止；改用真武汤，又不止；再加干姜，乃血尽自止。遂归功于姜、附，用之经年，渐至喉痛失音，脏毒溃脓而犹不悟，延至喉烂、肛烂，百苦而歿。大恣用苦寒，浪投辛热，不辨阴阳，皆非王道，病家医家，可不慎诸！

俞子浩兄令眷年近四十，艰嗣多郁，颈旁结一核，数年矣。后因丧子，其核渐大，内逼咽喉，妨碍饮食，有似外科失荣证。疡科作癭瘤治，愈大愈坚，渐加发热、咳嗽，竟似失荣证矣。用逍遥散治之不效；又仿《外科正宗》，用益气养荣汤，内有参、芪，甫二剂，便喘不能卧。由是医药杂投，有用葶苈泻肺者，有用苏子降气者，渐致汗出泄泻，阳气下脱，六、七日喘犹不止，已备终事。复商于余，诊脉细数，余沉思良久，其先结核，乃肝木部位，郁久化火，此火结之核，尚非失荣。误用黄芪，助其肝火，火灼肺金，因而大喘。先无他病，虽然喘久，断非气脱。盖乙癸同源，肾肝同治，补肾滋肝，引气下归。用六味地黄汤加归、芍、麦冬、五味子、牛膝。服四剂喘定，二十剂能平卧，后用六味地黄丸加沙参、元参、贝母、归、芍丸药三斤，并结核亦全消矣。

北山友松

大坂一妇人，年三十余，项上肿痛结一核，红如柿子。一医用人参败毒散，数日不效。请予治之，仍用前方加海带、昆布、山豆根、黄芩、黄连、瓜蒌仁五帖，而肿消热退。外用海带以下六味粗末，连钱草汁，和醋调贴。

《北山医案》

缪遵义

瘰癧之生，胆汁不足也，而木火因之上升。失血、咳嗽、鹜溏，所渡上传及肺，末传寒中也。滋则碍脾，燥则碍肺，兼顾方稳。

人参 霞天曲 莲肉 谷芽 淡菜 沙参 米仁 藕

《缪氏医案》

高锦庭

陈某某，幼年阴分不足，微感风湿，项间结核，是虚中挟实，用轻阳撤邪法。

象贝 连翘 夏枯草

二诊：穿溃后外邪虽熄，本体弱而多火，当与调中清火为主。

生洋参 牡蛎 归身 白芍 决明 夏枯草

《谦益斋外科医案》

吴簏

皖臬富竹泉，右颈中间连生三核，肿痛处如杯大。余曰：六脉洪数，似成马刀侠癰疽之象。外证非余所善，速延疡科医治，迟则核破可虞。廉访固求治之，遂令服真人活命饮，外敷金如意散，中核肿突破头，用草灰方搽之，贴以膏药。其小核以围药铁井栏箍之。并用败毒托补之剂，流出脓血十余碗，两月而安。

蒋，女十岁，项生数核如豆粒，按之则动而微痛。脉数弦滑，系肝胆经风热血燥，过食厚味，延及足阳明胃经蕴热，颈项结成痰核也。宜投二陈汤加夏枯草、黄芩、连翘、桔梗、牛蒡子、花粉、木香，间服八味逍遥散及归脾汤，俱加贝母、远志，以夏枯草煎汤代茶，外用大红膏，醋熬调敷患处。月余核小而软。后服此丸方，诸核全消。

生地四两 当归 赤芍 元参 茯苓 海藻 贝母
郁金各两半 连翘去心 白敛各一两 远志去心 橘红各八钱

右为末，用夏枯草八两熬膏，杵为丸，桐子大，空心服三钱，以开水送下。

瑚氏患瘰癧，少寐，年余而溃，浓水淋漓，月经五六十日一至。误服通经丸，展转无寐。午前恶寒，午后发热。余曰：由于忧思郁结，伤脾所致。即用归脾汤作丸。午前以六君子汤送下，午后以逍遥散送下，月余得寐。半载后经行如期，年余而疮亦痊。

《临证医案笔记》

何书田

郁火蒸痰，颈项结病，最难消退，以证关六郁耳。

川连姜汁炒 羚羊角 法半夏 陈皮 瓜蒌皮 竹茹 山栀
姜汁炒 石决明 牡丹皮 花粉 白蒺藜

郁热蒸痰成块，虚怯之根难脱矣。以消化为主。

柴胡 地骨皮 川贝 苡仁 橘红 青蒿 西洋参 杏仁
花粉 夏枯草

《箬山草堂医案》

王孟英

畝人吴茂林，患右颊肿痛，颊下结核，牙关仅能呿稀糜。外科称名不一，治若罔知。孟英投以天麻、僵蚕、羚羊（角）、石膏、省头草、

升麻、当归、秦艽、花粉、黄芩等药，渐愈。

《王氏医案》

顾德华

蔡。脾经素亏，经事衍期，血不养肝，肝木挟痰，上循少阳经络，结为瘰癧成串，交节续增，自颈下连于季肋，约有二三十枚，曾经溃过，时有寒热，乃虚劳根柢也。仿逍遥归脾合而加减。

羚羊角一钱五分 广郁金三分 川贝母一钱 归身一钱五分
制冬术一钱 制首乌四钱 生芪皮一钱五分 白芍一钱五分
左牡蛎五钱 鲜竹茹一钱五分 枣仁三钱 云苓三钱 鲜稻叶三钱
元眼肉五枚

又诊：日来瘰癧串痛缓，核俱流动，癸水逾期未至，五心焦热，头目眩晕。培太阴脾土，畅少阳木火以治。

绵黄芪一钱五分 杭甘菊一钱 川贝母二钱 归身一钱五分
制冬术一钱五分 白茯苓一钱五分 杞子二钱 白芍一钱五分
枣仁三钱 云苓三钱 鲜稻叶三钱

《花韵楼医案》

张大曜

恼怒悒郁，内火自生。火能燥痰，则气结痰凝，火性上炎，则痰随之上窜，结核成患于左项，安保右项之不发？壮年朴实之体，而得斯疾，凉亦偏于性情之固执也。倘能暂抛诵读，专以舒闷畅怀为事，则瘰癧之消，犹可计日而待。盖不若自戕本元致水亏火旺，而燥痰成串也。设听其在络内四窜，久延必至于溃，则终身之累矣，后悔莫及。聊赠数言，然乎否乎？

旋复花一钱五分 橘络一钱 白芥子七分 杏仁三钱 苏子一钱
海藻一钱五分 昆布一钱五分 丹皮一钱五分 竹茹一钱五分
香附一钱五分

再诊：通络化痰、理气开郁之方，已投七服，左项痰核软而可推，余络未窜，脉仍弦数，大便五日不行。内火犹炽，再议化痰通络之法。

海藻一钱五分 鳖甲五钱 黑梔二钱 昆布一钱五分
丹皮一钱五分 旋复花一钱五分 姜皮一钱五分 炙甲片七分
白芥子七分 竹沥一两

三诊：前方五服，痰核已消三粒，所剩四粒亦软而小，其势不至四窜矣。脉弦小软，大便已畅。再拟消痰，以冀速除。然方药虽效，亦半藉怡养功夫耳。

橘核一钱 川楝子一钱 炙山甲七分 土贝母三钱 昆布一钱
丹皮一钱五分 旋复花一钱 海浮石三钱 黑梔一钱五分 竹沥一两

论按：此案三方，药力不甚结实，而用意颇玲珑，在应酬方中，可云完善。

《柳选四家医案》

曹存心

上海李。少阳之脉行身之侧，痰核结于颈旁，延及腋下。想是湿生痰，痰生热，流落少阳部分而不能化达也。痰核所成，非一朝一夕，凉非汤药所能速效者。惟其不能速效，所患湿热即从少阳胆经袭入厥阴肝部。寤不成寐，寐则惊惕，甚至口燥舌黄，溺赤便坚，病热有加无已。良以胆附于腑，病还之于脏也。肝脏属木，其性最刚，非有水以涵之，每来横逆。此间阳常有余，阴常不足之体，更有易升无降，竟可彻夜不眠，为现在所苦，急须医治，然后再论缓调。拟许学士知母法。

石决明 洋参 大生地 龙齿 当归身 犀角 朱茯神 枣仁
柏子仁 沉香

《延陵弟子纪要》

費伯雄

某。七情不知，痰气郁结，左肩结核，延今数载，近来疹肿，入夜寒热，酿脓之象。怀孕四月。拟逍遥散加减，和肝脾以调气血。

全当归二钱 茯苓二钱 大川芎一钱 广皮一钱 炙草五分
酒白芍一钱 佩兰叶一钱 老苏梗三钱 柴胡一钱 象贝三钱
制香附二钱 广郁金二钱 生姜一片 降香一钱 炙鳖甲五钱
片姜黄一钱 防风一钱 广三七切，八分 鳖血炒柴胡一钱
夜交藤切，三钱 炙乳没各六分 丝瓜络八分 酒炒桑枝五钱

某。湿瘀凝滞，胯下结核硬痛。宜化瘀通络。

当归尾一钱半 炒延胡索三钱 乌药一钱半 青皮一钱
泽泻二钱 桃仁泥五分 大贝三钱 银花三钱 川牛膝二钱
川革薢三钱 桑枝五钱 陈酒一两冲

原注：一剂而愈。

某。阳明风热上乘，内挟气滞，发热不解，胸痞不食，头颅四围痲核肿破，已经一候。急宜祛风化痰，导滞达邪。

粉葛根一钱半 连翘壳一钱半 枳壳一钱 炒牛蒡三钱
象贝二钱 淡黄芩一钱 青防风一钱 银花二钱 淡昆布一钱半
川连三分 淡海藻一钱半 苏薄荷一钱 钩藤后入，二钱
茅根去壳，五钱 银花露一两 薄荷露一两冲

《費伯雄医案》

张乃修

张左。盘颈痲痰已久，兹则内热连绵，时见咯血，胸膈酸痛，日来腹痛便泄。脉细弦而数。阴虚木旺，虚火上炎，木乘土位。虚损情形，何易言治。

金石斛四钱 黑豆衣三钱 淡秋石一钱 炒木瓜皮一钱五分
女贞子三钱 炙黑草五分 侧柏炭二钱 炒白芍一钱五分

大天冬二钱 海蛤粉三钱

二诊：酸甘制木，以养脾阴，腹痛便泄已止。然虚火上炎，血虽未来，而咽痛音内。脉数细弦。脏阴皆损，何易言治。

大生地三钱 大天冬二钱 生熟草各二分 杭白芍一钱五分，酒炒
大熟地二钱 大麦冬一钱 女贞子三钱，酒炒 海蛤粉三钱，包
川贝母二钱

毛燕汤代水煎。

三诊：音声已升，咽痛亦止，而中脘犹复作痛。脉象细弦，舌质纹裂。痼疾既久，气血并亏，不能制伏肝木，致强肝克土乘脾则腹痛便泄，犯胃则脘痛呕吐。急者先治之。

香附二钱 金铃子一钱五分 半夏曲一钱五分，盐水炒 茯苓三钱
白芍二钱，土炒 白蒺藜三钱 橘白盐水炒，一钱 盐水炒竹茹一钱
左金丸五分，先服

四诊：痛泄已止，脘痛亦减，而右胁犹复作痛。肝木克土之余，肝风入络。再标本兼顾。

阿胶珠二钱 醋炒香附二钱 柏子霜三钱 炒木瓜皮一钱
生草三分 白茯苓三钱 橘叶一钱五分 金铃子一钱五分
酒炒白芍一钱五分

五诊：便泄既止，脘痛亦定，而右胸膈常觉作痛，舌苔纹裂。痼疾既久，阴伤则肝风入络。还恐损而难复。

阿胶珠二钱 白茯苓三钱 川贝母二钱 真猩绛五分
海蛤粉三钱 柏子霜三钱 旋复花三钱 酒炒白芍一钱五分
青葱管三茎

六诊：脘痛便泄，原属肝阳克犯脾胃。红炉泼水，则烈焰飞腾，所以两进柔药，火冲咽痛，随药而来。然火之有余。阴之不足也。再参辛燥之品，以反佐之。

阿胶珠二钱 粉丹皮二钱 海蛤粉三钱 柏子霜三钱
白茯苓三钱 女贞子三钱，酒炒 白芍一钱五分，酒炒 制半夏一钱五分

大天冬一钱五分

七诊：胸膈作痛稍轻，不自觉热，而脉形带数，阴伤火炽。然痰核随处结聚，恐其流窜。再熄少阳木火，参以化痰而和肝络。

炙生地四钱 海蛤粉三钱 桑叶一钱 炒白薇一钱五分
白茯苓三钱 柏子霜三钱 丹皮二钱 女贞子三钱 川贝母三钱

八诊：脉象稍缓，舌红苔腻。左胸膈作痛，牵引背肋，络隧不和。再宣通化痰和中。

川贝母二钱 当归一钱五分，酒炒 白茯苓三钱 粉丹皮二钱
桑叶一钱 海蛤粉三钱 制香附一钱五分 川断肉三钱
盐水炙橘红一钱 生熟谷芽各一钱

唐左。气血两亏，肝火挟痰，窜入少阳阳明之络。颈项结核坚硬，按之不移。脉虚弦滑。恐虚痰不化，而延入损途。

桑叶 海藻 制半夏 川贝母 郁金 茯苓 丹皮 桔梗
生香附 炒枳壳

雪羹汤煎

二诊：痰核软，加生于术。

《张聿青医案》

王旭高

某。心火与湿热交结而成痰核。上则舌下，中则腕间，下则阴头，皆结小核如棉子。此皆火郁之所致。

川连二钱，酒炒 陈皮一两，盐水炒 甘遂三钱，面包煨，去心
半夏一两五钱 茯苓二两 泽泻一两 蛤壳二两，研粉
红芽大戟三钱，洗淡，炒

上药共研细末，水泛为丸。每朝一钱，开水送下。

渊按：直捣其巢，非胆识兼优不能。然虚者未可漫试。

某。症久阴伤，项发痰核，头倾不举，腹中有块。年逾二八，天癸未通。虑延劳损。

大生地 制首乌 茯苓 丹皮 怀山药 软柴胡 白芍 当归 陈皮 十大功劳

陆。本原不足，兼挟风温。发热，颈间结核成痰。二十余日，不红，不肿，不消散，亦不作脓，属半虚半实。慎柔方有良法，用四君子加牛蒡子，世所未知，余曾验过。

四君子加牛蒡子、象贝母、桑叶。

渊按：四君补虚，佐蒡、贝以消风痰，桑叶清肺通络。从补虚中想出祛邪之法，心思灵敏。

又：昨用慎柔方，是托散法。服下若汗出热退，则数剂可消。若汗不出，仍发热，则数剂成脓，且易溃敛。

前方加钩钩。

又：三岁孩童，但哺乳汁，不进谷食，脾胃虚弱可知。颈结痰核而有寒热，必挟风温，属半虚半实。今将一月，热退复热，其块不消，不作脓，大便溏，脾胃不足，气血两虚。

党参 冬术 陈皮 荆芥 黄芪 归身 防风 葛根 砂仁 桑叶

《王旭高临证医案》

柳宝诒

李。项右结核，右肩漫肿，时剧时减。郁痰挟木火循少阳之经阻结不化。脉象细数小弦，阴气先虚，未便攻伐。拟方用丸剂缓缓治之。

细生地 元参 丹皮 黑山栀 橘核络各，炒打 郁金 牡蛎生研，水飞 昆布 海藻 夏枯草 象贝 茯苓 黄芪 麦冬 生甘草 白芍 刺蒺藜 上药可生研者生研，余亦略烘勿过性，各取净末，米汤泛丸，青黛为衣。每晨空心服，淡盐汤送下。

田。痰核数年，有继长增高之势。此证起由木火升窜，顽痰随之而结于络膜之间，日渐增积，如沙磧然，药力攻化，最难得效。脉

象不甚结实，正气不充，宜以养正清化之剂调其本原，佐以消痰软坚之法，冀其渐化，猛法攻消，非所宜也。

北沙参 丹皮 黑山栀 海藻 昆布 左牡蛎 夏枯草 橘络 法半夏 郁金 白芍 刺蒺藜 竹二青

二诊：痰核久而不化，再议扶土化痰，清泄木火，丸方佐之，煎方所未逮。

北沙参 於术 茯苓 党参 法半夏 瓦楞子 橘络 郁金 丹皮 白芍 刺蒺藜 生甘草 上药研末，用竹沥入姜汁泛丸。空心盐汤下。

季。右半体经络不和，腋下痰核成串，肌黄内热，营络与中气交病。病起产后，营气阻窒。当与养营和络，缓缓通调。

全当归 川芎炭 秦艽 川独活 桑寄生 枳壳 象贝 半夏 郁金 刺蒺藜 丝瓜络去油乳香，研末炒 竹二青 首乌藤

池。痰核结于会厌两旁，此必挟少阳木火浮越于上。凡六阴经脉，皆上至于颈，痰火窜入阴络，亦至此而止，病之所以易结而难散也。拟方软坚化痰，专清阴络之火，用丸剂缓缓调之。

炒当归 白芍酒炒 大生地炒 炒丹皮 元参 牡蛎 於术 茯苓 广郁金风化硝化水拌炒 刺蒺藜 橘红 夜交藤 黑山栀 昆布 夏枯草 上药为末，用竹沥、姜汁、蜜水泛丸。

《柳宝诒医案》

马文植

某。郁怒伤肝，思虑伤脾，痰气郁结，颈右马刀病硬坚，头半掣痛。症势非轻，宜养荣清肝化痰，更宜屏去尘情，勿怒勿劳为要。

当归 香附 茯苓 川芎 白蒺藜 白芍 半夏 大贝 牡蛎 杭菊 僵蚕 陈皮

复诊：马刀病为疡科恶候，连投解郁清肝，头痛已平，目能启视，似有转机，但午后微恶寒热，痰病坚肿如故，木郁不达。且逍遥

散合化坚汤主之。

当归 白芍 半夏 香附 白蒺藜 柴胡 陈皮 大贝 牡蛎 橘叶

某。阴亏痰热上升，下颏痰核肿大如李、发际兼有白屑，风湿相乘。养阴散结。

南沙参 竹茹 牛蒡子 僵蚕 橘红 法半夏 夏枯草 海藻 大贝 葶苈 连翘 甘草 海蜃

复诊：服后恙情大有好转，原方加当归、蛤粉。

某。左三部脉细如丝，右寸关弦滑，颐颌之左结块如桃，不红不痛。此属虚痰，不可专用攻坚克伐之品，拟金水六君加理气行痰为治，非比实症可以速效，还宜保养为嘱。

大熟地一两 半夏二钱 广陈皮二钱 白茯苓二钱 草节一钱
白芥子炒，二钱 焦僵蚕一钱 当归二钱 煨牡蛎五钱 炒牛蒡二钱
姜汁一匙

复诊：胃口虽能多进薄粥，大便亦能坚固，脉亦不似前之细数无根，而颌颐之下，结核已消。不明医理者，似若目有起色，殊不知吸吸气短，乃元海无根，非比肺家实喘，往往有顷刻变生而脱绝者，况无大剂人参在此急救，焉能挽回元气于无何有之乡？勉商观音梦授散合参麦散，以纳在上之虚气；都气丸作汤，以摄在下之脱气。倘或应手，还有可生之机，否则别无良法。

炒党参一两 麦冬元米炒，一钱 五味子炒，八分 加青盐三分
核桃夹膜一钱 接服方

熟地一两半 淮山药八钱 丹皮炒，一钱 茯苓一钱 怀牛膝二钱
萸肉炒，二钱 泽泻盐炒，一钱 五味子一钱 加青铅一两

某。脉见细数，着手即空，右手无力，内热不已，肝肾阴亏，无形之火上升，有形之痰凝聚，颈侧两旁结核累累，按之无形，乃虚痰也，非实症可用攻消。且拟育阴制阳，养营软坚一方，投后以观效否再酌。但脾虚症重，急宜静养，课读且停，切嘱切嘱。

银柴胡五分 炒白芍二钱 当归三钱 大熟地六钱 淮山药五钱
丹皮二钱 泽泻一钱 京玄参二钱 广皮一钱 石决明五钱
煅牡蛎八钱 川贝一钱 生甘草一钱 茯苓二钱 竹油十匙

二诊：自投育阴制阳，养营软坚法，热势虽减，胃口略起，颈侧
瘰块亦稍平，方非不对，惟左三部脉象仍如前细数，右三部未见有
力，不特阴亏，气分亦虚，当急为培补。所谓阴根于阳，阳根于阴也，
且补阴阴不能骤生，补气则无形能生有形也。但炎热之令将至，阴
亏气弱之体，须要极其小心调养，炎威固不可受，风寒亦不可感，至
于饮食，一切腥膻生冷面食发物，切勿入口，因虚体极易受邪，为此
叮咛告诫，若不遵守，往往变生，慎之慎之。

原方去当归、石决胆。

三诊：大势已退，带回此方多服。

上绵芪六钱 冬术一钱 白茯苓二钱 西党参三钱 银花一钱
炒白芍一钱 甘草节一钱 当归二钱 扁豆四钱 煅牡蛎八钱
建莲三钱

《外科集腋》

余听鸿

常熟某，素性诚实俭朴，完姻数载，起马刀失荣，从耳后项左侧
胀硬如臂，溃破脓水淋漓，咳嗽吐血，便澹，大肉皆削，皆谓不治。余
曰：白发在堂，襁褓在抱，若弃而不治，于心何安？然贫病相连，窘不
能服药，孙真人谓一不治也。有其内姊丈某解囊助药资，余璧诊金，
尽心调理。服甘温调脾，大便坚硬，咳甚痰多。即用甘凉清润，金土
同调，咳减，便仍澹。更番金土而治。如斯者三月，脾胃渐旺，大便
稍坚，纳增咳减。后以归脾法加疏通气血之品，再以和荣散坚丸兼
服。卧床载余，项颈溃烂亦敛，坚硬全消，起复如故。倘医知难而退，
亲戚不肯解囊，亦不治之症。所以为医当尽心，为亲戚当尽力，绝症
亦可勉力挽回。

琴川东乡周姓农妇，早寡无嗣。有田面四亩，夫兄争之不休，忧郁而胁腕作痛，项颈两旁，起核坚硬，就诊于余。余曰：忧愁则气闭不行，思虑则气结，忿怒则肝火上犯，久则生失荣马刀，难治之症也。幸经水仍来，虽少未绝，犹可挽回。余劝其将田面让于夫兄，纺织亦可度日。惟贫病相连，无资服药。余劝其无事行坐念佛，可解愁绪，而绝忿急之念，使肝气条达，虚火不升，而可苟延岁月。以鲜芋芡切片晒干二斤，川贝母二两，姜半夏三两，共为细末，用淡海藻二两，昆布三两，煎汁泛丸，临卧用雪羹汤淡海蜃三钱，大荸荠五钱，煎汁送下三钱，再用归脾汤原方倍木香加柴胡、白芍，三天服一剂。经三月余，项块渐消而软，胁痛已止，信水依时，诸恙霍然。若不劝其让产、念佛，终日扰攘不休，未必不死于郁症也。

《余听鸿医案》

巢崇山

某。项侧结块，退而未尽，足骭作痛，傍晚身热。治宜兼顾。

淡豉 山栀 桑叶 滑石 薄荷 丹皮 钩钩 续断 当归
秦艽 牛膝 蒺藜 赤苓 小胡麻

二诊：昨投清热化湿，疏邪和络，身热已退，足骭作痛亦减，惟项侧结核如昨。

当归 钩钩 牛膝 丹皮 薄荷 僵蚕 山栀 杏仁 青蛤
壳 小胡麻 白蒺藜 甘草节 大贝母 赤苓 秦艽

《玉壶仙馆外科医案》

邵兰荪

瘰癧已溃，脉弦左数，舌心空，倏热乍寒，经闭，症属重极。逍遥散加减治之。

酒炒柴胡七分 白芍一钱五分 香附一钱五分 生地三钱
当归一钱五分 茯神四钱 川贝二钱 绿萼梅一钱五分 丹皮三钱

生牡蛎四钱 昆布一钱 三帖

《邵氏医案》

陈学三

王，串痲破久不敛，经止五月，渐热，脉数。此乃血海空虚。丹溪谓瘰癧属胆有余火，而且气多血少，妇人见此尤甚。若月事以时下，寒热不作，方可无虞。否则变为潮热，甚症危矣。今拟滋养厥阴，以冀热通经来为幸。

鸡血炒丹参 竺黄 羌藟子 银柴胡 沉香 白矾 浮石

《陈学三医案》

陈莲舫

赵。肛漏流滋，痲串绕项，酸痛，势欲蒸脓，病情牵连太多，腰酸背痛，头蒙，鼻衄，潮热有汗，恐由虚进怯。

桑椹子 夏枯草 北沙参 左牡蛎 生白芍 银柴胡 光杏仁 新会皮 黑料豆 女贞子 厚杜仲 香青蒿 毛燕窝 磨冲象牙

陆。瘰疽肺脾，暑湿挟风煽烁，绕项支蔓，脉见细弦，拟釜底抽薪。

生川军 炒防风 净蝉衣 生甘草 飞滑石 穉荳蔻 大力子 焦茅术 侧柏叶 荷叶

李。重台痲，内热阴亏，脉弦，治以清养。

夏枯草 天虫 光杏仁 小青皮 生甘草 广陈皮 大力子 瓜蒌仁 淡昆布 淡海藻 海浮石 左牡蛎 川贝母 丝瓜络 周。痲串高肿，将欲溃破，旧虚新邪，寒热不解，腹痛彻上彻下，脉沉弦，恐其发厥。

厚川朴 左金丸 大腹皮 芸曲 鸡内金 橘皮 生米仁

川楝子 真獾肝 香青蒿 鲜佛手 云茯苓 荷叶

《莲舫秘旨》

王仲奇

程姑，新马路休南渡，七月初六日。血热液燥，宗脉不清，颈项结核已久，近见穿溃；经事或行或止，色则或紫或淡；鼻窍有疮，目赤，涕从鼻腭间出，带有血膜；脉弦数。液燥血热业已酿毒，且累及脑也，亟宜清化。

石决明煨先煎，四钱 粉丹皮炒，钱半 夏枯草三钱 冬桑叶钱半
甘菊花钱半 忍冬藤三钱 野料豆三钱 瓜蒌衣三钱 玄参二钱
海蛤粉包，三钱 红月季两支 丝瓜藤根烧存性、研冲，一钱

二诊：七月十三日。鼻疮目赤均已渐见向愈，涕与血膜从鼻腭间出亦瘥，颈项结核已溃未溃者皆觉稍消，脉弦数。仍以清血化毒，荣络安脑。

石决明煨先煎，五钱 粉丹皮炒，钱半 夏枯草三钱 冬桑叶钱半
甘菊花钱半 忍冬藤三钱 金钗斛二钱 瓜蒌衣三钱 玄参三钱
海蛤粉包，三钱 凌霄花二钱 红月季两支 丝瓜藤根烧存性研冲，一钱

方右，宁波路，九月朔，尾骶之下，魄门之后，曾臃肿外溃，血脓甚夥，据云已经完口，惟小有坚硬，然坚硬如块再溃亦意中事；经行失常，将行之际两胁掣痛，少腹作酸难过，脉弦涩。治以养血濡肝，兼调奇经。

石决明煨先煎，四钱 当归身蒸，二钱 白芍炒，二钱 丹参二钱
白蒺藜三钱 羌蔚子炒，二钱 粉丹皮炒，钱半 忍冬藤三钱 茯神三钱
新绛一钱二分 月季花三朵

二诊：九月十四日。魄门之后，尾骶之下，臃肿外溃，业已完口，惟尚有硬块，日来亦觉小瘥；此番经行两胁掣痛、少腹作酸较愈，经后常有白淫滑出，脉弦涩。血虚肝热，脉海失固之过。

龟版炙酥先煎，五钱 石决明煨先煎，四钱 当归身蒸，二钱

白蒺藜三钱 川杜仲三钱 续断炒，二钱 杭白芍炒，二钱 合欢皮四钱
茯神三钱 月季花三朵 白鸡冠花一钱 左牡蛎煨先煎，四钱

夏，百老汇路，八月朔。左耳后颈间有结核，右鼠颏亦有核，眼食如常，脉细而弦。为病仅痰气之结，然作治也简，若待其巨而图之，亦已晚矣。

紫贝齿煨先煎，三钱 左牡蛎煨先煎，三钱 石决明煨先煎，四钱
龟版炙焦黄先煎，六钱 忍冬藤三钱 络石藤三钱 新绛钱半
象贝母三钱 夏枯草三钱 茯神三钱 橘核炒，钱半 海蜇头洗净，五钱

二诊：八月初六日。左耳后颈间暨右鼠颏之结肿皆已稍消，惟溷浊濡滞腺中，急切难以输出，虽消亦不易尽。守原意为之可矣。

紫贝齿煨先煎，三钱 左牡蛎煨先煎，三钱 石决明煨先煎，四钱
龟版炙焦黄先煎，六钱 忍冬藤三钱 络石藤三钱 新绛钱半
象贝母三钱 夏枯草三钱 茯神三钱 穿山甲炙，二钱
海蜇头洗净，五钱 西珀屑研细末蜜丸吞，四分

三诊：八月十一日。左耳后颈间暨右鼠颏结肿已消未尽，溷浊濡滞腺中未消，日来腮间微肿。守原意清热凉血。

紫贝齿煨先煎，三钱 左牡蛎煨先煎，三钱 石决明煨先煎，四钱
龟版炙焦黄先煎，六钱 忍冬藤三钱 生地黄五钱 野料豆三钱
玄参二钱 知母炒，钱半 象贝母二钱 茯神三钱 紫荆皮三钱

四诊：八月廿一日。左耳后颈间暨右鼠颏结肿虽消而未净尽，腮间时有微肿已数年矣。再以舒络清血，用清萌蘖。

紫贝齿煨先煎，三钱 左牡蛎煨先煎，三钱 石决明煨先煎，四钱
龟版炙焦黄先煎，六钱 忍冬藤三钱 络石藤三钱 干地龙二钱
夏枯草三钱 象贝母二钱 紫荆皮三钱 新绛新半 橘核炒，钱半

五诊：左耳后颈间暨右鼠颏结肿消未净尽，腮间微肿业已戢平，惟声音未能清亮宣扬，喉咙为声音之路，乃少阴肾脉所循，此层务宜注意，且须自慎，否则怕有失音喉痹之患。

龟版炙焦黄先煎，六钱 石决明煨先煎，四钱 海蛤粉包，三钱

甘草一钱 象贝母二钱 金钗斛二钱 野料豆三钱 南沙参三钱
忍冬藤三钱 干苇茎三钱 玄参三钱

《王仲奇医案》

丁泽周

朱右。瘰癧窜发，未溃者肿硬疼痛，已溃者脓水不多。经停半载，寒热食减，肝脾肾三者并亏，难治之症也。肝藏血，脾统血，肾藏精，三经精血大亏，血脉干涩，经水不通，经不通则气不行，气不行则瘰癧成矣。当补益三阴，怡养性情。

吉林参须一钱五分 银柴胡一钱 大生地四钱 炙鳖甲三钱
地骨皮三钱 生特蛎六钱 广橘红一钱 云茯苓三钱
生於术一钱五分 京玄参二钱 夏枯草二钱 川象贝各四钱 红枣四枚

二诊：寒热已退，纳谷略增，项间累累成串，彼没此起，此敛彼溃，三阴精血不足，损症之根萌也。还宜填补三阴，怡养性情，庶溃易敛而肿易消矣。

吉林参须一钱五分 云茯苓三钱 生於术一钱五分 清炙草八分
广橘白一钱 仙半夏二钱 厚杜仲三钱 川断肉三钱 大生地四钱
玄武版四钱 川象贝各四钱 生牡蛎四钱 红枣四枚

《丁甘仁医案》

何童。瘰癧肿硬，两天不足，痰瘀凝结，症势缠绵，姑拟崇土化痰而通络道。

全当归二钱 京赤芍二钱 银柴胡一钱 生草节六分
苦桔梗一钱 生香附二钱 川象贝各二钱 炙僵蚕三钱 淡昆布钱半
藏红花五分 小金丹一大粒，化服。

陈海蜇皮二两，漂淡，煎汤代水。

魏小。咽痛蒂坠，颌下结核，咳嗽涕多，肝胆火升，痰瘀凝结络道，风热外乘，防成痲痰，姑拟清疏消解。

薄荷叶八分 净蝉衣八分 生甘草六分 轻马勃八分

京元参钱半 嫩前胡钱半 苦桔梗一钱 光杏仁三钱 连翘壳三钱
大贝母三钱 炙僵蚕三钱 藏青果一钱 京赤芍二钱
鲜竹叶茹三十张钱半

刘小姐。伏温愈后，咳嗽未止，纳少形瘦，白痞已回，大腿结核酸痛，左脉细弱，右脉濡滑。肺胃之阴已伤，痰热留恋，营卫循序失常，宜养正和胃，化痰通络。

南沙参三钱 川象贝各二钱 瓜蒌皮三钱 抱茯神三钱
炙远志一钱 怀山药三钱 甜光杏三钱 生苡仁四钱 冬瓜子三钱
浮小麦四钱 北秫米包，三钱 嫩桑枝三钱

谢右。痧后阴虚，肝火挟痰热，蕴结络道，风邪外乘，项颈结核，乍有寒热。虑其增剧，姑拟疏散消解。

薄荷叶八分 熟牛蒡二钱 荆芥穗一钱 京赤芍二钱
生草节五分 苦桔梗一钱 连翘壳三钱 大贝母三钱 炙僵蚕三钱
山慈菇片八分 鲜竹茹钱半 清水豆卷四钱

吕左。疝气屡发，马刀疔肿硬不消，形寒纳少，苔腻脉弦滑。肝失疏泄，痰瘀凝结，缠绵之症，宜泄肝渗湿，化痰通络。

金铃子一钱 延胡索一钱 生赤芍二钱 陈橘核四钱
福泽泻钱半 荔枝核炭，五枚 赤花苓三钱 大贝母三钱 炙僵蚕三钱
山慈菇片八分 清水豆卷五钱 枸橘打，一枚

《丁甘仁医案续编》

曹惕寅

王枢密巷周氏早寡，抚孤子至十八岁，辛苦备尝。忽子右腿胯结核，高肿巨大如瘤，能俯不能仰，伛偻而行。凡一切消散攻穿之剂，靡不遍尝，而外疡滋大之势与日俱进。其母忧之，乞诊于予。予曰：“此非外因之症，全由阴虚肝亢而起，火盛生痰，络气为湿热痹阻。宜令其善自珍爱。”其母坚谓小儿禀性诚直，绝无外好。余乃默询其子，乃知为手淫所误。噫！敲骨吸髓，莫此为甚！乃详为戒劝，

冀其遵循。进以党参、生地、天冬、川贝、白芍、料豆衣、竹沥、制半夏、橘络、丝瓜络、首乌藤、楮芽，外敷冲和玉烛，以水红花子、王不留行、土贝、木瓜、苏叶、桑枝煎汤调敷药满拓之。越十余日，面色转活，饮食便溺俱能复常。伏核十去七八，俯仰亦得自然。康复历七阅月。卒以不能永断恶习，竟至药石无效而死。以英隽之质，面惑于诱言，致召丧身之祸，良可哀也。故余每于诊治少年子弟在十七、八岁者，必以保身立命为戒，更复晓以利害。所谓身体发肤受之父母，不敢毁伤之义，尽寓于此矣。

《翠竹山房诊暇录稿》

赵文魁

四月初七日，赵文魁请得端康皇贵妃脉息：左关弦数，右寸关滑而近数。气道郁遏，血脉欠和，以致湿热流注。右腿起有结核，微肿作痒，胸闷口渴，身肢酸倦。今拟用开郁和脉化湿地调理。

中生地四钱 赤芍三钱 炒没药三钱 栝蒌根六钱
塘栝蒌八钱，捣 连翘四钱 法半夏三钱 浙贝母四钱，研
青皮子三钱，研 郁金三钱，研 川黄柏三钱 橘红络各二钱 引用羚羊角而八分，先煎、怀牛膝三钱

按：因气郁不畅，血脉欠和，脉络不利，而致湿热流注。故有右腿起有结核、微肿作痒、胸闷口渴、身肢酸倦等证。治当以开郁活血和脉，清热化湿理气之法。方中青皮子、郁金、生地、赤芍、没药开郁活血调肝；连翘、黄柏、浙贝、栝蒌根清热化痰消肿；半夏、橘红络、塘栝蒌通络、与诸药相伍，共奏散结消肿之功。引用羚羊角清肝热，怀牛膝活血脉，性降能引诸药下行，二药为引，功在清热调肝，散结消肿，使药到病处。

《赵文魁医案选》

张山雷

王左。素体丰伟，痰涎不免，项后结核亦是痰凝。前日溃后脓毒未净，收口太速，余块尚存。夜央咳嗽，痰浓滑，脉弦舌苔薄白。宜宣络顺气，消化和肝。

瓜蒌皮 6克 象贝母 9克 生紫菀 9克 黄射干 4.5克
丝瓜络 4.5克 鲜竹茹 4.5克 薄橘红 2.4克 苦桔梗 4.5克
柔白前 9克 全当归 4.5克 川断肉 6克 生远志肉 6克
橘络 1.2克

林左。稚阴未充，孤阳偏旺，内热酿痰，气升为咳，入络结核，脉数，舌尚楚楚。自述咳多于午后，阴分火炎是其明证，胃纳未减。宜滋阴养液，宜络化痰。

大元地 12克 大白芍 9克 象贝母 6克 旱莲草 6克
女贞子 9克 生紫菀 9克 广橘红络各 2.4克 京玄参 6克
壳砂仁 1.2克 昆布 4.5克 海藻 4.5克 陈胆星 2.4克 大麦冬 6克
银州柴胡 2.1克 丝瓜络 4.5克

二诊：稚阴未充，偏阳独旺，午后潮热，热则干咳，胃纳甚旺，亦是火气有余，挟痰淤结少阳之络，则瘰块累累。此非养阴涵阳，并以化痰宣络，久服不为功，不可求速效者。

大生地 9克 山萸肉 6克 生白芍 9克 女贞子 12克
地骨皮 4.5克 肥知母 6克 大天冬 6克 川柏皮 4.5克
象贝母 6克 夏枯草 4.5克 昆布 6克 壳砂仁打，1.2克 生紫菀 9克
竹茹 4.5克 旱莲草 6克 生牡蛎 15克 生打代赭石 6克

三诊：阴虚潮热干咳久延，两项侧瘰疡累累，纳谷兼人，脉小且数。此先天本薄，甚非轻恙。治法毓阴涵阳，然非多服难效。

大生地 12克 生白芍 6克 象贝母 6克 玄参 6克 竹茹 4.5克
沙苑蒺藜 12克 银柴胡 3克 淡鳖甲 12克 青蒿珠 2.4克

紫菀 6克 大麦冬 6克 知母 6克 天冬 4.5克 条芩 4.5克

《张山雷专辑》

范文甫

晋祥兄。颈项痲核成串。

海藻 9克 昆布 9克 皂刺 12克 象贝 9克 姜半夏 9克
淡附子 3克 生牡蛎 24克 茯苓 9克

二诊：前方加丹皮 9克

《范文甫专辑》

周镇

王右，役于妓院。素体阴虚肝旺，颈患痰核，牙宣腕胀。以清肝解郁，泄热化痰，如元参、丹皮、黑山栀、甘菊、僵蚕、橘叶、蛤壳、海浮石、木蝴蝶、香附、川贝母、淡海藻、鲜藕等。如鼓应桴，瘰癧渐消，余恙亦泯。

《周小农医案》

方公溥

曹女。七月十七日诊：肝气郁结，痰阻左颈，结核累累，病属瘰癧，急与舒肝散结软坚。

白芍药 9克 洗海藻 9克 川贝母 9克 全当归 9克
香白芷 4.5克 小青皮 4.5克 瓜蒌皮 9克 煅牡蛎 9克
洗昆布 9克 天花粉 9克 仙半夏 6克 制乳没各 3克

七月十九日复诊：进舒肝散结软坚，瘰癧已见缩小，脉象渐平，药既应手，再宗原意化裁。

处方同前，除白芍，加软柴胡 3克、京元参 9克、改乳没各 4.5克、煅牡蛎 9克

七月二十一日三诊：瘰癧渐消，脉象渐和，再与理气化痰。

处方同前，除柴胡、花粉。加夏枯草 9 克、炒竹茹 6 克、制香附 9 克。

《方公溥医案》

孔伯华

蒋女童，九月十四日。肝气挟痰，入于经络，项发结核，停经数月，脉滑而数大，左关较盛，当咸软内消之。

生牡蛎三钱，先煎 玄参心三钱 夏枯草三钱 桑寄生五钱
川贝母三钱 旋复花一钱 鲜竹茹五钱 枯黄芩二钱 代赭石一钱
鲜茅根两 知母三钱 怀牛膝一钱 藕两，切片

陈女童，六月初九日。证转后，已渐有生长象，体质亦较丰，第近日肝热较盛，项间旧有结核因之而发肿痛，脉大而数，当降肝热，兼内消之。

生石决明八钱 蒲公英五钱 梔子炭三钱 板蓝根四钱
酒龙胆草三钱 制乳香五分 制没药五分 地骨皮四钱 川黄柏三钱
忍冬花五钱 薄荷叶一钱 怀牛膝三钱 全栝楼八钱 鲜荷叶一个
忍冬藤五钱 六神丸三十粒（分吞）

某男，正月三十日。肝家阳邪上犯清明，头部偏痛，经注射后，右项筋络遂生结瘰，大便秘，脉象数实，宜清平凉化。

青竹茹六钱 蝉衣二钱 旋复花三钱，布包 地骨皮三钱
鲜芦根两 杏仁三钱 代赭石三钱 板蓝根四钱 黛蛤粉两
僵蚕三钱 薄荷叶钱半 川贝母三钱 枇杷叶四钱 川郁金三钱
全栝楼八钱 川牛膝三钱 蒲公英三钱 生石膏六钱 桑寄生六钱

刘妇，正月初九日。脾湿痰盛，肝家气郁，注于经络，项下发结核，渐致肿大，舌苔白腻，脉象弦滑而数，左关较盛，拟咸软豁痰柔肝。

石决明八钱，生研先煎 旋复花三钱，布包 法半夏二钱
夏枯草三钱 生牡蛎三钱 代赭石三钱 广陈皮二钱 川贝母三钱

白蒺藜三钱 天竺黄二钱 玄参心三钱 板蓝根四钱 竹茹四钱
知母三钱 犀黄丸六分(分吞) 百效膏(外贴)

《孔伯华医集》

章成之

孙女。平素喉间多痰，左颈有小核，但不咳。最近三日痰多，夜间有倏忽无定之热。

大贝母9克 玉桔梗3克 冬桑叶9克 粉前胡9克
夏枯草9克 海藻9克 炙僵蚕9克 冬瓜子9克 甘草2.4克

胡幼。患马刀挟瘰，历时已久，面色苍然，两颧发赤。调治失当，损怯之根萌也。

冬虫夏草30克 焙紫河车一具 炙鳖甲30克 水獭肝30克
淮山药30克 鹿衔草30克 京元参30克 川贝180克 煅牡蛎60克
淡海藻30克 淡昆布30克 夏枯草30克

上药研末，和蜜为丸，如梧子大，每早晚服十五粒，淡盐汤下。

蔡幼。马刀挟瘰，起于痧后，损之前驱，潮热、盗汗，更能使病势进展。

全当归6克 地骨皮6克 仙鹤草9克 夏枯草6克 秦艽5克
醋炒柴胡2.4克 瘪桃干5克 昆布5克 海藻5克

沈弟。此方专为瘰病而设，肛门作痒，当另治之。

全当归9克 黄芪9克 炙鳖甲15克 海藻12克 昆布9克
夏枯草9克 麦芽9克 芋苳丸9克 另：芫花、甘遂各60克，煎汤洗
肛门。

钱男。排便有粘液，不重要；重要者，瘰病不能收敛。

昆布90克 京元参120克 夏枯草90克 海藻90克 贝母90克
冬虫夏草90克 獭肝一具 脱力草150克 功劳叶150克
左牡蛎120克

上药共研细末，水泛为丸，日服三次，每次一钱。

戴男。此种失音，属金破不鸣，何况再见鼻衄；颈间结核累累，非轻症也。

北沙参 6克 麦冬 9克 五味子 5克 阿胶珠 9克
蜜炙兜铃 9克 蜜炙牛蒡 9克 肥玉竹 9克 生侧柏叶 30克
冬瓜子 15克 白茅根一扎 仙鹤草 12克

袁幼。瘰癧如串珠，药后已能稳定，不再滋长，便溏亦减。

左牡蛎 15克 浙贝母 15克 生黄芪 15克 京元参 15克
昆布 30克 上肉桂 15克 海藻 30克 小蓟 15克 淮山药 30克
为末，作丸如梧子大，早晚各服十粒。

二诊：瘰癧行将消退，便溏已止，深为可喜，仍当注意营养。

煅牡蛎 15克 生黄芪 9克 淮山药 9克 夏枯草 6克 昆布 6克
海藻 6克 炙鳖甲 9克 京元参 9克 白术 6克

方幼。服强壮剂，瘰癧十去七八，前方重其制，为丸常服。

京元参 60克 煅牡蛎 90克 白归身 60克 象贝母 60克
炙鳖甲 90克 淡苁蓉 30克 仙鹤草 60克 淮牛膝 60克
夏枯草 60克 獭肝一具，焙

上药共研细末，炼蜜为丸，如梧子大，每饭后各服 6 克。

王男。半年前曾患马刀挟瘰，尚未消失，复又痰中带红。今伤风匝月不除，两脉细数，实有大患潜伏。病者以肩胛胸背痛为苦。有不少损症，初起即以此为前驱。

远志肉 5克 杭白芍 9克 秦艽 5克 蒸百部 9克 炙鳖甲 24克
旋复花 9克包 牡蛎 24克 延胡索 9克 芋苈丸 9克，分二次吞

张男。颌腋胯部皆生大小之核，推之可移，措置得当，亦能弭大患于无形。

生黄芪 15克 杜仲 9克 苁蓉 9克 玄参 12克 党参 12克
甘杞子 9克 全当归 9克 煅牡蛎 30克 淮山药 15克 炙鳖甲 24克
天麦冬各 9克 五味子 9克 淮牛膝 9克 菟丝子 9克

象贝母 9 克 大熟地 24 克 虎骨胶 24 克 阿胶 30 克

《章次公医案》

张汝伟

王先容，女，年廿三，住愚园路六百一十一弄廿三号。肝郁气滞，思虑过度，环颈瘰癧，半隐半现，些微抽痛，将届一年，幸未溃穿。脉弦细，尚可消散，但急需摆脱思虑为要，出软坚化痰，解郁理气之方治之。

九制香附二钱 淡昆布 淡海藻 薄公英 半贝丸包
越鞠丸包，各三钱 广郁金 佩兰叶 香椽皮 丝瓜络各钱半
玫瑰花二朵

另用毛小鼠一窠，洗净，剥烂，作馄饨馅，包馄饨食之。

本证始末：王姓为伟诊病家多年，此次挈女来治。询及起病之因，缘恚郁而起，故用药如是，嘱另服单方，隔一月余，觅到，照服，方共服廿余剂。其明年，乃父陪夫人来诊。云吾女之瘰癧，已完全消除矣，甚感单方之有效云。

《临症一得》

冉雪峰

武昌周某，患瘰癧有年，累累成串，时重时轻，不以为意，后瘰癧大发，突尔肿硬逾恒，大如癭瘤，头部为之倾斜，乃急返武昌延予诊治。其脉弦劲，口渴烦躁，不安寐，嘱须静养，戒酒，节饮食，再商疗法。拟方，归尾三钱，鳖甲六钱，昆布、海藻各五钱，烧灰酒拌，大黄、郁金、牛膝各三钱，龙胆草、胡黄连各一钱五分，土茯苓四钱，芒硝四钱，以水四杯，煮取一杯，去渣，溶入芒硝，分温二服，二剂，大便二次，肿硬消三之一。复诊，减大黄、芒硝之半，续服二剂，肿硬消三之二。再复诊，原方去大黄、芒硝，加茯神、枣仁各四钱，续服四剂，肿硬大消，仅存瘰癧旧痕而已。后再宗前方去龙胆草、胡黄连加

梔子、丹皮各三钱，每日一剂，服一星期，并拟丸剂常服：当归尾、杭白芍各一两，石决明二两，昆布、海藻烧灰各二两，郁金、牛膝各一两，甘松一两，胡黄连、大黄各五钱，法丸如梧子大，每服一钱至二钱，日二次，清酒下，约二月后，原有瘰癧亦全消。此病其来也暴，其去也速，无足异。所可异者，突发瘰癧暴疾既消，旧有瘰癧痼疾亦消，实为意外收获。

《冉雪峰医案》

陆观虎

宋某某，女，45岁。

辨证：瘰癧。

病因：气痰滞络。

症候：颈瘰，胸闷，发热脸红，身懒，头重，腿痛。脉细。舌质红，苔浮黄而干。

治法：橄榄核9克 陈皮6克 嫩桑枝30克 射干5克
杭白芍9克 宣木瓜9克 杭菊花9克 丝瓜络5克 蒲公英9克
制半夏6克 黛蛤散9克，包

方解：嫩桑枝、木瓜、丝瓜络、蒲公英通经活血，止痛祛热消肿。陈皮、杭白芍、杭菊花开胃健脾，活血调气，理血散风，止痛。黛蛤散、制半夏清热解毒，降逆和胃，化湿，消除痰热郁结。橄榄核、射干清火解毒，活血消痰，以消堵闷。

成某某，女，41岁。

辨证：瘰癧。

病因：气痰郁结。

症候：右颈结核，右胁腋均痛。脉细弦。舌质红。

治法：疏气软坚。

处方：夏枯草9克 大贝母9克 炙乳没各3克 苏梗5克
炒赤芍6克 蒲公英9克 广木香2克 炙僵蚕9克 佛手2克

紫花地丁5克 代代花2克。

方解：苏梗、木香、佛手、代代花理气止痛，平肝散结。炒赤芍、蒲公英、炙乳没，炙僵蚕软坚活血，散结消肿。夏枯草治瘰癧，散郁结，祛血热。大贝母、紫花地丁清热解毒，散结肿，以消结核。

苏某某，女，26岁。

辨证：瘰癧。

病因：平素肺虚，湿毒郁结。

症候：颈腮臂瘰癧成串，咳嗽咽痒夜甚，肤热，目眩头痛，白带多。脉细濡。舌质红，苔浮黄。

治法：润肺化痰，利湿解毒。

处方：连翘6克 大贝母6克 益元散9克 净银花6克
炒赤芍5克 扁豆衣9克 夏枯草9克 焦苡米12克 猪赤苓9克
枇杷叶9克 川通草2克。

方解：连翘、净银花清热解毒。夏枯草、大贝母、赤芍散结化郁，清热消痰。益元散宁心清热利水。扁豆衣除湿升清。猪赤苓、焦苡米、川通草利便行水化湿清热。枇杷叶润肺止嗽化痰。

冯某某，女，27岁。

辨证：瘰癧。

病因：心肺虚损。

症候：右腋瘰癧成串，心跳吐血，便秘溲少。脉细濡。舌质红，苔微白腻。

治法：养心润肺，止血利便。

处方：朱茯神15克 川贝母6克 火麻仁9克 远志肉5克
炙乳没各6克 山楂炭9克 夏枯草9克 僵蚕9克 仙鹤草9克
全栝蒌18克 更衣丸3克，包吞服。

方解：朱茯神、远志养心益气。益智利窍补精强志。川贝母润肺，止咳嗽，散结，消痰除热。乳没活瘀散结，消肿止痛。山楂炭消食磨积，化痰。僵蚕散风化痰，行滞化痰。夏枯草化痰消瘰癧。仙

鹤草止血，治劳伤吐血。全栝蒌、火麻仁、更衣丸宽胸润肠利便。

赵某某，男，24岁。

辨证：瘰癧。

病因：湿痰互滞。

症候：颈部瘰癧，皮肤发痒，纳食泛恶。脉细弦。舌红，苔黄。

治法：利湿化痰。

处方：夏枯草9克 白茅根9克 川通草3克 冬瓜皮9克
山慈菇6克 橘叶6克 茯苓皮6克 蒲公英6克 益元散9克，包煎
大贝母6克 赤芍6克

方解：夏枯草、山慈菇化痰散结治瘰癧瘰癧。茅根、通草、冬瓜皮、益元散清热利湿。蒲公英清热解毒止痒。橘叶行气开郁，散毒消肿。大贝母、赤芍凉血散结化痰。

二诊

症候：颈部瘰癧痛，皮肤仍痒，纳食泛恶已减。脉细弦。舌质红有刺。

处方：前方去茅根 蒲公英 益元散 橘叶 通草，加
草薢9克 焦稻芽12克 梔子皮6克 竹茹9克
小金丹1.5克（冲服）。

方解：草薢、梔子皮清热利湿。焦稻芽、竹茹健胃化痰。小金丹消肿散结以治瘰癧。

三诊

症候：颈部瘰癧仍痛。肤痒渐轻。纳食泛恶已止。脉细弦。舌质红，苔微黄。

处方：前方去焦稻芽 竹茹 山慈菇 粉草薢 加
猪赤苓各6克 泽泻6克 粉丹皮6克 蒲公英9克。

方解：因纳食泛恶已止，但瘰癧仍痛并有肤痒，故减去焦稻芽、竹茹等药，而加猪赤苓、泽泻、蒲公英等以利尿渗湿解毒。

四诊

症候：颈部瘰癧仍痛，皮肤起脓疱，仍痒，脉细弦。舌质红，苔微黄。

处方：因痛痒未消又起脓疱，故前方去粉丹皮 加紫花地丁9克 山慈菇9克

五诊

症候：颈部瘰癧仍痛，皮肤脓疱痒减。脉细弦。舌红，苔黄。

处方：前方去栀子皮 泽泻 猪赤苓 赤芍 大贝母 加蒲公英9克 制乳没各3克 青陈皮各3克 制僵蚕9克 白茅根30克。

方解：因肤痒减轻，瘰癧仍痛而加入僵蚕、青陈皮理气消肿化痰。加入白茅根、乳香、没药、蒲公英清热解毒、活血消肿、化痰止痛。

六诊

症候：颈部瘰癧已消，仍有陈痛，肤痒已止，肿疱亦收。脉细弦。舌质红，有刺微黄。

处方：前方去茯苓皮 青陈皮 蒲公英 紫花地丁 白茅根 加益元散9克 栀子皮6克 土贝母6克 赤芍6克 橘叶6克

七诊：

症候：颈部瘰癧见消，陈痛渐轻。脉细弦。舌质红，苔浮白。

处方：前方去小金丹 栀子皮 冬瓜皮 加紫花地丁9克 黛蛤散 炒竹茹

八诊

症候：颈部瘰癧已消、痛止。脉弦细。舌苔浮黄。

处方：前方去橘叶 益元散 黛蛤散 加连翘6克 银花6克 丝瓜络6克

九诊

症候：颈部瘰癧已消，湿痰已化。脉细。舌红有刺。

处方：夏枯草9克 通草3克 蒲公英9克 竹茹9克

土贝母 9 克 黛蛤散 9 克 橘叶 6 克 赤芍 6 克 山慈菇 9 克
陈皮 6 克 半夏 6 克

共研细末，炼蜜为丸如梧桐子大，每服 5 克，睡前温开水送服。

方解：夏枯草、山慈菇，蒲公英消散瘰癧，通草、陈皮、半夏利湿化痰。赤芍、土贝母活血凉血散结。黛蛤散、橘叶化痰消瘰清热。

秦某某，女，46 岁。

辨证：瘰癧。

病因：气郁血淤。

症候：气瘰滞络，全身发酸，无力，颈筋紧束，发冷。月水方见二天。头胀。脉细弦而濡。舌质红，苔浮黄。

治法：解郁化瘀。

处 方：苏梗 5 克 僵蚕 6 克 荷梗 5 克 广木香 2 克
丝瓜络 5 克 通草 2 克 益元散 6 克，包煎 夏枯草 5 克 赤芍 6 克
大贝母 5 克 益母草 9 克 延胡索 5 克 山慈菇 5 克。

方解：苏梗、广木香、荷梗行气散郁，和中止痛。僵蚕，赤芍活血化瘀。丝瓜络化瘀。通草、益元散通气利小便，宁心清热利湿。大贝母、夏枯草、山慈菇散结清热化痰。延胡索、益母草调经养血化瘀。

二诊：

症候：气瘰见化，颈筋仍紧，全身酸懒，无力，气短，少腹作痛，冷退，腹胀已减。月水已净。脉细。舌红，苔白。

处方：原方去延胡索 益母草 苏梗 荷梗加橘叶 5 克
乳香没药各 5 克。

方解：橘叶散痼消肿，化核止痛。乳香没药活血调气，止痛散结，消肿化瘀。

董某某，女，48 岁。

辨证：瘰癧。

病因：肝郁痰滞。

症候：颈核作痛，左眼痛，头晕气短。脉细弦。舌红，苔黄。

治法：理气化痰。

处方：夏枯草 9 克 土贝母 5 克 代代花 3 克 嫩射干 3 克
炒赤芍 5 克 佛手花 3 克 山慈菇 3 克 青陈皮各 6 克 杭菊花 5 克
橄榄核 7 个 小金丹 3 克，分两次冲服。

方解：夏枯草、小金丹、炒赤芍活血破瘀，散结祛热，以消瘰癧。陈皮、代代花、佛手、杭菊花开胃顺气，开郁止痛，以祛头晕眼痛。射干、土贝母清热散结消肿。山慈菇、橄榄核清热理气，止痛消肿。

张某某，女，58 岁。

辨证：瘰癧。

病因：肺气素虚，湿痰滞络。

症候：颈部瘰癧，经久不化，咳嗽痰多腿痛。脉细濡。舌质红，苔薄白。

治法：顺气化痰，除湿散结。

处方：冬瓜子 9 克 大贝母 9 克 甘草 2 克 炒竹茹 6 克
炒赤芍 6 克 制半夏 9 克 黛蛤散 9 克 夏枯草 9 克 广陈皮 5 克
云茯苓 9 克 桑枝 15 克 木瓜 9 克。

方解：云茯苓、制半夏、陈皮、甘草除湿化痰利气和中。桑枝、木瓜通经活络，利湿止痛。炒赤芍、夏枯草清热散结，消瘰化痰。冬瓜子、大贝母、黛蛤散、竹茹止咳化痰下气，散结止逆，清热润肺。

《陆观虎医案》

乳痛

薛立斋

一儒者，两乳患肿，服连、翘饮，加坚硬，食少内热，胸胁作痛，日晡头痛，小便赤涩，此足三阴虚而兼郁怒，前药复损脾肺。先用六君加芎、归、柴、梔，四十余剂，元气复而自溃，乃作痛恶寒，此气血

虚也，用十全大补、六味地黄而愈。

封君袁阳涇，左乳内结一核，月余赤肿，此足三阴虚兼怒气所至。用八珍加柴、梔、丹皮，四剂，赤肿渐退，内核渐消；又用清肝解郁汤而愈。时当仲秋，两目连割，肝脉微弦，此肝经火盛而风动也，更加龙胆草五分，并六味地黄丸而愈。若用清热败毒，化痰行气，鲜不误者。

一儒者，两胁作胀，两乳作痛，服流气饮、瓜蒌散。半裁后左肋下结一块如核，肉色不变，劳则寒热，此郁结气伤而为患，虚而未能溃也。八物加柴胡、远志、贝母、桔梗，月余色赤作痛，脓将成矣。又服月余，针之出脓碗许，顿然作呕，此胃气虚而有痰也，令时吃生姜，服六君子汤呕止，加肉桂而疮愈。彼后出宰，每伤劳怒，胸乳仍痛，并发寒热，服补中益气加炒山梔愈。

一妇人内热胁胀，两乳不时作痛，口内不时辛辣，若卧而起急，则脐下牵痛，此带脉为患，用小柴胡加青皮、黄连、山梔二剂而瘥。

一妇人久郁，右乳内肿硬。用八珍汤加远志、贝母、柴胡、青皮，及隔蒜灸，兼服神效瓜蒌散，两月余而消。

一妇人左乳内肿如桃，不痛不赤，发热渐瘦。用八珍加香附（生姜汁制），远志、青皮、柴胡百余剂；又兼服神效瓜蒌散三十余剂，脓溃而愈。

一妇人禀实性躁，怀抱久郁，左乳内结一核，按之微痛。以连翘饮子二十余剂，少退；更以八珍加青皮、香附、桔梗、贝母，二十余剂而消。

一妇人发热作渴，至夜尤甚，两乳忽肿，肝脉洪数，乃热入血室也。用加味小柴胡汤，热止肿消。

一妇因怒，左乳作痛发热，表散太过，肿热益甚。用益气养荣汤数剂，热止脓成，不从用针，肿胀热渴，针，脓大泄，仍以前汤，月余始愈。此症若脓未成未破有薄皮剥起者，用代针之剂，其脓自出，不若及时用针，不致大溃，若脓血未尽，辄用生肌，反助其邪，慎之。

一妇人脓清肿硬，面黄食少，内热晡热，自汗盗汗，月经不行，此肝脾气血俱虚。用十全大补加远志、贝母及补中益气各三十余剂，外用葱熨患处，诸症寻愈。

一妇人脓成，胀痛，欲针之。不从，数日，始针，出败毒三四碗许，虚证蜂起，几至危殆，用大补，两月余而安。若元气虚弱不作脓者，用益气养荣汤补之，脓成，即针，若肿痛寒热，怠惰食少，或至夜热甚，用补中益气兼逍遥散补之为善。

一产妇因乳少，服药通之，致乳房肿胀发热作渴，以玉露散补之而愈。夫乳汁乃气血所化，在上为乳，在下为经，若冲任之脉盛，脾胃之气壮，则乳汁多而浓，衰则淡而少，所乳之子，亦弱而多病，又有屡产无乳，或大便涩滞，乃亡津液也。当滋化源。

一妇人，右乳内结三核，年余不消，朝寒暮热，饮食不甘，此乳岩。以商气养荣汤百余剂，血气渐复；更以木香饼熨之，年余而消。

一妇人年二十有五，素虚弱，多郁怒，时疫后，脾胃愈虚，饮食愈少，又值气忿，右乳肋下红肿，应内作痛。用炒麦麸熨之，肿虽少散，内痛益甚，转侧胸中，如物县坠，遂与加减四物汤，内肿如鹅卵，外大如盘，胸肋背心相应而痛，夜热势甚，时治者皆以攻毒为言，薛云：此病后脾弱，而复怒伤肝，治法惟主于健脾气，平肝火，则肿自消，而病自愈矣（病后治法）。惠方以八物加陈皮、黄芪、柴胡、山栀、白芷，服八剂，病减六七，去白芷加青皮、木香、桔梗，又六剂而全愈。若用攻毒之剂，病胡能瘳？

一妇产后忽两乳细小，下垂过小腹，痛甚，名乳悬。用芎、归各一斤，内用半斤水煎，余用烧烟薰口鼻，二料乃效。

《名医类案》

薛立斋

一妇人，因怒两乳肿，兼头痛寒热。此肝经气郁症也。用人参败毒散二剂，表症已退。用小柴胡加芎、归、枳壳、桔梗，四剂而愈。

一妇人因怒左乳作痛，胸膈不利。此属肝脾气滞，以方脉流气饮加木香、青皮，四剂而安。

一妇人久郁，左乳内结核如杏，三月不消，心脉涩，脾脉大，按之无力。此肝脾气血亏损。以八珍加贝母、远志、香附、柴胡、青皮、桔梗，五十余剂而消。

一妇人乳内结核年余，嗜热少食。此气血不足。欲用益气养荣汤，彼反服行气之剂。溃出清脓而殁。又一妇乳内结核如栗，亦服前药，大如覆碗，坚硬如石，出血水而殁。又郭氏妾，乃放出宫人，乳内结一核如栗。亦以前汤，彼不信，乃服疮科流气饮及败毒散。三年后大如覆碗，坚硬如石，出水不溃，亦殁。大抵郁闷则脾气阻，肝气逆，则成隐核，不痛不痒，人多忽之，最难治疗。若一有此，宜戒七情，远厚味，解郁结，更以养气血之药治之，庶可保全，否则不救。亦有二、三载或五、六载方溃下陷者，皆曰乳岩，以其形岩凸似岩穴也。最毒，慎之可保十中一二也。

一妇人肿而不作脓。以益气养荣汤加香附、青皮数剂而脓成，针之旬日而愈。

一妇人右乳肿，发热，怠惰嗜卧，无气以动，至夜热亦甚。以补中益气汤兼逍遥散治之而痊。

一男子左乳肿硬痛甚，以仙方活命饮二剂而止。更以十宣散加青皮四剂，脓成针之而愈。若脓成未破，疮头有薄皮剥起者，用代针之剂点起皮处，以膏药覆之，脓亦自出。不若及时针之，不致大溃。如出不利，更经搜化毒之药。若脓血未尽，辄用生肌之剂，反助邪气，纵早合必再发，不可不慎也。

一男子年逾五十，患子不立事，左乳肿痛，左胁胀肿，肝脉弦数而涩。先以龙荟丸二服，诸症顿退。又以小柴胡对四物加青皮、贝母、远志数剂而脓成。欲针之，仍以养气血解郁结。彼不从，乃杂用流气败毒之剂，致便秘发热作渴。复请治，谓脓成不溃，阳气虚不能鼓舞也；便秘发热，阴血竭不能濡润也。辞不治，果死。

一男子因怒左乳肿痛，肝脉弦数。以复元通气散，二服少愈，以小柴胡汤加青皮、芍、归数剂而消。复元通气散：木香、茴香、青皮、甲片、陈皮、白芷、甘草、漏芦、贝母各等分，每服三钱，温酒调下。

孙文垣侄妇，素有痰涎，胸膈痞胀，近因乳肿大，发寒热，欲成痈。以加味神效瓜蒌散二帖，寒热退而肿不消。用贝母、白芷为臣，瓜蒌为君，赤芍、当归、连翘为佐，青皮、甘草、柴胡为使，痛减肿仍不消。脉之近数，知已成脓。与内托十宣散加银花、地丁二帖而脓溃。因脚上生疮且有浮力，前方去地丁、银花，加苡仁、苍耳子调理全安。

《续名医类案》

薛立斋

王汝道室，年逾三十，每怒后乳内作痛或肿。此肝火所致，用小柴胡合四物加青皮、桔梗、香附、枳壳而愈。彼欲绝去病根，自服流气饮，遂致朝寒暮热，益加肿痛。此气血被损而然，与八珍十余剂，喜其年壮，元气易复，得愈。

一妇人乳内一肿块如鸡子大，劳则作痛，久而不消，服托里药不应。此乳劳症也，属肝经血少所致。先与神效瓜蒌散四剂，更隔蒜灸之，肿稍退。再与八珍汤倍加香附、夏枯草、地丁，仍间服前散，月余消。亦有乳疽一症，其状肿硬木闷，虽破而不溃，肿亦不消，尤当急服此散及隔蒜灸法。此乳肿症，气血为七情所伤，变劳症也，宜戒恼怒，节饮食，慎起居，否则不治。

一妇人患乳痈，气血颇实，但疮口不合，百治不应。与神效瓜蒌散四剂，少可。更与数剂及豆豉饼灸之而愈。

一妇人患此未溃，亦与前药三剂而消。陈良甫曰：妇人乳劳便服此药，可杜绝病根。毒已成能化脓为水，未成者则从大小便散之。

一人抱病小愈，左乳复生痛，继又胸膈间结核，其坚如石，在冉半载，百药不能施。已而牵掣于肩，痛楚特甚。瘁于张王祠，梦神语

曰：但用生姜自然汁制香附，服之可也。比觉检本草视之，二物治症相符。访医者张禄，亦云有理。用香附去毛，姜汁浸一宿，为末，二钱米饮调。才数服，疮脓流出，肿硬渐消而愈。

《续名医类案》

朱丹溪

一妇人，年六十，厚味郁气，而形实多妒。夏无汗而性急。忽左乳结一小核，大如棋子，不痛。自觉神思不佳，不知食味。经半月，以人参汤调青皮、甘草末，入生姜汁细细呷，一日夜五、六次，至五、七日消矣。此乃乳岩之始，不早治，隐至五年十年以后发，不痛不痒，必于乳下溃一窍，如岩穴，出脓。又或五、七年十年，虽饮食如故，洞见五内乃死。惟不得于夫者有之，妇人以夫为天，失于所天，乃能生此。谓之岩者，以其如穴之嵌坼空洞，而外无所见，故名曰岩。患此者必经久淹延，惟此妇治之早，消患于未形，余者皆死，凡十余人。又治一初嫁之妇只以青皮甘草与之安。

一孺人但经将行而乳肿，先两日发，口干而不渴，食少减，脉左弦带数，右却平。治用四物汤加陈皮、白术、茯苓，带热下与点丸三十粒。

义二孺人平时乳内有结核，不为痛。忽乳边又有一肿核，颇觉有些痛。黄芩、川芎、木通、陈皮各四钱，人参二钱，白芍一钱，大腹皮三钱，炙甘草、生甘草各一钱，当归头一钱，分二帖煎服。

黄孺人乳肿痛。青皮、石膏、连翘、角刺、黄药子、当归头、木通各一钱，生甘草三分，入好酒些少同煎饮，又别药洗肿处。

《续名医类案》

李东垣

一妇人，乳间出黑头疮，疮顶陷下作黑眼子，其脉弦洪，按之细小。升麻、连翘、葛根各一钱，肉桂三分，黄芪、归身、甘草炙各一钱，

牛蒡五分，黄柏二钱，水煎至一盞，二服愈。

《续名医类案》

薛立斋

一妇人，患乳痈，寒热头痛。与荆防败毒一剂，更与蒲公英一握，捣烂入酒二三盞，再捣取汁热服，渣热涂患处而消。丹溪云：此草散热毒，消肿核，又散滞气，解金石毒之圣药。

陈良甫云：开庆间，淦川嘉林曾都运恭人年已五十，而病奶痈，痈（缺）后果不起。又癸亥年，仆处五羊赵经略夫人年七十一岁，隔一二年前，左乳房上有一块，如鹅卵大。今忽然作楚，召予议药。仆云据孙真人云：妇人年五十岁以上，乳房不宜见痈，见则不可治矣。幸而未破，恐是气瘤，漫以五香连翘汤去大黄煎服。服后稍减则已，过六七年后，每遇再肿胀时，再合服，必消减矣。

立斋曰：一妇人乳内结核，年余不消，口干倦怠，脉涩少食。此肝脾二经血气亏损之症，宜培养为主。乃用草药敷贴，遂不救。

《续名医类案》

缪仲淳

顾文学又善内人，患左乳岩，用夏枯草、蒲公英为君；银花、漏芦为臣；贝母、桑叶、甘菊、雄鼠粪、连翘、白芷、紫花地丁、山茨菰、炙草、瓜蒌、茜根、陈皮、乳香、没药为佐使；另用夏枯草煎浓汁丸之，服斤许而消。三年后右乳复患，用旧存余药服之亦消。后以此治数人俱效。

《续名医类案》

马铭鞠

沈姓妇患乳癌，溃烂经年，不见脏腑者一膜耳。用鼠粪、土楝树子（经霜者佳，川楝不用）、露蜂房各三钱，俱煨存性，各取净末和匀，每

服三钱，酒下，间两日一服，痛即止，不数日脓尽收敛。此方传自江西贩糖客，因治祝氏喉症得之。

张五屋录后江孟修兄验过乳癖方：白芷一钱，雄鼠粪一钱，二种晒干为末，用好酒调服饮取，一醺睡而愈（雄鼠粪，尖者是）。又一神验方，用活鲫鱼一个，山药一段如鱼长，同捣汁敷乳上，以纸盖之，立愈

《续名医类案》

薛立斋

一妇人乳痈愈后发热，服养气血药不应，与八珍汤加炮姜四剂而止。仍以前汤加黄芪、香附三十余剂，气血平复。

一妇人年逾二十，稟弱，乳内作痛，头疼脉浮。与人参败毒散倍加人参一剂，表症悉退，但饮食少思，日晡微热。更以小柴胡汤合六君子汤二剂，热退食进，方本托里药加柴胡十余剂，针出脓而愈。又一妇患此症，脓成畏针，病势渐盛乃强针之，脓出三碗许，脉数发渴，以大补药三十余剂而愈。丹溪云：乳房为阳明所经，乳头为厥阴所属，厥阴者，肝也，乃女子致命之地，宗筋之所，且各有囊囊。其始焮肿虽盛，受患止于一二囊，若脓成不针，攻溃诸囊矣。壮者犹可，弱者多致不救。所以必针而后愈也。

《续名医类案》

钱国宾

一妇人，年五十六，左乳患痈已七年，烂过半矣。中间一孔如桃，时流血水，凡贴膏药，痛反增剧，以布圈系护，防其摩擦。夫乳头属足厥阴肝，乳房属足阳明胃，乃肝胃二经之症，非单方不足以治其外，非峻补不足以养其内，以形色气味治之。用陈香橼一个，其穰之瓣如乳内之房，其色先青而后黄，青属肝，黄属胃，其味先酸而后甘，酸属肝，甘属胃，其气香，能通肝胃之气，煨黑止血，酒服和经，

此治其乳也。制一枚为末，作二次服。又用酒炒黄芪二两，益气实表，土炒白术二两，山药五钱，健脾收湿，芎、归、地、芍各一钱，养血。水六碗，煎三碗，作四次服，调至一月痊。

《续名医类案》

吴兢

李氏缘怒后两乳肿痛，寒热头疼，脉浮弦紧，此肝经气滞，兼感风邪而然。即服人参败毒散三剂，表证已退。更服小柴胡加芎、归、远志、枳壳、蒲公英，数帖乃痊。

刘氏产后左乳肿痛，肉色焮赤，憎寒壮热，头痛烦渴。诊两关浮大弦数，此属胆胃二腑热毒，气血壅滞而成乳痈也。即用人参败毒散，以解表清热，更以神效瓜蒌散及八味道遥散，连服二十余剂，其肿痛止。

蔡氏右乳痈肿如桃，内热晡热，胸膈不利，食少汗多，形体消瘦。余曰：脉息细微，此缘治痈过服苦寒之剂，故致肝脾受伤，气血亏损之极。亟用十全大补汤加远志、贝母以冀渐痊。外用隔蒜灸之，以木香饼熨之。间服八珍及补中益气汤，调理半年，气血复而痛止痈消。

《临证医案笔记》

抱灵居士

德妇，产后右乳胀成痈，溃汁不敛，恶寒，心慌，头昏，偏身风包痒，脉濡，两关细数。以四物汤去生地，加芪、神、草、荆、防、姜虫、蝉蜕、生姜二剂；以归脾汤去木香、加白芍、生姜、荆防、蝉退、僵蚕三剂，头昏愈，风包好；以养荣汤加枣仁、防风三剂，疮敛而愈。数月后头昏胸痞，风包，发热，脉滑数，以二陈汤加柴胡、栀子、桔梗、僵蚕、枣仁三剂而愈。

《李氏医案》

費伯雄

某。外吹乳癰，紅腫疼痛，發熱惡寒，恐難全消。急宜清散。

蒲公英四錢 銀花三錢 甘草節一錢 赤芍一錢半 山楂三錢
貝母三錢 細木通一錢 制乳沒各一錢 生麥芽三錢 當歸二錢
防風一錢 連翹一錢半 白芷一錢 荷房一個 茅根四錢 陳酒一兩

某。懷孕九月，內吹乳癰，腫硬色紅，寒熱，恐難全散。

全枝歸二錢 銀花三錢 青陳皮各一錢 甘草節一錢
全瓜蒌三錢 連翹二錢 制香附一錢 炙乳沒各六分 炙甲片一錢
柴胡一錢 赤芍一錢 淡黃芩一錢 蒲公英三錢 蔥白三個
茅根四錢 陳酒一兩

某。乳癰潰爛，瘡口漸收，膿亦大減，寒熱亦輕，惟胃口未醒，納谷欠香。宜以托毒，兼和陽明。

全枝歸二錢 丹皮參各二錢 川石斛二錢 赤白芍各一錢
銀花三錢 茯苓二錢 柴胡一錢 生甘草八分 陳皮一錢
香白芷一錢 省頭草 焦山楂三錢 生熟谷芽各三錢 紅棗三個
灯心十尺

復診：加蒲公英 全瓜蒌 橘核絡

某。產後乳癰潰膿，氣血虧，邪連任督，腰脊骨節俱疼，睡即盜汗。宜養營血，益衛氣。

炙綿芪三錢 金毛脊切，四錢 烏藥二錢 劉寄奴三錢 川斷三錢
炙草五分 白芍酒炒，一錢半 炒杜仲三錢 當歸二錢 羌獨活各一錢
丹參二錢 核桃一枚 桑枝三錢

《費伯雄醫案》

沈登階

正月二十二日，凡不乳婦人害乳，名曰“干奶子”。初起結核如棋子，漸大如雞蛋，有名曰“乳癰、乳粟、乳節”，乳患之名有十餘種，

但外科重在消散。然乳生此证，皆因肝火太旺，气血凝滞而成。先宜疏肝解郁消核，不至破烂，方为正治法门。今右乳周围漫肿，乳头下而及近胸近腋肢处已破烂，五、六块滴水，疮口旁肉翻出，其漫肿坚硬如石，乳头缩入不见，大非所宜。况乳头属兄厥阴肝，乳房属足阳明胃。《经》言：妇人之乳，男子之肾，皆性命之根也。奈何远道而来，不得不代为拟方，以疏肝解郁为法。

银花一两 公英一两 熟附片一钱 天花粉 木通 通草 柴胡 茯苓 栀子仁 白芥子 鲜橘叶三十片，如无橘叶用青皮
元寿丹。

龟盖一个，烧存性，研末蜜丸。

三肾膏。

鲜忍冬藤五斤 蒲公英五斤 夏枯草五斤

煮取汁，白蜜收膏。

早起，服三肾膏三钱；午后，服煎方二次；睡时，服元寿丹三钱。

二十三日，二十日纳薄物，睡倒不能起坐，破处滴黄水，乳不知痛，舌中作痛而干燥难忍，疮口五处翻出，若不知痛，乳岩必成，神仙无法。

二十四日，右乳中忽作大痛，重坠难忍，一刻不得宁，下午近胸处破头，滴粘黄水，夜间痛止安眠。按：乳有十二穰，今已窜七穰。如十二穰概行窜到，坚硬如石不软，即是乳岩也。

服药照前。

二十五日，右眼红肿羞明，浑身四肢发出鲜红脓窠，稠密痒极难忍，乳中不痛，自觉重坠稍松去一二分，饮食加增矣。遂将原方减半。

银花五钱 公英五钱 附子五分 花粉 木通 通草 柴胡 茯苓 山栀 白芥子 鲜金橘叶

二十六日，舌上灰黄厚苔退清，乳亦不痛，精神渐能振作，饮食又能加添。

服药照前。

二十七日，乳头伸出，疮口努肉平复，能起床行走，自觉乳之重坠又松，上面未穿之五穰，可以不至再穿而破烂矣。

二十八日至三十日，眼赤渐退，饮食眠睡如常，乳之上面漫肿坚硬处，似乎有些松动，乳之左右及下面，仍坚硬如石，毫无消动，破处时流黄水，惟乳按之不痛耳。

服膏丸照前。

三月初一日，饮食、眠睡皆如平昔，惟乳之破烂，只流黄水面毫无痛苦，添方易服。

鲜银花藤 生嫩黄芪 潞党参 真干术 茜草 白芥子 全当归

膏丸照服。

初二日至初五日，乳上坚硬渐消，疮口溃烂处，粘水渐干，只有一处滴水。

初六日至初十日，疮口全行收功，乳之左右上下，坚硬如石，已消软一半，无庸贴膏药。回忆如此险证，不过两句，竟能转危为安，真属万幸。十一日回府，煎药即行停止，其丸药、膏滋药，吃至乳中核消再停。至遍身脓窠，热毒尽自愈，不必医治也。

《青霞医案》

刘子维

曾某之室，乳肿不通，无乳，寒热均作，牙龈肿。

银花一两 蒲公英八钱 生地三钱 生首乌八钱 生白芍五钱
通草三钱 白芷二钱 香附三钱 干姜三钱 黄芩一钱 薄荷二钱
梔子三钱 生姜二钱

三付，一付即愈。

李俊注：此乳痈也，乳房与牙龈属阳明，乳头属厥阴，二经之气血郁，故二经之属肿而不通，寒闭于外，热生于内，故作寒热。凡痈

肿莫不由风寒壅遏，血凝气滞，热聚肉腐而成，而性情嗜好之偏，以致气血不和，内窍不扁，风寒易袭，又其主因也。《刺节篇》曰：虚邪中人，搏于脉中，血泣不行，发为痈肿，此外因也；《生气通天论》曰：营气不从，逆于肉理，乃生痈肿，则不尽外因矣。此症热已聚而肉未腐，急治之，犹可消患于始萌也。

阳明之气血不通于乳房与牙龈而为痈肿，其害犹轻；厥阴之气血不通于乳窍而生内变，其害则大。盖木之性喜畅恶郁，郁则无不鼓动以逞者。《六微旨大论》曰：成败倚伏生乎动，动而不已则变作，诚可惧也！惟白芍能泻肝肠之有余，以治其鼓动之标；惟首乌能补肝阴之不足，以治其鼓动之本。鼓动已，则血气平，而正气不至与邪同化矣。

《别录》载：何首乌外主瘰癧，消痈肿；内长筋骨，益精髓。故昔人解其能为阳之开，而治气血之结；又能为阴之合，而治气血之劣，言虽是，而尚有当申补者，盖首乌苦涩之性，实禀柔静之德，故有是效耳。夫人心惟危，易动难静，肝为之母，如响应声，故心有一念之浮动不平，而肝气即随之。浮动则窍开而邪入；不平则气拂而血壅。养生家惩忿窒欲以保其元气，明于此也。夫静而行仁者，肝之先天也；刚而喜动者，肝之后天也，未有肝气和而周身之气血不和者。何首乌入肝，柔以济刚，静以制动，以复其先天，则凡因气血浮动不平而生之疾，自可随气血之平静而复其初，非首乌博赅众长而能行气血之结也。《至真要大论》曰：阴阳之气，清静则生化。首乌之能长筋骨益精髓者，乃肝肾由清静而自行生化之功，非首乌之能锐于补也。是则首乌之消痈肿乃在内安其本，不在外攘其标，而寒热之偏与气血之结，势必有待于他山之助也，审矣。

金银花、蒲公英清热散结，为解疮毒、消乳痈圣药，均宜重用，惟心恶热，惟火克金，梔、芩泻心肺气分之热，生地清心肝血分之热。惟阳宜通，惟表宜和，白芷、薄荷开泄肌表，生姜、干姜宣通脾胃，合之香附理气血，通草通乳汁，共成治平之功，此皆首乌所不能

治而必集众药之长以为力者也。

五藏之情，中上宜清，中下宜温，诸凉药可以泻心肺之热者，即可以伤脾胃之阳，故用能通能守之干姜以为反佐，而资健运。盖阴之不可无阳，犹阳之不可无阴也。

病有宜热而佐之以寒者，保中上之清肃也；有宜寒而佐之以热者，保中下之氤氲也；有宜升而佐之以降者，降浊以镇下也；有宜降而佐之以升者，升清以清上也；有宜开而佐之以合者，阴宜守也；有宜合而佐之以开者，阳宜通也。此皆从者反治之义也。

《圣余医案论解》

巢崇山

某。乳块向下，傍夜寒热，胃呆便闭，脉小数，脓尚未成。仍当疏散。

春柴胡 生香附 连翘 酒芩 瓜蒌仁 炙乳没 大力子
皂角针 赤芍 甘草节 大贝母 橘叶

二诊：昨投疏散，寒热渐轻，乳肿仍然，脉小数，舌黄腻。宿乳停囊，阳明结热。再以消散。

柴胡 牛蒡 赤芍 土贝母 枯芩 连翘 银花 青橘叶
全瓜蒌 天花粉 炙甲片 蒲公英 制香附 甘草

《玉壶仙馆外科医案》

陈莲舫

丁。乳痈，起因毒邪走散。左臂漫肿无头，非疔也，谓之无名中毒。肿痛走窜，尚无界限，寒热发厥，十中图一，治以疏和。

全当归 飞滑石 生甘草 宣木瓜 汉防己 川羌活 小青
皮 广木香 新会皮 炒赤芍 厚杜仲 丝瓜络

《莲舫秘旨》

丁泽周

林右。乳痈根株未除，肝火湿热未清，宜和荣托毒。

全当归二钱 京赤芍二钱 紫丹参二钱 生草节八分
大贝母三钱 全瓜蒌打，三钱 忍冬藤三钱 连翘壳三钱 蒲公英三钱
青橘叶钱半 丝瓜络二钱

《丁甘仁医案续编》

贺季衡

刘女。左乳赤肿作痛，已将化脓，且根脚散漫，寒热迭作，脉沉数，舌红。肝阳及热毒俱重，宣泄为宜。

全瓜蒌六钱 大贝母四钱 京赤芍二钱 连翘二钱
细木通一钱五分 柴胡一钱 黑山栀二钱 粉丹皮一钱五分
生甘草八分 当归二钱 蒲公英五钱

二诊：乳痈自溃，脓出颇多，疮口腐肉尚未吐出，幸寒热已清。当再清肝化坚，以消余硬。

当归二钱 全瓜蒌五钱 大贝母四钱 京赤芍二钱 粉丹皮二钱
黑山栀二钱 炙甲片三钱 白蒺藜四钱 甘草节八分
金香附一钱五分 蒲公英五钱 红枣三个

三诊：乳痈已将完口，余硬亦无多，腐肉亦将尽，脉细数，舌红。荣阴暗亏，养血清肝可也。

南沙参四钱 大麦冬二钱 大白芍二钱 白蒺藜四钱
大贝母四钱 粉丹皮一钱五分 炙甘草八分 红枣三个
金香附一钱五分 云神四钱 瓜蒌三钱 蒲公英五钱

任女。左乳结硬作痛，皮外无色，按之甚热，不时掀痛，脉弦细，舌红中黄。木郁生火，化脓可虑。亟为疏泄。

当归二钱 柴胡一钱 全瓜蒌四钱 京赤芍二钱 大贝母三钱
金香附二钱 川郁金二钱 白蒺藜三钱 细青皮一钱 炙甘草八分

蒲公英三钱

二诊：左乳结硬更大，按之热，逐日寒热不清，脉弦数，舌红中黄。肝家气火尚旺，势有化脓之虑。

全瓜蒌四钱 柴胡一钱 黑山栀一钱五分 粉丹皮一钱五分
归须二钱 甘草节八分 大贝母三钱 京赤芍二钱 细青皮一钱
炒麦芽四钱 蒲公英五钱

另：青龙丸一粒，开水化服。

宋女。产后乳痈完口太早，又复赤肿作痛，热如火燎，势将复行溃脓，寒热不清，头痛，便血，脉弦数，舌红苔黄。火象显然，拟瓜蒌散加味。

柴胡一钱，醋炒 京赤芍二钱 黑山栀二钱 当归二钱
苏梗一钱五分 全瓜蒌六钱 大贝母四钱 川郁金二钱 炙甘草八分
细木通一钱五分 旋复花一钱五分，包 蒲公英五钱

另：用武八将平安膏药，青敷九成，冲和一层，外敷。

二诊：产后乳痈自溃，脓出颇多，寒热亦退，惟余硬未消，脉弦细，舌红。肝家气火未平，仍以瓜蒌散主之。

当归二钱 京赤芍二钱 大贝母四钱 蒲公英五钱
金香附一钱五分 黑山栀二钱 炙甘草八分 云苓三钱 细青皮一钱
全瓜蒌六钱 白蒺藜四钱 红枣三个

林男。乳痈肿痛屡发，此次必须溃脓，因以赤肿色充，脓已将成，四围尚硬，脉弦细，舌黄。当清肝排脓。

当归二钱 京赤芍二钱 大贝母四钱 连翘二钱 生甘草八分
全瓜蒌六钱 黑山栀二钱 细青皮一钱 云苓三钱 夏枯草三钱
蒲公英五钱

潘女。左乳窜溃三头，久不完口，四周余硬未消，脉弦细，舌红。当清肝化坚为事。

中生地五钱 当归二钱 白蒺藜四钱 陈橘核三钱 炙甘草八分
粉丹皮二钱 赤白芍各二钱 细青皮一钱 生黄芪三钱 云苓三钱

蒲公英五钱 红枣三个

《贺季衡医案》

范文甫

桂如媳。新产乳痈，红肿热痛。此阳明积热，挟乳汁壅积乳络之故也。舌红、苔黄而焦，脉弦而数。

生大黄9克 蒲公英30克 花粉9克 象贝9克 皂刺9克
银花9克 知母9克

二诊：昨日下午，热减，肿亦减。

王不留行9克 生大黄9克 蒲公英30克 花粉9克 象贝9克
皂刺9克 银花9克 沉香末0.9克，吞

《范文甫专辑》

方公博

吴女。肝气不舒，右乳肿硬，焮红乍痛，寒热乍发，头痛，筋掣，两便不利，脉数，舌苔白腻，急拟疏肝活血，散结解毒。

全当归12克 全瓜蒌18克，连皮打 制乳没各4.5克
小青皮4.5克 生甘草3克 金银花9克 软柴胡1.5克
香白芷4.5克 福桔叶12克另酒药五枚研细，酒炒布包熨之，日二三次。

复诊：右乳硬块肿痛较平，寒热渐解，头痛筋掣亦有转机，药既奏效，再与前法出入。

处方同前，除生甘草，香白芷。加赤芍药9克、光桃仁9克。

《方公博医案》

孔伯华

赵妇，六月十二日。初因乳聚，经络不畅而发乳疮，经医施行右乳手术后，近则左部又发红肿作痛，身烧，大便秘，脉滑数，宜清柔

达络。

生石膏六钱 旋复花四钱 代赭石四钱 桑寄生六钱 知母三钱
黄柏三钱 栝蒌两 乌药三钱 石决明八钱 紫花地丁四钱
黄花地丁四钱 威灵仙三钱 滑石块四钱 枯黄芩三钱 生山甲三钱
忍冬花四钱 地骨皮三钱 川牛膝三钱 莲子心三钱 酒川军一分
荷叶一个 藕两 犀黄丸二钱(分吞) 忍冬藤四钱

二诊:六月十四日。加梅花点舌丹二粒(和入汤药内),万应膏一帖。

三诊:六月十六日。石决明改两、酒川军改四分,加小川连八分。

四诊:六月十八日。去枯黄芩,石膏改为八钱,加辛薤三钱。

王妇,九月二十三日。乳痈割后,余毒未净,昼心中发热,时作咳嗽,血虚有热,病情夹杂,脉仍弦数,治宜清肝解毒。

生地炭八钱 竹茹二钱 甘草节三钱 金银花四钱 连翘三钱
甘菊花二钱 生栀子三钱 蒲公英四钱 酒黄芩二钱 赤芍药三钱
丹皮二钱 白当归四钱 土茯苓五钱 土贝母三钱

《孔伯华医集》

丁叔度

患者某某,女,34岁。左乳病痈,痛不可忍,溃流脓血,脉浮壮热,以散风清热活瘀药治之。病家欲求速效,复延他医诊治,半月后复邀丁氏往诊,见病人仰卧床上,面如白纸,旁有鲜血半盆,系由乳痈疮口流出,因自家用刀割乳疮,割破血管血流不止。遂用金伤止血法,以汉三七粉按于出血处,待血浸透药粉后,如前再用药按于患处,用水洗去一切脓血,见疮口如半月状一寸宽、二寸长,乳与脓并流,经用三七粉后约半个多小时血止,乃为之内服补血托里药。

处方:熟地 白芍 制乳没 炙罂粟壳 川芎 阿胶 水煎服

外用化腐生肌药。共治一个月，疮口平，无其他不适而痊愈。

患者马某某，女，25岁。妊娠九个月，湿热气滞，右乳肿胀坚硬，皮色微红，口干舌燥，头眩，脉滑数。

处方：银花15克 黄连4.5克 橘叶6克 青连翘9克
全瓜蒌12克 竹茹9克 浙贝9克 蒲公英9克 炒山栀9克
桔梗4.5克 枳壳3克 粉甘草4.5克

连服三剂，右乳肿胀消退，坚硬明显变软，再服两剂加黄芩9克，痊愈。

《津门医粹》

冉雪峰

江静英，女，患乳痈，自按西医法治疗，肿硬化脓，此隔未愈，彼隔又发，辗转蔓延，月余不收口，脓血瘀积，不易排出，浸渍日久，组织似将变质，补起不大注意，厥后颇觉痛苦，乃改请中医治疗，诊其脉弦劲，查其体坚实。按痈脓，普通已溃或久败多用温托，此病人脉实证实，无须用阳和汤等温托，拟方清热化毒，活血消痰，方用：银花、连翘各三钱，土牛膝、土茯苓各四钱，蒲公英、败酱各三钱，薏苡仁、瓜瓣各四钱，土木香、川郁金各三钱，鲜苇茎八钱，十一味，水五杯同煎，取一杯半，分温二服，外治以消炎溶液浸纱布条塞入疮口，三日肿消，五日脓尽，内服剂如前，外治改用生肌白玉膏，十日收口，平复如故。

再予早年治环阳鸛洲胡姓患乳痈者，与江病类似，然治江病内服剂系清化，治胡病内服剂系温托（系用当归内补建中汤、黄耆五物汤）。所以然者，江体坚实，胡体薄弱，各适其应，以平为期，可见治病不必拘于一法。

《冉雪峰医案》

施今墨

杨某某，女，34岁。产后9个月，仍在哺乳时期，两日前忽觉右乳房红肿胀痛，局部灼热，周身寒热，大便干燥，食欲不佳。舌苔微黄。脉象数而弦。

辨证立法：哺乳9个月，已非乳腺阻滞所致，良由毒邪外侵，内热积郁而发。邪热相乘，来势甚急，当以清热解毒，调和气血，以消炎肿。

处方：山甲珠10克 炒枳壳5克 酒川芎5克 酒当归6克
山慈菇10克 青连翘10克 制乳没10克 川郁金10克
苦桔梗5克 忍冬藤6克 杭白芍10克，柴胡5克同炒
全瓜蒌18克，藤白头10克同打 忍冬花6克 粉甘草3克

二诊：进药三剂，寒热止，炎肿消减，自觉肿胀轻松，按之尚痛，大便甚畅，食欲增加，再按原意加減。

处方：白杏仁6克 酒当归10克 山慈菇10克
全瓜蒌18克，藤白头10克同打 杭白芍10克，柴胡5克同炒
旋复花6克，代赭石12克同布包 山甲珠10克 制乳没10克
酒川芎5克 炒枳壳5克 苦桔梗5克 粉甘草3克

以上共服三剂，肿胀全消，已能正常哺乳。

李某某，女，26岁。初产二十天，右乳房红肿胀硬，疼痛拒按。身觉寒热不适，病已四天。大便微干，小溲黄。舌苔薄白。脉象：数。

辨证立法：热毒聚结，气血壅滞，乳汁潴留，络道瘀阻，毒热蕴积成痈。主以清热消毒，宣通络道。

处方：蒲公英24克 金银花15克 青连翘10克 全瓜蒌24克
制乳没各10克 当归尾6克 香白芷5克 山慈菇10克
萱草根10克 青橘叶10克 王不留10克

二诊：服药三剂，肿痛大为缓解，寒热已退，原方加贝母10克

再服两剂。后于来诊他病时，得知二次服药后完全消肿。

《施今墨临床经验集》

乳疽

赖松兰

乳疽坚硬肿痛，脉形左弦右濡，此由营虚气滞，气郁化热，热甚生风，游溢腠理，遍体致发痒癢。其乳房属胃，乳头属肝，肝木侮土，是以营气不从，逆于肉理，此疽之所由成也。鄙意和阳明之营，泄厥阴之肝，营气相和，诸恙可痊矣。

黄耆 当归 细生地 东白芍 瓦楞子 全瓜蒌 枸桔李
制香附 真毛菇 路路通 丝瓜络 用青桔叶三片泡汤磨伽南香
丸方：

全瓜蒌 蒲公英 真毛菇 净漏芦 连翘壳 全当归 东白
芍 制香附 香白芷 象贝母 滴乳香 明没药 广郁金 沉香
屑 炒青皮 粉甘草 夏枯花 桔叶

《赖松兰医案》

丁泽周

王右。肝不条达，胃热瘀凝，左乳生疽，肿硬疼痛。虑其增剧，急宜祛瘀消解。

当归尾三钱 赤芍药三钱 银柴胡一钱 青陈皮各一钱
全瓜蒌三钱 生草节八分 忍冬藤三钱 连翘壳三钱 炙甲片一钱
蒲公英包，三钱 青橘叶钱半 丝瓜络二钱

张右。外吹乳疽，初起结块疼痛，肝郁挟痰瘀凝结，营卫不从，宜解郁化痰。

全当归二钱 京赤芍二钱 银柴胡一钱 青陈皮各一钱
全瓜蒌打，四钱 生香附钱半 大贝母三钱 炙姜蚕三钱 蒲公英三钱

生草节八分
贴硃砂膏

《丁甘仁医案续编》

翟竹亭

北郭外王庄赵清彦之妻，年近五十，患乳疽。初得乳中结一核，大如枣许，百治无效。至半载一乳俱硬，请某医。云：“疮坚硬尚熟也。”日夜疼痛不止，无奈迎余诊治。余以指捏之，外坚而内软，问伊疼之日数，伊云：“大痛月余矣。”余曰：“痛甚者内中必是腐血，决无脓。若用刀刺破，放出败血，疼可立止，此是开门逐贼之治，亦免再坏良肉。服补养气血疏肝之剂，可图渐愈，难求速好。”患者乐治。遂用尖刀刺至软处，约二寸许，黑色败血流有二碗余，疼痛轻七八分，外上红升丹，新肉日生，精神日强，饮食日增。共服药近二十余帖而愈。方开于后。

党参 10 克 白术 10 克 茯苓 10 克 炙甘草 6 克 当归 6 克
川芎 6 克 白芍 10 克 香附 10 克 青皮 10 克 郁金 6 克
广木香 6 克 丹参 10 克 连翘 10 克 红花 3 克 陈皮 6 克
金银花 10 克 小柴胡 12 克 水煎服

杨大庄周姓妇，年二十余，生一乳疽，先往西医院调治。他医云：“业已腐坏，非割下别无良法。”患者闻此，任死不治，就治于余。诊其脉弦细劲硬，此因郁怒伤肝，思虑伤脾，肝脾两亏，必服内治药，外上红升丹，约月余方可收功。遂用健脾疏肝之药，服五帖后，腐肉尽脱，新肉日生，上药每日两次，又服药十帖，已轻四五。共服药二十余帖，始终近五十天痊愈，且无分毫残废。方用于后。

党参 12 克 茯苓 10 克 白术 10 克 炙甘草 6 克 当归 10 克
川芎 10 克 生地 10 克 白芍 10 克 柴胡 15 克 丹皮 10 克 红花 3 克
金银花 10 克 瓜蒌皮 10 克 连翘 10 克 桔梗 6 克 水煎服

邑北窦贵寨曹长贵余仁侄也，其妻患乳疽。赴他医调治月余无

效，迎余往诊。见一乳烂去一半，脓水交流，其色紫黑，骨瘦似柴，言语低微，面色焦黄，诊其脉濡弱虚细。告伊曰：“乳者属肝脾胃三经。此证因郁怒伤肝，思虑伤脾，肝脾气郁，结于乳房，血为之不行，结而为患。”此证非从内治弗愈，先后服药疏肝健脾以绝根株，患处上大金丹，提脓拔毒，化腐生新，经曰：“治病必求其本”即此谓也。遂用八珍汤加减，服五帖，脓渐稠，新肉渐长，饮食日增。共服十五帖，月余痊愈。此证倘不服药，专用外治，舍本不问，吉凶不可知也。

八珍汤加减

党参 12 克 茯苓 12 克 白术 10 克 当归 10 克 川芎 6 克
白芍 10 克 熟地 10 克 穿山甲 6 克 瓜蒌皮 6 克 青皮 6 克
白芷 6 克 乳香 10 克 香附 10 克 金银花 10 克 清半夏 10 克
甘草 6 克 水煎服。

《湖岳村史医案》

乳中结核

张千里

杭州王平居，嗜酒，湿凝阳郁为病，去秋四肢疼痛，两足及左臂为甚，乃是湿蒸气滞，足太阴、阳明脉络不宣也，继则鼻衄，《难经》所谓阳络伤则血外溢，阴络伤则血内溢，热泄气通，自然络痹较衰矣，今春左乳结核，时咳痰稠，体疲脉濡，舌黄目昏，耳钝亦湿邪上蒙耳，然络病宜清，腑病宜通，时值夏令，收效难速，拟用和阳化湿，清气宣络缓图之。

潞党参二钱 法半夏一钱 木防己一钱五分 赤豆衣三钱
竹茹七分 新会皮一钱五分 生冬术一钱 川黄柏一钱五分
粉丹皮一钱五分 云苓二钱 炙甘草四钱 米仁三钱 建泽泻一钱五分

《千里医案》

吴簾

周介室人，产后乳内生核，肉色如故，五心发热，肢体倦瘦。诊两关弦数而滑。乃肝脾二脏郁热，气血壅滞而然。速服瓜蒌散，用瓜蒌一个，乳香二钱，以酒煎先治之。外用南星为末，以温汤调涂甚效。继用八味逍遥散及归脾汤，乳核日消，后服此丸遂愈。

熟地四两 蒲公英 当归各二两 白芍 贝母 橘叶 泽兰
女贞子 茯苓各两半 远志五钱 川芎八钱 青皮七钱，醋炒
夏枯草一两 为末，蜜炼为丸。

《临证医案笔记》

何书田

肾虚，肝络不和，乳中结核。治以滋肝兼通络化痰法。

制首乌 牡丹皮 瓜蒌仁 川郁金 青皮 茯苓 全当归
石决明 化橘红 白蒺藜 蒲公英

《葑山草堂医案》

王孟英

仲秋偶觉左乳微疼，按之更甚，始知有坚核如小豆大，外微肿，即取外科药围涂，而以纸盖之，迨药干，揭之甚痛，余不能忍。且金云必破而不易收功，以其在乳盘之内也。余不畏死，而惧不能受此楚毒，因往求吕君慎庵视之。曰无虑也，扫榻款留。日以葱白寸许，嵌入梅花点舌丹一粒，旋复花三钱煎汤下；外用洞溪束毒围围之，亦以纸盖之，而药干则自然脱落，略无粘肉伐毛之若，此玉精炭之妙用也。凡十二日，核渐消尽。深佩吕君之德，谨录之以识其手眼之不可及，而方药之效验，俾后人亦有所征信也。

《归砚录》

顾德华

尤。乳房结病，大小不一，起经四载，屡发酸胀，痛楚则更坚大，胸膈梗痛如束，脉弦舌红。一派肝郁，结于阳明部分也。有关格之根柢，怡养为佳。

制首乌四钱 乌药一钱 青皮三分 归身一钱五分 川贝母三钱
广郁金三分 橘络一钱五分 白芍一钱五分 瓜蒌皮三钱 杞子二钱
左金丸五分

又诊：乳病痛缓胀松，胸膈亦舒。脉症合参，究系营虚肝郁也。

制首乌四钱 川贝母二钱 枣仁三钱 归身一钱五分
元参一钱五分 枸杞三钱 柿霜三钱 东白芍一钱五分，生炒各半
广郁金四分

《花韵楼医案》

费伯雄

某。乳病僵强，延绵三月，刻今疼痛，急宜消散。

川贝母三两 醋煅牡蛎六两 京玄参二两 橘皮核各一两
酒炒白芍一两 全当归二两 川郁金二两 夏枯穗二两 香附二两
醋炒青皮一两

上药研末，加青橘叶二两煎水泛丸。

《费伯雄医案》

马文植

屯村，张。肝胃气火郁结，左乳房结核硬如杯大，内热胸闷，月事不调。拟养阴清气化坚。

北沙参 连翘 僵蚕 橘叶 全瓜蒌 青皮 法半夏 夏枯
草 象贝 当归 赤芍 郁金

二诊：乳核见松，发热头眩胸闷亦减。原法。

沙参 丹皮 当归 白芍 贝母 瓜蒌 香附 连翘 甘草
法半夏 青皮 郁金 橘叶

《外科集腋》

陈莲舫

伯平兄。乳癖渐小，脘痛，盗汗，脉象濡细，再和肝脾。

吉林须 远志肉 制丹参 川杜仲 佛手花 真毛菇 广陈
皮 生白芍 抱茯神 炒归身 旋复花 绿萼梅 代代花 丝瓜
络

《莲舫秘旨》

贺季衡

朱男。两乳结核已久，比增人夜发热，不汗而解，热时则乳核酸痛，幸饮食如常，脉细数，舌红。水亏木旺，肝家气火上升。先当滋阴清热。

南沙参四钱 地骨皮四钱 炙甘草五分 青蒿一钱五分
大贝母四钱 川石斛四钱 炙鳖甲八钱，先煎 大白芍二钱
粉丹皮二钱 云苓三钱 炒竹茹一钱五分 青荷叶一角

娃女。右乳结硬十余年，日来抽掣作痛，夜热口渴，头目眩痛，脉弦数，舌苔浮黄。肝家气火内灼，慎防腐溃翻花。拟道遥散加味。

当归二钱 大白芍二钱 白蒺藜四钱 黑山栀二钱 川郁金二钱
大贝母四钱 细青皮一钱，醋炒 生石决一两，先煎 醋炒柴胡一钱
杭菊炭二钱 夏枯草三钱 金橘叶卅片

江女。左乳结核年余，或大或小，或作痛，幸推之可移，非乳岩也；脉弦数而滑，舌红无苔。肝家气火郁结，与阳明宿痰相薄而来。势无速效，先当清肝化坚。

当归二钱 赤白芍各二钱 全瓜蒌六钱 白蒺藜四钱
大贝母三钱 川郁金二钱 生牡蛎六钱，先煎 金香附二钱

细青皮一钱 夏枯草三钱 金橘叶卅片

丸方：清肝化痰，以消结核。

大生地四两 柴胡六钱 当归二两 赤白芍各二两 陈橘核三两
白蒺藜三两 大贝母三两 全瓜蒌六两 蒲公英三两
黑山栀一两五钱 牡蛎四钱 炙甘草五钱 金香附一两五钱
金橘叶一两五钱

上为末，夏枯草四两，煎汤泛丸。每服三钱，开水下。

另：龙泉粉二钱 金香附五钱 大贝母一两 山慈菇一两

上味研取细末，加麝香五分，和匀，用醋加蜜水调敷。

江女。乳癖三年，日以益大，比增色紫作痛，已将化脓，四围余硬之根脚尚大，脉细左弦，舌红中剥。阴血暗亏，肝家气火内蕴，与宿痰相薄而成。溃后最防流血翻花，亟为清肝化坚。

当归二钱 大白芍二钱 大贝母四钱 白蒺藜四钱 川郁金二钱
煨牡蛎五钱，先煎 细青皮一钱 黑山栀二钱 醋炒柴胡一钱
炙甘草八分 粉丹皮二钱 夏枯草三钱

另：八味逍遥丸三两，每服三钱，开水下。

另：龙泉粉二两，大贝母一两，荆三棱五钱，蓬莪术五钱，麝香一分，研末醋调敷。

《贺季衡医案》

张山雷

陈右。乳癖兼有湿热，皮肤痒搔，牵引腋下，脉滑，舌不腻，胃纳不爽，先以和血化湿。

全当归 6克 白鲜皮 9克 蠶梗 4.5克 茵陈 6克 玄参 6克
丹皮 3克 半夏 4.5克 橘叶 4.5克 沉香曲 4.5克 木香 1.5克
丹参 6克 山栀 6克

《张山雷专辑》

王孟英

斜桥苏氏妇，年二十四岁，患乳肿如悬瓠，溃处日流水，医治二百餘日，略不见效。冬初求治于余，视其面色青瘦，微嗽唇红，音朗不嘶，寒热暮甚，日进粥两盏、饭半盏。所服之药，洋参、鳖甲、丹皮之类，皆谓疮劳已成，不过苟延时日也。余知其因循误药致此，以纸捻入药于疮孔，嘱到家自为抽换。妇云：胃气不佳，求赐一方。余曰：汝误药至此，尚不悟耶？停药五日，胃自苏矣。又问究成劳否？余给之曰：后五日来，当赠汝妙药，决不成劳也。忻然而去。越五日来曰：奇哉，到家方暮，觉乳胀，抽去药线，出清脓碗许，是夜寒热顿减；近来抽换，日得清脓杯许，今不复如前肿硬矣。饭已可进两盏，固求赐方。余曰：煎剂费事，余有合就丸药，日服数钱可也。持去后，越旬复来曰：自服妙药，胃气胜于平时，惟脓水未净，月事未行，求一通经方。余见其肌肉丰润，两颊红晕，经已将至。若不与药，而另求内科通经，反恐误事，仍以前丸与之。后即全愈受孕。其实两次所用之药，皆饭焦磨末，少加橘皮而丸也。余治六、七年不愈之乳证，用药线刀针愈者，不胜仆数。即如此妇，若不插药，脓何由出？寒热何由止？胃气何由复？岂但疮劳而已，殆无生理矣！设不停药，肠胃津液被伐，必致绝粒。尝谓汉、唐方士以金石杀人，赖高贤救止，而草木延年补益诸说，牢不可破，真医道没而枉死者多矣。窃怪今之医生劝人服药，吾不知其居心何为？或问：断为死证而得不死，何也？曰：医之所谓死证，彼自有死之之法耳。断为死证而竟死，昧者必咎其术之神，而医者亦诩其断之准，而自鸣得意。悲夫，业医者知此有几人哉？

细君上年病后，以清养药熬膏，服至岁杪，已康复胜常。孟春十八日，分娩亦快健。七日后，余即游武林，继返硤川，由梅溪而游嘉秀，至清明归，为展墓也。知其左乳裂疼，乳房亦痒，搔即水出，起已月餘，初谓外恙不足虑，令取疡科普药敷之。余复鼓棹游梅泾而至

桃李，又浮海游崇沙，迨归已届端阳矣。见其右目胞坍而甚赤，询厥乳患，左加甚而更及于右，诸药久敷，皆无偶效，且兼气冲痰嗽，口渴肤糙，盖津液悉从外患而耗也。察其脉滑而数，良由肺胃热炽使然。遂授元参、石膏、知、翘、甘、苈、菱、梔、菖、菊、蛤壳、银花等，二十馀剂而各恙并蠲。既而余游吴越间者月馀，归见其遍身暑疖，形瘦少餐，食后神疲，二便不畅，脉则弦涩不调。与元参、丝瓜络、梔、连、菖、橘、菱、苑、薇、苏，四帖而经月之病若失，亦因气郁热壅也。可见治病必探其源，勿徒遏其流，而故人管君荣棠尝谓外证不宜服药，盖为服不得其当，及信书太过、泥用成方者言耳。若宣气清血之法，原不禁也。

《归砚录》

方公溥

卢女。十一月二十七日诊：分娩期近，乳泄无度，神疲乏力，腰部酸楚，脉象细滑，舌淡苔薄，亟宜固摄培元，以免生端。

软绵芪9克 炒当归9克 白芍药9克 淡子芩4.5克
桑寄生9克 熟地黄9克 制川芎4.5克 云茯苓9克 大冬术9克
炙甘草3克 炒厚杜仲9克 别直参1.5克，另外兑入

十一月二十九日复诊：乳涌较减，腰楚渐平，头痛眩晕，再进前法参以养血和肝之品。

处方同前，除别直参、杜仲、绵芪。加潞党参9克、石决明12克、嫩勾尖9克、蔓荆子9克。

三诊：乳涌已止，腰楚亦平，头痛眩晕好转，喉咙入夜哽痛，再从前意出入。

处方同前，除蔓荆子、嫩勾尖，加炙绵芪9克、京元参9克。

《方公溥医案》

痔疮

薛立斋

王侍郎之子患痔，作渴发热，尺脉洪数，按之无力。薛曰：此肝肾阴精亏损，虚火妄动，当滋化源。彼不信，后吐痰声嘶，面赤倦疲而殁。

一进士周素有疝痔，劳则小腹上疔作痛，茎出白津，痔则肿痛。若饮食劳倦，则发寒内热，体倦吐痰。服十全大补，诸症皆愈。犹欲速效，乃易药攻之，肌体骨立。薛用补中益气、地黄丸，元气渐复。

一士人患痔，脓血淋漓，口干作渴，晡热便血，自汗盗汗。薛曰：此属肾阴虚也。彼不信，乃服柏、知、连、翘以致食少泻呕。乃先用补中益气加茯苓、半夏、炮干姜，脾气渐醒。后用六味丸，与临卧服，两月而愈。

一男子误服寒凉之剂，虚证悉具，每晨去后稀溏，食少体倦，口干无津液，时觉下坠，此元气下陷也。用补中益气汤而下坠断止，投四神丸而食进便实，用六味丸而津生疮愈矣。

一膏粱酒色之人，患痔作痛。服寒凉之药，竟臀肿硬，又加大黄，腹胀头痛。为用补中益气汤，升补阳气，加参、苓、半夏、木香，以助行气，数剂而愈。

陆上舍冬患痔作痛，右寸浮大（肺金生化之源已绝），左寸口洪数（心火嫌原于天，非壮水不可）。薛曰：冬见夏脉，当壮水之主，以镇阳光。彼以为迂，别服芩、连之剂。薛谓其侄曰：令舅氏肾水不能生肝木。殁于春，验矣。今令叔肾水不能制心火，当殁于夏至甲辰六月，薛复视之。痰涎上涌，日夜不寐，脉洪大而数，按之无力，左尺全无，足膝肩脯逆冷。薛曰：事急矣。彼云：但求少延数日，以待嗣子一见姑用参、芪、归、术、炮姜之类，及六味丸料，加肉桂，至本月而殁。五行之理，

信然。

《名医类案》

孔华峰

一人患痔，浓血淋漓。用黄连去毛为细末，蜜调，空心服二三钱，立效。

江应宿述：予年四十有六，盛夏北上，途中酷暑，鞍马之劳，饮烧酒，食葱蒜（火毒），抵燕，患痔如荔枝大，每更衣脱出，移时渐上，后重胀闷。以川连一斤去毛，无灰酒七斤，慢火煮黑，滴稠如蜜，加清酒调服，脱然如失。后二年六月出塞，复患如前，再服黄连煮酒一匕而愈，永不复发。宿述经云：饮食饱甚，筋脉横解，肠癖为痔，多起于房劳心苦，饮食不节。补起则易为力，久而成漏，宜禁灸燔饱食，或房劳忧怒，内观自养可也，幸勿妄用穿针挂线烂药，内病不除，徒伤正气，致损天命，慎之。

《名医类案》

孙文垣

周文川肛上生一肿毒，月余脓溃矣。但少动则出鲜血不止。大便燥结，胸膈饱闷，饮食不思，脉之两寸短弱，关弦尺洪滑。此气虚血热隐于下部，宜补而升提，不然痔漏将作，可虑也。黄芪二钱，归身、地榆、槐花、枳壳各一钱，升麻、秦艽各七分，荆芥穗五分，甘草三分，服后胸膈宽，惟口苦甚。前方加酒连、连翘各五分而愈。

高仰山内人痔血，里急后重，饮食入腹，大便即行，昼夜五、六度，五更咳嗽痰喘，肌肉脱，口作渴。由服凉血之剂过多，致脾虚不能统血也。脉之六部皆软弱无力。以君子汤加荆芥穗、秦艽、陈皮、炮姜，四贴而饮食进，血全止，嗽亦定。减炮姜，倍加何首乌，又四贴遂数年不发。

徐检发老寒热，臀近肛硬处生一毒，红肿而痛，坐卧为艰。外科

以线针点开，插药线于内，涂以烂药，使脓血急溃。又与敷生肌药，使易收口，受谢而去。未半月，硬处之旁又红肿痛，寒热交作。召前医，治法如前。受谢以去。违医违患，凡半年矣。诊之面色青惨，脉皆濡弱，手足如冰，饮食减半。究所服则槐角、生地、黄柏之属。曰：此痔痢，非痔漏也。痔漏当用桂线以五灰膏点之，可愈。令肿硬无定处，离肛门且远，其初只可大补气血，即有毒亦宜托出，一脓而愈。此王道之治不胜于针刀万万？哉乃内用寒凉，外用收口，动辄挂线，致疑滞流注，愈而屡发，非禀厚气强，六旬余安能当此？与十全大补四贴，饮食加，手足暖。大便艰涩，向润之而不行者，今亦通利。再以首乌四两，人参、枸杞、当归、黄芪、熟地各二两，槐角、秦艽各一两，蜜丸服之。肿处出少脓，全瘳。徐喜而谑曰：予非孙君，诸外科视此臀为金穴矣！呵呵！

医学博士齐德之云：予读《养生必效方》，见干义傅僧觉海少年患痔疾，其行业比冰霜，缘此饱食久坐。知痔疾者不必酒色过度矣。故《素问》云：因而饱食，筋脉横解，肠癖为痔。治之故不同也。三神丸：枳壳、皂角、五倍，蜜丸，每服二、三十丸。

黄履素曰：予中年患痔，点洗都不效，惟白萝卜煎汤频洗差佳。近读《环集》中载冬瓜皮同朴硝煎洗翻花痔，立愈。又法以白萝卜代冬瓜亦效。冬瓜未之试，萝卜已验矣。

《续名医类案》

薛立斋

儒者杨举元，素阴虚，劳则肢体倦怠，两足发热，服清热等药，热至腰膝，大便涩滞，饮食过多则泻。至年余作渴吐痰，患痔出脓。仍不节劳，则忽恶寒发热，复患痢，脓水不止，气血虚甚。仍用六味丸、补中益气汤滋养化源，喜其慎疾，年余而痊。

《续名医类案》

陈自明

一男子患痔，未成脓，苦痛，大便难。与神仙太乙丹一铤，去后二吹，痛即止。不日而消。

《续名医类案》

薛立斋

一男子患痔，大便燥结，焮痛作渴，脉数，按之则热，以秦艽苍术汤，二剂少愈；更以四物汤加芩、连、槐花、枳壳四剂愈。

一男子素不慎酒色，患痔焮肿，肛门坠痛，兼下血，大便干燥，脉洪大，按之则涩。以当归郁李仁汤加桃仁，四剂少愈，更以四物汤加红花、桃仁、条芩、槐花数剂而愈。大抵醉饱入房，则筋脉横解，或精气脱泄，脉络一虚，酒食之毒乘虚流注；或淫极强固精气，遂传大肠，以致木乘火热而毁金；或食厚味过多，必成斯疾。夫受病者，燥气也；为病者，湿热也；宜以泻火和血、润燥疏风之剂治之。若破而不愈即成漏矣。有患臀者，有患阴者，有穿肠者，有秽从疮口而出者。形虽不同，治法颇似。其肠头肿成块者，湿热也；作痛者，风也；大便燥结者，火也；溃而为脓者，热胜血也。当各推其所因而治之。

一男子患痔成漏，每登厕则痛。以秦艽防风汤加条芩、枳壳，四剂而愈。以四物加升麻、芩、连、荆、防，不复作。

一男子患痔漏，每登厕则肛门下脱作痛，良久方收。以秦艽防风汤，数剂少愈。乃去大黄加黄芪、川芎、白芍而痛止。而以补中益气汤二十余剂，后不再脱。

一妇人患痔，肿焮痛甚。以四物汤加芩、连、桃仁、红花、丹皮四剂，少止；又数剂而愈。

一妇人素患痔漏，每因热则下血数滴。以四物汤加黄连治之，即愈。后为大劳，疮肿痛，经水不止，脉洪大，按之无力。此劳伤血气，血动而然也。用八珍汤加芩、连、蒲黄，二剂而止。后去蒲黄、芩、

连，加地骨皮数剂而安。丹溪云：妇人崩中者，由脏伤损，冲任二脉血气俱虚故也。二脉为脉经之海，血气之行，外循经络，内营脏腑，若气血调适，经下依时；若劳动过极，脏腑俱伤，冲任之气虚，不能约制其经血，故忽然而下，谓之崩中暴下。治宜大补气血之药举养脾胃，微加镇坠心火之药治其心。补阴泻阳，经自正矣。

一男子有痔漏，每发如厕肛脱，良久方止。诊其脉细而微。用补中益气汤三十余剂，遂不再作。丹溪曰：脱肛属气热气虚，血虚血热。气虚者，补气参、芪、芎、归、升麻；血虚者，四物汤；血热者，凉血四物汤加黄柏。肺与大肠为表里，故肺脏蕴热，则肛闭结；肺脏虚寒，则肛门脱出。有妇人孕育用力，小儿久痢，亦致此。治之必须温补肺脏、肠胃，久则自然收矣。

临安曹五方黄院荐引为高宗取痔得效，后封曹官至察使。用好信石色黄明者三钱，打如豆大；明矾一两为末；好黄丹水飞炒紫色五钱；蝎稍七个，净洗瓦上焙干，研末；草乌紧实光滑者，去皮生研末一钱。右用紫泥罐，先将炭火煨，放冷，拭净，先下明矾烧令沸。次下信人矾内，拌匀文武火煨，候沸再搅匀，看罐通红烟起为度。将罐掇下，待冷取研末。方入草乌、黄丹、蝎稍三味，再同研极细，入磁罐内收贮。如欲敷药，先煎甘草汤或葱、椒煎汤洗净患处，然后用生麻油调前药，以鹅毛扫药痔上，每日敷药三次，必去黄水如胶汁然，痔头渐消。看痔病年深浅，年远者不出十日可取尽；日近者俱化黄水，连根去尽。更搽生好肉药，应是五痔皆去之。（名如神千金方）

李防御方：五痔原，痔者，贫、富、男、女皆有之。富者酒色财气；贫者担轻负重，饥露早行；皆心肝二血。喜则伤心，怒则伤肝，喜怒无常，风血侵于大肠，到谷道无出路，结积成块。出血生乳，各有形相。妇人因经后伤冷，月事伤风，余血在心，经血流于大肠。小儿因利后或母腹中受热也。先用水澄膏护其肉，郁金、白芨各一两，或加黄连，右二味为末。如内痔，候登厕翻出在外，用温汤洗净，不须坐，侧卧于床即出。用蜜水调令得中，篦挑涂谷道四边好肉上，留痔在

外，以纸盖药上，良久方用枯药搽痔上，用笔蘸温水于纸上，不令药干。及四散枯药用好白矾四两，生信石二钱半，朱砂一钱生研极细，右各研为细末。先用砒入紫泥罐，次用白矾末盖之，用火煨，令烟断，其砒尽随烟去，止借砒气于矾中耳。用矾为极细末，看痔头大小，取矾末在掌中，更入朱砂少许，以唾调稀，用篦头涂痔上周遍。一日三上，候看痔头颜色焦黑为度。至夜有黄水出，切勿他疑，水尽为妙。至中夜上药一遍。来日依然药三次，有小痛不妨。换药时以碗盛新水或温汤在边，用笔轻洗痔上旧药，更上新药，仍用护肉药。次用荆芥汤洗之。三两日后黄水出将尽，却于药中增朱砂，减白矾，则药力即缓。三两日方可增减，渐渐取之，庶不惊人，全在用药人。看痔头转色，增减厚薄敷药，方是活法。此药只是借砒信耳，又有朱砂解之。一方士将此二方在京治人，多效，致富。一富商因验，以百金求得之。录于予，予虽未用，传人无不言效。但枯药赵宜真炼师以刊于《青囊杂纂》如神，千金方未见刊传。大抵今人言能取痔者，皆此方也。恐气血虚或内邪者，还当兼治其内，庶不有失。

《续名医类案》

薛立斋

一男子，痔疮肿痛，便血尤甚，脉洪且涩，经云：因醉饱，筋脉横解，胀僻为痔。盖风气通于肝，肝生风，风生热，风客则淫气伤精，而成斯疾。遂与黄连、当归、芪、生地、防风、枳壳、白芷、柴胡、槐花、地榆、甘草治之，渐愈。次以黄连丸而瘥。

一男子患痔，脉浮鼓，午后发热作痛。以八珍汤加黄芪、柴胡、地骨皮治之，稍可。彼欲速效，用劫药蚀之，痛甚，绝食而歿（此用枯药者宜先治其内，内愈而后可治其外也）。夫疮之溃、敛，气血使然也。脉浮鼓，日晡痛，此气血虚也。丹溪云：疮口不合，用大剂参、芪、术、归、芍补之，外以附子饼灸之，更以补药作膏贴之。

一男子年逾四十，有痔漏，大便不实，服五苓散，愈加泄泻，饮

食少思。此非湿毒，乃肠脾胃虚也。当以理中汤治之。不信，仍服五苓，愈甚。乃以理中汤及二神丸，月余而平。

李遼因痔疮怯弱，以补中益气汤少加芩、连、枳壳治之，稍愈。后因怒加甚。时仲冬，脉得洪大。谓：脉不应病，此乃肾水不足，火来乘之，药不能治。果殁于火旺之月。常见患痔者肾脉不足，俱难治。

刘商有痔，肛门脱出，此湿热下注，真气不能升举。诊其脉果虚。遂以四君子汤加黄芩、芍、归、苍术、黄柏、升麻、柴胡服之，更以五倍子煎汤熏洗。彼以为缓，乃用砒霜等毒药蚀之而殁。夫劫药特治其末，且能伐真元，鲜不害人，慎之。

徐生因痔，气血愈虚，饮食不甘，小便不禁，夜或遗精。此气虚兼湿热而然，非疮故也。以补中益气汤加山茱、山药、五味兼还少丹治之而愈。

一男子患痔漏，脓出大便，诸药不应。诊其脉颇实。令用猪腰一个，切开后黑牵牛末五分，线扎，以荷叶包煨熟，空心细嚼，温盐酒送下，数服顿退。更以托里药而愈。（即埋肾散）

《续名医类案》

朱丹溪

一人肛门生疔，后不收口。有针窍三孔，穴边有脓。用黄芪、条芩、连翘、秦艽，右末之，神曲丸服。（治法）

予庚戌除夕痔作，时官舍合肥，艰得医者。取官局钓肠丸一百二十粒，分为二服，热酒并服之。中夜腹间微痛，下少结尿，旦起已安。治证具载本方，所以作效速者，以服多故耳。（百乙方）

葱青内刮取涎，封停人蜜调匀。先以木鳖子煎汤熏汤，然后敷药。其冷如冰。唐仲举云：曾有一吏人苦此，渠族弟亲合与之。早饭前敷，午后以榜纸来谢拜于庭下，疾已安矣。

郑器先用之亲曾等效，其法鸠骨尖少偃处即是穴，麦粒大艾

炷灸七壮或十四壮，甚者二十一壮。上疮发即安，可除根本。

《续名医类案》

薛立斋

一人痔漏，口干，胃脉弱。此中气不足，津液短少，不能上润而然。以黄芪六一汤、七味白术散治之。或曰：诸痛痒疮皆属心火。遂服苦寒之药，大便不禁而殁。夫诸痛痒皆属心火，言其常也。始热终寒则反常矣，可泥此而不察乎？

《续名医类案》

许叔微

一人肠风脱肛不收，有血下。用皂角三茎，槌碎，水一碗，揉令皂角消尽，用绢二重滤去清汁数分，将脱肛肠浸在药中，其肠自收，不用手托。如大肠收了，更用汤烫其脱肛上，令皂角气行则不再作，三次烫愈。

《续名医类案》

龚之才

小儿脱肛因久患泻痢所致。宜用葱汤熏洗，令软送上。或以五倍子末敷而频托入。又以五倍子煎汤洗亦可。又以鳖头，烧存性，香油调敷。一云此物烧烟熏之，久自收。又以东壁土泡汤，先熏后洗，亦效。

苏东坡与程正甫书云：凡痔疮宜断酒肉与盐、酪、酱菜、厚味及粳米饭，唯宜食淡面一味及以九蒸胡麻即黑芝麻，同煎去皮茯苓，少入白蜜为面食之。日久气力不衰而百病自去，而痔渐退。此乃长生要诀，但易知而难行耳。

江夏铁佛寺蔡和尚病肛门痔漏，不可忍。有人教用木鳖仁带润者，雌、雄各五个，乳细作七丸，碗覆湿处，勿令干。每以丸唾化

开，贴痔上，其痛即止。一夜一丸，自消也。后用治数人，皆效。

《续名医类案》

张子和

赵君玉常病痔。凤眼草、刺猬皮、槐根、狸首之类皆用之。或以干姜作末涂，猪肉炙食之，大便燥结，不利用瘤，疑痿。后数日因病黄，大涌泻数，不言痔作矣。

《续名医类案》

薛立斋

治一男子臀患漏，口干发热，喜脓不清稀，脉来迟缓。以豆豉饼灸及服八珍汤加麦冬、五味子、软柴胡、地骨皮，三月余而愈。后因不慎房劳，复溃。脓清脉大，辞不治。果歿。河间云：因病致虚则为轻，盖病势尚浅，元气未虚也。至病初愈而劳复，饭食劳倦或房劳，七情六欲，阳痿阴弱，如致羸损，此因虚致损则为重，病热已过，元气已索之故也。

一男子年愈二十，稟弱，左腿外侧患毒，三月方溃。脓水清稀，肌肉不生。以十全大补汤加牛膝二十余剂，渐已；更以豆豉饼灸之，月余而痊。又一媼左臂结核，年余方溃，脓清不敛；一男子患贴骨瘤，腿细短软，疮口不合；俱饮十全大补汤，外用附子饼及贴补药膏调护得宜，百贴而愈。大凡不足之症。宜大补之兼灸，以接补阳气，祛散寒邪为上。

京师董赐年逾四十，胸患疮成漏，日出脓碗许。喜饮食如常。以十全大补汤加贝母、远志、白薇、续断，灸以附子饼，脓渐少，谨调护，岁余而愈。

一男子患漏，时值阴寒，忽恶寒，右手脉有而似无。此胃气虚而不任风寒也。以四君子汤加炮姜、肉桂，二剂少止；又四剂而安。

姚应凤治郑孝廉患流注穿漏，垂死。应凤曰：气从下洩，难奏

功。乃取药作靡，周身封以败楮，隙肩井穴，吸之而愈。

《续名医类案》

北山友松

布施氏，年六十余。毒患痔疾，庚申秋月，燥令大行，大便结硬，数至圊而不能便。日久下迫广肠，僻裂努出，其痔如榴花然。外科敷药，虽收复发，后用针灸涂抹油膏，因大便时，清血随滴，而痔依旧翻出，肛边生疮，痒而复痛。一医内服外敷，亦不见效。一日登圊，忽下清血不止，事急，请予诊视。予至则倒于寝矣。诊之两手俱绝，不及问候来历，令急煎人参五钱许，煎成缓缓灌入口中。少顷，其脉应指如蛛丝然，再三灌之，乃醒人事，而能认得人矣。又撮补中益气汤，如《脾胃论》之方之数复升当归如黄芪之目，人参同之，再加酒芍药，充当归之数，九味共作一帖，水二盅，煎一盅，作三次温服。仍间服独参汤。次早诊之，脉洪而软弱。予告其妻子仆从曰：“久痔失血，脉当小缓，今反之者，难复其本欤，别请良医可也”。妻子苦求曰：“家翁识先生久矣，一旦闻辞药之言，势必再绝。望先生怜之。”予不得已再与前法调理三日，病者言行如常，只苦下疾临圊翻出，血丝点滴不绝，且素好清洁，每圊后以温水净洗，而水为之色变，使婢拭干。一任外科敷贴焉，不知外科妄贪速效，以砒、矾、硝、乌枯痔杂药搽擦月余，临圊虽宽，肛门腐坏，肌肉难生。每敷药之时，其气臭如屁者，从魄门冲出，恍如燃薪吹火之势焉。予闻之谓其妻孥曰：“令家翁餐之谷肉果菜有数，魄门冲泄之气无限，魄门即肛门也。大肠与肺为表里，肺藏魄而主气，肛门失守，则气陷而神去，故曰魄门矣。此虽出外科之妄，或由天命之尽耶，未可知也，吾欲使翁预知何如？”妻子闻知失色，含悲而已。他日因收官债而有喜色时，予论及石崇豪富，范丹穷苦，甘罗早贵，吕望晚荣，颜子短命，老彭高寿，六人总归天乎命乎人乎？渠笑云：“儒不云乎死生有命，富贵在天？”予带笑曰：“翁若天命有尽何如？”翁笑曰：“全身葬在某寺足矣，某尝

与寺僧有约矣。”良久曰：“但官债未白，使某过冬收拾官债，付与儿曹，则世事亦足矣，岂贪老毫之限乎？”予于是褒其有超人之见，微笑而别。时十月望也。后易外科付贴稠粘膏药欲保下吹之气之泄少矣，于是每日撮人参养荣汤三钱半，外增新罗参一钱为一帖。其或见他症，如伤食，如感冒，如劳心，如劳动，则易药处治。别煎人参膏以参末调和为丸，每服一钱许，日三，前后计用人参九斤许。及过残腊，朔风匝地，严寒逼人，一如常时，饮啖自若，应酬礼宜，不知怠倦，其收放结算，有家人管理焉。新正启贺停药三日，自觉起居不便，四肢无力，口失滋味，目不欲开，言不欲发，心神懒惰，乃云：“先生尝云人参开胃消食，久服延年，谅不虚也。我停服人参三日，便成死态也如此，惜乎不早知此神草，临死服之，亦能延我百日之残喘者。”予闻之曰：“为神农氏左袒者，其在翁乎。”病者欢喜，依前服之。数日后，其神气又复常耳。延至仲春之望，忽尔小便不通，自觉便道内无急胀之苦，外无点滴之水，唯溜入广肠随大便而出焉。此乃外科毒药急攻，蓄毒于内，蚀于溺道而致然也。后又腐坏及臀，以至不救焉。前是冬初，与翁谈及生死有份之事，翁愿过冬收债为足焉，故藉大力神草，而补难补下脱之气，假摇光紫气，而延莫延有限之时者，实缘不期然而然之奇物也，详记之，以遗子弟作榜样云。

壮男患内痔，直肠肿痛，脓汁不干

当归 桃仁 枳壳 苦参 白芷 地榆 红花 甘草节 兼用苦参丸每服十丸。

四旬余男，患内痔。结粪疼痛不已。夜甚。脉左弦尺弦实，右浮弦五动余。

当归尾 赤芍药 川芎 荆芥 地榆 枳壳 槐花 酒黄连 生地黄 防风 乳香 没药 桃仁 甘草节

《北山医案》

陈念祖

患肠痔有年，脱肛便血，时复举发，脉象细数，阴血早已耗伤。面黄乏神，脾气又见困弱。近复加以腹鸣不和，是脾阳亦且损及矣。一切苦寒之剂非所宜用，今仿东垣黑地黄丸法。

熟地黄六钱，炒 黄芪三钱，炙 人参二钱 五味子一钱，炒
茅术一钱五分，米泔浸炒 阿胶一钱五分 炮姜五分 荷叶蒂二个

《南雅堂医案》

何书田

肺热移于大肠，以致痔漏大痛下血；且虚阳上升，咳呛久而不止；脉形扎软。阴亏之候。未易愈也。

西洋参 麦冬肉 甜杏仁 川贝母 知母 花粉 龟板 牡丹皮 川石斛 槐米炭 柿饼痔漏吐红，脉细小而胃不开。棘手之候也。

龟板 洋参 麦冬 川斛 茯苓 橘白 牡丹皮 沙参 知母 山药 牡蛎

《薛山草堂医案》

林佩琴

某。便燥出血，痔核肿痛。参东垣润燥通幽二汤，用熟地、生地、桃仁、麻仁、红花、当归酒润、杏仁、甘草、枳壳，蜜丸。此入血分润燥结，服效。

某。痔血延久不痊，便后血色鲜紫，虽似肠胃远血，然恐肠尽肝头旧损所渗，沿便之一线而来，尾闾不禁，沧海易枯，无怪面色萎悴也。治用凉以润之，黑以止之，固以摄之。槐米炒、柿饼煨、乌梅蒸烂、侧柏叶捣汁、地榆炒、百草霜、熟地拌青，加炼蜜丸，服效。

《类证治裁》

曹存心

痔疾、下痢、脏毒，三者皆属下焦湿热为患。

地榆散合三奇散芪、防、枳壳。加广木香

治按：立方精到。拟再增银花、丹皮。

《柳选四家医案》

费伯雄

痔疮初起，肿胀疼痛。

上绵芪三钱 淡黄芩一钱半 青防风一钱 赤芍一钱半
炙黑草梢一钱 生地三钱 丹皮二钱 金银花三钱 苍术一钱
当归尾二钱 刺猬皮一钱 枳壳一钱 炒槐米三钱 泽泻二钱

单方：夏枯草、玄参、煅牡蛎、苦参等分为丸。

《费伯雄医案》

杨毓斌

张辛甫内子，妊娠四月。肠风内痔下血如注，肢体倦怠，神气困惫，纳谷不香，喉间秽浊之气冲触口鼻。此肝脾下降，金气失调，以致水府之气不清，腐臭之气上犯。正所谓清阳不升，浊阴不降故也。其原总由血病累气。当先治血，加升清调金之品，仍是治风先治血之旨。

何首乌 蛤粉炒阿胶 炙芪 乌梅炭 赤石脂 牡蛎 生白芍 地榆炭 茯苓 醋炒柴胡 荷叶灰 黄上和百劳水煎

方三服，下血愈，食香，神完。惟口中秽浊之气未除，易方数服愈。

前方去赤石脂、地榆炭、荷叶灰，加入泽兰、紫苏、砂仁、大麦芽，荷叶盖煎。

《治验论案》

温载之

友人虞仲卿与余比邻。于秋初患痔，肿痛异常。医用泻火润燥之剂，服之不效。连更数医，均谓肠胃热毒下注肛门。用通利之品，其痛尤甚。身卧床褥，号呼彻夜。余闻而临之，问：“其症系热毒，何以泻火全不应效，究竟病从何起？”渠云：“向有此痔所发，均服凉药而愈。此次因天热贪凉而发，服药不效，胀痛难当。”请余诊治。审其六脉洪数，惟两寸微紧。此名两感之症，因贪凉而起。里热表寒，仅清其里，未解其表，是以不效。闻之深为折服，求余主方。即用防风通圣散表里双解。一剂知，二剂已。

《温病浅说温氏医案》

陈幻生

痔证有七：一曰牡痔，二曰特痔，三曰脉痔，四曰肛痔，五曰血痔，六曰酒痔，七曰气痔。有藏肛门内者，有突出于外者，各审所因治之可已。辛卯，应试都门，镇江葛某患痔颇剧，每便一次，肛门肿痛异常，必呻吟半日许，头面臂腕，遍发疮斑，人误认气虚下坠，用补中益气方，病加剧，问治于余，余切其脉，六部数大，知是湿热蕴结，久久不化，酿而为毒，即肠痔、酒痔之类，非急为荡涤不可，用大承气去川朴，加川山甲、连翘、银花、生草为主，二剂，痛轻，又二剂，疮斑渐退，后合滋清法治之，月余而愈。惟愈后，当戒酒远色，少劳菇淡方妙，若不守禁忌，后必复泛，久而不瘥，将变为漏。慎之！戒之！

《珍余举隅录》

张乃修

尹左。肛门痔坠，脱痞不舒，食入腹满。此痰湿有余，湿压府气。不易图治也。

焦白术 赤白苓 防风根 猪苓 泽泻 砂仁 制半夏 上
广皮 煨葛根 制香附 生熟米仁

二诊：肠痔下坠，肛门作痛。苟非湿热有余，则气坠何致作痛？然卧着之后，肛仍不收，中气亦未必实。拟汤丸并进，上下分治。

野于术 川黄柏姜汁炒 泽泻 赤白苓 生米仁 制半夏
苍术麻油炒黄 猪苓 补中益气丸三钱，开水晚服

右。痔坠便血。肝火湿热下注于肠。不宜急切图功。

黄柏炭二钱 炒槐米二钱 炒丹皮二钱 地榆炭二钱
川连炭三分 火麻仁一钱五分 龟甲心七钱，先煎 荆芥炭一钱五分
润肠丸一钱五分

二诊：痔坠下血大减。再凉血宽肠。

白术炭 煨天麻 白蒺藜 钩钩 煅石决明 茯苓神 丹皮
炭 火麻仁 泽泻

郑左。大便之后，血遂注下。湿热结于大肠，肠痔情形也。

苍术一钱，麻油炒黄 荆芥炭一钱 茯苓三钱 当归炭二钱
炒防风一钱 泽泻一钱五分 川连炭五分 黄芩一钱五分 黄柏炭三钱
白术一钱 陈大红鸡冠花三钱，炙

二诊：血下稍止。再大苦泄热，使直透肠中。

黄柏炭 秦艽 炒槐花 炒丹皮 台白术 川连炭 泽泻
猪茯苓 防风炭 炒荆芥

邵左。肺痢之后，湿热下趋大肠，每至大便痔坠下血。日来胃钝少纳，中脘不舒。脉象微滑，舌苔粘腻。似不在阴虚之极、阴络损伤之例。良以湿热伤营，营络不固。非苦温不足以胜湿，非大苦不足以泄热而入肠中也。

泽泻一钱五分 丹皮炭二钱 炒槐花二钱 防风炭一钱
干术炒，钱半 苍术八分，麻油炒黄 黄柏炭三钱 白茯苓三钱
红鸡冠花三钱

二诊：培土燥湿泄热，下血稍减。若是阴虚而阴络不固，断不能

如此和平也。前法再进一步。

苍术一钱二分 防风炭一钱 黄柏炭三钱 丹皮炭二钱
荆芥炭一钱 当归炭一钱五分 土炒于术二钱 大红鸡冠花三钱
脏连丸二钱

三诊：血色渐淡，大肠湿热稍清，而脾阳不能固摄之象也。再温脏清府。

苍于术各一钱五分 丹皮炭一钱五分 川连炭四分 黄柏炭三钱
炮姜炭六分 云苓三钱 防风炭一钱 生薏仁四钱 泽泻一钱五分
大红鸡冠花三钱

四诊：温脏清府，肠红大退。的是大肠湿热有余，而脾土真阳不足。非大苦不足以泄肠中之湿，非大温不足以复脾脏之阳气也。

川连炭三分 黄柏炭二钱 焦茅术一钱五分 丹皮炭二钱
茯苓三钱 炮姜炭五分 泽泻一钱五分 炒于术一钱五分
大红鸡冠花三钱

五诊：血已止住。然血去阴伤，诸虚杂出。既节其流，再开其源。

朱茯神三钱 女贞子三钱 柏子仁三钱 当归炭二钱
白芍一钱五分 旱莲草二钱 池菊花二钱 黑稻豆衣三钱
黑地黄丸三钱

六诊：肠红之后，气觉上逆。再导湿热下行，而引入膀胱。

冬瓜子 光杏仁 生米仁 通草 滑石 云茯苓 白蒺藜
池菊花 青芦尖

七诊：阳气上逆不平，面色浮黄，筋脉跳跃。此由血去阴伤，不能涵养。再培土养肝

生于术 白茯苓 白蒺藜 黑豆衣 冬瓜子 生米仁 晚蚕沙
海蛤壳 炒竹茹

八诊：神情稍振，面色浮黄稍退。再培土养肝，仍参理湿。

于术 黑豆衣 女贞子 茯苓 生薏仁 泽泻 蚕沙 海蛤壳
炒竹茹 白蒺藜 生山药

迟左。便血仍然不止，其血滴沥而下。风湿热郁于大肠，肠痔情形。前法再进一筹。

荆芥炭一钱 黄柏炭三钱 丹皮炭二钱 防风根一钱
细生地四钱 柏叶炭三钱 地榆炭三钱 木耳炭二钱 炒槐花二钱
泽泻一钱五分 当归炭一钱五分 赤白苓各二钱

二诊：加川连炭，血余炭、二妙丸。

左。痔坠便血身热。风邪在表，湿热在府。

冬桑叶一钱 炒槐花二钱 川连炭五分 秦艽一钱五分
防风一钱 丹皮炭二钱 川柏炭三钱 荆芥炭一钱 炒枳壳一钱
皂莢子一钱五分，蜜炙

二诊：便血已止，肛门灼热，湿热不楚也。

川柏 炒槐角 秦艽 泽泻 地榆炭 黄芩炭 蜜炙皂角子

《张聿青医案》

余听鸿

《内经》云：因而饱食，筋脉横解，房室劳伤，肠澼为痔。风热不散，谷气流溢，传于下部，故令肛门肿满，结如梅李核，甚者变而为瘻也。五脏切宜保养，勿令受邪，既成痔漏，当调饮食，寡欲节劳，皆可带病延年。余三十岁时，肛侧外如李，溃脓后深寸余，插药条逐日有脓，中按有孔，如豆大而深，余掺以海浮散，膏药盖之，内服调和气血之药，一月痊愈如故。后逢房室劳碌，即作胀流水，余即寡欲节劳，今已十五六年未发矣。

《余听鸿医案》

沈祖复

某姓妇素有外痔，一日病暑热起伏，先生将伏邪治愈后，而痔发更甚，痛如刀割，卧床不起。视其痔，大如茄，色灰黑，势将翻花。昼夜呼号，其家人欲抬入医院剖割而不果。先生开黄柏、龙胆草、淡

芩、槐花、升麻苦寒之品，服数剂，见效；再加制军、犀角、苦参、火麻仁、郁李仁，又服数剂；外用熊胆、冰片、蚌水、猪胆汁、西牛黄调敷，肿胀消而痛止。后用补中益气法，十余剂而收缩如常矣。至今数年未发。

《医验随笔》

凌奂

倪(二月)，阴虚湿火下注，肛门血痔，更衣见红，由来已久。即内经所谓阴络伤则血内溢是也。脉象弦数，拟宗丹溪槐角法。

炒槐米 黑荆芥 丹皮炒黑 赤苓 地榆炭 女贞子 净银花炒炭 泽泻 炒枳壳 东白芍 米仁 车前草

血不止加柿饼炭。

内、外痔俱同法，漏管者加象牙屑。

《凌临灵方》

王靖

商友梁某，素有痔，兼好鸦片，发则痛不能起，且有隐疾，未尝告人。一日痔发，不可忍，延一南医治之。梁素弱，面目削瘦，饮食不思，南医以为虚也。用桂附补之，二日而腹胀如鼓，烦闷不安，因而痔益增痛。急延余往视之，脉细数而有力。余曰：阴亏血热，且增烦躁，故痔作。鸦片最燥肺，肺主气，气燥而血亦不润矣。再以桂附火之，无怪其增痛也。

昔人虽谓痔有虚实，而未有不由湿热内蕴者，先清其热，则痛止。遂用槐花散加归芍而进之，夜半痛少止。次日又往，则进以归芍地黄汤，十日而愈。他日告余曰：不惟病愈，痔亦愈。余曰：痔何能去？特血润则不痛矣。须薄滋味，谨嗜欲，节劳逸，方可渐望其去。否则，发作无时。日中所见，固少因痔而死者，亦少治之痊愈者。梁首肯。后余以内艰归家。越三年余，梁来信云，本年痔发特甚，惟服

君前药少止，然成长命债矣。

《醉花窗医案》

费承祖

扬州张勤甫，痔疮肿痛，下血淋漓，内热口渴。诊脉细数。湿热销灼营阴，血多下溢。治必清化湿热。

炒槐米三钱 地榆炭二钱 牡丹皮二钱 鲜生地八钱
赤芍一钱半 麦门冬三钱 川石斛三钱 天花粉三钱 冬桑叶一钱半
冬瓜子四钱 鲜竹茹一钱半

连进五剂，下血即止，痔疮肿痛皆消，内热口渴亦退。惟精神未振，纳谷未旺，此湿热清而胃阴虚也。照前方去槐米、地榆、生地、赤芍、桑叶，加西洋参一钱、杭白芍一钱半、白茯苓二钱、川贝母三钱、广陈皮一钱。又服五剂，即康复如初。

《费绳甫医话医案》

张山雷

吴左。湿热下注，肛痔便坚，脉来甚弦，六部一律，舌根黄腻颇厚。治宜清泄燥金。

知母6克 川柏4.5克 怀牛膝6克 西茵陈15克
玄明粉4.5克 槐花米6克 柏子仁9克 白鲜皮9克 粉萆薢9克
生苡仁9克 玄参6克 银花12克 北丹皮4.5克

《张山雷专辑》

范文甫

久禾师母。舌淡脉弱，痔疮翻花。

黄芪30克 白术9克 陈皮3克 升麻6克 柴胡6克
当归9克 党参12克 甘草3克

唐晋泉。痔疮，湿热下趋，结而蕴酿，以致不得流通。

生甘草梢 30 克 生大黄 9 克

张培生。酗酒，湿热郁积于肠间，下趋则痔疮便血。

生地榆 30 克 生白芍 15 克 穿山甲 6 克 茯苓 30 克
米仁 30 克 怀山药 30 克

《范文甫专辑》

魏长春

冯献庭君夫人，年约三十余岁。五月九日诊。

病名：肠热痔血。

原因：初患痔疾便血，恶寒发热，前医认为伤寒，屡进表散增剧。

证候：外痔剧痛，便血发热。

诊断：脉数，舌绛苔黄。肠热湿火，下注为痔，病属外疡，而根于内，法宜内外并治。

疗法：外敷用铜绿二钱，冰片二分，研细塞于肛门，内服清火润肠方。

炳按：若参子最妙最灵。

处方：槐角三钱 油当归三钱 升麻一钱 苦参子廿粒，去壳吞
生白芍五钱 瓜蒌仁五钱 火麻仁四钱 生大黄二钱
龟板胶八钱，另烊冲

次诊：五月十一日。痔疾已差，热减。仿麻仁丸法润之。

次方：生大黄四钱 生白芍五钱 火麻仁五钱 瓜蒌仁五钱
油当归三钱 蜜炙枳实二钱 苦杏仁四钱 槐米四钱 黄芩三钱
桔梗三钱

三诊：五月十三日。痔痛已愈，便实，脉缓，舌红。湿火未尽，用润肠治痔法。

三方：槐米四钱 生大黄四钱 元明粉三钱 枳实二钱
防风一钱 瓜蒌仁五钱 咸苡蓉四钱，酒洗 桔梗三钱

效果：服后，便畅热清，病愈。

炳按：痔血乃肠热液燥，故便多不畅，宜增润肠液，硝黄消攻耗液，尚须斟酌体禀用之，惟脏连丸可久服。

《慈溪魏氏验案类编初集》

章成之

倪男。作慢性痢治，其血量虽少，而总是不能根除。原来出血之因在痔，痔不能愈，血当不能止。

油当归 12 克 棉花子 12 克 桑椹子 24 克 仙鹤草 18 克
黑芝麻 15 克 制首乌 9 克 炙草 6 克

《章次公医案》

陆观虎

张某某，男，43 岁。

辨证：痔痿

病因：湿痰下注，阴虚火炽。

症候：痔痿有脓，脘胀腹痛。头痛，咳嗽，喉梗。下肢酸痛。脉细滑。舌质红，苔白。

治法：清火化痰，利湿消痔。

处方：冬瓜子 6 克 宣木瓜 9 克 广陈皮炭 6 克 猪赤苓各 6 克
云茯苓 9 克 嫩桑枝 15 克 杭甘菊 6 克 焦苡米 9 克 丝瓜络 6 克
生枇杷叶 6 克 大腹皮 6 克 细青皮 3 克 槐角丸 9 克，冲吞服

方解：冬瓜子、生枇杷叶润肺止咳，化痰下气。云茯苓、猪赤苓，焦苡米健脾利湿。丝瓜络、木瓜、桑枝通经络，化湿止痛。杭甘菊清热散风。广陈皮炭、细青皮宽胸化痰，和胃伐肝除腹胀。大腹皮消胀行水。槐角丸清热润便、凉血止血。

二诊

症候：痔痿脓减，头痛已减，脘胀酸痛已止，腿痛已减，下肢无

力，微咳。脉细。舌质红，苔浮黄。

处方：去云茯苓、丝瓜络、槐角丸、细青皮，加地榆炭 6 克、炒赤芍 6 克、蒲公英 6 克、槐花炭 6 克。

重在活血散瘀，清热解毒消肿以治肠风便脓血。

三诊

症候：痔漏脓止，腿痛已止，力增。仍有咳嗽。脉细。舌质红，苔浮黄。

处方：去蒲公英，加炒青蒿 6 克。

以治阴虚热毒，再服八剂咳嗽亦止。

王某某，男，31 岁。

辨证：痔痿。

病因：胃肠湿热搏结。

症候：肛门痔坠有血，小腹作痛，大便稀。脉细弦。舌质红，苔薄黄。

治法：清热，止血，利湿。

处方：地榆炭 9 克 大腹皮 9 克 淡姜炭 3 克 槐花炭 3 克
炒赤芍 9 克 鲜荷梗 6 克 炒莢连 6 克 藕节炭 9 克 炒扁豆衣 9 克
云茯苓 6 克 焦苡米 9 克

方解：地榆炭、藕节炭、槐花炭清热止血。腹皮消胀利水。姜炭祛寒止腹痛。赤芍活血。鲜荷梗升清通气。炒莢连祛寒止便稀。焦苡米、云茯苓、扁豆衣健脾利湿。

马某某，女，24 岁。

辨证：痔痿。

病因：大肠热盛，湿热相搏。

症候：痔血经外，脘痛作堵，心悸，头晕，牙龈腐烂。脉细。舌红，苔黄。

治法：清热，健脾，止血。

处方：佛手花 3 克 代代花 3 克 连翘 6 克 炒赤芍 6 克

槐花炭 9克 净银花 6克 侧柏炭 6克 炒黄连 3克 地榆炭 6克
炒枣仁 6克 保和丸 9克,包冲

方解:佛手花、代代花理气舒郁治脘痛作堵。保和丸消食利湿,宽胸健胃。银花、连翘、赤芍清热解毒。槐花炭、地榆炭、侧柏炭止血化湿清热。炒黄连祛寒火。炒枣仁宁心安神以止心悸。

齐某某,男,30岁。

辨证:痔瘕(内痔)。

病因:肺肾虚损,虚热相搏于大肠。

症候:内痔,肛门肿痛,流血少腹作痛,耳鸣、心悸,咳嗽,自汗。脉沉细而弦。舌质红,苔微黄。

治法:润肺固肾,清热止血。

处方:煨益智 9克 左牡蛎 16克 大生地 9克 杭白芍 9克,炒
生枇杷叶 6克 润元参 9克 净槐米 9克 大麦冬 9克
浮小麦 9克 地榆炭 9克 川杜仲 9克 槐解丸 9克,包冲服
十灰散 9克,包冲

方解:杜仲、益智、牡蛎固涩以壮腰肾。生地、麦冬 元参清热润肺生津以止咳嗽。杭白芍敛阴平肝。枇杷叶润肺止咳。槐米、地榆炭、槐角丸清热、止血、解毒。浮小麦养心止汗。十灰散凉血止血。

邱某某,男,41岁。

辨证:痔瘕(内痔)。

病因:肺肾虚损,虚热结肠。

症候:内痔肿痛,咳嗽痰白,喉痛。小便艰涩,多汗,疲乏。腰部胀痛,小腹下坠。左肩痛不能上举。脉细数。舌质红,苔微黄。

治法:滋肾润肺,利湿消肿。

处方:冬瓜子 9克 黑豆衣 扁豆衣各 9克 炙枇杷叶 9克
桑枝 15克 通草 3克 胖大海 3个 广陈皮炭 6克 女贞子 6克
浮小麦 15克 杜仲 9克 山楂炭 6克 紫丹参 9克 净槐米 9克

方解:冬瓜子、枇杷叶润肺止咳。扁豆衣、黑豆衣、桑枝,健脾利

湿，益肾。通草利湿。胖大海利咽，润喉、止喉痛。广陈皮炭、山楂炭理气助消化。浮小麦养心退热止汗。女贞子、杜仲壮腰肾、滋补肾阴。丹参、槐米消痔肿，清血分之热。

二诊：症候：内痔仍痛，咳嗽，白痰，喉痛减轻，出汗减少，脘胀痛止，少腹坠轻，右肩痛亦轻，脉细数。舌质红，苔微黄。

处方：前方去胖大海、紫丹参、山楂炭、川通草，加远志肉 6 克、金灯笼 3 克、荷梗 6 克。

杨某某，女，49 岁。

辨证：痔疮。

病因：湿热下注，心肾不交。

症候：痔疮作痛，便燥失眠，脉细。舌质红，苔薄白。

治法：清热化湿，消痔安神。

处方：地榆炭 9 克 槐花炭 9 克 槐角丸 9 克，冲吞 远志 6 克
夜交藤 6 克 朱茯神 9 克 合欢皮 9 克 蒲公英 9 克 猪赤苓各 6 克
炒赤芍 6 克 朱砂安神丸 9 克，冲服。

方解：地榆炭、槐花炭、槐角丸化湿热，通大便、消痔治肠风便血。夜交藤、朱茯神、远志肉、合欢皮、朱砂安神丸补心安神定志以治失眠。赤芍破瘀活血。猪赤苓益心利水渗湿。

林某某，女，34 岁。

辨证：痔疮

病因：湿热下注，肝阳上亢。

症候：痔疮作痛，夜眠不安，烦躁，头胀。脉细弦。舌质红，苔浮黄。

治法：清热利湿，平肝安神。

处方：朱茯神 6 克 陈皮 6 克 制半夏 6 克 净槐米 9 克
地榆炭 9 克 大贝母 6 克 石决明 12 克 夜交藤 9 克 蒲公英 9 克
珍珠母 9 克。

方解：朱茯神、夜交藤补心安神定志以治失眠。陈皮、制半夏、

大贝母理气和中，利湿散结，清热化痰。杭甘菊清风热。净槐米、地榆炭除血热，治肠风痔血。珍珠母、石决明平肝除风热，镇心坠痰以治头胀。

张某某，女，34岁。

辨证：痔疮

病因：湿热郁结，下注肛门。

症候：痔痛，大便干燥，头晕，疲倦、右臂微痛。脉细数。舌质红，苔黄腻。

治法：清利湿热。

处方：云茯苓9克 猪赤苓各6克 焦稻芽9克 焦苡米9克
杭甘菊6克 海桐皮6克 槐角丸9克，同煎 当归6克 酒桑枝9克
丝瓜络6克 大小蓟各6克。

方解：云茯苓、猪赤苓、焦苡米，渗湿宁心，利水以化湿热。当归、大小蓟养血，润肠止痛，破瘀生新。桑枝、丝瓜络通经活络，散风利关节。海桐皮祛风除湿。杭甘菊清热去头风。焦稻芽消食导滞开胃。槐角丸化湿热疗痔疮。

《陆观虎医案》

脱肛

薛立斋

举人余时正，素有痔。每劳役脱肛，肿痛出水，此中气下陷。用补中益气加茯苓、芍药十余剂，中气渐复痔症悉愈。后复脱肛作痛，误服大黄丸，以致腹鸣恶食几殆。薛用煎汤，加炮姜、酒炒芍药、诸症悉除，乃去炮姜，加熟地、五味，三十余剂而脱肛渐上亦愈。

一男子脾胃素弱，或因房劳，或因劳倦，肛门即下，肿闷痛甚。用补中益气加麦冬、五味，兼六味丸而愈。

一儒者面白神劳，喜热极饮食，多必吞酸作泻，吸气觉冷，便血

盗汗。薛以为脾胃虚寒，用补中益气加炮姜、肉桂，五十余剂，八味丸斤许，诸症悉愈。

《名医类案》

中神琴溪

智音院一沙弥，患脱肛，起居太苦。有事于伏见某寺充其役也，欲速收之，诸治无验。乃来告其状，且曰：“期逼，来日不速收之，竟不能从事此役，子幸有奇术乎？”先生曰：“盖有之。尝闻某家有婴儿，患脱肛不堪步行。欲收之，百法无验。冬日使家僮负之出游，僮无慧也，涉水转蹶，堕儿于水中。已懵然出水振衣拭面，而不顾儿。儿则泣于水中，路人见乃救之，叱僮令背之归。家人大骇，且骂僮，省儿所患，脱肛既收，后不复发云。由是观之，冷水岂脱肛之良药乎？上人其试之。”沙弥曰诺。乃盛水盆中，灌之者数四，果有效，来谢曰：“幸奉教，而宿疴顿愈，伏见役得卒事云。”

《生生堂治验》

王孟

高若舟之庶母，患脱肛。孟英脉之，弦而滑，洩涩苔黄。曰：虽属高年，非虚证也。清其湿热而痊。

《王氏医案》

费伯雄

某。肝气已平，脾土渐健，腰痛亦已，胸闷噎气，均已轻减，惟血亏未复，湿痰未净，脱肛苔灰。尚宜养血柔肝，健脾化痰。

新会皮一钱 制半夏一钱 茯苓二钱 远志肉五分 炒枣仁三钱
别直参八分 归身二钱 金毛脊去毛，四钱 木香五分 砂仁一钱
合欢皮二钱 龙眼肉二枚 桑枝一尺

某。营血久亏，脾有积湿，泄利脱肛，症势非轻。姑拟扶土和荣

治之。

当归二钱 枳壳一钱 青陈皮各一钱 木香五分 砂仁一钱
乌药一钱 车前子三钱 荷叶炭五分 荞饼四钱

二诊：经治后，泄利已痊，惟木乘土位，运化失职，故足肿到膝，湿热未清，以致水谷之气，化湿而停，渐成水肿。宜补火生土，利湿化浊。

真潞党参三钱 连皮苓四钱 砂仁一钱 生熟苡仁各三钱
白芍一钱 制附片五分 甘草梢五分 冬瓜子皮各三钱 青皮一钱
木香五分 大腹皮二钱 姜皮五分

某。肠红日久，以致肛门脱下，不能收纳。治宜药液熏洗。

当归四钱 枳壳三钱 升麻二钱 甘草一钱

上药煎汤去渣，置清洁盛器中，乘热熏洗四、五次，即效。

《费伯雄医案》

魏树春

丹徒杨云甫，便秘带血，脱肛肿痛，已历年余，时作时止。前医不知为大肠蕴热，而谓为气虚下陷，误进补中益气汤而脱肛肿痛益甚。乃求治于予，予用黄连解毒汤加槐花、柏叶，肿痛脱肛均愈。再进五仁法，而大便如常，此后遂永不复发。

《清代名医医话精华》

许恩普

陈紫蓬太守在京投供五年，与余契交，患脱肛肿痛。时医均为痔疮治之，肿疼逾甚。延余诊视，脉沉虚，年逾六旬，知为脱肛便血。急则治标，先以螺汁合梅片敷之减疼；内服滋阴清提补药，顿缩；外用椅垫，日晒大热，轮换坐之；又以开水频洗，数日而愈。

《许氏医案》

陈如生

春分以后，地气动而湿胜；秋分以后，天气肃而燥胜。秋燥致病，气分先受，治肺为急，人皆知之，然肺与大肠相表里，其为金也则一，燥从下受，往往大肠液固，症转为危。辛卯秋，人都应试毕，吾友史怡之遣人持节，邀余往诊。脉象细数，舌微有黄苔而干，大肠燥结，便后脱肛，人见形容瘦弱，以脱肛为气虚，进以补中益气汤加味，遂至异常疼痛，日夜呻吟，安寐既不能，饮食尤少进。余思瘦人多火，此证系伏火为患，现届秋月燥令，燥火二气相并，庚金受灼殊甚，又服补气之剂，火得补而益炽，病安得不剧，因用地冬润肠膏二剂，大便润，疼痛平，能安睡矣。再用生地黄煎，去竹沥、姜汁三剂，诸恙大减，饮食如恒。后又服滋养药十余服而愈。论脱肛一症，小儿气血未壮，老人气血已衰，或孕育及久痢用力过多，每患此疾。《难经》云：大肠与肺相表里，肺藏蕴热则闭，虚则脱。须升举而补之。盖缘气虚不能约束故也。后人宗其议，遇脱肛症，不问何因，率用补中益气汤为主方，岂知治者愈是，病者愈苦。症情百出，安能以一法绳乎？如此症，燥火烁金，非清润不可，若一于升补，邪愈实，血愈枯，后恐变不可测。昔人于《大肠燥结门》有“气血耗竭，呕逆不食，便如羊矢”之戒。岂无所见而云然哉！

《诊余举隅录》

刘子维

王恒子弟，大肠下坠十余日未收，作痛，如大便即不了，又下血，食少，神微。

黄芪三两 首乌五钱 甘葛三钱 白芍一两 沙参八钱
桔梗二钱 五味三钱 白术五钱 苦参三钱 苡仁五钱 制附片五钱
香附三钱

三付，服二付肠收一半，胃口亦利，服毕全收。

李俊注：此脱肛也。地无凭也，天以大气举之。《六微旨大论》曰：天枢以上，天之气也；天枢以下，地之气也。凡天构以下有崩坠之失者，皆由天枢以上之气不举，如此症是也。然五行之理，木泄金收，坠而不收，则木令之有余可知，木有余则土不足，故食少而神微也。

薛立斋曰：脱肛属大肠，气血虚而兼湿热，缘湿为阴邪，阳虚者，无不生湿，而酒家尤甚，湿郁生热，遂为湿热，热伤阴络，则血内溢，内溢则下血，此症脱肛而兼下血，是阳虚为本而湿热为标也。

虚者，补之；陷者，举之。黄芪、参、术大补天枢以上之气，以为举陷之君；桔梗升肺，甘葛升胃，以为举陷之佐；脱者收之，五味子酸以收脱，使升而获上者，不至溜而复下，此皆下病上取之义也。然安良者，必戢暴；扶弱者，必抑强，否则用力虽多，成功则寡，非其治也。故用白芍平肝阳之不静，首乌敛肝阴之不守，俾木气归原，不复下迫，肾气受益，封藏有度，则脾肺诸药各展其长而无碍矣。

白术、附片苦温辛热，以治阳虚生湿之本，苦参、苡仁苦寒甘淡，以治湿郁生热之标；附子慓悍之性，能鼓阳气上升，凡中气下陷而阳虚者，合之参、芪举陷尤速也。

黄芪、白芍为此方调和金木之主药，故重用，又以香附疏达血气者，合中有开也。

肝气下迫而合有余者，宜平肝而治之以开；肝气下迫而开有余者，宜平肝而治之以合，金木相争之为病虽多，苟能察其胜负所在，而调之使平，无不愈者。此症肝气下迫而开有余，故除补中举陷外，于木则平之，于金则合之也。

第二方遗失，第三方如后，莲子五十个 白芍五钱 牡蛎五钱
玉竹三钱 米谷五钱 枣皮二钱 广皮二钱 沙参五钱 官桂二钱
百部三钱 大腹皮三钱 生姜皮五钱 大枣三枚

此方服毕，事事如前，病家极为称赞。

第三方以内守为主，补虚为辅，第一方以举陷为主，内守为辅，

第二方补虚与内守并重可知也。兹因第二方遗失，义已不全，姑录存之。

《圣余医案诠释》

余听鸿

吴门某绅子，患脱肛载余，出二寸，不能收，痛苦万状，百药不效。就诊华墅姜姓医，将锈铁三斤，浓煎沸扬，置便桶内熏洗之，再将活吸铁石二两，煎浓汁饮之，其肛渐渐吸之而上。再服升提补托之品，调理月余而痊。所以为医者，读书之余，又须广其见闻，此法可为巧夺天工矣。

《余听鸿医案》

丁泽周

李左。脱肛坠胀，燥粪结于直肠，气虚阴亏，肠中宿垢不得下达，胃呆纳少，宜理脾通胃，升清降浊。

全当归三钱 炙升麻六分 淡苁蓉三钱 苦桔梗三钱
广陈皮一钱 炒谷麦芽各三钱 炙枳壳一钱 全瓜蒌切，三钱
郁李仁三钱 火麻仁四钱 白通草八分

《丁甘仁医案续编》

傅松元

吴人大便必用便桶，坐桶如坐马上，故便桶又称马桶。有蒋木匠者，因屙坐桶，努力下挣，尿未出而肠已坠，肛门急痛，气不相续，汗淋如雨，恶心如呕，正在危急。即请邻医周某诊，周问因何至此？其妇具以告。周按其脉，若有若无，一身冷汗，以为因便而呕又汗，竟以霍乱吐泻治之，方用附子、干姜、藿香、厚朴、半夏、陈皮、茅术、泽泻等药，嘱令速煎与服，迟则不救等语。蒋妇急煎与服，进一口，木匠即作恶吐出，瞑目闭口，不复言语。其妇大为慌张，急遣邻人邀

余往。见木匠闭目卧床，身清微汗脉濡，因问病原，妇又具告之。余问所下之粪若何？云粪未出也，问所呕何物？云但恶心而未呕，顷所呕者，乃周先生之药水一口耳。问冷汗何时始起？云在马桶上，见其大汗身冷色变，故抱之于床。余曰：“此因用力太过而肛坠，粪在直肠未出，致气不相续而暴脱，故冷汗如浴也。”病者闻言曰：“是也。”余为之用保元汤，加麻仁、薏仁一剂，汗止神清气复。第二剂，前方下更衣丸一钱五分，粪出而愈。

《医案摘奇》

范文甫

洪岳福翁。八十外老翁，中气不足，食钝，大便不通，脱肛。

黄芪 30 克 党参 12 克 白术 9 克 甘草 3 克 当归 9 克
陈皮 3 克 柴胡 6 克 升麻 6 克 生姜 3 克 红枣 6 枚 咸苡蓉 9 克

沈兆其。素患脱肛，自汗出，脉弱舌淡，便血因脱肛所致，脱肛因气虚所致。

黄芪 30 克 防风 6 克 白术 9 克 血余炭 9 克 地榆 12 克

二诊：血已止，轻可不少。

白术 9 克 黄芪 30 克 陈皮 3 克 升麻 6 克 柴胡 6 克
党参 9 克 当归 9 克 甘草 3 克

《范文甫专辑》

张汝伟

柴庆瑞(女)，年三十七，平湖，住斜徐路。努力伤气，脾肾两亏，湿热下注，肛门脱下，前阴亦脱出，白带淋漓，腰酸。脉弦细，宜升以举上，化湿以降逆。

太子参一钱 煨升麻一钱 细柴胡一钱 粉归身 炒白芍 制
女贞 潼沙苑 乌贼骨 桑螵蛸各三钱 制香附二钱
生决明先煎，一两 生牡蛎八钱，先煎

复方，肛门前阴俱收进，腰酸较减，白带仍多。前方去升麻、柴胡、石决明、加椿根皮 粉萆薢、炒苡仁各三钱

本证始末：此人诊两次，即全愈。白带亦微，未能净尽，不再诊视，不过前后二阴并脱之事，甚少。大约由于饮酒入房，非法过度所致。其立方治法，亦病罕前例，伟处方，用升阳益胃，合宜阴治带之法，竟能见效，此亦心领神会而思得其治法也。

《临症一得》

陆观虎

齐某某，男，30岁。

辨证：脱肛（心肺虚）

病因：心肺两虚，湿热下注。

症候：脱肛不收，疼痛有血，咳嗽心慌。脉虚。舌红，苔白。

治法：润肺益气，养心渗湿。

处方：地榆炭9克 槐花炭9克 荆芥炭3克 葛根炭3克
焦苡米12克 大贝母6克 陈皮6克 荷梗6克 柏子仁6克
炒枣仁6克 炙枇杷叶9克

方解：地榆炭、槐花炭、荆芥炭止血散瘀，凉血清热。葛根炭、荷梗升阳生津，止渴润肺，散郁通气。焦苡米补肺清热，健脾渗湿。大贝母、枇杷叶润肺散郁，清痰止咳。陈皮调中快膈，降气，消痰，止咳。柏子养心，益血宁神。炒枣仁宁心除烦，止渴醒脾。

杨某某，男，58岁。

辨证：脱肛。

病因：素有痔疮，气虚下陷。

症候：肛坠不收，疼痛有血，脘中不舒，脐部有块，纳少。脉沉弱。舌质红，苔薄黄。

治法：升阳补气，佐以健脾化痔。

处方：地榆炭9克 净槐米9克 焦稻芽15克 山楂炭9克

六曲炭 9 克 炒赤芍 9 克 猪苓 6 克 陈皮 4 克 蒲公英 9 克
云茯苓 6 克 补中益气丸 9 克,冲服

方解:地榆炭止血消瘀,治脏毒。净槐米敛大肠,治痔血。蒲色英化毒消肿。焦稻芽、山楂炭、六曲炭、陈皮和胃健脾,消食磨积,消滞散结。炒赤芍散瘀血消肿。去茯苓、猪苓渗湿益气,宁心行水,泄滞。补中益气丸升阳补气。

《陆观虎医案》

施今墨

桂某某,男,41岁。前年曾患痢疾,因之脱肛,迄今已有两年。大便经常每日二次,溏泻兼有粘液脓样物,每便秘脱肛,疼痛,时常出血。腹胀闷,不思食,舌苔黄垢,脉象沉数。

辨证立法:积热于肠,久病未愈,苔黄脉数职是之征。清阳不升,浊阴不降,中气日虚,脱肛症现。宜分清浊,除肠热。后议补中气治脱肛。

处方:青皮炭 5 克 苍术炭 6 克 血余炭 6 克,禹余粮 10 克同布包
广皮炭 5 克 白术炭 6 克 椿根炭 10 克 炒槐米 10 克
吴萸 5 克,黄连 5 克同炒 葛根炭 10 克 炒地榆 10 克 焦薏仁 20 克
条芩炭 10 克 紫厚朴 5 克 炙草梢 3 克 苦参 10 克

二诊:服药四剂,大见功效,大便一日一次,已无脓样溏便,胀闷消,食欲增。脱肛未效,拟补中益气汤治之。

处方:醋柴胡 5 克 黑升麻 3 克 杭白芍 10 克 黑芥穗 3 克
血余炭 10 克,禹余粮 10 克同布包 箭黄芪 12 克 米党参 10 克
野於术 6 克 炒槐米 10 克 广陈皮 3 克 炒地榆 10 克
吴萸 2 克,黄连 3 克同炒 炙草梢 3 克 椿根皮炭 10 克 当归身 5 克
焦薏仁 20 克

三诊:服药六剂,大便每日一次,服药期间脱肛只现二次,疼痛大减,食欲增强,拟用丸药巩固。

处方：每日早服七宝妙灵丹 1 瓶，晚服补中益气丸 10 克。

《施今墨临床经验集》

肛痛

陈莲舫

朱。脏毒，即肛头生疮。

炒槐米 川楝子 块滑石 粉萆薢 金银花 黑地榆 生白芍 焦米仁 侧柏叶 生甘草

孙葆甫兄。向有痔患，属三阴内虚，阳明湿热壅滞。现在肛后起块，又恐成痈，痈与痔同类异名。最虑咳呛复发，有上下失血之变。脉息细弦，治以和养。

珠儿参 桑椹子 黑料豆 生白芍 川石斛 生牡蛎 生甘草 女贞子 紫丹参 炒槐米 炙龟板 丝瓜络 醋摩一笔消冲嘉善，闻福林兄。肛痈蒸脓已溃，最防结管，治以清化。

石决明 炒槐米 野料豆 生白芍 连翘心 川石斛 炙龟板 象牙屑 桑椹子 黑地榆 粉丹皮 生甘草 藕节

黄。吐血咳嗽，肛痈流滋，土语天穿地漏，有药又复否数进劳。

珠儿参 黑料豆 川贝母 薄橘红 生甘草 甜杏仁 女贞子 川石斛 毛燕窝 生白芍 白茯苓 生藕 象牙屑 枇杷叶

《蓬舫秘旨》

丁泽周

郑左。肛痈初起，肿红焮痛，日晡寒热，阴虚质体，营卫不从，湿热凝瘀，宜清疏消解。

清水豆卷四钱 黑山栀二钱 当归尾二钱 京赤芍二钱 生草节八分 金银花三钱 连翘壳三钱 大贝母三钱 通草八分 飞滑石三钱 泽兰叶钱半 丝瓜络二钱 杜赤豆一两

吕左。肛痈双发，破溃得脓不多，四围肿红疼痛，纳少苔腻，湿热蕴结下焦，营卫不从，症属缠绵，姑拟和营托毒而化蕴湿。

全当归二钱 京赤芍二钱 紫丹参二钱 忍冬藤二钱
茯苓皮三钱 通草八分 大贝母三钱 生苡仁四钱 丝瓜络二钱
杜赤豆一两 佩兰梗钱半

退消膏 上黑虎丹、呼脓丹、九黄丹。

《丁甘仁医案续编》

张山雷

胡左。肛门起核，是阴虚湿热下注，不易速愈。脉右关尺弦搏。所谓肺与大肠相表里也，舌滑，先以养阴而参升举。

炒贡蒺 6克 绿升麻 1.5克 山萸肉 6克 大白芍 6克
丹皮 4.5克 川柏皮 4.5克 生西芪 6克 生桑白皮 6克
熟女贞子 9克 大生地 12克 带壳春砂仁打，1.2克 生延胡 4.5克
玄参 6克

二诊：肛门瘡，是真阴不足而湿热下注，颇不易痊。前授滋阴佐升清化湿，其势已减，姑仍踵步。

炒贡蒺 4.5克 绿升麻 1.5克 生西芪 4.5克 川柏皮 4.5克
槐花芯 6克 生苡仁 9克 白茯苓 9克 带壳砂仁 1.2克打
广藿梗 4.5克 焦山栀 9克 炒山萸肉 4.5克 西茵陈 6克
陈皮 4.5克

三诊：肛瘡已平，脓水无多，胃纳已佳，余无他苦。脉犹弦搏，阴中有火，舌色甚清，是宜填阴，兼清余焰。

砂仁末 1.2克，同打大生地 12克 山萸肉 6克 川柏皮 6克
西茵陈 6克 甘杞子 6克 生苡仁 9克 潼蒺藜 9克 女贞子 12克
旱莲草 9克 福泽泻 4.5克 生鳖甲 12克 生牡蛎 18克

《张山雷专辑》

肛瘻

何书田

阴虚成怯，肛漏流水。火令正旺，难期全愈。

西洋参 中生地 牡丹皮 麦冬肉 淮山药 炙龟板 沙苑子 制女贞 煅牡蛎 白茯苓

肛漏流脓，已逾五载，结块作痛，愈溃愈大，阴虚极矣，难许全愈。

西党参 炙龟板 制女贞 金石斛 白茯苓 炒阿胶 牡丹皮 煅牡蛎 淮山药 湘莲肉

《笄山草堂医案》

余听鸿

毗陵曹青岩先生，讳禾，著有《医学读书志》三卷，上始轩歧伊尹，由汉唐直至国朝，读书数百家，一一皆有评论。余读其书，深服先生无书不读，博学多闻，为医道中出类拔萃者也。阳湖赵惠甫，先生之老友也。言及幼时痔漏，治之无效，问先生。先生曰：前有一典中司帐者，肛漏有数十孔，穿肛穿臀，更穿及股髀，百药不效，求治于余，亦不能治。过数月，忽见典伙行走如常。问用何药，笑而不答。遍访其中使役之人，知是用水菖蒲根一味，逐日煎水熏洗而愈。赵公试之果验。因秘书不可湮没，故录之以俟后之试者。又一人用竹茹做椅垫，夏天坐之，亦验。又有一方，余屡试之亦验，用向东杨树根四两，白蜡一两，五倍子一两，槐花一两，生石膏末一两，胡桃壳四两，煎汤熏洗，亦效。但成漏管则无用耳。

《余听鸿医案》

巢渭芳

六州，姚某。脉来虚大无力，感暑夹湿，发热神烦，肛有脏毒成漏，已有十载，腴脆之体，苔白口渴，酷饮不畅，右腹角及腿缝高肿绵软，历求数医罔效。邀余就诊，曰：遗毒也。又因房事太过，瘀浊注经是否？病者涕答曰：是耳。恳请从速挽救！爰为拟方，先达暑热。继以清中淡化透毒为要。生石膏、银花、藿香叶、角针、生苡仁、六一散、连翘、通草、大贝母、怀牛膝（盐水炒）、西洋参、芦根尖，服二剂稍退，改清托，一月收功。

《巢渭芳医话》

陈莲舫

祥翁。肛漏已成，穿头不一，眼细中空，不脓则胀，出脓则安，真阴内亏，阳明湿热多从下注，脉见细弦，治以清养。

珠儿参 象牙屑 黑地榆 川石斛 黑川柏 大丹参 忍冬藤 炙龟板 石决明 炒槐米 柔白薇 肥知母 橘红 藕节

《莲舫秘旨》

交肠

中神琴溪

一妇人，年可三十，有奇疾。后窍闭塞不通，大便却从前阴泄，如是旬许。而腰腹阵痛，大烦闷，燥屎始通，前阴所出亦自止。嗣后周而又发，盖患之十余年，医药百端，无不为矣。容貌日羸，神气甚乏。师诊之，其脉数而无力，始按其脐下，有粘屎即从前阴出，再按有一块应手，师问曰：“月事不行者几年？”曰：“十有余年矣。”先与大黄牡丹汤，缓缓下之，佐以龙门丸泻之者，月一次，自是前后阴口得其所居。数旬自谓曰：“妾有牡痔，方临厕也，疾痛不可忍。”师视

之，肛傍有如指头者，以药线截而治之，仍服前方一周年许，块亦自消。

《生生堂治验》

曹存心

大小便易位而出，名曰交肠。骤然气乱于中，多属暴病。此症乃久病，良由瘀血内阻，新血不生，肠胃之气无所附而失治，故所食之水谷，悉从前阴而出。所谓幽门者，不司泌别清浊，而辟为坦途，比之交肠证，有似是而实非者。此时论治，主以化瘀润肠，必大肠之故道复通，乃可拨乱者而返之正。

旋复花 猩绛 葱管 归须 首乌 柏子仁 芥菜花

另旧纱帽一只炙灰每服一钱五分酒下

原注：纱帽一发漆胶粘而成，其亦取通瘀之意耶。

诒按：论证用药，均有巧思，特未知效否何如？忆喻西昌《寓意草》中所载姜宜人交肠病，与此相似；特病原有虚实之异耳，学者当参观之。

《柳选四家医案》

张大曦

大小便易位而出，证名交肠。当得之大怒大饱之后，气火错乱，升降失常，以致清浊混淆，水滓不按常道而行，久则难治。

明矾七分，敲如绿豆大，用腐衣五层包扎，淡盐汤送下。日三服，三日九服可愈。

诒按：立方简当。

《柳选四家医案》

魏树春

宝应华少臣夫人，产后清浊混淆，大小便易位而出，病名交肠，

言大小肠交之谓也。其家以新产体虚，不便出外就诊，特遣人询方于予。予用五苓散，令服三钱，温酒调下，使清浊分利，则二便自可发常。后月余致礼来谢矣。

《清代名医医话精华》

何长治

左。下血后，致发白浊，溺粪，茎痛，脉细软而数。此系气屏络伤，传为交肠之候。当从理气和中。

生黄芪二钱 炒归身钱半 肥知母钱半 川黄柏钱半
炒枳壳钱半 焦冬术钱半 白茯苓三钱 远志肉钱半 车前子钱半
甘草梢五分 加煨木香五分 藕节四枚

《何鸿舫医案》

吴鞠通

穆氏。前阴出粪，病名交肠，湿热之故。以其人喜饮黄酒，大食猪肉之所致也。与五苓散法：五苓散加黄柏、黄连、龙胆草，数帖而愈。告以切戒猪肉、黄酒，伊遵戒半年，饮食精神大好，已复元矣。八月节开肉，后又开酒，病复发，不可为矣。

《吴鞠通医案》

其它

薛立斋

金台院金宪，年逾五十，腹内隐痛，小便如淋，皮肤错纵而脉滑数。此肠痈也，脉滑数则脓已成。遂以广东牛皮胶，酒溶化送太乙膏，下脓升许，更以排脓托里药及蜡矾丸而愈。

《续名医类案》

孙文垣

染匠妇，腹痛两年，或以为寒、为热、为气、为血、为虫、为积，治之不效。或与膏药，大如斗，贴之痛益剧，欲去之，牢粘不可揭。卧舟中，数人扶之不起。往诊，见其面色苍黑，两手枯燥如柴，六脉皆洪数（腹痛脉洪数，内痈可知其得此亦赖此）。问其痛之所在，解衣指示（痛有定处），始知膏药牢粘。叩其不能起步之由，乃左脚不可动，动则痛应于心。察其色、脉皆非死候，此必汤痈。左脚不能举动是其征也（俗名缩脚肠痈）。与营卫反魂汤加金银花为君，四贴，酒水各半煎，服一贴，痛稍减；二贴，下臭脓半桶，病全减，膏药亦不揭自落。四贴完，其妇与匠来谢，并求善后之方。

《续名医类案》

龚之才

一妇人，腹痛如锥，每痛欲死，不可著手，六脉洪数。此肠痈也。用穿山甲、炒白芷、贝母、僵蚕、大黄合一大剂水煎服，脓血从小便出而愈。

《续名医类案》

李士材

吴光禄夫人，患腹满而痛，喘急异常，饮食不进。或用理气利水之剂二十日，不效。诊之脉大而数，右尺为甚，令人按腹，手不可近。曰：此大肠痈也。脉数为脓已成。用黄芪、角刺、白芷之类加葵根一两，煎一碗，顿服之。未申痛甚，至夜半脓血大下，昏晕不支，即与独参汤，消安。更与十全大补，两月而愈。

《续名医类案》

周汉卿

义乌陈氏子，腹有块，扪之如磬。汉卿曰：此肠痈也。用大针灼

而刺之，入三寸许，脓随针迸出有声，愈。

《续名医类案》

薛立斋

秀水卜封君，善饮腹痛便泻，服分利化痰等剂不应。其脉滑数，皮肤甲错。谓：此酒毒致肠痈而溃败也。辞不治。仍服煎剂，果便脓而斃。

《续名医类案》

孙某

一女子腹痛，百方不治，脉滑数，时作热，腹微急。孙曰：痛病脉当沉细，今滑数，肠痈也。以云母膏一两，为丸如梧子大，以牛皮胶溶入酒中，并水吞之。饷时服尽，下脓血愈。

《续名医类案》

薛立斋

通府张廷用，患肠痈两月余矣。时出白脓，体倦恶寒。此邪气去而中气虚也。用托里散兼益气汤徐徐呷之，又令以猪肚肺煮烂，取其汤调米粉煮，时呷半盏。后渐调理而痊。

一男子小腹痛而坚硬，小便数，汗时出，脉迟紧。以大黄汤一剂，下瘀合许。以薏仁汤四剂而安。（苡仁、瓜蒌各三钱，丹皮、桃仁各二钱）

一男子脓已成，用云母膏一服，下脓升许。更以排脓托里药而愈。后因不守禁忌，以致不救。

一人患肠痈，伛偻痛不能伸。有道人教以饮纯黄犬血二碗，和白酒服。其人逆饮至四碗。次日下脓血尽而瘳。

《续名医类案》

孙文垣

潘大司马，尝有肠风之症。八月丁祭，学博馈鹿血，食之血暴下。用槐角子五钱，黄连、枳壳、地榆、贯众各三钱，一服而止。潘善其方，书之粘壁间。遇有便血者，依方服之，无不立效。

陈鹿塘原有肠风脏毒之症，大便燥结，数日不能一行，痛苦殊甚。此胃寒肠热也。其脉两寸皆数，两关弦而无力，两尺洪滑而左尤甚。久治不效，因忆东垣有云：大肠喜清而恶热，脾胃喜温而恶寒。以胃属土，肠属金也。乃制一方，专以肠风脏毒药为主，外以养血之药裹之，使不伤胃气。盖药先入胃，后入大肠，入胃时裹药未化，乃入大肠则裹药化而君药始见，庶几两不相妨。因以九制大黄二两，槐花三两，木耳二两，郁李仁、皂角子、象牙屑、条芩各一两，血余、升麻、荆芥穗各五钱，共为末，炼蜜为丸，赤豆大。外以四物加蒲黄各一两为衣，米饮送下，空心及下午各二钱，血果止。大便不燥，饮食日加而愈。

王祖泉大便里急后重，腹痛，日夜下紫稠粘三、四十度。作利治，三月不效，肌瘦懒食，眼合懒开。悉以为不治，脉之，六部濡弱，所下之色甚晦，状如苧苗汁。曰：此非痢，乃脏毒下血也。《医说》中人参樗皮散正与此对。即制与之，其夜果减半，终剂全愈。方以人参、樗根白皮各二两，为末，空心米饮调二钱，忌肉汁、生菜、鱼腥。

汤封君简庵血分热甚，以善饮致肠风，且心肾不效。以四物汤加枣仁、侧柏叶、槐花、连翘，蜜为丸，服之而愈。

《续名医类案》

吴孚先

张东铭，素患痔疾兼后重之症，似痢非痢，登圜窘迫，行步如跨马状，坐亦作楚。六脉偏盛，稍觉无神。知为气血虚而挟湿热。用芎、归、芩、连、生地、槐角、查肉、升麻和人参二两为丸。彼不用参，

服之不效。复入参，服半料已全愈。

张子和曰：一男子脏毒下血，当六月，热不可堪，自分必死。忽思蜜水猛，舍性命饮一大盏，痛止血住。

汝南节度副使完颜君宝病脏毒下衄血，发渴，寒热往来，延及六载，日渐瘦弱无力，面黄如染。张诊其两手，脉沉面身凉。《内经》：寒以为营气在，故生，可治。先以七宣丸，下五、七行；次以黄连解毒汤加当归、赤芍、地榆散同煎服之，一月而愈。

方勺《泊宅编》云：外兄刘棣病脏毒下血，凡半月，自分必死。得一方，只以干肺烧灰，饭服二钱，遂愈。又王璆《百一方》云：曾通判子病下血十年，亦用此方，一服而愈。为丸为散皆可。

《续名医类案》

薛立斋

一男子脏毒下血服凉败毒药，不惟血不能止，且饮食少思，肢体愈倦，脉数，按之则涩。先以补中益气汤数剂，少止；更以六君子汤如升麻、炮姜四剂，而止。乃去炮姜，加芍、归月余，脾胃亦愈。当治积热或风热下血者，先以败毒散散之，胃寒气弱者用四君子汤或参苓白术散补之，并效。

一男子脏毒下血，脾气素弱，用六君子汤加芍、归、枳壳、地榆、槐花治之而愈。后因谋事，血复下，诸药不应。意思虑伤脾所致，投归脾汤四剂而痊。大抵此症所致之由不一，当究其因而治之。丹溪云：芍归汤一剂，又调血之上品。热加茯苓、槐花，冷加茯苓、木香。此则自根自本之论也。虽然精、气、血出于谷气，惟大肠下血以胃药收功。以四君子汤、参苓白术散，以枳壳散、小乌沉汤和之，胃气一回，血自循经络矣。肠风者，邪气外入，随感随见；脏毒者，蕴积毒久而始见。又云：人惟坐卧风湿，醉饱房劳，生冷停寒，酒面积热，以致荣血失道，渗入大肠，此风脏毒之所作也。挟热下血，清而色鲜；腹中有痛，挟冷下血，浊而色黯。腹内略痛，清则为肠风，浊则为脏毒。

有先便而后血者，其来也远；有先血而后便者，其来也近；世俗屎前屎后之说非也。治法大要，先当解散汤胃风邪，热则败毒散，冷不换金、正气散加芎、归，后随其冷热治之。河间云：起成不节，用力过度，则络脉伤，阳络伤则血外溢，血外溢则衄血。阴络伤则血内溢，血内溢则便血。肠胃之络伤则血溢肠外，有寒汁沫与血相搏，则并合凝聚不得散而成积矣。又《内经》云：肠癖下脓血，脉弦绝者死，滑大者生。血溢身热者死，身凉者生。诸方皆谓风热侵于大肠而然。若饮食有节，起居有时，肠胃不虚，邪气何从而入。

王执中云：何教授汤簿有肠风疾，积年不愈。取春端穷骨名龟尾，当中一灸除根。汤簿因传此方。后观《灸经》此穴疗小儿脱肛泻血，盖岐伯灸小儿法也。后人因之以灸大人肠风泻血耳。盖大人、小儿之病初不异故也。五痔便血，失屎回气，灸百壮在脊穷骨上赤下白处。

《续名医类案》

北山友松

中年男，常患小腹弦缩，饮食不甘，过则尿结尿数，觉口中粗淡。本年八月肛门肿痛，脓汁不断，脉弦弱数。

人参 白术 当归尾 陈皮 柴胡 没药 桃仁 槐花 白芷
甘草节 川芎 益智 地榆 黄芪

《北山医案》

许豫和

仰村赵氏子，初生，肛门之外，有皮连着其孔曲入卵根之下，食乳、粪渣，则能曲出。周岁后，能谷食，粪坚不能曲出，胀痛，啼叫，请予治。予曰：“内无病，不必服药，以刀割开外皮，粪自下矣”。因请外科割之，遂愈。

《豫村治验》

费伯雄

某。内肛门湿烂，经治肿硬渐松，寒热亦减。仍宜前法。

当归尾四钱 甘草节一钱 桃仁泥一钱半 赤芍一钱半
炙甲片一钱 陈皮一钱 银花三钱 独活五分 柴胡一钱
炙乳没各一钱半 黄柏三钱 角针八分 桑枝一两 泽兰一两，煎汤代水
陈酒一两

某。通肛毒浸淫痒痛，遍身结核，皆因余毒未楚，随气血而行走也。尚宜和营清化之。

忍冬藤 连翘 赤芍 生草 大贝 萆薢 花粉 苡仁 桔梗 山栀 枳壳 桑枝

《费伯雄医案》

张乃修

李左。咳嗽渐定，肛门胀痛，虚火郁于大肠也。

炒槐花 淡芩 象贝母 冬瓜子 粉丹皮 炒杏仁 甘草
天花粉 枇杷叶膏三钱

二诊：肛门胀痛大减，每至清晨，气冲欲咳，日间则干呛无痰。阴分日亏，还恐传损。

生地炭四钱 粉丹皮二钱 象贝母二钱 甜杏仁三钱 甘草三分
炒槐花二钱 青蛤散三钱 冬瓜子三钱 枇杷叶三钱，蜜炙
都气丸三钱，先服

《张聿青医案》

江泽之

湿郁化热，袭入奇经，故季腹下及两腿胯，渗入大肠，肛门裂痛，后坠苦不可言。胸中懊恼，谷食懒进，烦热薰蒸前面，赤白带下味兼腥秽，痛甚肢冷，脉象沉弦。再延防胃气大伤，致生枝节。

丝瓜络 甜瓜子 茯苓 瓜蒌皮 旋复花 天仙藤 皂角子
橘皮络 半夏粉 煨芍根 松子仁 涤饮散 甘草 郁李仁
木防己

《江泽之医案》

丁泽周

杨左。肛门坠胀疼痛，时轻时剧，大便或溏，皆由气虚肾亏。清阳不升。宜益气滋肾，升清化湿。

生黄芪四钱 潞党参三钱 炙升麻六分 生首乌三钱
蜜炙防己八分 生甘草六分 广陈皮一钱 净槐米包，三钱
炒枳壳八分 苦桔梗二钱 全当归二钱 大白芍二钱 干柿饼三钱

杨右。气虚血亏，肝胃不和，肛门坠胀，欲解不得，胸闷纳少，甚则泛恶，舌苔薄腻。宜益气生津，和胃畅中。

生黄芪三钱 青防风一钱 蜜炙枳壳一钱 苦桔梗一钱
云茯苓三钱 仙半夏二钱 广陈皮一钱 春砂壳八分 白蔻壳八分
炒谷麦芽各二钱 佩兰梗钱半 通草八分 佛手八分

《丁甘仁医案续编》

石淋、砂淋

林佩琴

畦。劳力伤阴，脉右弦左大，腹痛溺涩出粉，此为沙淋。海金沙六分、杜牛膝一钱、当归尾八分、薏仁三钱、灯心八分、赤苓二钱、小茴香(盐水炒)八分。数服涩痛止，去前三味，加杞子、沙苑子、益智子(俱炒)、钗斛、怀牛膝(酒蒸)，数服甚适。此温通之剂，能节劳则淋可不发。

《类证治裁》

费伯雄

某。营血不足，肝木太旺，上犯肺胃，下克脾土，积湿下注，致成石淋。宜养阴运脾，兼以分利。

天门冬 细生地 云茯苓 车前子 女贞子 南沙参 川草
薢 柏子仁 川通草 生苡仁 全当归 怀牛膝

《费伯雄医案》

潘名熊

明经乡周韶石叔令昆，年将三十，石淋阻塞溺窍，点滴不通，以至腹胀如鼓，痛楚不堪，卧床不起。危急之际，延余治。脉呆纯不甚应指（气不升降，转旋失职故也）。余用京柿炭一个（连霜蒂煨），朱砂三钱（二味方得自杨濠马虞阶孝廉，谓凡小便不通皆合，用粥水送下。余用治血淋屡效，今又仿之以治石淋），芒硝三钱，同研末；用杜牛膝五钱（时药店无，以鲜土牛膝一两代），怀牛膝、川滑石、黄柏、桃仁、韭白各三钱，甘草梢、石菖蒲各七分，煎汤送下。服后出石一条，长约一寸，大如粗箸，小便频出，床地俱湿，腹胀顿消而愈。

黄阁乡张某，年七十余，患石淋，小便点滴而出，痛甚，少腹胀，气微喘，能食。医用清利法罔效，求余治。左尺弦大，直上左关。余用大补阴丸合滋肾丸治，龟板一两，地黄五钱，知母、黄柏各三钱，肉桂六分。张畏桂性热，减其半。服后小便稍通，腹胀略减，而痛不除，再求治，余谓必须佐桂六分乃效。信服之，小便大利，出石数粒如橘核大，遂愈。

《评琴书屋医略》

王仲奇

郑，三洋泾桥，八月十二日。精溺异出同门，肾伤，精道血管迸裂，血从溺管出，中有砂石，阴道及胯间不舒，四脚筋骨疼痛，下元

已衰，衰际岂宜如此？及早清心摄养，少思寡欲可也。

龟板炙，先煎，六钱 石决明煨先煎，四钱 紫贝齿煨先煎，三钱
左牡蛎煨先煎三钱 仙鹤草三钱 旱莲草三钱 女贞子三钱
淮牛膝炒，二钱 潼沙苑三钱 甘草梢钱半 白蒺藜三钱 忍冬藤三钱
川草薢三钱 仙遗粮四钱 川黄柏炒，一钱二分 茯苓三钱

二诊：十月廿六日。精败为浊，色黄，渗泄不已，腿肢内外发痒
搔痒，近日面亦微浮。肾脏精气有伤，排泄分泌亦为之不力。脉弦
数，守原意损益。

紫贝齿煨先煎，三钱 石决明煨先煎，四钱 龟板炙焦黄先煎，六钱
川黄柏炒，一钱 榆白皮三钱 甘草梢钱半 地肤子二钱 白蒺藜三钱
川草薢三钱 仙遗粮五钱 野料豆三钱 甜桔梗一钱二分
威喜丸吞，三钱

《王仲奇医案》

陆观虎

刘某某，男，16岁。

辨证：石淋。

病因：膀胱蓄热。

症候：小便作淋，艰涩中断，时有溲痛，其痛连及腹背难忍。尿
有时带血，混物有如砂石。脉细弦。舌质红，苔浮白。

治法：利尿涤石，清热利湿。

处方：瞿麦9克 黄柏6克 牛膝9克 篇蓄9克 赤芍9克
猪赤苓各9克 海金沙9克 粉草薢9克 甘草梢3克 琥珀末3克
飞滑石9克

方解：以海金沙散（海金沙、滑石、甘草）为主，佐以瞿麦、黄柏
利小便治热淋；篇蓄、草薢分清别浊，去湿固下无；琥珀末活血祛
瘀，利水通淋；牛膝引药下行，固肾，壮腰膝；赤芍、赤苓、猪苓活血

凉血清热利水以治淋浊。

《陆观虎医案》

施今墨

葛某某，男，八年前患肾结石曾动手术取出结石一块，如蚕豆大，近一年来又生结石，血尿，色鲜，X光照片有两块结石，已下行入输尿管中，现症小便量少，腰疼，食睡正常，大便每日一次。舌苔薄白而腻，脉濡数。

辨证立法：湿热久郁，尿中浊物结化成石，热结膀胱，遂有血尿，然其炎热之源则由于肾阴虚也。拟清热利尿滋肾消石法为治。

处方：旱莲草 30克 金钱草 30克 车前子 10克 车前草 10克
云苓块 12克 海浮石 10克，布包 瓦楞子 20克 海金砂 10克，布包
滑石块 20克 陈阿胶 10克，另炖兑服 淡苡蓉 15克 炒地榆 12克
甘枸杞 15克 建泽泻 10克 甘草梢 6克 淡猪苓 10克

二诊：服药七剂，小便较前为多，溺出如细砂物甚伙，腰仍痛。仍遵前法治之。

处方：风化硝 30克 瓦楞子 30克 旱莲草 60克 海浮石 30克
滑石块 60克 淡猪苓 30克 红苏木 60克 建泽泻 30克
淡苡蓉 60克 枸杞 60克 山萸肉 30克 菟丝子 60克 陈阿胶 60克
炒地榆 60克 云茯苓 30克 老紫草 30克 瞿麦穗 30克
海金砂 30克 川续断 30克 川杜仲 30克 车前子 30克
炙草梢 30克

共研细末，金樱子膏 600克，合为小丸，每日早午晚各服 6克。每日以金钱草 120克，煮水代茶饮。

三诊：前方已服八十日，现余少许。经X光检查结石更趋下行，体积亦小，每次小便均有细砂物，腰部时痛，有时少腹亦疼，体力活动多时或有血尿。

处方：上肉桂 30克 瓦楞子 30克 风化硝 60克 盆沉香 15克

肥知母 30 克 青皮 15 克 旱莲草 60 克 淡苡蓉 60 克
滑石块 60 克 建泽泻 30 克 毕澄茄 15 克 白檀香 15 克
海金砂 30 克 没药 30 克 陈阿胶 60 克 云苓块 60 克 海浮石 30 克
鱼枕骨 30 克 山萸肉 30 克 台乌药 30 克 菟丝子 60 克
老紫草 30 克 炙草梢 30 克

共研细末，蜜丸，每丸重 10 克，早晚各服一丸。

《施今墨临床经验集》

青淋

任贤斗

邓正黄，病膏淋涩痛，服草药及清凉利水之药，而膏止尿清，神气亦爽，但小解时茎中涩痛，全然不减。夫尿已清，膏已止，火必去矣，火既去，涩痛亦当全愈，而不愈者何也？以淋证火热之去，必由茎中，故茎中被热侵久而涩痛不止也。药宜直达茎中而解热郁，庶几有效，细思惟蚯蚓性凉达下，善解肾囊及茎中之毒，令取蚯蚓数条，搗烂，用水酒烧滚，泡蚯蚓一时久，至黄昏时，去渣温服一碗，次早茎中之痛顿失。

《瞻山医案》

林佩琴

族某。膏淋溺面浮油，有时便中推出髓条，此积劳损伤肾阴所致。宿恙经年，近又兼病阴疴，真元日惫，饮食无味，益肾必先补脾。潞参、茯神、山药、生白术、薏仁、杜仲、芡实、莲子（俱炒）、何首乌、沙苑子，十数服全愈。

《类证治裁》

李铎

一男子，年三十余。小便日数十次，如稠米泔，色白，神思恍惚，形容憔悴，食减足软，隔一旬、二旬，必遗精一次。余仿汪石山法，进桑螵蛸散，一月而愈。

桑螵蛸 远志 菖蒲 当归 人参 茯神 龟甲 龙骨
各等分，为末，每服二三钱，夜卧参汤调下。

此方能安神魂，补心气，定心志，治健忘，小便数，梦遗精滑，功效若神。

《医案偶存》

姚龙光

耿璧翁夫人，年四旬，自颇知医，初春患病，历夏徂冬，叠经名手医治，即孟河、费马诸名家亦皆亲往就诊，服药百余剂，病日加重，冬月下旬，已回家待毙矣。后闻吾名而来就治，曰：始只食少体倦，腹胀溺涩，白带时下，现白带如注，小便极难，努挣许久，只有点滴，混浊如膏，小腹坠痛，几欲自尽，腹不知饥，口不能食，每日早晨神气稍清，至午则疲惫不能动作，医药备尝，百无一应，吾已自知不起，而罪实难受，不知早去为妙，请诊视而示我死期耳。吾见其肌消气弱，目钝无神，诊其脉，六部俱微，惟两尺略滑，余曰：病久神伤，因误治而致此，幸脉症相符，非死候也。彼曰：吾不畏死，先生毋逛我。余曰：吾非行道者流，不求名，不求利，欲赚尔何为？贵恙本脾虚湿重，故溺涩腹胀，医见小便不利，为用五苓利湿，詎知脾阳不健，湿气壅遏，愈服淡渗之剂，脾阳愈伤，壅遏愈甚，浊气下流，清气亦因之下陷，医虽屡更药，仍一辙，故愈治而病愈重也。又或因饮食日减，肢体倦怠，认为脾虚，用参、术等味，詎知脾湿已重，参、术不能补脾，反来助湿，是脾愈困而湿愈生，腹胀便秘恶食愈甚也，今清气下陷，浊气下壅，痰湿下流，故白物淫淫而下，小便艰涩坠痛，中

虚而有阻滞，则心肾不交，故不寐肢冷，先为升清化浊，后为交能心肾，须至木气得令，春温开发之时，方得全愈。用川厚朴、枳壳、陈皮、半夏、牡蛎、苦参、破故纸、升麻、柴胡、柏树东行根皮、煅白螺蛳壳，煎服，连进六剂，果坠痛减，小便通，为易方常服，又开丸方补心肾，令日日间服，至三月果愈。

《崇实堂医案》

柳宝诒

潘。湿浊下注，而为膏淋。其病蓄积于膀胱。脉象虚细软弱。内火不甚重，而气弱则无力疏运。拟于清利之中，兼助膀胱之气，俾得通利为要。

粉萆薢 车前子 海金沙包 甘草梢 牡蛎 春砂仁 赤苓
乌药 牛膝梢 菟丝子 远志炭 泽泻 淡竹子 莲子

《柳宝诒医案》

巢渭芳

太平洲，某童，十二岁。脉来弦数无力，面黄内热，淋下膏丝二月有余。已经多医，治以凉攻补塞，以致胸闷食少，茎中微痛。宜以清肺化湿。川萆薢、桑皮、炒黄柏、橘红、乌药、生苡仁、通草、茯苓、牛膝。数剂即效。

《巢渭芳医话》

王仲奇

潘右。蒲柏路，六月廿六日。小溲白如膏液，亦膏淋之属，但不胀痛，精神疲倦，腰酸乏力，且有脱肛，莫非虚象，脉濡滑而弦。治以补摄可也。

左萆薢煨先煎，三钱 龙骨煨先煎，三钱 潞党参三钱 大有膏三钱
淮山药三钱 潼沙苑三钱 益智仁一钱 菟丝饼三钱

远志肉炙，一钱 续断炒，二钱 茯苓三钱

二诊：七月初四日。小溲白如膏液，原膏淋之属，脱肛较愈，腰酸、神疲仍如曩昔，脉濡弦。仍以补摄可也。

左牡蛎煨先煎，三钱 龙骨煨先煎，三钱 路党参三钱 大有耆三钱
潼沙苑三钱 远志肉炙，一钱 桑螵蛸炒，二钱 甘枸杞炒，二钱
续断炒，二钱 益智仁一钱 川杜仲炒，三钱 菟丝饼三钱

《王仲奇医案》

陆观虎

朱某某，男，46岁。

辨证：膏淋。

病因：肾元虚冷，不能分清去浊。

症候：溲淋其状如米泔或如膏脂，经一年。并有腰酸，咳嗽。脉细弦。舌质红，苔薄黄。

治法：补肾化气，分清去浊。

处方：茯神9克 狗脊9克 知母9克 牛膝6克 远志6克
益智仁6克 扁豆9克 苡米12克 女贞子6克 绿豆衣9克
杜仲9克 川续断9克 乌药6克 黑豆衣9克

方解：知母滋阴清膀胱热；牛膝益肾壮腰；益智仁固肾涩精；女贞子、杜仲、川续断、狗脊补益肝肾，分清浊以治腰酸及小便不清；茯神宁心，通膀胱利窍；远志通肾气，上达于心利九窍；乌药顺气治膀胱冷气；黑豆衣补肾利水；苡米、绿豆衣健脾利湿；扁豆衣通利三焦。

共诊五次，守方三十剂症愈。

《陆观虎医案》

癃闭

程从周

吴季伟之令岳母，年近四旬，体质素弱，蟠居多年。患小便不通数日矣，小腹急坠而胀疼。初医用五苓分利之药，非惟便不能通，而转增胀急。乃逆予脉之，六部缓而无力，色白而黄，此中气不足，七情内伤，升降之气不能如常，乃虚闭也。经云：膀胱者，州都之官，津液藏焉，气化则能出矣。今元气大虚，不能行运化之机，其便故闭。即如少年气旺，一便即行。老年气衰，久而不出，且了而不了，便后余滴，皆气虚之过也。药用参、芪、归、芍、苓、术以补中，甘草、香附、陈皮以理气，一剂即通，数剂而愈。

《程茂先医案》

任贤斗

王道和，病挟虚伤寒，小便闭寒全无点滴，小腹微胀，前医用发表之药，兼四苓利水，病加沉重，精神愈困，小便仍然不能。余曰：此病正气大虚，夫精神困倦，肺脾虚也；小便闭塞，肾气虚也。经云膀胱者州都之官，气化则能出矣。发表之药乃克伐之性，中虚何能堪此，是邪气未攻及而胃气愈遭其困矣，四苓散乃利水之剂，利性伤气，则州都之气愈被其戕矣。中气伤则外邪愈进，肾气愈亏而小水愈不化矣，治此之法，只宜峻补，待正气已健，邪气不攻自溃，肾阳已壮，水得气化而自通矣。即与大剂六味回阳饮，峻补三焦之元气，服至二日，精神颇畅，大汗出而外邪解矣，小水亦略通，服至五日，小水大利，小腹豁然，而精神举动尚未健，服至旬余，始气爽神强而大安。

六味回阳饮

人参 附片 干姜 枸杞 当归 甘草

《黉山医案》

陈念祖

淋闭点滴，茎痛，腹中坚满，乃隧道不通，未可概认为虚证。盖遗由精窍，淋由溺窍，异源同流，须分别治之。且盛夏暑热熏蒸，足趾时患湿痒，下焦湿热内蕴，腑气阻遏不行，致有胀满之虑。拟先治膀胱，为利湿泻热之计。

白术二钱 猪苓二钱 白茯苓二钱 泽泻二钱 桂枝木五分
水同煎服。

《南雅堂医案》

李炳

唐朴存孝廉，病暑不洩，利之、清之皆不效，势危笃。翁治以蝉蜕，即洩。

病由暑气塞于上焦。上焦如雾，非风不驱，蝉性轻清，暑愈酷而愈鸣。用之为清风之吹也。

《李翁医记》

齐秉慧

曾治梁世琦因病后服附桂热药太多，消烁肺气，小便不通。医家又用四物汤加厚朴，猪苓、泽泻，则胀满加剧，湊上胸膈，膀胱胀满，喘促不宁，告急求治。余曰：“足下是有余之症，乃附子热药之误也。”用芩、连、知柏、桔梗、栀子、茯苓、甘草、去白陈皮水煎，调沉香末子，服一剂而小便行通如常。继服六味地黄汤加麦冬四剂而安。

曾治汪多才，年七十有六，患小便滴沥，醉胀异常。医用破血之剂，胸膈膨胀，人事皆昏晕，喘促无宁。余曰：“此非血蓄膀胱，何

用破血为哉，医误之矣。仲景有云：小便不利者为无血也。病在气分，不当用血分之药，此是蓄尿过满，胀翻出窍，以致尿不得出，名为癃闭。”吾用白蔻宣畅胸膈，砂仁、半夏醒脾开胃，肉桂化气，桔梗开提，生姜升散，令服是剂。且以手上拂其肚脐，使膀胱之气能转远，斯窍自顺，而尿如涌矣。少顷果自言松了大半，而便下行，转瞬又行，则安然熟睡，睡起又行，腹消如故。即于前方中加参、苓、芪、术数剂而安。

曾治吴盐商患小便不能，余以加减禹功散，用去白陈皮、桔梗、赤茯苓、泽泻、白术、木通、条芩、黑山栀、法夏各三钱，升麻、砂仁、甘草各六分，水煎服。少时以鸡翎探痰，吐之而通。此方妙在兼用吐法，譬如滴水之器，闭其上窍则涩，拨之则水通流泄矣。余用此方活人亦多，敢告同志。

曾治黄学畬小便闭塞。医用凉药过多而不通，是元气虚而不能输化。余用补中益气汤，加泽泻、肉桂化气而通。继服六味地黄丸，加麦冬一年而体健。又治一人小便淋漓不通，予以六味丸料，倍茯苓、泽泻而通。

又治一个体肿喘嗽，小便不通。与之补中益气汤，兼服金匱肾气丸而安。

曾治老农田子有患小便不通，小腹胀满。经云：此症宜急治，缓则杀人。余用连根葱白一斤，捣烂炒热，入寸香三分，以布裹分作两处，更换熨脐下即通。遂煎服六味地黄丸料，二剂而安。

曾治骆欣患伤寒小便不通，余以皮硝少许，水煎化用新青布蘸水搭脐上，并小便上，顷刻立通。诸药不应，此可治之，男女同法。

曾治一人患前后不通，胀满闷乱，余以甘遂末水调敷脐下，以甘昌节煎汤饮之。小水来如涌泉，少顷大便亦通矣。

曾治一人患症如前，关格胀满，命在须臾，又居穷乡，无处觅药。余令以独蒜烧熟，去皮微捣，绵裹纳下部，冷即易之，立通。

曾治一人患二便不通，余用苦瓜蒂五钱，川乌、草乌、牙皂、北

辛各三钱，胡椒一钱，麝香三分为末，吹入肛门，立通。

歌曰：二便秘结甚难医，急炒盐末塞满脐，蒜片复盐堆艾熨，利便良方少人知。已上诸案，余系记用古方，屡试屡效，救危亡于顷刻，但要身体强壮者，方可用之。若富贵之人，多因内虚所致，尤须斟酌，用开提之法，或补中，或八味，斯为至善，不可鲁莽从事，以致有误人性命也。

《齐有堂医案》

黄凯钧

徐，二八，自述患疟两发，入河洗澡，下日疟愈，即患小溲不通，腹坚如石，隆起如阜，两腿光肿，气短神呆，已经七日，危急难挨，莫过乎此。前医投承气更衣汤丸，大便微通，小便涓滴而已。诊脉弦而有力，明系疟邪结，膀胱之气亦为不化。盖足少阳病及足太阳，治宜泄少阳开太阳。

柴胡一钱 黄芩一钱五分 青皮一钱 橘皮一钱 茯苓一钱五分
猪苓一钱 泽泻一钱五分 荷梗七寸

傍晚服下，至更余腹中有声，预教以灯心搐鼻，连喷数嚏，小水如注，到天明连更五回，约有斗许，秽浊难闻，其病如失。此方妙在重用柴胡。

《肘后偶抄》

李文荣

大侄筱村小溲不通已至三日，腹膨急，胀至不能忍。先有某医连进通利，不通愈甚。急觅予诊，予见其肺脉独大而数，知其宿来嗜饮，因问：“连日饮何酒？”筱村曰：“近因酒贵，常饮烧酒。三日前有小集，饮烧酒，且甚多。”予曰：“是矣！”时端阳节后，急令买大批杷二斤，恣意啖食。另变补中益气方法，去党参、黄芪、白术、当归，唯用陈皮一钱，甘草梢八分，醋炒柴胡五分，蜜炙升麻三分，而加天冬

三钱，麦冬三钱，北沙参三钱，车前草一棵与服。一时许，小溲大行一大杯而愈。伊急遽中不暇问故，予亦未言。后至松江华亭县，刑席邵瓣莲有沉疴，甚奇，每发，当脐腹痛非常，而先必溲闭。百医罔效，必小溲自通，而腹痛乃止。其症少时即有，至四十外更甚。适当举发，延余一诊。其脉肺部独大而数，与筱村侄同。予问：“素嗜烟酒否？”曰：“皆有之，而水烟尤朝夕不断。”予曰：“是矣！”即以与筱村侄方，去升、柴，加黄芩、知母与服。服后小溲大行，腹痛亦止。伊问予：“病如何？何药之灵也？”予曰：“肺为气之主，又为水之上源。《内经》云：‘膀胱为州都之官，津液藏焉。气化则能出矣。有属中气者，中气不足，小溲便为之变；有属肾气者，肾与膀胱相表里是也。而其实气化之权肺实主之，肺在人身，主乎天气，天气清明而下降，肺气清肃而下行。上源行乎所不得不行，下流自有所不得而止。而有所不行者，虚也，热也，虚则气不足以行，热则气反逆而上，肺气不行则诸气不行。通则不痛，痛则不通，今溲不通而腹乃痛。肺脉独大而数，症经三十年，此先天肺热，后天烟酒，积热日伤肺阴，肺失清肃之令，故病易发而亦渐重也。以后将此方常服，且戒烟酒，可望不发。”瓣莲饮服，请将所论书一通，并药方裱糊收藏。连服廿剂，后果不发。治筱村法至松江始畅发其义。盖尝观诸禽鸟，有肺者有尿，无肺者无尿，知肺之关乎小溲者多矣！筱村侄用升、柴，而邵兄不用升、柴，加黄芩、知母者，何也？筱村曾服利药而溲更不通，气乃更结，非加升柴以提其气转不能通。如酒壶然，壶嘴不通，揭其盖自通也。邵瓣莲未服利药，而热久而重，故不用升柴而加黄芩、知母也。虽然，勿谓癃闭之尽在清肺也！吾乡钱光斗之弟妇张氏产育用力太过，正气大伤，三日小溲不通。予用补中益抽汤全方，姜、枣引，加冬葵子三钱，一服而通。写真华秋岩内怀孕六、七月，偶因下阶，一跌坐地，腹中坠胀，小溲不通半日，即延予诊。予知胎气震压膀胱，亦用大剂补中益气，姜、枣引，一服而通。此皆用温补升提，治在中气，而不在肺气也。其冬葵子或用或不用者，一则癃闭三日，以葵

子引经通之；一则仅半日许，提其气而洩自行，毋烦通利也。后又有丹徒县署吴晴叔明府所请钱席胡晴麓，恙已愈后，大解数日未行，急欲其解，以便加餐。一日登厕，数次力努，干结不出。是日晚登净桶，约一更许，极力努挣，大便不来而小便反闭。次日自用车前、泽泻等药通利之，而仍不通，腹加胀。又次日，延予，予曰：“大肠膀胱相隔一间，分道而行，本不相碍。今因直肠有燥粪阻塞，努力太过，前无出路，后有来者，广肠之粪，皆集于此，直肠胀满，挤后膀胱，小洩无路可出，此非膀胱自病，虽多方通利，终不得通，徒增胀满耳。予有一法，不知肯用否？”众问：“何法？”予曰：“止有下法耳！下其大便，小便自通。”时署中官亲朋友来问病者甚多，予在房中倡议，而房外窃议者皆不以为然，以为小便不通，反通大便，殊难相信。且病者年已六十有四，又值病后，连日怕胀又不敢多进饮食，如何能受下剂？众口难调，予亦辞去。第三日又来敦请，晴麓本与予金兰契好，万不能辞。至则胀已至胸，盖又杂进单方，如促织、草帽圈之类，有入无出，直至胀不有动。予曰：“在书，大便不通有四、五十日无妨者，而小便不通，五日必死。今已三日，再延二日，神仙不治。此症下或不死，不下必死，诸君奈何必欲置之死地耶？”时晴椒先生以为不可下，众皆和之，予方至此，众不复言。而其如君独奋然曰：“三日以来，愈治愈坏，今日竟请立方，虽死不怨。”予索纸开方：西党参五钱，炙黄芪三钱，于术三钱，当归身三钱，陈皮一钱，炙草一钱，炒柴胡一钱，炙升麻六分，煨姜二片，大枣二枚。众皆诧异，曰：“先生说，要用下法，何开此补中益气汤？”予笑曰：“诸公勿急，尚有加味。”爰加生大黄三钱，元明粉三钱。因告众曰：“大便阻塞小便，固非用下不可；然此症有三虚，年高，一虚也；久病，二虚也；连日不敢纳谷，三虚也。此三虚者诸公曾言之，予岂不知之？故是症非下不可，而非用补以用下不可。古人黄龙汤用参以用下，玉烛散用四物以用下。今用大剂补中益气，然后用硝、黄以推荡，大解行而膀胱路宽，小解亦自畅行。二便俱行，而正气不陷，相辅之道也。不然，

予岂孟浪用下者哉！众乃爽然，制药与服。一时许，大便畅行，小便随至，源源不绝，几半净桶，腹中畅，病乃若失。以上五症皆小溲不通，四用东垣补中益气，而变化不同，法则仿古，用则因心。《易》云：“神而明之，存乎其人。”岂不信哉！

《仿寓意草》

张千里

新胜卜，湿热之邪混杂三阳，迄今旬日，虽壮热神昏，身痛等症俱退，而邪势留经入腑，膀胱气痹，少腹高突拒按，小溲淋漓，大便闭结，所谓邪犯太阳之本，已成胞痹矣，脉来弦滑，宜急宣通少腑，以防湿浊阴邪上逆喘脱。

猪苓一钱五分 生冬术一钱五分 泽泻一钱五分 木防己一钱五分
茯苓一钱五分 小川连三分 桂枝三分 飞滑石三钱 木通一钱
车前子二钱

姚光祖按：此五苓加味，若势急，可先用葱白熨法及罨脐法，颇获捷效。

又 大小便虽俱通，然宿矢未尽，胞痹未平，舌黄，脉右弦实，仍宜通利，犹在险途。

照前方去木通、滑石、车前，加煨大黄二钱，枳壳八分，桃仁十粒，薤白一钱。

《千里医案》

王孟英

管君芝山拉余治其表嫂吴媪，年五十五岁。上年仲夏患癰二十余日，愈后小溲迄未通畅，已成痼疾。今秋分后，溺秘不行，医疗旬余，温如姜、桂、乌药，凉如栀、苓、黄柏，利如木通、滑石，皆不效，甚有用益智等以涩之者，渐至腰腹皆胀而拒按，胸高腿肿，不饥不食，大便不通，小溲略滴几点，热痛异常，舌绛无津，渴喜沸饮，而不敢

多吸以增胀满，呻吟待毙。脉软而微，乃阴虚气化无权也。以沙参、熟地、连、萆、苓、泽、麦冬、紫苑、牛膝、车前，加附子一钱，桂心五分，煎成冷服，一周时溺出桶许，而大便随行，进粥得眠，口苦而喜凉饮，即去附、桂、连、萆、苑、膝，加知、柏、芍药、砂仁，数服而起。缘境窘不复調理，锢疾闻犹存也。

《归砚录》

东垣云：“中年以后，已行降令，清阳易陷，升举为宜”。吾师赵菊斋者，年逾花甲，偶因奔走之劳，肛翻患痔，小溲不行。医者拟用补中益气汤及肾气丸等法。孟英按其脉：软滑而数，苔色腻滞。曰：此平昔善饮，湿热内蕴，奔走过劳，邪乃下注，想由其强忍肛坠之势，以致膀胱气阻，溲涩不通，既非真火无权，亦拒清阳下陷。师闻而叹曰：论证如见肺肝，虽我自言，无此明切也。方以车前、通草、乌药、延胡、梔子、橘核、金铃子、泽泻、海金沙，调膀胱之气化而渗水。服之，溲即渐行。改用防风、地榆、丹皮、银花、荆芥、槐蕊、石斛、黄连、当归，清血分之热而导湿，肛痔亦平。设不辨证而服升提温补之方，则气愈壅塞，浊亦上行，况在高年，告危极易。

《王氏医案》

方南薰

桃源熊维周先生令嗣德瑛，病小便秘结，少腹胀满，先生素知医，自以导赤散、五苓散服之，未效，继以附子理中汤服之，病势略减。先生只一子，求愈甚切，敦请他人授以知柏八味汤，遂至腹痛莫解，寝食不安。切得六脉沉迟，两手更甚，予曰：“此蓄尿癰闭证也。”医诗云：“蓄尿定然少腹满，若是蓄热乃松宽，尿若蓄多胀愈甚，五苓下利转觉难。《内经》云：膀胱者，州都之官，津液藏焉，气化则能出矣。此证元气下陷，阳不化阴所致，因用洋参以补气，小茴以暖气，肉桂以化气，砂仁、白蔻以醒脾胃，单取桔梗为君以升提，如壶吸盖，揭开即通。服下片晌，果即通利，但大便闭结，阴分尚亏，又宜

宗张介宾之论：不可过用附子以劫阴也。

书云：小便不利者，治其标。今用升提即愈，得非治本之力耶？

《高友堂医案》

蒋宝素

上闭下不通，气升水自降。宜东垣补中益气汤。

人参 生黄芪 冬白术 炙甘草 当归身 陈橘皮 春柴胡
绿升麻 生姜 大枣肉

两进补中益气，升清降浊，癃闭已通，节制已行，金令直到州都，气液化归常度。是方本非通利。盖小便利与不利，中气为之斡旋。真阴本亏，再以景岳补阴益气煎，以善其后。

大生地 人参 怀山药 炙甘草 当归身 陈橘皮 柴胡根
绿升麻

《问斋医案》

费伯雄

某。气分不通。小便癃闭症。

丹参二钱 青陈皮各一钱 柏子仁二钱 石竹花三钱
木通酒炒，一钱 川草薢三钱 通草五分 赤苓三钱 苡仁煎汤代水，四钱
露风草一握 通关滋肾丸三钱

某。肠胃不和，湿热下注，小便不通。治宜分利。

统车前三钱 甘草梢五分 蜈蚣三钱 当归三钱 赤苓三钱
生苡仁四钱 薄荷一钱 木通酒炒，一钱 川牛膝二钱 草薢三钱
瞿麦三钱

另用单方：

用食盐放锅内炒白，再用大蒜二个，生山栀三钱，捣烂敷脐。

《费伯雄医案》

王燕昌

一妇，年五十余岁，秋月小便闭结，脐下胀痛，不能坐卧，三日夜矣。其脉左关沉结，右尺沉弱，右关沉濡。乃肝热、脾湿淤而闭也。用小柴胡加桂枝木、茯苓、车前子，一剂；外用麝香少许，涂于脐下，膏药盖之。不时水利而愈。

《王氏医存》

吴达

壬年小春既望，夜将半，顾容斋先生命與邀诊。至则所诊者，乃金陵吕秋樵孝廉也。秋翁患淋沥，医云湿热下注，方有生地八钱，畏未敢服，因自服五苓去桂加制军之方，小溲点滴不通，至晚胀急愈甚，坐立不安，不得已绕屋而行，足不停趾，因延予治。诊其脉尺大寸小，濡涩不调，用胆草、苓皮、猪苓、车前、苡、斛、黄柏、生草，佐以桂枝、防风、羌活、柴胡、杏仁、陈皮，以姜皮、枇杷叶为引。诘朝秋翁乘輿自来，小便通调，淋浊亦止。易以渗湿达木之方，调理而安。

《医学求是》

许恩普

癸巳，孙来山尚书小姐因寒癰闭二日，腹胀如鼓。李山农方伯知医，曾治尚书湿病而愈。兹治小姐不效，素信余医，代为荐诊。少阳脉弦，知为虚痞。拟以柴胡半夏茯苓汤加减，汗解溺畅，遂愈。

《许氏医案》

张乃修

唐左。小溲淋痛，闭癰不爽，甚至涓滴不通。脉细而沉候弦硬。此湿热蕴结膀胱。恐至癰闭。

滑石块 甘草梢 泽泻 瞿麦 磨湘军三分 黑山栀 车前子 扁蓄 滋肾通关丸盐汤送下

二诊：涩痛大退，而尿管气坠难忍，无形之热稍化，而有形之湿压滞府气。再标本并顾。

炙黄耆三钱 于术一钱五分 党参三钱 炙升麻七分
炙柴胡七分 甘草三分

西血珀五分，上沉香二分，生湘军一钱五分，三味研细末，用茯苓五钱，煎浓汁作丸，微烘令干，药汁送下。

师云：此湿与气并坠，又以身之火与热与湿与气交注膀胱，药难突围而入，未有不为气湿火热恋住者。用三味外，复以升柴提之，如滴水器开其上而下自注也。清儒附誌

三诊：呕吐以提其气，泄泻以泄其湿，滞坠顿退，而仍闭癃不爽。膀胱之气不化，还难许治。

桔梗 赤白苓 猪苓 冬葵子 车前子 木通 甘草梢 泽泻 滋肾通关丸

四诊：闭癃已通，而尿管时仍作痛，小溲亦时通时阻。膀胱湿热未清。再为疏利。

木通 扁蓄 甘草梢 车前子 磨湘军三分 瞿麦 滑石 黑山栀 牛膝梢 泽泻

五诊：小便时通时阻，总由膀胱蕴结未清。再为分利，而参苦辛开通。

黑山栀 木猪苓 甘草梢 车前子 牛膝梢 福泽泻 茯苓 扁蓄 冬葵子 滋肾通关丸

六诊：癃淋之证，本由湿热蕴结而来，不为清利，而以针导，湿热依然蕴结，元气陡伤，辗转而致成损，奈何。

上安桂后入 川黄柏盐水炒 肥知母 滑石 泽泻 车前子 细木通 扁蓄 甘草梢 黑山栀

西人用银针针进尺许，尿血俱出，随后复闭，邪不得楚，元气转

伤矣。正蒙诂。

《张聿青医案》

黄述宁

李书彝令正，患小便不通，投八正散不效，询知头痛鼻塞，因用前胡、防风、半夏、细辛之剂不效，午刻复召，诊其脉，左寸关沉弦而细，右寸微洪，及验舌，色白如粉刺，始知厥阴家，寒与气凝，而昨昔之制军，尚欠斟酌也。方用干姜、吴萸、桂枝、细辛、郁金、元胡、通草、麝香、沉香。虽夜间稍通，而腹大气逆，呕吐恶心，辗转烦燥，举室惊慌。次早诊其脉，右寸浮洪而数，左寸关沉细如无，因以左金丸服之，呕止，因连进二钱四分，至晚通利如注。

《黄谿翁医案》

刘子维

王某之父，小便不通，胃不食，小腹胀痛，神气少，舌胎黑，口渴，饮茶十分困难。

云苓五钱 桔梗二钱 上桂三钱 连翘五钱 通草三钱
银花八钱 知母二钱 干姜五钱 甘草梢五钱 黄柏二钱
益智仁三钱 生白芍二两

三付，服一付小便通，三付诸病去。

李俊注：此癃闭也。《灵兰秘典论》曰：膀胱者，州都之官，津液藏焉，气化则能出矣。此决渎气化之在下者；《经脉别论》曰：脾气散精，上归于肺，通调水道，下输膀胱。此决渎气化之在上者。故小便者，天水气化之合也，有一失职，均可致不利。此症寒水不化，停蓄胞中，少腹胀痛，下失职矣；火炎金热，化源涸绝，口渴饮金，上失职矣。上下均失，此其所以不通也。

脾为胃使，肾为胃关，胃不利者，脾不能为胃行气，肾不能为胃降浊也。黑为水之色，舌乃心之苗，舌胎黑者，土不制水，水来克火

也。气逆脉满则神不安。十分困难者，肝正苦急，郁而不泄也。夫心为君火而司知觉，当行尿时，知觉之所至，即心火之所至，各官无不翕然从之。是小便虽为膀胱与肺之职，而司输送者，则心也，若火炎金热，知觉至而火与金皆不至，未见其能通调也。人皆知天交于水则小便出，抑知心交于肾，又为天水相交之前导乎？此症之困难也，口渴也，癃闭也，皆水火不交之明征，未有心火不降而天气得以交者也。薛立斋曰：人之溺尿，赖心肾二气为之输送，洵不诬也。《口问篇》曰：中气不足，溲便为之变。《经脉篇》曰：肝所生病，遗尿闭癃。故治小便不利者，宜详察病机所在何脏，有失而调之使平，不可拘，拘责之膀胱与肺也。

李东垣曰：口不渴而癃闭者，病在下焦血分，得之膏粱积热损伤肾水，无阴则阳无以化也。夫肾为水火之脏，可开合而行化于下，小便不通者，有合无开而化不行也。惟阳主开，惟肉桂能入下焦血分，化肾气以速其开，阳无阴不化，故又配以知、柏之辛苦寒以速其化，此滋肾丸寒热并用之义也。东垣治王善夫一案，腹坚如石，腿裂出水而舌胎不黑，盖气有余便是火，胀甚者，热亦甚，故重用知、柏。此症少腹胀痛，虽不无热，而舌胎黑色，则又为寒，故用滋肾丸而变更其轻重之配合。肺为水之上源，王善夫病虽下剧上轻，然未有治水而不治肺者。知母色白味辛，能清肺金之分，源清而流自远也。至东垣下焦血分宜阴中阳药之说殊未可全信，即以滋肾丸而论，曷尝不及上焦气分哉？此为偏治下焦血分。

口渴而癃闭者，病在上焦气分，宜气薄渗淡之药，以清水之上源，知母味厚，究非肺经专药，故用连翘清心火以导天气。银花、通草清肺热，肃肺气下行以通膀胱。桔梗则升提肺气，开上窍以资下达，犹之滴水器。然上窍开则下窍自利也，此为专治上焦气分。

黑者，寒水之色也，寒水之气能越土上凌而侮所不胜，不但水寒，而土亦寒矣。故用干姜、益智温中厚土，摄水归元而堤防之；茯苓则以伐肾邪，与干姜、益智相辅而行者也。五脏之情，各随所喜，

此之谓矣。此为治卑监之土，应崇其堤。

《生气通天论》曰：苍天之气，清净则志意治，顺之则阳气固，失之则内闭九窍，外壅肌肉。夫苍天之气，生气也。在人身为肝阳之气，禀受于天者也。顺之得天者全，故志意治而阳气固；逆之则得天者削，故五行之气皆逆而内闭外壅。此证上下不通，十分困难，正浊气膨胀，阳强欲绝之时也。故重用白芍平之，甘草缓之，以强内守而安志意，倘失此不治，一旦溃围而出，阴阳相离，腠理发泄则无及矣。甘草用稍者，并取其泻火达茎，以利小便，一举而两得之也，此为治太过之木不安于位。

《藏气法时论》曰：肝欲散，急食辛以散之，用辛补之酸泻之。夫肝欲散者，木喜条达也；辛补者，阳虚也；酸泻者，阳强也。然《金匱要略》曰：肝之病，补用酸，与经言能勿悖乎？盖从阳则谓之泻，从阴则谓之补，当阳强时，苟不用白芍之苦酸寒以泻之，则不能保其垂绝之阴，以为阳之守，得不谓之补乎？若有补无泻之酸温，则宜于阳虚不敛，又非阳强所宜矣。阳虚辛补治在肝肾，阳郁辛通则无界畔。人生无处无生气，即无处无肝气。阳郁宜辛者，乃欲使生阳之气流行于五脏、六府、十二经脉而不滞。如此方桔梗上开，肉桂下化，干姜、益智运脾胃，茯苓、通草利水道，皆足以疏达肝气，非必从肝而散之也。不惟此也，且须从肝而守之，俾郁遏之阳，随各经辛药之开，但条畅于内，而不消亡于外，而为上工，否则辛能散之，即能亡之，能勿虑乎？凡病除治其偏盛偏虚外，微用通药以畅其机者，皆散之之意。若疏肝不离生气发源之厥阴，疏肝之药不离升阳动阴之柴胡、川芎，则刻舟求剑矣，非《内经》立言之意也。若夫肺以酸为补者，当在收令不及、开泄太过之候，此症失之过合，惟宜治之以开，即参、芪之固，亦所不可，况酸收乎？

《圣余医案詮解》

余听鸿

常熟西乡大市桥宗福湖，小便不通，延医治之，不外五苓、导赤、通草、滑石之类，无效。已十三日未能小便，少腹高硬作痛，汗出气促，少腹按之石硬。余进通关法，加地黄，重用肉桂，一剂而通。渡仍未畅，少腹两旁仍硬，脐下中间三指阔已软。余曰：此阳气未得运化也。进以济生肾气汤大剂，少腹以葱薤水熏洗，三日渡畅如前。《内经》云：膀胱为州都之官，气化则能出矣。若专于利水，而不挟以温药，则愈利愈塞矣。

常熟大河镇李姓妇，孀居有年，年四十余，素体丰肥，前为争产事，以致成讼，郁怒伤肝，后即少腹膨胀，左侧更甚，小便三日不通。某医进以五苓、导赤等法，俱无效，就余寓诊。余曰：此乃肝气郁结，气滞不化，厥阴之脉绕于阴器，系于延孔，专于利水无益，疏肝理气，自然可通，立方用川楝子三钱，青皮二钱，广木香五分，香附二钱，郁金二钱，橘皮钱半，官桂五分，葱管三尺，浓汁送下通关丸三钱。一剂即通。明日来寓，更方而去。所以治病先求法外之法，不利其水而水自通，专于利水而水不行，此中自有精义存焉，非浅学所能领略也。

《余听鸿医案》

张锡纯

辽宁石某某，年三十二岁，于仲冬得小便不通证。

病因：晚饭之后，食梨一颗，至夜站岗又受寒过甚，遂致小便不通。

证候：病初得时，先入西医院治疗。西医治以引溺管小便通出，有顷小便复存蓄若干，西医又纳以橡皮引溺管，使久在其中，有尿即通出。乃初虽稍利，继则小便仍不出，遂求为诊治。其脉弦细沉微，不足四至，自言下焦疼甚且凉甚，知其小便因受寒而凝滞也，斯当

以温热之药通之。

处方：野党参五钱 椒目五钱炒捣 怀牛膝五钱 乌附子三钱
广肉桂三钱 当归三钱 干姜二钱 小茴香二钱 生明没药二钱
威灵仙二钱 甘草二钱

共煎一大盅，温服。

方解：方中之义，人参、灵仙并用，可治气虚小便不通。椒目与桂、附、干姜并用，可治因寒小便不通。又佐以当归、牛膝、茴香、没药、甘草诸药，或润而滑之，或引而下之，或辛香以透窍，或温通以开瘀，或和中以止疼，众药相济为功，自当随手奏效也。

效果：将药煎服一剂，小便通下，服至三剂，腹疼觉凉全愈，脉已复常。俾停服汤药，日用生硫黄钱许研细，分作两次服，以善其后。

说明：诸家本草，皆谓硫黄之性能使大便润小便长，用于此证，其暖而能通之性适与此证相宜也。

《医学衷中参西录》

赖松兰

癃闭，渡溺不爽，少腹屏痛，总属湿邪阻气，气化失宣也，以和中分利治之。

生川军 海金沙 黑山栀 篇蓄草 瞿麦 车前 滑石 草梢 片木通 明血珀 荸荠茎

《赖松兰医案》

王埶

甲寅春，余内阁供职时，以军饷浩繁，开钱铤例赠附生，并准捐教，以京铤二贯抵银一两。砚友宋懋之，名敏德。以附生人都捐训导，一切余为经纪，宋甚德之，上兑后，宋日邀余游观。一日归来，宋忽小便不出，兼腹痛。疑是感寒，忌生冷者数日，病仍不减。乃邀余

治。诊其六脉俱弦，两尺尤甚。乃曰：此蓄水也，利之可愈。投以五苓散加木通四钱，两刻许，小便泉涌，腹颇舒泰。越日再诊，左尺平，而右尺仍弦。乃曰：小肠之水已除，大肠之水尚在。不去之，恐召湿作泻，又以胃苓汤去肉桂加砂仁等进。服药后，宋寓居客店西藏睡，劳不自觉，天明始醒，而被褥粪秽粘染殆遍，急呼人湔涤之。觉腹中馁甚，自此食量兼人，颇称壮健。归来至家，已选安邑校官矣。安乃广文极优之席，到任后寄谢余曰，既蒙除去宿疾，又蒙经理得此官。感激之忱，铭于肌骨。而宋赋性鄙琐特甚，余见时尚酬应，余则寅友亲戚较锱铢如性命，不数年竟以大计失官。所积金，往来蒲洛作鹺贾，兹闻以疫疾，殁于茅津渡。所获货财，皆为他人赚去。贪鄙怪吝之骨，安能富厚终哉！因忆其病，故并志之。

《醉花窗医案》

吴鞠通

保，女，十八岁。怒郁，少腹胀大如斗，小便涓滴全无，已三日矣，急不可忍，仰卧不能转侧起立，与开阴络。

降香末三钱 香附三钱 广郁金二钱 龙胆草三钱 琥珀五分
两头尖三钱 归横须三钱 韭白汁冲，三匙 麝香同研冲，五厘
小青皮五钱煮三杯，分三次服，一帖而通，二帖而畅。

《吴鞠通医案》

徐锦

白茆新市钱延诊案云：酒湿素盛，膀胱气痹，小溲点滴，淋漓作痛，老年病癰，治颇费手。五苓散去术加川朴、二陈，别作滋肾丸。

再诊：仿东垣法以升举之，补中益气汤加芍，小水顿通。

《心太平轩医案》

金子久

两足酸楚，不便行动，起于十月初旬；少腹高突，小便癃闭，发于本月中旬；大便将旬始得更衣，小溲点滴不获通行，当脐之下少腹之上，有形横突日益增大。水道一日不通，气道一日不畅，渐至气入于络，胸膈肋助俱胀，形寒形热，忽来忽去，舌质糙黄，脉象弦紧，三焦决渎失司，膀胱气化失职，升降交阻，津液互伤，急当通其道，参以和其水道。

上瑶桂 制甲片 桃仁 牛膝 丝瓜络 知母 海蜇 川黄柏 车前草 木通 蟋蟀 地栗 金铃子

二诊：十月初头发现两足酸楚，本月中尝又加小溲闭滞，此三焦失决渎之司，而六腑失传输之职。近来大便亦不畅下，小溲又见涓滴，水道日窒，气道日塞，旧湿从何而去，新湿乘机而来，通泄愈滞，升降愈阻，少腹高如阜，按之坚如石，流行之气留于经络，胸膈肋助皆见胀满，脉息弦细，舌质灰燥，治法通腑通络，藉此和气利水。

川草薢 瑶桂 川芎 川柏 控涎丸 牛膝 海蜇 车前子 甲片 桃仁 知母 两头尖 红花染丝瓜络

三诊：大肠传导失司，大便二日一行，小肠受盛失职，小溲不循常度，有时频多，有时涓滴，当脐之下，少腹之上，忽而有形，忽而无迹。惊蜇将届，春阳萌动，肝木由此怒张，胃气竟受戕侮，夜寐不多，胃纳颇少，身半以上经络掣胀，身半以下经络酸楚。病缠已将三月，肝肾精营两伤，六脉弦细，舌质净白，猛剂妨碍气血，断不可施，缓剂宣通经络，似为妥当。

归须 桃仁 炒知母 茯神 枣仁 红花 染丝瓜络 瑶桂 栝蒌 黄柏 芽谷 盐水炒 牛膝 海蜇 大地栗

《金子久专辑》

曹锡寅

苏州皋桥铜匠王姓，壬子夏间陡患癰闭。凡一切通利之剂，靡不尽服，而病不稍减，腰酸腹胀，筋绞气闷，历至七日，始求治于余。适以诊者猥集，强欲速诊，并以危词耸听。余仓猝间屏息凝思，势果可危，急使嗅卧龙丹取嚏，连得数嚏，溲下如注。王某悦其病之若失，观众咸惊余智之急，技之神，一时发为疑议。殊不知此理出于日用之间，譬如壶茗满盛，口气闭塞，点滴不利，揭其盖，则所出如注，亦凡丹溪所谓将欲降之，必先升之之意，又曰气升则水自降。

《翠竹山房诊暇录稿》

孔继炎

姻戚孟聚五，亚圣裔，以贡生守选在家。年逾六旬，艰于小便，其症似淋非淋，每欲溲则气串而下，腰背先疼，甚则鼓结于腰臀之间如鸡鸭卵，小便点滴，移时不尽，或溺未下而大便已出，忽清忽水，总不能禁。遍用治淋之药皆不效，病数年矣。丁巳冬，遇予于从弟斗南家，遂求诊视。视毕，为立案曰：两尺浮细而近于弦，肝脉也。见于尺部，是为于乘母位；见于浮分，则督脉俱病矣。经曰：足厥阴肝之经病为腰疼、俯仰不利，为遗尿，为闭癰。又曰：督脉为病，不得前后。以脉症参之，此症之治，当责之厥阴与督脉二经。且厥阴之脉绕阴器，入少腹；督脉起关元，抵阴循茎，合纂绕臀，挟脊而上，正当今之病处，故须于二经求之。夫肝主疏泄，督总诸阳，肝气郁则疏泄之职弱矣，阳气闭则痹而不得通矣。此症疏肝经之气，当先养肝家之血；宣督脉之阳，必先开督脉之闭，寻常利小便诸药无当也。案出，聚翁阅一过，未及细谈，即促立方，且求速效。予曰：数年之病，责效旦夕，势所不能。且经病细微曲折，非可以大开大合、直行直治，姑依方用药，将来犹有变化，不可求急也。曰：服或不愈，何处寻君？予仍与翁期之斗南家。孟去，斗南问予曰：聚翁之病，向来无此

治法，今始改弦易辙，得效亦未可知，顾何以知其肝气之郁在气分，而先养其阴何也？曰：木喜条达，气偏乎阳，非血不足以丽之。经所谓软弱招招，如揭长竿末梢，此肝之平脉，见于本宫者然也。今弦在尺部，下陷肾中；细而不长，肝气已促；浮而不软，肝血不荫。气短血少，而借母气以自养，如贫儿浪子盗窃父母之衣粮，老年衰竭之肾气，岂堪供其挹取乎？夫肾，膀胱之源也。源本不旺，又被肝气吸引而上，无余气以输膀胱，故气化日窘。若不疏肝之气，肾气何以下通？若不养肝之阴，肝气何以不郁？治病必求其本，正谓此也。抑尤有合者，聚翁生于富贵，安享豪华，年来家计中落，不无经营。经曰：谋虑不决则伤肝。肝伤而血燥，其气将日郁而日甚。养阴以舒之，斯为正治，何待复言？曰：阳气闭何以痹而不通？而又责之督脉，何也？曰：人之一身，内为阴，外为阳，腹为阴，背为阳。督脉从腹而行于背，又在皮肤至浅之处，阳中之阳也。夫阴主闭而阳主通，其运行周流，本无停机，缘风寒湿三气合邪，客于脉中，阳气乃阻闭而不宣矣，聚久则结而为痹。聚翁之腰背串疼，鼓结如卵，即督脉之痹。督脉痹而阳气不能内达，因而为肠痹，因而为胞痹，小便从此愈艰矣。聚翁此症，肠痹与胞痹俱见，而治归于督脉者，病成而变，内邪由外邪酿成，治从其源也。曰：何以见为肠痹、胞痹？曰：经云：肠痹者，数饮而出不得，中气喘争，时发飧泄，胞痹者，少腹膀胱按之内痛，若沃以汤，涩于小便，上为清涕。聚翁之病有一不与此合者乎？夫聚翁痹在督脉，本应大小便俱艰，缘已病痹而气化阻，日饮之水不能渗入膀胱，转从幽门直注而下，故心欲漉而大便已溏。其膀胱一腑气不下达，及致太阳之经气逆行而上，烁及髓海，故适间之来，鼻中清涕源源，拭之不干也。吾为悬内照之鉴，此二症止从督脉求根蒂。督为诸阳之总司，而手足两太阳又外系督脉者也。督脉通则阳气内达于胞宫，肠与胞自可复其传化之职。惟肝家犹须养血，不得纯用阳药耳。斗南曰：善。后当再延之。及后予再至斗南家，延之来诊，以事冗不获至。予益知聚翁受病之由，而恨前言未尽使闻

也。

《孔氏医案》

贺季衡

吕男。阴气不足，传送无权，二便艰结，小水点滴不爽，胃纳不充，脉沉滑小数，间或喘逆。肺肾本亏，当清养肺肾，以资气化。

北沙参四钱 淮牛膝一钱五分 海蛤粉四钱 泽泻一钱五分
黑大豆四钱 潼沙苑四钱 云苓神各三钱 菟丝子四钱
车前子四钱，盐水炒 大麦冬二钱 连心莲子十粒

胡男。始而淋浊，止之太早，余浊留于肠腑，通降无权，于是癃闭，二便不通，脉弦数，舌苔浮白。拟通泄为先。

青宁丸三钱，开水另服 正滑石五钱 甘草梢八分 冬葵子四钱
淮膝梢一钱五分 细木通一钱五分 云苓四钱 净车前四钱
泽泻一钱五分 黑山栀二钱 蟋蟀七对

钱男。高年小溲勤数作痛，间或带浊，大腑燥结，脉沉细如丝，舌光如镜。血液已耗，虚而生燥，气化不及也。癃闭可虑。

油当归二钱 大白芍二钱 泽泻一钱五分 冬葵子四钱
台乌药一钱 淮牛膝一钱五分 清阿胶二钱 猪茯苓各三钱
大麦冬二钱 川萆薢四钱 滋肾丸三钱，开水另下

二诊：大腑已通，小溲带浊亦止，惟赤色及痛如故，入夜尤勤短，脉沉细小数，舌光无苔。高年血虚生燥，气化不及使然。

北沙参四钱 淮牛膝一钱五分 泽泻一钱五分 细木通一钱五分
清阿胶二钱 猪茯苓各三钱 甘草梢八分 大白芍二钱
肥知母一钱五分 大麦冬二钱 淡秋石八分 灯芯二十茎

潘男。猝然水道不通，气从下坠，右少腹急胀，如欲大便状，脉弦数右浮，舌黄边红。阴气不足，湿火下注肠腑也。

大麦冬二钱 淮牛膝一钱五分 小茴香一钱，盐水炒 泽泻一钱五分
瞿麦四钱 正滑石五钱 川楝子一钱五分 赤苓四钱 车前子四钱

滋肾丸三钱，开水先下

另：豆豉四钱，食盐少许，青葱一握开水泡，杵烂成饼，再入前味同杵，涂于关元穴，外帛束之。

二诊：进通阳理气，分化湿浊，水道已通，气从下坠亦减，脉之浮弦亦就平，惟溲时腰俞尚或酸楚，溺管尚或痛。肾气久亏可知，法当通阳益气，兼培下元。

白归身二钱 川杜仲四钱 泽泻一钱五分 小茴香八分，盐水炒
淮牛膝一钱五分 川黄柏一钱五分，盐水炒 鹿角霜二钱 云苓三钱
大生地五钱，秋石四分化水炒 净车前四钱，盐水炒 滋肾丸三钱，入煎

三诊：两进通阳化浊，小便癃闭已通，腰酸溺管痛已减，惟仍咳不已，脉尚数，舌心浮黄。阳气虽通，阴气未复也。仿知柏地黄丸用意。

大生地五钱 川黄柏一钱五分，盐水炒 肥知母一钱五分
泽泻一钱五分 粉丹皮一钱五分 云苓三钱 大麦冬二钱 川石斛四钱
乌玄参四钱 料豆衣四钱 连心莲子十粒

膏方：育阴益肾，以滋水源。

大生地五两 肥玉竹五两 川杜仲五两 女贞子四两
北沙参四两 云苓四两 大麦冬三两 川石斛四两 川黄柏一两五钱
肥知母一两五钱 黑料豆四两

上味煎汁，文火熬糊，入白蜜十两收膏。每服一匙，开水下。

服膏以来，热清阴复，水道已通，惟气分尚亏，劳则气怯，又当阴气两治。

大生地六两 炙黄芪三两 淮牛膝一两五钱 北沙参四两
女贞子四两 川杜仲四两 泽泻一两五钱，盐水炒 云苓三两
肥玉竹四两 黑料豆四两 潼沙苑三两 大麦冬二两 连心莲子五两

上味煎取浓汁，文火熬糊，入白蜜十四两收膏。每服一匙，开水化服。

王男。小溲不通，点滴不爽，且作通，少腹急胀，脉细数，舌红边

绛，心移热于小肠之见象也。

大麦冬二钱，连心 冬葵子四钱 黑山栀二钱 泽泻二钱
正滑石五钱 细木通一钱五分 白知母二钱 云苓四钱 车前子四钱
甘草梢八分 灯芯二十茎 蟋蟀七对

盛女。室女二便不通，少腹急胀，气从下坠，头肢麻痹，脉沉细，舌白。湿浊结于肠腑，气失通调，癃闭可虑。

当归二钱 淮牛膝一钱五分 猪茯苓各三钱 上肉桂五分，去皮，切
冬葵子四钱 小茴香一钱，盐水炒 台乌药一钱 泽泻一钱五分
川楝子一钱五分 炒枳壳一钱五分 瞿麦四钱 蟋蟀七对

另：荠菜花五钱，青葱一握，紫苏五钱，煎汤薰洗。

俞男。梦泄已久，败精与湿热相搏，水道不利，溺管痛，或带血丝，脉弦细，舌苔浮黄。延有癃闭之害。

大生地五钱 淮膝炭一钱五分 泽泻一钱五分 台乌药一钱
川楝子一钱五分 甘草梢八分 瞿麦四钱 大麦冬二钱 黑山栀二钱
川黄柏一钱五分，盐水炒 赤苓四钱 灯芯十茎
另：滋肾丸三钱，开水送下。

《贺季衡医案》

周镇

苏国祥之尊翁，年已八旬。向来参、芪温补，大便不畅，润之则通。乙未四月下旬，小溲忽秘。西医外治已通。复秘，少腹高起二寸，疑外疡也。疡科以敷药涂治，不减。五月补二日乃延余诊。脉弦右濡，苔白底滑。是高年运输失职，因事动气，水为之阻，恐其上冲而致喘变。厚朴、陈皮、薏仁、金铃子、鼠矢、乌药，二苓、泽泻、归身、苡蓉、甜杏仁、火麻仁、莱菔子、栗壳。另西血珀五分，麝香三厘，蟋蟀二对，黑丑三分，研末，砂仁汤下。外治用田螺、车前子、蒜肉、葱头、皮硝，打和烘热，敷脐上。又用葱斤许，切炒，布包，隔衣熨少腹，热盐亦可。

初三日复诊：已得小便，黄而不畅，略有矢气，五日未便，大腹之坚略软，中央尚高，湿为气阻显然。惟高年血液亦亏，故大便必三四日方解。膀胱气化不行，益以肠燥，症情夹杂，再拟通气化浊润肠。厚朴、半夏、陈皮、甜杏仁、紫菀、乌药、金铃子、鼠矢、苁蓉、归身、松子、莱菔子、莪术、玄明粉。另沉香四分，黑丑四分，血珀四分，蜈蚣一对，川贝母五分，研末，竹沥调服。洩通不畅，便解干燥，大腹之高满即退。辍药旬日，少腹之满复起。十五日延诊：脉弦不敛，苔白根腻。此高年肾液不充，膀胱不利。如偏分利，阴液更亏，姑拟增液理气化以通积水。大麦冬、大生地、元参、归身、鲜苁蓉、杞子、紫菀、薏仁、牛膝、车前子、云苓、黑芝麻、鼠矢。另肥知母、黄柏、交趾桂，研末，米饮糊丸，烘干，空腹服。另嘱食菠菜、麻酱润肠之品。服后二便旋通，饮食起居如常。越三月，饮餐后忽然作满，形如食豚，不及治而逝。

《周小农医案》

陆观虎

杨某某，女，36岁。

辨证：癃闭。

病因：肾阴阳俱虚。

症候：心悸气短，下午发热，溲灼烧难排，少腹坠胀。脉细。舌质红。

治法：补肾、清热、宁心、利溲。

处方：朱连翘6克 朱通草3克 海金沙9克 茯神6克
朱灯心3克 青蒿6克 远志3克 篇蓄6克 益元散9克
瞿麦9克 扁豆衣6克 金匱肾气丸9克，包另服

方解：朱连翘、远志、朱通草、茯神、朱灯心草安神以止心悸，利水道；海金沙、篇蓄、瞿麦、益元散、扁豆衣利小便以治少腹坠胀；青蒿治阴虚午后发热；金匱肾气丸补肾以治肾虚。

宫某某,男,43岁。

辨症:癃闭

病因:脾虚不能制水,水不下行。

症候:脘堵纳少,小溲不通,腹胀大而硬,腿足浮肿。脉细数。舌质红,苔浮白微黄。

治法:健脾行气利水

处方:焦麦芽24克 大腹皮9克 砂仁末3克 茯苓皮9克
沉香曲9克 香橡皮6克 冬瓜皮9克 鸡内金9克 猪赤苓各9克
文竹3克 车前子9克,包

方解:大腹皮、茯苓皮、冬瓜皮、猪赤苓、文竹、车前子行气利水道消肿,砂仁末、沉香曲、香橡皮、鸡内金、焦稻芽健脾胃行气助运化以治脘堵、纳少。

李某某,男,38岁。

辨证:癃闭。

病因:肝气郁结。

症候:少腹作痛,脘跳窜及臀部,小便排出费力,气乏无力。脉弦细。舌质红,苔薄黄。

治法:疏肝补肾,调中利水。

处方:焦于术6克 篇蓄9克 杜仲炭9克 远志肉6克
焦苡米6克 猪赤苓各9克 瞿麦9克 丝瓜络6克 车前子9克
云茯苓9克 甘草梢9克 代代花3克 佛手3克。

方解:篇蓄、苡米、猪赤苓、瞿麦、瓜络、车前子、草梢利水道,通小便,杜仲炭固肾去乏力。于白术、云茯苓调中气安心神;代代花、佛手花宽中疏肝气。

杨某某,女,40岁。

辨证:癃闭

病因:湿热滞于膀胱,气化失司。

症状:小便频数,色黄量小,少腹紧迫,两腿酸困,月水不准。脉

细弦。舌红，苔白。

治法：固脾气，通水道。

处方：瞿麦 9 克 猪赤苓各 6 克 泽泻 6 克 篇蓄 9 克 木瓜 9 克
生山药 9 克 通草 3 克 桑枝 15 克 益母草 9 克 益智仁 6 克
乌药 6 克

方解：瞿麦、猪赤苓、泽泻、篇蓄、通草泻膀胱湿热，利水通小便，生山药、益智仁、乌药三味即缩泉丸，用以止小便频数；木瓜与桑枝舒筋活络以治腿酸困；益母草活血调经。

崔某某，女，29 岁。

辨证：癃闭。

病因：热结膀胱。

症候：少腹作痛，下坠，小溲迫痛不利。口角疱疹，得食作吐。脉细数。舌红，苔黄布刺。

治法：顺气、平肝、清热。

处方：鲜佩兰 6 克 陈皮 6 克 佛手 3 克 苏梗 6 克
大腹皮 6 克 代代花 3 克 炒黄连同 3 克 杭芍 9 克 蒲公英 9 克
连翘 9 克 净银花 6 克

方解：佩兰、陈皮、佛手、苏梗、代代花、大腹皮芳香开胃，散郁顺气，故能止腹痛下坠，止吐，利小便，因气行则水行；杭芍平肝清热止腹痛。连翘、银花、蒲公英清热解毒散热结；炒黄连同泻肝火少腹坠痛自止。

张某某，男，41 岁。

辨证：癃闭。

病因：湿热郁结于膀胱，水不下行。

症状：小便淋流，排出不畅，尿痛，脘堵。脉细弦。舌质红，苔薄黄。

治法：清热健脾，利湿通窍。

处方：瞿麦 9 克 篇蓄 9 克 炒赤芍 9 克 建曲炭 9 克

山楂炭 6克 猪赤苓各 6克 云茯苓 6克 陈皮 6克 通草 3克
焦苡米 12克 益元散 9克,鲜荷叶包刺孔

方解:瞿麦、赤芍、篇蓄、猪赤苓、云茯苓、通草、苡米、益元散清膀胱郁结之湿热,利水通小便;建曲、山楂炭、陈皮健胃燥脾以去腹胀,宽中顺气,气化则小便自利。

《陆观虎医案》

施今墨

秦某某,男,66岁。尿意频频而排尿甚难,有时尿闭,须导尿始能排出,病已八年之久,经医院检查为前列腺肥大,需动手术,希望中医治疗。舌苔正常,脉象濡数。

辨证立法:心肾不交,水火无制,清阳不升,浊阴不降,致成小便淋漓涩痛,而尿意频频。治宜升阳、利尿,调和水火为法。

处方:炙升麻 3克 嫩桂枝 5克 盐黄柏 6克 炒吴萸 2克
鱼枕骨 25克 滑石块 25克 盐知母 6克
海金砂 10克,海浮石 10克同布包 台乌药 6克 炙草梢 3克
赤茯苓 10克 赤小豆 20克 车前草 10克 旱莲草 10克 蟋蟀 7枚

二诊:前方服二剂效果甚好,小便已非点滴淋漓,排尿顺利,但仍频数,要求常服方。

处方:炙升麻 3克 嫩桂枝 5克 盐知母 6克 盐黄柏 6克
海金砂 6克 海浮石 6克,布包 鱼枕骨 25克 滑石块 25克
赤茯苓 10克 赤小豆 20克 冬瓜子 12克 冬葵子 12克
车前草 10克 旱莲草 10克 炒吴萸 6克 醋炒川楝子 6克
台乌药 6克 炙草梢 3克 蟋蟀 1枚 蜈蚣 7枚

每星期服三剂。

《施今墨临床经验集》

不育

王燕昌

一商人，年三十余岁，无嗣。其脉两尺俱弱，水火俱亏也；右寸滑，右关细，腹疼时作，肺虚有痰、脾胃弱也；左寸、关平，肝、心尚未病也。用八味地黄丸加干姜、白术、鹿茸、五味子、白芍使服。妻、妾亦问证制方。后数年，商来谢曰：共生九胎矣，今存三男二女。

《王氏医存》

阳痿

倪复贞

福莆清海林公，叶相国内戚也。叶府席间谭及云阳痿久矣，方士多用起阳药投之，更痿甚，不知当用何药。余按得命门脉既虚弱，胃脉复弱甚。因思经云男子前阴谓之宗筋，宗筋属阳明，胃经阳明实而宗筋坚，能束骨而利机关矣。胃为水谷之海，六腑之大源，能容谷二斗，容水一斗五升，今之一大茶盂耳。饮食多则阳旺，饮食少则阳痿，今公食少且泻，安得不痿乎？治法但补命门真火，开胃健脾，使饮食日渐加倍，阳自起矣。公悦，遂用补骨脂为君，人参、白术为臣，白茯苓、干山药为佐，石斛、泽泻为使。交子时服，一二剂而起，三四剂而旺。《内经》云：诸痿生于肺热。肺金体燥，居上焦，肺虚则热，宜子母相生，脾乃肺之母也。余不用清肺热，但补下焦真火者，俾火生土，土生金，寻源之意也。

《两都医案》

齐秉慧

曾治江西徐茂松患阳痿，来寓谓余曰：“愚贸叙郡，以勤劳颇获

蝇头利。三十方娶，未数月而阳忽痿，饮食无味，精神衰减，松虽不肖，亦知不孝有三，无后为大。如此景况，命恐不保，焉望嗣乎？敢求先生怜治。”余遂与之酌一方，芪、术各五钱，姜、桂、附、半各二钱，砂、蔻、吴萸、川椒各一钱。服一剂。阳物出而不举。又服一剂，举而不坚。改用干熟地一两，白术五钱，山萸、杜仲、枸杞各四钱，远志、巴戟、苁蓉、茯神各三钱。熬汁冲香甜肉桂末一钱，服一剂而阳起，三剂而阳强矣。此方用热药于补水之中，则火起而不愁炎烧之祸。自然煮汤可饮，煮米可食，断不主焦釜沸于，或虞暴碎也。继服强阳壮精丹，用干熟地、嫩北芪各一斤，当归、白术各八两，巴戟天八两，麦冬、柏子仁、覆盆子、枸杞子、虎胥骨、嫩鹿茸、附子、肉桂各四两，白蜜为丸。服一料而阳强势举，饮食健旺，步履如旧，连生二子。

《芥有堂医案》

费伯雄

某。三旬以内而阳事不举，此先天稟弱，心肾失交，非老年阳衰之比。宜填充髓海，交合心肾。

熟地四钱 雄羊肾一对 甘杞子三钱 远志二钱 补骨脂一钱
白茯苓二钱 青盐五分 粉丹皮二钱 广郁金三钱 陈皮一钱
黑山栀三钱 猪脊髓一条 鹿御草三钱

《费伯雄医案》

王燕昌

一贵胃，三十岁，阳痿，大便或泄或止。医用八味加鹿茸、故纸、韭子、枸杞子，巴戟天等药不效，且遗精。诊其六脉沉细，右关濡弱，左关、两尺俱有力。问得酒色过度，湿热伤其脾、肾，故右关濡弱而阳痿、便滑；用药增其湿热，故左关、两尺俱有力而遗精也。用四君子加杜仲、牡蛎、泽泻、山药、麦冬、知母，十剂诸证俱已。原方去知

母，加黄芪、白芍为丸，而愈。

《王氏医存》

张乃修

庄左。命门相之，为生身之本，真阳亏损则火衰，湿痰郁遏，火不用事，则火亦衰。脉滑而大。痰多阳痿，火之式微，湿之有余也。取舍之间，自有明辨。

冬术炭二钱 制半夏一钱五分 生米仁四钱 炒蒺藜三钱
广皮一钱 泽泻一钱五分 赤白苓各二钱 川草薢二钱 杏仁泥三钱
姜汁炒竹茹一钱

二诊：流化湿邪，相火得展，而腹笥膨满。还是湿郁气滞。再调气泄湿。

冬术炭 大腹皮 生薏仁 枳实炭 制香附 赤猪苓 泽泻
广皮 木香 砂仁 焦麦芽

左。体丰多湿，加以大病之后，余蕴未清，以致湿邪流行入络，髀关及左腿膝作酸，麻木不仁，艰于步履，腰背作痛，卧着尤甚。湿邪久困，则相火为之郁遏，阳道不举。脉象濡滑，苔白微黄，质腻。皆由络隧之中，为湿所阻，则无形之气，有形之血，不能宣畅流布。而历来所服之药，皆是补滞之品，未免为敌树帜，名曰中湿，非久药不为功。

汉防己一钱五分，酒炒 川草薢三钱 左秦艽一钱五分 上广皮一钱
制半夏二钱 威灵仙一钱五分，酒炒 焦苍术一钱五分 川桂枝五分
生米仁五钱 川独活一钱五分 泽泻一钱五分
桑枝酒炒，一两五钱，煎汤代水

二诊：祛湿和络，脉象稍觉流畅，相火有燃动之机。足见湿邪抑遏，虽有真阳，无从发露。药既应手，再扩充以进。

焦苍术一钱五分 川草薢二钱 汉防己一钱五分，酒炒
威灵仙一钱五分 赤白苓各二钱 制半夏二钱 泽泻一钱五分

独活一钱 木猪苓二钱 新会皮一钱 川桂枝五分 白僵蚕一钱五分
生薏仁四钱 红花三分、酒炒

《张聿青医案》

施今墨

张某某，男，36岁。素患神经衰弱已十年之久，头晕神虚，自觉眼冒黑花，虽曾治疗，时轻时重。近一年来，又感腰酸楚，阴囊冷，早泄、阳痿屡治未效。面色青白，精神疲惫。舌苔薄白，脉沉细无力。

辨证立法：神经衰弱患之日久，常有阳萎、早泄症状产生，盖肾者生成之本，元气之根，精神所舍，肾气足则志有余，若肾阳虚，则现阳萎、早泄，腰为肾府，故现腰酸楚，肾寒则阴囊冷，治之以温肾、补阳、壮髓之剂，病属慢性，宜服丸药。

处方：海马1具，紫河车60克 紫贝齿30克 牡蛎30克
石决明60克 阳起石30克 龙骨60克 仙茅60克 桑叶60克
蛇床子30克 刺猬皮30克 巴戟天60克 砂仁5克 益智仁15克
菟丝子60克 海参60克 阿胶30克 鹿角胶30克 淫羊藿60克
附片30克 於术30克 吉林参30克 金樱子90克

共研细末，怀山药300克打糊为丸如小梧桐子大，每日早、晚各服10克，白开水送下。

二诊：服丸药一料，共服七十日。头晕、眼冒黑花，阳萎、早泄诸症均见好，面色红润，精神焕发，工作效率增强，要求再配丸药服用。

处方：鹿茸片30克 紫河车60克 龙骨60克 珍珠母60克
蛇床子30克 刺猬皮30克 海参60克 砂仁15克 益智仁15克
仙灵脾60克 鹿衔草60克 仙茅60克 菟丝子60克 巴戟天30克
阳起石30克 阿胶60克 白蒺藜60克 甘枸杞60克
车前子30克 山萸肉60克 炙甘草30克 五味子30克
覆盆子30克 大熟地60克

共研细末，怀山药 600 克打糊为丸，如小梧桐子大，每日早、晚各服 6 克，本方可服一百四十日，服药期间注意节欲，并应练习体操或练太极拳，以助气血活畅。

《施今墨临床经验集》

遗精

丹溪

一人，虚损盗汗，遗精白浊。用四物加参、术、黄芪、知母、黄柏、牡蛎、牛膝、杜仲、五味煎服寻愈。

一人虚损，小便中常出精血。以四物加山梔、参、术、麦冬、黄柏、木通、车前子、茯苓。

一人，年六十五，精滑常流。以黄柏、知母、蛤粉、山药、牡蛎、饭丸梧桐子大，盐汤下八十丸。

一人潮热精滑。八物加黄柏、知母、牡蛎、蛤粉。

《名医类案》

东垣

一人，年三十余，病脚膝痿弱，脐下尻臀皆冷，阴汗臊臭，精滑不固，群医治以茸热之药，罔效。李脉之沉数有力。曰：此因醇酒膏粱滋火于内，逼阴于外，复投热药反泻其阴而补其阳，真所谓实实虚虚也。以滋肾丸，黄柏、知母（酒洗焙）各一两，肉桂五分，丸梧桐子大，汤下百丸，大苦寒之剂，制之以急，寒因热用，引入下焦，适其病所，以泻命门相火，再服而愈。

《名医类案》

虞恒德

一人，病遗精潮热，卧榻三月矣。虞脉之，左右寸关皆浮虚无

力，雨尺洪大而软。投补中益气加熟地、知母、黄柏、地骨皮煎，下珍珠粉丸。外做小篾笼一个，以笼阴茎，勿使搭肉。服药三十余贴，寻愈。

《名医类案》

丹溪

一人，年二十余，夜读至四、五鼓，犹未就枕，故卧，茎一有所著，精随而遗，不著则否，饮食减而倦怠少气，夫何故？盖用心过甚，二火俱起，夜弗就枕，血不归肝，则肾水有亏，火乘阴虚，人客下焦，鼓其精房，则精不得聚藏而走失矣。因玉茎著物，犹厥气客之，故作接内之梦。于是上则补心安神；中则调理脾胃，提掣其阴；下则益津生阴固阳，不三月而疾如失。

一老人年六十岁，患疝而嗽，多服四兽饮，积成湿热，乘于下焦，已岌岌乎殆矣。朱诊之，尺数而有力。与补中益气，加凉剂，三日，与黄柏丸，及早，尺数顿减。询其有夜梦否？曰：有之，幸不泄耳。是盖老年精衰，因无以泄。为大热结于精房，得泄火益阴之药，其火散走于阴器之窍，疾可瘳矣。再服二日，又梦，其疝嗽全愈。

一人每夜有梦，朱连诊二日，观其动止，头不仰举，但俯视不正，必阴邪相著。叩之，不言其状，询其仆，乃言至庙，见侍女，以手抚摩久之，不三日而寝疾。令法师入庙，毁其像，小腹中泥土皆湿，其疾随瘳。此则鬼魅相感耳。

一男子至夜脊心热而梦遗。用珍珠粉丸、猪苓丸，遗止。终服紫雪，脊热毕除。

一男子脉洪，腰热遗精。用沉香和中丸下之，导赤散泻其火而愈。乃知身热而遗者，热遗也。按：沉香和中丸，即王仲阳之滚痰丸。

丹溪壮年有梦遗症，每四十五日必一遗。累用凤髓丹、河间秘真丸，效虽少见，而遗终不除。改用远志、菖蒲、韭子、桑螵蛸、益智、酸枣仁、牡蛎、龙骨、锁阳等为丸，服之寻愈。

一男子丁年梦遗，群医以珍珠粉丸，罔效。亦以远志、菖蒲等剂投之，应手而愈。

一壮男子，梦遗白浊，少腹有气冲上，每日腰热，卯作酉凉，每腰热作则手足冷，前阴无气来耕，腰热退，则前阴气耕，手足温，又且多下气，暮多噫时振，隔一旬二旬必遗。脉旦弦搏而大，午洪大，知其有郁滞也。先用沉香和中丸大下之，次用加减八物汤，下滋肾丸百粒。若稍与蛤粉等涩药，则遗与浊滋甚，或一夜二遗，遂改用导赤散大剂并汤服之，遗浊皆止。

有二中年男子，皆梦遗，医或与涩药，反甚，连遗数夜。乃先与神芎丸大下之，继制猪苓丸服之，皆得痊。

一武官便浊，精滑不禁，百药罔效，用倒仓法而愈。于此见梦遗属郁滞者多矣。

《名医类案》

吴球

一男子，因病后用心过度，遂成梦遗之患，多痰瘦削。群医以清心莲子饮，久服无效。吴诊脉紧涩，知冷药利水之剂太过，致使肾冷精遗而肾气独降，故病益剧。乃以升提之法，升坎水以济离火，降阳气而养血滋阴。次用鹿角胶、人乳填补精血，不逾月而愈。

木渚吴姓者，病精滑，百药勿疗。或授以一术，但以胁腹缩尾闻，闭光瞑目，头若石压之状，即引气自背后直入泥丸而后咽归丹田，不计遍数，行住坐卧皆为之。仍服保真丸，及半载，颜色悦泽，病不复作矣。此术亦可以疗头风。（席上辅谈）

盛启东永乐戊子夏治郁文质遗精，形体羸弱，兼痰嗽交作，日夕不能休。群医治之，转剧。盛视之，曰：此阳脱也。急治则生，缓则死。非大料重剂则不能瘳。于是以附子、天雄，佐以参、苓、白术，日加数服，夜则减半，自秋徂冬，所服附子约百余枚，厥疾乃瘳。

有人梦遗精，初有所见，后来虽梦无所感，日夜常常走漏。作心

气不足，服补心药，罔效。作肾气虚治，亦罔效。医问患者，觉脑冷否？应之曰：只为脑冷。服驱寒散遂安。盖脑者，诸阳之会，髓之海。脑冷则髓不固，是以遗漏也。宜先去脑中风冷，脑气冲和，兼服益心肾药，无不瘳者。

《医余》

王中阳

一石工，丁年，忽病头目不利，肩背拘急，合目即便泄精，四肢沉困，不欲执作，梦寐不宁。每作虚治，罔效。王治之，使其趺足而坐，则其股足随气跳跃，如脉六动，其脉亦过位，长实有力。遂用凉膈散、青木香丸互换，疏道三五次，更服三黄丸，数日寻愈。

《名医类案》

汪石山

一人，年四十余，洩精久之，神不守舍，梦乱心跳。用清心莲子饮，罔效。取袖珍方治小便出髓条药服之，又服小兔丝子丸，又服四物汤加黄柏，亦罔效。汪诊之，一日间其脉或浮濡而驶，或沉弱而缓。曰：脉之不常，虚之故也。其症初因肾水有亏，以致心火亢极乘金，木寡于畏而侮其脾，此心脾肾三经之病也，理宜补脾为主，兼之滋肾养心，病可疗也。方用人参为君，白术、茯神、麦冬、酸枣仁、梔子、生甘草为佐，莲肉、山查、黄柏、陈皮为使，其他牡蛎、龙骨、川芎、白芍、熟地之类，随其变症而出人之。且曰：必待人参加至五钱病脱。其人未信，服二十余日，人参每服三钱，洩精减半矣；又月余，人参加至五钱，寻愈。

《名医类案》

江篁南

一壮年，患遗精，医用滋阴降火剂，罔效。一医用牡蛎、龙骨等

止涩药，其精愈泄。又服芩、连、檉、山梔等药，百五十余贴，兼服小便二百余碗；又或作痰火治，或作湿热治，俱罔效，盖经年余矣。二月间，请江诊视，左脉浮濡无力，右寸浮散近驶，两尺尤弱，不任寻按。其人头晕，筋骨酸疼，腰痛畏气，小便黄，腹中时鸣。以熟地黄、远志为君，当归身、桑螵蛸、人参为臣，石莲子肉、白茯苓为佐，石菖蒲、甘草为使，十余贴后精固，惟筋骨犹酸，小便犹黄，腹或至晚犹鸣，煎剂再加黄柏，兼服补阴丸加人参、鹿茸、菟丝子、桑螵蛸、茯神之类，两月而愈。

夫梦遗有三：有因用心积热而泄，有因多服门冬、茯神、车前、知母、黄柏冷利之剂而流泄者，有久遗玉门不闭肾气独降而泄者。治法：积热者，清心降火；冷利者，温补下元；肾气独降者，升提肾水，使水火自交，而坎离之位定矣。

山阴戴文训，少年患梦遗，服固精丸而愈。用狗头骨一个，煨存性，用粳米饭为丸，如梧桐子大，朱砂金箔为衣，每服五六十丸。

《名医类案》

秦昌遇

一人患遗精，闻妇人声即泄，瘠甚欲死。以远志为君，莲须、石莲为臣，龙齿、茯神、沙蒺藜、牡蛎为佐。丸服稍止，然终不断，于前方加螵蛸一味，不终剂即愈。

《医验大成》

程从周

程延甫年二十五岁，修长而白皙，常有梦遗之患。今年五月终旬，盖因酒多，又兼劳碌，小便赤涩，隐隐作疼，似淋而非淋也。医以为淋浊，竟用通利之剂，一剂而精遗，再剂而精滑矣。且连日叠用枝、苓、滑石、槟榔、乌药，无剂无之，盖未知其何所取用。乃一日梦遗之后，复以寒凉杂进，以致小腹胀疼，大小便皆为阻滞，胀痛殊

急，不能反侧。予脉之，曰：“此中气大虚，清气下陷，皆苦寒降下之所致也。而槟榔坠气为害更多。”予乃用补中益气汤，升提其气，而胀自宽，加肉桂以散其寒，而痛自止，服之果然奏效，数剂而痊。但此症若非早用温补，则为寒凉所误，变症蜂起，而延甫或亦未知其病之轻重也。

《程茂先医案》

沈璠

汪周拔二令郎，年二十二岁，新婚之后，乃祖督课颇严，馆于别业，经年不入韩房，肝火抑郁而不舒，扰其精房而成梦遗。马元仪以补肾涩精之药治之，甚至厥逆不醒，谓其为虚欲脱，竟以参、芪、鹿茸、河车等药补之，日甚一日，肌肉消瘦，卧床不起，已经一载，于是延余诊视，时八月下旬，见其饮食少进，暖气而大便燥结，五六日一解，语言默默，小便黄赤。诊其脉息，沉细带数，察其形，唇口、面色皆红，肌肉虽瘦，润泽而不枯，夜间坐而不卧，无倦怠之意，日间只食薄粥二盏，按其胸腹，板硬不和软。此因补药太过，壅塞肠胃，气道不行，不能宣通，正所谓大羸有实也。因投以二陈加莱菔子、山楂、枳壳、香附、厚朴，冲元明粉服之。三剂后，大便去结粪三、五块，胸次稍宽，语言稍出，又进滚痰丸三钱，又去结粪五、六块，再服前煎方五、六帖，大便去粘腻而黑色者不计，间与滚痰丸及清火理气之药，如得通泰，自是可进稀粥六七碗，然亦不觉大饥。又以保和丸加黄连，早、晚服之。两月后可进干饭。余往还两月，而门人蔡沧文居其家，常为调理，至冬至后，步履如常，住宿于内，新春到舍奉谢，酬以千金，此康熙四十八年之事，其人号严天，至今无恙。今元仪谓是渠调治而安，欺妄无耻，即此一案，可知其无不说谎，无一可信，而犹谬自著述，附会于他人之书尾，真鬼蜮也。雍正八年，海上沈璠，时年七十有八。

《沈氏医案》

任贤斗

聂连拔，梦遗，四五夜一次，或六七夜一次，服养气收涩之药而遗反甚，一夜一次，或一夜两次，色淡神疲，脉略洪大。其色淡神疲似属气虚，故宜养大，第脉之洪大必内有伏火，火乱神室，致妄梦遗精，是神疲色淡者，因精之去，精去因于妄梦，妄梦因于火乱神室也。前服养气涩精，皆是助火之物，致梦愈动而精无夜宁。与二阴煎，一剂即减，五剂全安。第梦遗愈后，精神仍疲，此因精去之多而然，乃与小营煎，二十余剂而始健。

二阴煎

生地 麦冬 枣仁 玄参 黄连 茯苓 木通 甘草 灯芯

小营煎

熟地 当归 枸杞 白芍 淮山 甘草

或问曰：精去过多何不用左归饮以补精？曰：精因火动之病，补精切防助火，若左归饮内有枣皮敛火，梦必复作，小营煎补精，无敛火之物，又有白芍养阴泻火，其功实妙于左归饮。

《瞻山医案》

缪遵义

脉右尺举按少力，左关弦，肝火易动，动则主疏泄，精泄不固，有自来矣。右尺主肾中之阳，脉象不鼓，一由真阳不足，一由心火不降。不降则不交，少阴之枢室矣。从两经论治，方合病机。

制于术 菟丝饼 麦冬 川斛 远志炭 沙蒺藜 杜仲 巴戟肉 黄甘菊 丹皮炭 米仁 莲蕊。

素患精虚遗泄，今春始发潮热，半夜方止。补则扞之而热，后则热及骨髓矣。此系肾虚，复感冬寒，以感轻，故发亦不甚耳。

炒熟地 桂枝 生牡蛎 龙骨 茯神 白芍 煨姜 炙草

陈念祖

病由忧郁而起，肝火亢盛。始则小便浑浊，渐至遗精，经年未痊。现春木司令，其势益张；是以少腹气逆上攻，心烦脘闷，口苦色苍脉弦，皆木火亢烈之明征。虚火妄动，坎离不交，阴精乃暗走外泄矣。宜制木壮水，冀可平复，方列后：

生地黄三钱 川连八分，炒 赤茯苓二钱 肥知母一钱五分
炒黄柏一钱五分 黑山栀二钱 沙参二钱 延胡索一钱 龟板二钱
川楝子一钱 芡实二钱

上药水同煎服。另吞当归龙荟丸一钱，开水送服。

诊得右脉三部俱见弦滑，左尺细，寸关微弱，舌苔白色。以脉合症，是肾阴下亏，湿热内淫，相火挟而上蒙清窍。是以头眩耳鸣，下则遗精，肛门作痒出水。法宜滋养肾阴，调和胃土，并分利膀胱以化湿热而清相火，冀可有效。

大生地四钱，炒 淮山药三钱 赤茯苓三钱 粉丹皮二钱
麦门冬二钱 川草薢二钱 龟板三钱 制半夏二钱 黄柏一钱五分
知母一钱五分 左牡蛎三钱 泽泻二钱

色白脉小，频患梦遗。阴精久已失守，入春阳动不藏，诸气皆升。头面常热，心悸汗出跗肿，动即气促，夜寐不安，五志烦扰。乃肾气摄纳无权；阳不潜伏。宜取厚味以填阴，重质以镇神，并甘以缓之，酸以收之，久持冀可有效。

熟地黄三钱 清龙骨二钱 淮山药二钱 白茯神二钱
人参一钱五分 枸杞子一钱五分，炒 炒牛膝一钱 五味子七分

诊得左尺脉浮不和，肾气虚损可知，关部独大弦数，舌苔黄燥，肝经湿热，郁火又盛。火动必摇其精，故时有梦遗之患。肾主收藏，虚则宜补；肝主疏泄，实则宜泻。斯为一定成法。

人参二钱 天门冬二钱 黄柏二钱 炙甘草七分 大生地三钱
缩砂仁八分 黑山栀二钱 柴胡一钱 龙胆草一钱五分

水同煎服。

《南雅堂医案》

程文囿

萃翁公郎，禀质向亏，诵读烦劳，心神伤耗。初病浮火上升，继则阳强不密，精时自下，诊脉虚细无力。方定六味地黄汤，除茯苓、泽泻，加麦冬、五味、远志、枣仁、牡蛎、芡实。期以功成百日。服药数剂未应，更医病状依然。复召诊视，予曰：“此水火失济象也，岂能速效。”仍用前方，再加龙骨、蒺藜、桑螵蛸、莲蕊须，合乎滑者涩之意。守服两旬，虚阳渐敛，精下日减，但病久形羸食少，究由脾胃有亏。经云：肾者主水，受五脏六腑之精而藏之。是精藏于肾，非生于肾也。譬诸钱粮虽贮库中，然非库中自出。须补脾胃化源，欲于前方内参入脾药，嫌其杂而不专，乃从脾肾分治之法。早用参苓白术散，晚间仍进前药，服之益效。续拟丸方，调养而瘳。

《杏轩医案》

齐秉慧

曾治魏孝廉发热遗精，或小便不禁。诊其脉，右寸浮大，右关微弦，左寸关俱沉微，两尺俱迟而扎。余曰：“此劳伤脾肾，俱属亏损。”遂与补中益气汤合六味地黄丸料，煎服十剂顿愈。劝令多服补中益气汤，以滋化源，兼服六味地黄丸，壮水为主，至今不发。

又治王孝廉劳则遗精，牙龈肿痛。余即以补中益气汤加茯苓、半夏、白芍，并服六味地黄丸渐愈。更以十全大补汤，而元气大复。

又治俞万顺梦遗白浊，口干作渴，大便燥结，午后发热。余以补中益气汤，加白芍、玄参，兼服八味丸而瘳。

曾治雷监生患茎中痛，小便作痒出白津。余用逍遥散加半夏、

茯苓、山梔、泽泻、木通、龙胆草，煎服二剂而痊。继服六味地黄丸壮水，永不再发。

曾治李文龙便血精滑，或尿血发热，或小便不禁。余曰：足下肾经亏损已极，遂以补中益气汤，合六味地黄丸料，滋其化源而愈。

又治汤孝廉遇劳遗精，申酉二时大热，其齿痛不可忍。余曰：此脾肾虚热，先煎补中益气汤，送六味地黄丸，更服人参养营而痊。

曾治春桥茂才魏表弟，禀性刚直，为人厚道。素患中气不足，遗精唾血。愚于庚午春诊之，右寸脉大于五部，惟左尺沉迟而扎。余曰：足下之恙，乃浊气下降，清阳不升，中州郁滞，脾失健运，黄庭衰败，不能摄血。兼以肾气涣散，或观书久坐，或作文用心，每劳必遗精。缘因茯苓、陈皮疏泄太过，一味滋阴，以至阴愈长而阳愈亏矣。春桥曰：“分经用药，阳生阴长，既闻命矣。敢问治之当何法？”余曰：“明乎哉问也！乃用黄芪、白术大补中气，益智、故纸收摄肾气，砂仁、半夏醒脾开胃，干姜、白蔻宣畅胸膈，使中州气旺，转运有权，肾气收藏。胸中之气，肃然下行。再加煎当归、茯神、远志、枣仁安神，益智，麦冬甘寒润燥金而清水源，五味子酸温泻丙丁，而补庚金。更以鹿鞭大补肾阳，芪、术、参、茸温补黄庭，益其气而举其陷，则肾自固而精自守。再服龟鹿地黄丸，壮水之主，大补精血，可保长年矣。彼见余议病精确，依法调理而安。明年冬以书谢我曰：三折妙手，俾得远近回春；万应仙方，普动亲疏诵德。弟不知何修而得遇此矣，沐恩愚表弟，奇逢顿首。

甲戌冬，又因惊闻戚友家难。不忍坐视，代为忧郁，前症复发。偶因外寒，邪中章门，痛如刀插，人即昏晕，倒卧床褥。乃兄仓皇，急延予诊。按之六脉已伏，惟右寸浮大，乍有乍无。细察其候，脱症已具八九，刻不容缓，乃与逍遥散舒肝气，归脾汤解郁结，合煎一剂而苏。明早复诊，脉出如常矣。以理脾涤饮，加草蔻一钱，煎服二剂而安。春桥复问余曰：“章门结块，痛似刀插，又兼麻木，人即昏晕，而脉即伏，果为何症？”余曰：“窘乎哉问也。其理莫措，静而筹之。”明

日方得其解。麻乃血虚，木乃湿痰，皆脾肾经寒所致。缘君平日慧直善怒，怒则未有不伤心肝脾三经者也。理脾涤饮，乃对症之方，兼服归脾汤，解郁结，生脾血。补中益气汤，壮脾胃，生发诸经。龟鹿地黄丸以滋补肾肝，汤丸并进，自必永寿。丙子秋又书曰：弟自幼至壮，多病床褥，父母常忧不寿。庚午春，天以兄台赐弟，一饮妙剂回生。不独弟蒙深恩，即堂上白发亦暗自怡颜，以为弟身强壮，可以读书稍慰于万一耳。沐恩愚表弟顿首稟谢。

曾医优生雷大壮，赋性端方，为人诚厚，素患遗精。缘由先天不足，中气大虚，幸自调养，究之治未得法。丙戌之秋，病卧床褥，脱症已具，举室仓皇。乃弟求诊，按之六脉沉微，右寸脉大而空，左尺迟细而扎。察其色，淘其状，肾气涣散，屁无休息，尤兼下利不能收固，心慌之极，自知其不可为矣。余哂曰：不妨。观子面白唇红，声音清亮，目睛尚慧，生气勃勃，雷氏尚有福庇也。纵病虽重，吾药可解，子何忧哉？”乃与黄芪、白术、大补中气、砂仁、半夏醒脾崇土，胡巴、故纸收固肾气，怀山、芡实、莲子兜塞大肠，涩以固脱，大剂多服，使精生神足，肾气收藏，元气自复。兼服龟鹿地黄丸，加牛膝、虎胶，壮水生津，强筋壮骨，如法调理，果逾月而安。

曾治同庚康生三兰香，素好勤学，四鼓犹未卧。忽自汗梦遗，瞑目即泄，乃翁求治。予曰：“此因勤劳，三阴受伤。”遂与补中益气汤合六味地黄汤，煎服四剂而梦遗少，精神稍舒。乃依仲景法，用芡实八两，怀山、生枣仁各十两，建莲子心中棣芽五钱焙干，和前药为末，米汤打为丸，梧子大，滚水送五钱，日二服。此方平淡之中有至理存焉。盖心一动而即精遗，乃心虚之故，而玉关不闭也。方中山药补肾而生精，芡实生精而去湿，生枣仁清心而益心包之火，莲子心尤能清心而气下通于肾，使心肾相交，闭玉关之圣药。谁知莲子之妙，全在心。俗医弃置不敢用，良由所见不广耳。妙哉斯论，乃载在大乘莲花经内，医道所以须通竺典。生枣仁正安其不睡，始能不泄，妙在与山药同用，又安其能睡而不泄。

治梦遗成劳者，每小便桶内起泡盈桶，此肾水衰涸也。以红鸡冠花为末，用温酒调服三钱而愈。

余尝闻士子读书辛劳，最宜节欲。盖劳心而妄想，又不节欲，则相火必动，动则肾水日耗，水耗则火炽，火炽则肺金受伤，而变为劳。轻则盗汗自汗，梦遗精滑；重则咳嗽唾痰，吐血衄血。体壮者幸遇明医，扶之即起，体弱者治之尤难。一遇庸医误投寒凉，轻者重，而重者死矣，冤哉！慧溷杏林五十年来，深知读书之苦心，洞鉴得病之情由。

《齐有堂医案》

王九峰

肾受五脏六腑之精而藏之，源源能来，用宜有节。精固则生化出于自然。脏腑皆赖其营养，精亏则五内互相克制，诸病之所由生也。素本先天不足，童年后为遗泄所戕，继之心虚白浊，加之过劳神思，以致心肾不效，精关不固，精不化气，气不归精，渐成羸疾。《经》以精食气，形食味，味归气，气归精。欲补无形之气，须益有形之精；欲补有形之精，须益无形之气，形气有无之象也。今拟气味俱厚之味，味厚补坎，气厚填离，冀其坎离相济，心肾交通，方克有济。

熟地 麦冬 杞子 黄柏 五味子 河车 冬术 覆盆子
菟丝子 洋参 丹参 枣仁 沉香 龟板胶 黄鱼胶

蜜为丸

《王九峰医案》

顾金寿

唐璞齐。两脉沉涩，尺尤少力，见色流精，不能健举，年近四旬，子女信沓。此先天不足，更兼操劳过耗，精气不固。法宜丸药培补。

丸方：何首乌八两，竹刀刮去皮，赤白各半，黑豆同蒸九次 白茯苓四两，人乳拌晒 牛膝二两，酒浸，同首乌第七次，蒸至第九次 归身四两，酒洗 枸杞

子四两，酒浸 菟丝子四两，酒浸 破故纸二两，黑芝麻炒 川续断二两，
盐水炒 车前子二两 蒸五味二两，去核 白蒺藜二两，去刺 芡实四两

上药治末，用羊腰子十个，猪脊髓十条，煮烂捣丸，如桐子大，
每空心淡盐开水送四钱。

再每逢入房之期，先用鹿阴蒸熟切片，陈酒送四五钱，饮勿过
醉。

问种子俱用温药壮阳，前此调治，亦遵古法，竟如石投大海，今
用美髯丹加减而效，且得生男何也？曰：种子过用壮阳燥剂，是房中
术，非毓麟法也。男子当壮年不能遂欲，固由先天精气不充，亦因心
相两火虚而易动肾水，又无所熬恋，故易于疏泄，徒壮相火，肾水被
劫，气愈不能坚固矣。譬之灯火不明，添油乎？加火乎？此间自有
至理，必须温养水中之火，加以血肉有情者填补精髓，俾精充生气，
气固聚精，自无不效之理。经云：不足者补之。此类是也。易云：男
女媾精，万物化生，本属自然妙理。试观禽兽交合有时暨男女私情
暗合，无不一发即中，非精充情动之验欤。若居平不知保养，交合不
按经期，徒求助于金石，取快一时，吾恐去生已远，尚安望生生不已
耶。悲夫。

《吴门治验录》

吴簪

祥，据述十五岁完娶后，得梦遗精滑，嗣当差劳役，即头目眩
晕，腰疼足酸，夜间睡着即遗。余按脉虚弦数，尺部尤旺。缘知识太
早，气血未充，耗损直阴，以致虚火上炎，精气滑脱而然。《经》曰：阴
精所奉其人寿，阳精所降其人夭。凡少年初省人事，精道未实者，以
惜精净心为要着。古语：苟知惜命先须惜精，苟欲惜精先须净心是
也。即服知柏地黄丸加远志、莲须、杜仲、蔡胶，以冀渐愈。

《临证医案笔记》

何书田

气阴两亏，脱肛精滑。舍补无策。

大熟地 炒归身 西路党 淮山药 炙甘草 炒萸肉 炙五味
制于术 白茯苓 炙升麻

劳伤结痞，阴虚滑泄，证关肝肾两经。年少患此，不易愈也。

中生地 沙苑子 肥知母 淮山药 生牡蛎 炙龟板 牡丹
皮 炒黄柏 白茯苓 芡实

真水亏，相火炽，精关不固，梦泄频作；脉弦细而数。当从少阴补纳。

大熟地 沙苑子 炒萸肉 五味 淮山药 茯苓 炙龟板
麦冬肉 煅牡蛎 芡实 湘莲肉

固阴敛精为主治。

西党参 炙龟板 丹皮 茯神 煅牡蛎 龙齿 大生地 山
萸肉 知母 柏子霜 金樱子山药

坎离不交，滑泄久缠，阴亏火炽。夜卧不安，日间时有精溢，脉散数而不摄。全属阴亏之象，难许调治获痊也。

炒熟地 牡丹皮 山萸肉 白茯神 山药 炙龟板 紫石英
五味子 酸枣仁 龙骨

阴亏，水不制火，心跳神摇，梦寐遗滑；小便短数，有时不禁；脉形振宕不定。此手足少阴两亏之验，非浅恙也。宜静养勿烦为嘱。

炒黄连 原生地 白茯神 酸枣仁 牡丹皮 炒黄柏 炙龟
板 远志肉 龙骨 灯心草

君火过甚，相火引之而动，则不时梦泄矣，至咳痰带红。此属下焦火炎所致。急宜静养，勿烦为嘱。

原生地 牡丹皮 川贝母 淮山药 芡实 炙龟板 麦冬肉
肥知母 白茯苓 橘白

少阴君火不静，相火因之而动，则滑泄不已；六脉沉微，头晕神

困，非小恙也。暂拟清泄一法。

川黄连 米炒 炒知母 盐水拌 沙苑子 山药 茯神 苡仁 牡
丹皮 炒黄柏 盐水拌 柏子霜 牡蛎 芡实

清泄龙雷之火，则头晕遗泄可止矣。

川黄连 石决明 小生地 肥知母 广橘白 黑山栀 牡丹
皮 料豆皮 福泽泻

《笥山草堂医案》

王孟英

一少年，骤然遗精，数日后，形肉大脱。连服滋阴涩精之药，如石投水。孟英与桂枝汤加（高丽）参、（黄）芪、龙（骨）、牡（蛎），服下即效，匝月而瘳。

屠某，患梦遗，久治不愈。耳出脓水，目泪难开，肩胁胸背酸疼，微有寒热，食减神疲。孟英察脉，左弦数，右虚软，以三才（汤）、封髓（丹）加龙（骨）、牡（蛎）、黄（芪）、丹（皮）、（山）栀、菊（花），旬日而瘳。

《王氏医案》

林佩琴

吕。少年未室，每十日一梦泄。积久疲乏，面少神采，素服滋阴敛涩等药，不效。改服镇心安神等剂，亦不效。予谓肝肾脉虚，非相火为害，但精关久滑，气少固摄耳。询之，果有时无梦亦泄，遂重用参、芪，佐以五味、茯神、山药、莲子、菟丝、芡实、杞子（俱炒）。滑泄竟止。更用丸剂，加鱼鳔（炒研）而固。

幼侄。宵读神劳即梦泄，夜热易饥，左关脉搏按。丹溪云：主闭藏者肾，司疏泄者肝，二脏皆有相火。而其系上属于心，心君火也，感物而动，君火动则相火随之，虽不交会，精亦暗流矣。又隐庵谓：肾炎阴虚则精不藏，肝之阳强则气不固，故梦而精脱也。先用六味汤加减，熟地、山药、茯神、丹皮、远志、潞参、麦冬、芡实、莲心、石

斛。数服而效，后加龙骨、白芍、五味，炼蜜为丸，服愈。此补肝肾参养心之剂。君火安则神魂敛而龙雷不扰矣。

刘。试场受惊，心惕精走于下。延为怔忡悸恐，心君虚不主令，相代其权，乃至有梦无梦皆遗，腰膝酸软乏力。诊左寸沉数，左关尺沉细如丝，右尺微弦。此心营损极，神不摄精。宜补养心神，固纳肾真。经言：怵惕思虑则伤神，神伤则恐惧流淫不止。又云：恐惧不解则伤精，精伤则骨酸痿厥，精时自下。大抵怵惕伤心，恐惧伤肾，心肾失交，精关不固。必精生神、神摄精，乃能却病。且情志之病，尤在静养善调，勿希速效。潞参、熟地、茯神各三钱、龙骨、山药各二钱、枣仁、远志、当归各钱半、金樱子一钱、五味子、柏子仁各六分、莲子十粒。二服甚适。诊左寸绵绵不绝，惟尺泽空，精腑少藏耳。若滋填精室，旬日内漏卮勿泄，尺脉可起。又夜半易饥便滑，前方去当归、柏子仁、熟地、山药焙用，加鱼鳔三钱、菟丝饼二钱。十服神安精固，惟骨节时酸，胁肉时胝，坐卧恍惚，如在波浪中。此病后神未复元，虚阳浮越也。宜招集散亡，封固管钥，更用潜阳填髓丸：熟地八两、湖莲、芡实（俱炒）、线胶、淡菜、茯神、山药各四两、五味一两、龟板、远志、麦冬（朱砂拌炒）各二两、猪脊髓（熬）为丸。又经云：精不足补之以味。午用猪心肾海参煨食，晨用牛乳同糯米煮食，调理数月渐安。

族某。梦泄。宿痾腰痛，新兼腕痛，脉弦细。此伤精候也。妙香散去黄芪、麝、辰砂，加砂仁、马料豆（炒），服效。

某。无梦而遗，劳心辄泄，乃心肾失交症。用茯神丸参六味。人参、熟地、茯神、远志、当归、山药、莲须、枣仁、五味、龙骨、莲实。糊丸服。数料全愈。

吉。己巳同会试前数日，同寓约观梨园，座中遗泄如注。归寓后寒热咳嗽吐痰，此阴虚兼外感也。令服补中汤，寒热退，但脉虚而沉细欲绝，断为肾损难治。粗毕场事，神愈疲乏，劳热喘促，痰嗽食减，乃脾肺虚而气不归源也。必用人参乃定。彼吝费，一友赠高丽

参二钱，予谓代用效减，自须全投，书人参养营汤去熟地与桂，加茯神、山药、莲实。彼又将高丽参二钱分作四服。予哂之，服后喘热减，饮食颇加。又两服，改用潞参，而效更减矣。

《类证治裁》

方南薰

应和齐长子益恭，年方弱冠，精从梦泄，人神困倦，肌肉清瘦。辛丑秋，延余诊治，六脉细弱，右手更甚，余曰：“强壮之年，得此脉症，总由先后二天不足，气虚脾弱，下元不固而精自梦遗。”方用益气补脾，因肾涩精三十余剂，乃获全愈。

酒炒黄芪三钱 米炒党参二钱 土炒白术二钱 淮山药二钱
山茱萸一钱二分 破故纸二钱 益智仁去壳，一钱 芡实米二钱
菟丝饼二钱 煅牡蛎一钱 远志肉去心，一钱 炒枣仁八分
桑螵蛸一钱五分

加金樱膏三匙煎服。

《尚友堂医案》

曹存心

气虚不能摄精，精虚不能化气，所进饮食，徒增痰湿。

六君子汤加菟丝饼、炮姜炭、韭菜子。

原注：纯从脾脏气虚立案。

治按：案语简洁老当，方亦周到。

曾经失血，现在遗精，精血暗伤，当脐下之动气攻筑，漫无愈期，肢体从此脱力，语言从此轻微，饮食从此减少，无怪乎脉息乱而无神也。病情如此，虚已甚乎。而舌苔腻浊，中宫又有湿邪，治须兼理。

杞子 熟地 芡实 楂炭 石莲子 当归 茯苓 金樱子
莲须

另清暑益气汤去术泻草

原注：此九龙丹也，吴鹤皋云：主治精浊。

再诊：前方小效，小变其制。

九龙丹加干术、半夏、茯苓、陈皮、五倍子，煎送威喜丸。

治按：阴虚而挟湿邪，最难用药，须看其两面照顾处。

梦中遗泄，久而无梦亦遗，加以溺后漏精，近日无精，而小水之淋漓而下者，亦如漏精之状。始而气虚不能摄精，继而精虚不能化气。

三才封髓丹加蛤粉、芡实、金樱子。

治按：此肾中精气两损之证，再合肾气聚精等法，较似精密。

金本制木，今木火太旺，反侮肺金，肺金尚受其克，则其吸取肾水，疏泄肾精，更属易易。此梦泄、咳嗽之所由来也。

三才封髓丹加白芍、龙胆草。

再诊：接来札，知所言梦遗者，有梦而遗者也，比之无梦者，大有分别。无梦为虚，有梦为实。就左脉弦数而论，弦主肝，数主热，热伏肝家，动而不静，势必摇精。盖肾之封藏不固，由肝之疏泄太过耳。

三才封髓丹加牡蛎、龙胆草、青盐。

三诊：迭进封髓秘元，而仍不主蛰。细诊脉息，左关独见沉弦且数。肝经之疏泄显然。

草薢分清饮（菖、薢、草、乌药、益智、青盐。）去菖合三才封髓丹加龙胆草。

四诊：病已大减，仍守前法。

前方加白芍。

原注：病得草薢、瞿麦而大减，是湿重于火也。

治按：首案遗泄咳嗽并提，方凡四易，而未曾有一味顾及咳嗽，想以肝火为本，治其本而标病可置之耳。

肾者主蛰，封藏之本，精之处也。精之所以能安其处者，全在肾

气充足，封藏乃不失其职；虚者反是，增出胫酸、体倦、口苦、耳鸣、便坚等证，亦势所必然。然左尺之脉浮而不静，固由肾气下虚；而关部独弦独大独数，舌苔黄燥，厥阴肝脏又有湿热助其相火；火动乎中，必摇其精，所谓肝主疏泄也。虚则补之，未始不美；而实则泻之，亦此证最要之义。

天冬 生地 党参 黄柏 炙草 砂仁 龙胆草 山栀 柴胡

治按：此三才封髓丹加胆、栀、柴胡，方与案若合符节。

再诊：大便畅行，口中干苦亦愈，左关之脉大者亦小。惟弦数仍然，尺亦未静。可以前方增损。

三才封髓丹加茯神、龙胆草、柏子仁。

三诊：久积之湿热，下从大便而泄。然久病之体，脾肾元气内亏，又不宜再泻，当以守中法。

异功散加白芍、荷叶蒂、秫米。

四诊：大便已和，脉形弦数，数为有火，弦主乎肝。肝经既有伏火，不但顺乘阳明，而且容易摇精。精虽四日未动，究须小心。

三才封髓丹加陈皮、白芍。

另猪肚丸（苦参、白术、牡蛎、猪肚）。

原注：此证拈定左关独大、独弦、独数，所以重用胆草、黑栀，直折其肝家郁火，俾湿热之邪从大便而出。

《柳选四家医案》

费伯雄

某。无梦而遗，心肾亏也。宜交通心肾。

莲子 杜仲 川断 茯神 山药 生地 女贞 牡蛎 龙骨
芡实 广皮

外用方：

固精丹：五倍子炙研末，以掺膏药中，贴肚脐上，二、三日一换，

久之即愈。

某。肾开窍于二阴，肾水久亏，精关不固，不时遗精，小溲频数，木失水涵，肝阳上升，脾土受制，积湿化热，脐中流水，口燥痰多。再以滋肾柔肝，健脾化湿。

潼沙苑三钱 生石决四钱 牡丹皮二钱 冬青子二钱 云苓二钱
淮山药三钱 黑料豆三钱 西洋参一钱半 象贝三钱 桥菱仁三钱
新会皮一钱 莲子十粒 川石斛三钱 五加皮三钱 玫瑰花三朵
桑枝一尺

外用灶心土研末，加冰片少许掺之。

某。阴虚阳旺，精官不固。宜育阴制阳。

花龙骨煨，二钱 左牡蛎煨，四钱 茯苓二钱 淮山药三钱
潼沙苑三钱 丹皮二钱 剪芡实三钱 女贞二钱 陈皮一钱
生地三钱 莲子去心，十粒 鱼鳔五钱 金樱子膏五钱

某。肾水久亏，肝阳入客下焦，鼓其精房，以致精官不固，时有梦遗。姑拟壮水柔肝，兼以摄纳。

天麦冬各二钱 南沙参四钱 茯苓二钱 淮山药三钱 牡蛎四钱
花龙骨三钱 煎芡实三钱 女贞子二钱 牡仲三钱
潼白蒺藜各三钱 川断三钱 丹皮二钱 莲子十粒 广皮白一钱

《费伯雄医案》

李铎

陈某，年二十余，经年梦泄，食减气馁，足软无力，脉关尺细弱，此肾气虚损兼之下陷。仿升提肾气以归元法。

潞党 冬术 升麻 陈皮 远志 智仁 枸杞 龙骨 云神
飞朱砂 芡实 甘草 建莲肉 红枣肉同煎

此症因过服清心滋水寒凉之药，以致肾气下陷，梦泄愈甚。余用举陷养心安神之法，弥月而愈。

潘某，年逾四十，体虚气怯，面色㿠白，脉细弱，间五六日必梦

泄一次。《灵枢经》曰：厥气客于阴器则梦接内，然必淫邪相感，而心气虚也。屡投温补固涩诸方，皆无效。鄙意宜益气养心，安神驱邪以治其本，此隔一隔二法也。

人参 黄芪 茯神 当归 鹿角屑 酥黄 龙齿 远志 枣仁
麦冬 朱砂 甘草 姜枣 水煎服，三十帖而安。

间必梦泄，似属精随火动，观此治，则《灵》、《素》诸书诚不可不读。寿山。

辛亥治一人，病遗精三月。脉虚大无力，饮食无味，神气衰惫，服王荆公妙香散不应，用补中益气汤，兼送封髓丹，二十余帖寻愈。

江某，年壮形盛，梦遗，脉洪身热，服涩药而反甚，连遗数夜则茎痛，此明是心火旺甚。盖心火一动，而相火随之，兼之身热茎痛，显是心移热于小肠，用导赤散加黄连泻其心火，坎离丸制其相火，连服旬日，遗次颇减，后以黄连清心饮十余剂而瘳。

是即其身热。至夜茎痛辨出心火。寿山

傅木客，嗜酒好色，得遗精病，自服滋阴降火之剂及清心莲子饮，皆罔效。更医用莲须、金樱、龙骨、牡蛎止涩之类，遗愈甚，求诊于余。脉得浮濡无力，两尺犹弱，不任寻按。知嗜欲之人，肾气已亏，关元不禁，当补肾中之阳，兼佐固精之类，谨调一月而痊。

老山参 鹿茸 菟丝子 益智 桑螵蛸 茯神 鹿角霜
酒色伤肾，不越补阳一法。

《医案偶存》

徐守愚

新昌舒倬甫乃郎舒生淦心，年二十，诵读之余，兼有文字之劳，每致坎离顺用。自三月间，忽然心跳不宁，汗出足冷，竟夜不寐，昼日行走，其跳更甚。夜卧稍睡即梦女接而精乃泄，午后身热，至次日天明始止。如是者月余，乃邀余诊，脉左关短涩，右关弦大，两尺紧小，其面色晄白；两颧微红，肌肉瘦削而饮食如故，应可无虞。余

曰：“正以此为患耳。”倬甫未明其旨，余据脉而论曰：其左关短涩者，肝气郁而不升也；右关弦大而饮食如故者，肝阳犯胃，食入即消也。而肝与肾同源，肝病未有不及肾者，则于尺脉紧小知其肾脏虚寒，而坎中一点真阳孤飞于上，所以心跳诸证因之叠起，治宜阴阳互进，使坎离交媾。为是舍金匱二加龙骨汤，其无别法。”至是倬甫乃明告余曰：“小儿之症，以前医方，有用六味加远志、枣仁者；有用归脾加熟地者；有用天王补心丹、左金丸者。虽不见功，亦无大害，至近日医生杨某认为外感湿热未尽，用米仁、厚朴、苍术、茯苓、薄荷、黄芩等味，服后而病上加病，遂至斯疾。今先生所议深得病情，投药凉无不效。”于是昼服二加龙骨汤，晚服半夏秫米汤，乃得终夜酣睡，身温气和。留余调治三日而病减六七，继嘱伊以参归建中汤为主，兼服桂枝真武汤而还。越旬日复诊，倬甫欣然曰：“小儿诸症皆愈，惟梦遗或三、四日一次，或五、六日一次，未能断根。”余曰：“此患不除，恐成怯证，是不可无权宜之计，金樱子膏多服有效”。倬甫乃自煎数斤，每日与服二两，其方仍用二加龙骨汤，兼进理中汤，静摄数月，而梦遗乃绝。前哲云：“精遗勿涩”。观此似治之以涩矣，然而不可以为训。

《医案梦记》

杨毓斌

万茂才去疾，恙由相火过炽，神魂失敛，以致颠倒梦乱，精不能守。精者，肾所藏。精伤即肾伤。腰为肾府，髓本精生。府治则腰健，髓充则骨温。今腰膝酸痛，两腿无力，畏寒，精伤髓虚故也。乙木主疏泄，而不虑太过者，以得癸水，温养生机调畅耳。今水病不能养木，木失养则怒；而愈欲疏泄，遂致风生火动，下陷无所制，加以存养不密，欲不遗泄得乎？所以然者，乙癸同原，未有水病而木不病者，理相因也。木郁则邪火旺；火无水制，则邪热上干，于是痰嗽、目涩赤痛、颧红，怯损之象生矣。夫惊怯者，肝胆虚也；烦梦者，心神扰

也；思慮者，土濕而脾郁不升也；猜疑者，腎虛而志不定也；勞力多汗者，汗為心液，實腎所主，強力傷腎，火無水濟，因之心陽外越也。抑聞之，不見可欲，則心不亂。夢中所主之心，心之神也；所見之形，肝之魂也；所泄之精，腎之精也。心為君火，肝腎屬相火，君火動，相火必隨之而動。必當清心寡欲，勿勞筋力，役形神，靜養數月，調以藥餌，庶幾精足神完。若徒恃藥力，不自撙節，雖診治得法，亦得不償失，何論固澀雜投，寒暖妄進，补水壯水，紛紛者庸有濟乎？証經年余不瘳，豈容輕忽，愿熟復此論，嚴為防閑，務使天君泰然，調攝如約，則長生妙諦，近在目前矣。金針直度，有道審之。

附方：龍骨 牡蛎 炙草 遠志 茯神 棗仁 白芍 五味子 炙芪 竹葉 蓮子心 炒黃柏

此証經年半，歷試多醫，罔效；就予商治。予見受病已深，先立論以戒之，并囑眠食起居必告無諱，然後隨時治以活法。奈不能寡欲，出入半年始治愈。附方特其一斑。

《治驗論案》

陳如生

腎陰虛則精不藏，肝陽強則氣易泄，故遺精惟腎肝為多。然亦有不在肝腎，而在心肺脾胃之不足者，又未可執一論。庚寅冬，余至濟南，有黃姓某，五十餘歲，精關不固，先遺後滑，病經一年，神疲氣弱，痿頓不堪，頻服六味丸不效，來延余診。脈象兩尺細數，寸關虛大，知是陽氣下陷，不能攝精，以補中益氣湯加麥冬、五味，固攝則愈。乙未，余寓上海，寧波沈某二十餘歲，形瘦色赤，咳嗽吐紅，黎明夢遺，患已兩年，醫藥不應，問治于余。余診之，六脈滑數，左尺尤盛，知是陰虛有火，用六味丸去山萸，加元參、黃柏、車前。十劑，火平；又十劑，陰復。仍前法進以參芪，調養而愈。此二症也，前系脾陽虛，後系肝陰虛，皆不足症也。然一陰一陽，判若霄壤，如當升補而反滋陰，元氣愈陷；如當滋清而反補澀，相火愈強，不辨所因，謬

然施治，病必加剧，又况郁滞积热与一切痰火为病，每致不梦而遗，尤非聚精、固精等丸，所能奏效乎？总恃临诊者，有辨虚实，审阴阳之权耳。

《诊余举隅录》

张乃修

王左。肾为阴主藏精，肝为阳主疏泄，肾之阴虚则精不藏，肝之阳强则气不固。久病气阴皆虚，精不能藏，不时滑泄。少阴为开合之枢，枢病则开合失度，往来寒热。肾主骨，骨髓空虚，腰酸足软。大便艰难，以藏阴愈亏，则府阳愈燥也。脉虚形虚，虚损之证，何易言治。且先固摄其下，以节其流。

炙熟地三钱 煅牡蛎四钱 菟丝子盐水炒，三钱 潼沙苑三钱
厚杜仲三钱 煅龙骨三钱 补骨脂盐水炒，三钱 生山药三钱
奎党参三钱 剪芡实三钱 甘杞子三钱 莲子肉三钱

二诊：摄肾固精，精气稍固，饮食略为馨旺。但精髓空虚，开合失度，藏阳不足以济燥金，倏寒倏热，大便旬日不行，阳升筋掣，脉形虚大。前法参滋润养藏。

生地姜汁炒，三钱 杞子三钱 炙熟地二钱 龙骨五钱，煅
补骨脂三钱 鲜苡蓉八钱 潼沙苑盐水炒，三钱 天麦冬各一钱五分
金樱子去核，三钱 萸肉三钱 火麻仁三钱 莲须一钱

三诊：滋肾固精养藏，大便颇通，滑泄之期稍远，胃纳略觉馨旺。脉神较振。药既应手，无用更章。

生熟地各二钱 龙骨三钱，煅 萸肉二钱 牡蛎五钱，煅
归身一钱五分 台参须另煎冲，一钱 苡蓉二钱 杜仲三钱 杞子三钱
山药四钱 潼沙苑盐水炒，三钱 莲须一钱

四诊：遗泄渐疏，大便艰难较润，往来寒热亦定。从效方再展一筹。

大熟地五钱 人参须另煎冲，一钱 酒炒归身二钱 干苁蓉三钱
生于术二钱 沙苑子盐水炒三钱 炒枣仁三钱，打 朱茯神三钱
甘杞子三钱 山萸肉二钱 煨龙骨三钱 煨牡蛎五钱

五诊：脉虽细弱，渐觉有神，形色亦渐华泽。然遗泄有时仍作。还是肾气不固。再为固补。

大兼条参另煎冲，一钱 茯神三钱 潼沙苑盐水炒，三钱
大熟地五钱 生于术一钱 干苁蓉三钱 补骨脂三钱 煨牡蛎五钱
煨龙骨三钱 菟丝子盐水炒，三钱 湘莲肉三钱 淮山药三钱

六诊：饭食坚硬，损伤脾土，食入时觉胀满。虚损之证，全凭上药温养，脾土不运，安能峻补。从此宜慎食物。

于术土炒，二钱 真建曲二钱 奎党参二钱 砂仁四分，后入
陈皮一钱 连皮苓三钱 南查炭三钱 焦枳实四分 焦麦芽二钱

七诊：胀满已舒，舒则噯噯。阳明既虚，客气上逆也。

奎党参三钱 旋复花包，一钱五分 橘皮一钱 茯苓三钱
姜渣六分 代赭石三钱 制半夏一钱五分 炒竹茹一钱 黑大枣二枚

八诊：脾胃气弱，旬日之后，健运不复。拟六君出人。

小兼条参另煎冲，一钱 半夏曲炒，一钱五分 茯苓三钱
砂仁壳五分 土炒于术一钱 广陈皮一钱 广木香二分
生熟甘草各二分 生熟谷芽各一钱五分

九诊：脾胃稍得健运。脾土以阳为用，前法再参温补下焦。

奎党参二钱 白茯苓三钱 菟丝子三钱 炒山药三钱
甘杞子三钱 生于术一钱五分 补骨脂三钱 砂仁末四分，后入
生熟谷芽各一钱

十诊：中焦受气，受谷气也。少火生气，以蒸变于下，气生于上也。中州运化呆钝。良由蒸变无力，谷难化气。再益阴中之阳，以助少火之蒸化。

台参须另煎冲，一钱 生于术二钱 破故纸盐水炒，三钱
甘杞子三钱 菟丝子盐水炒，三钱 煨益智八分 潼沙苑盐水炒，三钱

湘莲肉三钱 茯神三钱

《张聿青医案》

王旭高

华。病由丧子忧怒抑郁，肝火亢甚，小溲淋浊，渐至遗精，一载有余，日无虚度。今年新正，左少腹睾丸气上攻胸，心神狂乱，衄血目青，皆肝火亢盛莫制也。经云：肾主闭藏，肝司疏泄。二脏皆有相火。其系上属于心。心为君火，君不制相，相火妄动，虽不交会，亦暗流走泄矣。当制肝之亢，益肾之虚，宗越人东实西虚、泻南补北例。

川连 焦山栀 延胡索 鲜生地 赤苓 沙参 川楝子 知母 黄柏 龟板 芡实

另当归龙荟丸一钱，开水送下。

附丸方：

川连盐水炒 苦参 白术米泔浸，晒 牡蛎

共研末，用雄猪肚一枚，将药末纳入肚中，以线扎好，用水酒各半煎烂，将酒药末共捣，如嫌烂，加建莲粉拌干作丸。每朝三钱，开水送下。

陈。遗精无梦，不特阴虚，阳亦衰矣；干咳无痰，不特肺虚，胃亦弱矣。补精纳气，温煦真阳，治其肾也；补土生金，清肃高源，治其肺也。若夫救本之图，在于息心无妄。无妄二字所该者广，心君镇定，自无震撼之虞。

大熟地 党参 五味子 枸杞子 茯神 菟丝子 龙骨 沙苑子 怀山药 牡蛎 龟板 丹皮 杜仲 芡实

薛。左尺极细，寸关微而似数，右三部俱弦滑。下有遗精暗疾，肛门痒而出水；上则头眩耳鸣，舌苔粉白。以脉合症，肾阴下亏，湿热相火下淫上混，清窍为之蒙闭。法当补肾之阴而清相火，清金和胃，分利膀胱以化湿热。

萆薢 大生地 蛤粉炒 知母 泽泻 龟板 麦冬 黄柏 赤苓 半夏 丹皮 牡蛎 怀山药

又丸方：大生地 砂仁、陈酒拌蒸 冬术土炒 黄连盐水炒 苦参 天麻 怀山药 丹皮盐水炒 川芎 芡实 龟板酥炙 牡蛎煨 泽泻盐水炒 黄柏盐水炒 知母盐水炒 半夏 萆薢盐水炒 赤苓 麦冬元米炒

上药为末，用建莲粉四两，神曲四两，煮糊捣丸。

溯按：此方治肾虚湿热遗精极妙，然须胃纳尚旺者。若谷食式微，连、柏等苦寒宜斟酌。

顾。遗精无梦为肾虚，咳嗽寒热乃风邪，腹胀纳少兼肝气。此三者当先何治？曰：咳嗽盗汗出，不宜治肺；肝气横，不宜伐肝；然则治其肾乎？

六味丸去泽泻，加陈皮、白芍、沉香、牡蛎、芡实、湘莲肉。

又：遗精属肾，不寐属心。心火刑金则咳，心阳下陷则遗。阴虚则盗汗，肝虚则结寢。法当交济坎离。

大生地 远志 芡实 茯苓 白芍 党参 龙齿 枣仁 怀山药 龟板 六神曲 麦冬 牡蛎 五味子 丹皮 建莲肉

《王旭高临证医案》

柳宝诒

沈。寐则阳气内藏。阳厥于外，则四肢若木；阳聚于内，则惊惕遗泄。病属阴阳两乖，而肝病为多。宜养阴潜阳，镇肝安胃。

太子参 丹参 元参 生地 青龙齿 左牡蛎 远志 茯神 枣仁川连炒 丹皮 蒺藜 夜交藤 竹茹

另：磁朱丸磁石、朱砂、神曲 孔圣枕中丹龟板、龙齿、远志

两样和匀，每服三钱，临卧竹叶灯心汤送下。

二诊：肝阴不足，则肝阳浮扰，夜寐不安。其实阳失阴涵，而不

能静，非阳气之有余也。泻肝之药，亦非所宜。脉象软细而数，不能鼓指，即肝阳亦有疲损之象；盗汗痉掣，多梦遗泄，阴弱而阳不内藏。当用养阴潜摄法，缓缓调理。

洋参 麦冬 生地 萸肉 盐水炒 白芍 丹皮 枣仁 白薇
圆眼肉 竹茹

另：孔圣枕中丹 天王补心丹和匀，每服三钱，临卧开水下。

杨。遗泄多年，腰膝酸软，脉象细弱，此由肾气不摄，相火暗动。法当兼与固摄。

大熟地 炒炭 砂仁 盐水炒 潼沙苑 杜仲 盐水炒 菟丝子 杞子 丹皮炭 金樱子 盐水炒 牡蛎 煅 黄柏 盐水炒 茯神 建莲

另：金锁固精丸 三才封髓丹

戴。泄泻宜健脾，遗泄宜补肾，此一定之成法也。但细审病情，口疮足瘰，舌苔黄腻，脉象带数，胃口能纳不化，此必脾脏有蕴湿蒸郁，外及于胃，故久泄不止；内外相结，故遗泄时作。用药之法，当就脾脏清泄湿热，遽投补剂，转恐助邪。

於术 于茅术 黄柏 酒炒 砂仁 盐水炒 茵陈 广陈皮 苡仁 生甘草 豆卷 枳实 炙鸡金 荷叶

另：刘松石猪肚丸

方。遗泄无梦而发。肾水失蛰藏之职，肝火乏疏泄之权。潜肝纳肾，本乙癸同源之正治；惟右脉弦数，似脾脏兼有湿热，亦当兼顾。

淡天冬 大生地 炒 金樱子 盐水炒 菟丝子 盐水炒 茯苓 丹皮炭 怀山药 左牡蛎 盐水煅 潼沙苑 黄柏 盐水炒 莲须

另：刘松石猪肚丸盐花汤送下。

二诊：前方潜肝纳肾，遗泄暂止。前人谓无梦而泄者，属肾气不摄；而由于湿热下注者，亦复不少。右脉浮弦，左脉细弱，即脾湿不化不元家。拟方以培土摄肾为主。

党参 於术 土炒 茯苓 山药 黄柏 盐水炭 春砂仁 丹皮

炙甘草 潼沙苑_{盐水炒} 菟丝子_{盐水炒} 制女贞 白芍 大生地
莲须 上药为末，用金樱子膏四两，化水泛丸，空心盐汤送下。

柯。肝火郁于上，则胸痹头晕；肝火注于下，则遗泄时作。左脉弦长。治以疏木为主，佐以清金固肾。

白芍 洋参 生地 川柏 砂仁 炙甘草 苡仁 丹皮 牡蛎
麦冬 旋复花 刺蒺藜 莲子_{勿去心}

另：三才封髓丹

薛。症邪恋于肝胆，郁化为热，木火升腾于上，则气逆饕搅；下注于肾，则遗溺梦泄。病久伤阴，足痿无力。法当养阴清肝，参以泄降化湿。

淡天冬 大生地 北沙参 川柏 砂仁 炙甘草
左牡蛎_{盐水煨} 陈木瓜 丹皮 黑山栀 黑稻豆衣 制女贞子
墨旱莲草 茅根肉

盛。梦泄之证主乎肾，实生于肝。以肝火一动，必求疏泄故也。惊惕心烦，少寐多梦，肝阴虚而肝阳浮也。近日忽作吐红，或见血丝血点，肝胆之火，游溢经络，上乘心肺。腰脊肢体酸痛无力，而总偏于左半，乃阴气不足之故。拟方养阴泄肝，兼佐填补肾阴之法。

西洋参 生熟地黄各 天冬 丹皮炭 黑山栀 牡蛎
黄柏_{盐水炒} 春砂仁 白芍 制马料豆 杜仲_{盐水炒}

煎汁滤收，加清阿胶、白蜜收膏。

尤。本患心脾不营。今诊脉肝部独见浮动，右手弦数。肝脏相火内烁，恐其梦泄剧发。用清肝法。

大生地 白芍 丹皮 黑山栀 牡蛎 淮山药 茯苓 砂仁
川柏 炙甘草 北沙参 莲子

向。遗泄暂止，左关及右尺尚欠软静。仍与清肝摄肾。

天冬 生地 白芍 川柏 砂仁 炙甘草 牡蛎 金樱子
远志炭 茯神 刺蒺藜 野料豆 莲子

伍。脉象虚数带弦，内热咳嗽，咽痛遗泄时作。当先清阴彻热。

青蒿 豆豉 淡黄芩 西洋参 生地 白芍 丹皮 白薇
蛤壳 牡蛎 鳖甲_{生打} 茅根 青果

柳。中气不足，湿痰易蒙。脉象左手弦数，时有梦遗。此木火为湿所阻，不能疏越而陷注耳。黄坤载氏谓：“土湿水寒，则木气不柔，郁陷生火。”与此证病机恰合，即仿其意立法。

党参 於术 茯苓 干姜 盐半夏 陈皮 丹皮 白芍 川
柏 牡蛎 竹二青

二诊：湿痰中阻，相火不得疏越。中焦多痰，下焦遗泄。拟用六君子法，佐以清摄肾气之品，作丸药缓调之。

党参 於术 茯苓 炙甘草 盐半夏 广陈皮 淮山药 川
柏炙 砂仁 刺蒺藜 丹皮 熟地 芡实 菟丝子 甘杞子 湘
莲 上药为末，金樱子膏、白蜜和丸，每空心盐汤下。

刘。脉象左手弦数，晚热神倦。阴虚而热恋于营，木火下注，遗泄时作，虚热上浮，咳血兼见。当以养阴清热为主，佐以固摄肾气。

淡天冬 大生地 北沙参 青蒿 白薇 丹皮炙 炙甘草
春砂仁 左牡蛎_{生打} 莲子 枇杷叶 川黄柏_{炙黑}

华。遗泄时发，左关脉弦数不静。肝阳与相火交动，若遽与止涩，恐内动之火，不能下泄，而转上炎，此非计之得也。与疏泄兼固摄法。

东白芍 刺蒺藜 黑山栀 丹皮 牡蛎 茯神 川柏炙 砂
仁 炙甘草 淮山药 车前子 泽泻 莲须 银杏肉

姜。阴气内损，肝阳不藏。遗泄频作，脉象左手偏弦，而舌苔黄浊，胃纳不多。当此暑湿司令，勿宜滋腻。先与清暑熄肝，稍兼固摄之意。

淡天冬 北沙参 川石斛 白芍 丹皮 广陈皮 川柏炙
砂仁 炙甘草 淮山药 牡蛎 莲须

庄。梦遗不止，右尺脉独弦。相火不藏。用清肝合封髓法。

大生地 淡天冬 粉丹皮 川柏炙 砂仁 炙甘草 茯神

牡蛎 金樱子 莲肉

《柳宝诒医案》

马文植

萧。心主血而藏神，肾属水而藏精。久病遗泄，肾水不足，则肝火沸腾。神不内守，闻声惊惕，汗出溱溱，津液蒸变为痰，肺气不展，胸膈窒塞，咽干，喉际作痛，鼻有秽气，痰凝为粒，咯之不爽，肺燥气伤。拟养心益肾，润肺化痰。

北沙参 白薇 玄参 蛤粉 石斛 全瓜蒌 玄精石 麦冬
贝母 竹茹 丹皮 枇杷叶 毛燕

复诊：滋水养心润肺，内热自汗较减，痰亦较少，浮阳渐敛。惟肾阴久亏，复之不易，肺气不舒，胸膈尤痛，口舌仍干。还宜养肺润燥清金。

沙参 贝母 生地 天麦冬 白薇 女贞子 玄参 丹皮
石斛 玄精石 毛燕 枇杷叶

《马培之医案》

余听鸿

老吴市陆少云，遗精三四日一次，已有三年，养阴固摄俱罔效。余诊之，脉细肢倦，神疲形寒。曰：初起之遗，在相火不静。日久之遗，在气虚不固。而龙骨、牡蛎之固摄，但能固其精，未能固其气，治其病当固其气于无形之中。进以韭菜子二钱，杞子二钱，菟丝子三钱，党参三钱，于术二钱，鹿角霜五钱，桑螵蛸三钱，黄芪三钱，仙灵脾钱半，巴戟肉二钱，炙草一钱，红枣五枚，煨姜两片。服三剂，觉身体轻健，四肢渐温，胃气亦旺。服至十剂，则遗精已止矣。

《余听鸿医案》

赖松兰

遗泄又兼淋浊，久而不已，两足痿弱，步履难艰右目筋赤，视物羞明，脉见濡细右见细数，此系肝肾阴亏，虚阳上浮所致，欲降虚阳，先滋其阴，夏至伊尔，又恐加剧。

佛兰参 夜交藤 生地 白芍 龟板 鳖甲 桑椹子 青箱子
子 蜜蒙花 蕤仁霜 牡蛎

《赖松兰医案》

陈莲舫

费干卿。禀质气虚，则生痰多病。阴虚则生热生风，梦泄至滑不持，心气为伤，而至肾关不固。心与肾既失相济，肝阳转动，少寐，痉厥，胁痛，肢酸，无所不主。脉滑数，左甚于右，两尺尚不上游。龙相失潜不至，有升少降，惟痰热内风。调补不能不兼顾，否则峻补而不得祛病也，复方候政。

吉林须 抱茯神 生白芍 鱼线胶 白莲须 宋半夏 姜竹茹
原生地 大丹参 元龟板 覆盆子 夜交藤 新会皮 龙眼肉 金箔滚。

复方：少年肾关不固，诸恙蜂起。肾不交心，心悸少寐；肾不涵肝，手足抽搐。心与肝皆由肾真内亏，生风挟痰，迁移不定。脉两尺濡软，右滑左弦大。拟用养心柔肝，参以熄风化痰。至壮脏之药，只须轻淡固摄。

吉林须 炒夏曲 抱茯神 桑椹子 白蒺藜 白莲须 川石斛
陈秫米 酸枣仁 生白芍 潼蒺藜 广陈皮 龙眼肉 包川连

《莲舫秘旨》

邵兰荪

渔庄沈。阴火已敛，脉虚细，心肾不交则遗精，舌白稍润。宜补

心丹加減。五月十九日

丹參三錢 生地三錢 金櫻子三錢 生牡蠣四錢 茯神四錢
遠志肉八分 懷藥三錢 柏子仁三錢 西洋參一錢 炒棗仁三錢
新會皮錢半

清煎四帖。

又：精遺未除，脈細勁，舌微白，大便難，有血。宜補益潤腸。五月廿八日

太子參一錢 龜板四錢 麻子仁三錢 新會皮錢半 茯神四錢
丹皮三錢 金櫻子三錢 生牡蠣四錢 生地三錢 遠志肉八分
稻豆衣三錢

清煎四帖。

史介生評：《內經》云：神氣舍心，精神畢具。又曰：心者生之本，神之舍也。今以腎液未能上承于心，而心不藏神，心神一動，腎精遺泄，故治以補心丹加減，藉滋腎液而安心神。但其陰液已虛，未能腴潤于大腸，腸中宿垢因致秘結不通，傳導之官失其常度，故次方于滋陰潛陽之中，參用麻仁，生地，以潤腸通便，俾得腎液漸充，則自通暢而精固神安。

《邵兰荪医案》

何長治

左。腎虛，精關不固，大便時精洩自遺；胃虛，氣逆不降，易于惡心，脈虛小。脾腎兩亏矣。

沙苑子三錢 淮山藥三錢 茯苓三錢 姜半夏錢半 益智錢半
菟絲餅三錢 黃柏錢半 陳皮八分 加蓮子肉三錢

《何鴻舫医案》

王仲奇

戴，爰多亞路，二月廿五日。腎主精髓，其華在髮，其充在骨。遺

精滑泄，头眩肢清，腹疼体酸，发毛堕落，不但肾亏也已。脉弦涩。姑从两少阴论治。

龟板炙，先煎，八钱 石决明煨，先煎，四钱 潼沙苑三钱 续断炒三钱
茯神三钱 金钗斛二钱 旱莲草三钱 冬青子三钱 桑椹子三钱
野料豆三钱 紫地丁三钱

二诊：三月二日。肾者主蛰，封藏之本，精之处也，其华在发，其充在骨。遗精滑泄，发堕，头眩肢清，左睾丸偏肿，脉濡弦。守原意以治。

龟板炙，先煎，八钱 石决明煨，先煎，四钱 潼沙苑三钱
金钗斛三钱 南烛子二钱 野料豆三钱 冬青子二钱 桑椹子三钱
续断炒，二钱 柏子仁拌，三钱 紫地丁三钱 甘菊花钱半

三诊：三月八日。左睾丸偏肿见消，发堕亦定，惟左腿髀仍觉酸痛，间有遗泄，头微眩，脉弦滑。守原意为之。

龟板炙，先煎，八钱 石决明煨，先煎，四钱 续断炒，三钱
潼沙苑三钱 茯神三钱 金钗斛二钱 野料豆三钱 冬青子三钱
海桐皮三钱 石楠叶二钱 夜交藤四钱 柏子仁拌，三钱
十大功劳二钱

四诊：三月十五日。左睾丸偏肿见消，发堕亦定，便溺较利，惟会阴之间尚酸痛欠适，势力一挺则胀，左腿髀作酸，头眩，脉濡弦。仍以原意为之。

龟板炙，先煎，八钱 石决明煨，先煎，四钱 血余炭包，六分
川黄柏炒，钱半 卷柏炒，钱半 丹参二钱 潼沙苑三钱 金钗斛二钱
夜交藤四钱 茯神三钱 柏子仁拌，三钱 石楠叶二钱

五诊：三月廿日。左睾丸偏肿既消，发堕亦定，会阴之间已较爽适，惟日前又有遗泄，背脊腰尻疼痛，脉弦涩。仍以强肾益髓可也。

龟板炙，先煎，八钱 石决明煨，先煎，四钱 血余炭包，六分
川黄柏炒，钱半 鹿衔草三钱 白蒺藜三钱 川草薢三钱
川杜仲炒，三钱 续断炒，二钱 石楠叶二钱 茯神三钱 十大功劳二钱

金钗斛三钱

六诊：三月廿六日。左睾丸偏肿既消，发堕亦定，会阴之间已较爽适，惟精泄之后，肾亏髓减，背脊腰尻疼痛，头眩，脉濡弦。仍以强肾封髓可也。

龟板炙，先煎，八钱 大熟地炒炭，六钱 血余炭包，六分

川黄柏炒，钱半 潼沙苑三钱 菟丝饼三钱 苏芡实三钱 金樱子三钱

茯神三钱 十大功劳三钱 川杜仲炒，三钱 续断炒，二钱

徐，北火车站，七月七日。未婚媾而遗泄频仍，甚至无日无之，精气大耗，以致头眩耳鸣，寝有盗汗，咳嗽曾经失血，形瘦体酸，脉濡弦数。病机渐入损怯，务宜自爱，但舌苔黄浊厚腻，饮食宜慎，以防沾染时病也。

左牡蛎煨，先煎，三钱 白蒺藜三钱 淮山药三钱 川石斛二钱

北沙参二钱 百部蒸，八分 款冬花炙，一钱 川黄柏炒，一钱

甘草炙，一钱 苏芡实三钱 野茯苓三钱

二诊：七月十一日。数日来精泄较固，又感时邪，兼伤食滞，腹痛便泻，汗出如雨淋漓，脉弦，舌苔黄厚而糙。治以宣化，仍宜谨慎为妙。

藿香八分 佩兰三钱 陈枳壳炒，钱半 白豆蔻六分 法半夏钱半

橘红衣一钱 猪苓二钱 野茯苓三钱 通草一钱 陈六神曲炒，三钱

三诊：七月十三日。腹痛便泻，身热有汗，此属时邪兼滞，但黄糙厚苔较化，病机可冀渐减。日来又有遗泄，然固精之剂未可泛投也。

藿香一钱 佩兰三钱 陈枳壳炒，钱半 条芩炒，一钱 猪苓二钱

野茯苓三钱 法半夏钱半 白豆蔻六分 青蒿二钱 通草一钱

陈六神曲炒，三钱

四诊：七月廿三日。时邪兼滞已清，然未婚媾而遗泄，精滑体虚，头眩耳鸣，寝则盗汗，脉弦数。心肝肾兼治。

白龙骨煨，先煎，三钱 左牡蛎煨，先煎，三钱 桑螵蛸炒，二钱

菟丝饼三钱 潼沙苑三钱 苏芡实三钱 金樱子三钱 川黄柏炒，一钱
茯苓三钱 莲须八分 夜交藤三钱

五诊：八月朔。精泄较稀，寝汗亦歇，惟髓虚难复，骨酸乏力，仍从原意治。

白龙骨煨，先煎，三钱 左牡蛎煨，先煎，三钱 桑螵蛸炒，三钱
川杜仲炒，三钱 潼沙苑三钱 骨碎补二钱 菟丝饼三钱 夜交藤三钱
苏芡实二钱 金樱子三钱 续断炒，二钱 川黄柏炒，一钱

左。关元肾命不固，火难归窟，时或遗泄，眼帘泛绿色，而视则昏暗，胸坎及脐腹偶或作痛，脉亦细弱少神，皆元阳虚弱之候。治以咸温固命火，命火既固，阴翳潜消矣。

淡苁蓉漂去脾 锁阳 菟丝子 全当归 淮牛膝蒸 潼沙苑
覆盆子 金樱子 巴戟天上肉桂 沉香前二味同研末饭丸吞
兔肝炙干研末冲炒仁

二诊：补纳元阳，益精明目。

淡苁蓉漂去脾 川杜仲炒 潼沙苑 菟丝子粉 淮牛膝酒蒸
锁阳 巴戟天 全当归 甘枸杞 马沉香 金钗斛 兔肝炙干
龟板漂净炙 牡蛎煨 石决明

上药研为细末，用金樱膏捣为丸，每早空腹淡盐水送下四钱。

三诊：前方尚获安适，率由旧章可也。

淡苁蓉漂去脾 川杜仲炒 潼沙苑 菟丝子粉
鳊鱼鳔胶蒸切碎蛤粉炒珠 石决明煨 巴戟天 淮牛膝酒蒸 全当归
杭白芍酒炒 益智仁 补骨脂炒 于术蒸透 甘枸杞 金钗斛
谷精草 兔肝炙干

上药研为末，用金樱膏捣为丸，每早空腹以淡盐水送下二钱。

《王仲奇医案》

陈莲舫

宋。阴虚于下为遗泄，阳冒于上为鼻衄。上下失扭，致中气不

振，纳减溇稀，脉息濡细，须多为调摄。

生黄芪 白茅花 抱茯神 黑料豆 广橘红 焦米仁 野於术 白莲须 制丹参 生白芍 炒夏曲 荷蒂 红枣

王。遗泄，属气不摄精，以致气怯腰楚，治以和养，脉息乳濡，调补非旦夕为功。

吉林须 川石斛 川杜仲 沙苑子 抱茯神 法半夏 焦米仁 西绵芪 生白芍 枸杞子 桑椹子 鱼线膏 新会皮

吴。阴虚湿热，心肾不交，遗泄有梦，心虚于肾，治以清养。

北沙参 川石斛 抱茯神 覆盆子 白茯苓 川杜仲 西绵芪 黑料豆 夜交藤 白莲须 白苡米 广陈皮

七帖后，沙参换西洋参。

上洋，陈。遗泄肾虚，肾不涵肝则旺，肾为胃关，致胃弱，少腹鸣响，胸脘满闷，暖气纳少，大便渐燥，脉息细弦，拟调肝而和脾胃。

左金丸 生白芍 炒夏曲 白茯苓 川杜仲 白莲须 真獭肝 小青皮 新会皮 抱茯神 生当归 乌沉香 竹二青

海盐，高。遗泄无梦，潮热有汗，遂至头眩心悸，气怯神疲。最为关系者，防咳嗽成劳。左脉细数。阴虚热炽，治以清养。

北沙参 川石斛 柔白薇 白茯苓 沙苑子 广陈皮 银柴胡 生白芍 黑料豆 粉蛤壳 淮山药 枇杷叶

复方：吉林须 北沙参 冬虫夏草 抱茯神 黑料豆 淡秋石 毛燕窝 淮山药 花龙骨 生白芍 橘红 伽南香 枇杷叶

陆。遗泄阴亏，有梦无梦，一心一肾，治宜潜育。

炙升麻 北沙参 抱茯神 白莲须 夜交藤 生白芍 生绵芪 川石斛 大丹参 花龙骨 左牡蛎 新会皮 金樱膏

张。梦泄频频，精管受伤，因虚生热，小洩急而带痛，茎头作痒，治以清养。

西绵芪 炙龟板 抱茯神 川杜仲 左牡蛎 生白芍 北沙参 鱼线胶 苍龙齿 沙苑子 覆盆子 广陈皮 金樱膏

吴。遗泄阴伤，腹膨痞攻，气虚于中，致气不摄精，脉息濡滑，治宜兼顾。

生绵芪 抱茯神 统当归 沙苑子 生白芍 炒苡米 荷蒂
炙升麻 花龙骨 远志肉 桑寄生 黑料豆 新会皮 红枣

《莲舫秘旨》

王埤

黄庚垣先生，江西人，以捐饷奉特旨议叙举人加藩司衔并赏花翎，补西安粮道。道缺甚优，兼家资优厚，而观察性尚清廉，接下以宽，故属下皆颂之。年五十许，曾患遗精病。观察侍妾数人，幕友有善医者，以为许多姬妾，必致虚损。用三才封髓丹补之，而观察又讲颐养，日食燕窝、东参以调之，然遗精如故。幕友以为已成虚劳，不可救药。

一日午后无事，忽召余至署，且命便服，余急趋命，观察便衣而出，揖而延之上座，余惊问故，观察曰：患遗精数年矣，曾服汤药百余付，丸药数斤，而毫无效。余问饮食何如？观察曰：虽不能多，然尚非不能食者。老夫子以我为虚癆，故不敢多食也。问咳嗽气少，发热自汗乎？曰否。乃告之曰，既无此数者，恐有余症，非不足证也。观察惊曰，遗精尚有实症乎？余对曰，大人未窥医书，兼脾胃虚弱，不特医者不敢以实论，即大人亦自疑其虚也。岂知遗精之由有数端，相火太旺，夜梦失遗，阳必壮健，宜滋之；饮食厚味，湿热内淫，则迫而失精宜销导之；久旷气充，精满而溢，宜疏泄之。此外，中气下陷，清阳不升，则亦遗；色欲过度，心肾不交，则亦遗。又有恐惧暴怒，精窍滑而不涩，皆能致遗。若或坐或卧，无故遗精，则为虚极之症，最为危险。俗医不细求其故，不分虚寒实热，见遗精者，则曰色欲过度也；又曰年少好淫也。致病者，多受不白之冤，而治之多不效。遂归咎于病之不可治，不亦惑乎。

观察慨然起曰：闻君讲解，无不确当晓畅，心为之开，然则我之

遗精绝非虚症，请一视之。乃诊其脉，缓而坚，右关尤甚。告之曰：大人之病，所谓湿热内淫是也。胸膈常患闷滞，大便颇形后重，当消导之。进以震亨渗湿汤。观察阅方内有黄连恐不宜，且厚朴、苍术恐伤胃气。告曰，胃苓汤是湿热要药。平胃散者，培卑监而使之平，非削平之谓也，前辈言之甚明，此方用黄连川芎素亦疑之，细思其理，苦能燥湿用黄连而焦炒之，用其苦非用其凉也。湿热能瘀血，用川芎以行之，震亨此方，具有深意。大人成见在胸，一误岂容再误，他人必谓此方，非治遗之药，岂知治病必求其本，本治而未不治者，未之有也。请放心照服四付，常服香砂六君丸以调之，不但精不遗，即饮食亦当倍也。观察如言服之，五日后，约晚饭，至则告曰，前闻君言甚有理，而心窃疑之，今服君药，遗已止，果觉精神增健，食量亦佳，并阳事亦壮。非君妙达精微，几乎冤我，可见医道无方，在究其理而变通之耳。后余诸蒙奖许，即内艰而归，犹寄函问讯者数四。

《醉花窗医案》

费承祖

南汇沈仲明，遗精心悸，肌热暴瘦。脉来沉细。肾阴久虚，封藏不固，中气更亏，不能摄精。

别直参五钱 黄芪三钱 甘草五分 大生地三钱 潼沙苑三钱
白芍一钱五分 牡蛎四钱 麦冬三钱 莲子十粒

连服三十剂，遗精止而肌肉丰。

通州魏仲宣，遗精心悸，腰痛腿酸，肌肉心痛，口干胸闷。此心肾俱亏，而兼邪热灼津，治必先生津泄邪，俟邪清而后培养心肾。

石斛三钱 天花粉三钱 甘草五分 豆豉三钱 黑山栀一钱五分
冬瓜子四钱 生谷芽四钱 广皮白五分 鲜竹茹一钱 冬桑叶一钱
荷叶一角

进两剂，热退脘舒，头痛口干皆止。邪热已清，当培补心肾。

西洋参一钱 大麦冬三钱 杜仲三钱 白芍一钱五分

女贞子三钱 川石斛三钱 广皮一钱 大生地三钱 黑料豆三钱
龙眼肉十枚 荷叶一角

续服十剂而愈。

福建高君镜心，病阳缩囊冷，小溲带浊，遗精腰痛，腿软头痛，内热不寐，饮食少进，手冷出汗。脉极弦细。肾阴久虚，封藏不固；肝阳上亢，销烁津液；阴伤及气，中无砥柱。治宜益肾清肝，培养中气。

吉林参五分 西洋参一钱五分 杜仲三钱 川续断二钱
女贞子三钱 白芍一钱五分 甘草五分 麦冬三钱 石斛三钱
陈皮一钱 冬瓜子四钱 云茯神二钱 生熟谷芽各四钱 银杏肉十粒
珍珠粉过服，一分

连服二十剂而愈。

南京金君利生，患腿足软弱无力，行动时常倾跌，遗精音暗，内热食少，心悸耳鸣。精虚及气，中难提挈，下失封藏。脉来细弱。平日利湿太过，精气皆伤。治当益气固精。

潞党参四钱 西洋参一钱 绵黄芪七钱 甘草五分 杜仲三钱
女贞子三钱 白芍一钱五分 柏子仁二钱 黑料豆三钱 瓜蒌皮二钱
石斛三钱 陈皮一钱 竹茹一钱 荷叶一角
服三十剂而愈。

《费绳甫医话医案》

曹沧州

某左。肝肾不足，易于梦遗，气短，耳失聪，脉软弦，此属内损为病，未易奏功。

台参须五分 川石斛三钱 杜仲三钱 金樱子膏四钱 橘白一钱
南沙参三钱 川断三钱 线鱼胶一钱半，蛤粉炒 盐半夏一钱半
玄参一钱半 沙苑子三钱 炒谷芽五钱，包

某左。五志之动，皆属于阳之有余便是火，火甚烁阴形瘦，纳

减，走泄，无梦多而有梦少，病系肝肾为主，非培不可。

潞党参三钱 细生地四钱 杜仲三钱 上西薤一钱半
丹皮一钱半 川断三钱，盐水炒 南沙参三钱 远志一钱半，去心
沙苑子三钱 线鱼胶一钱半 金樱子膏二钱，冲

某左。肾关不固，有梦无不走，当泄火固本并进之。

北沙参 乌贼骨 生石决明 知母 制首乌 白莲须 广郁金
沙苑子 朱连翘 金铃子 川柏

某左。无梦而遗，肾家关键不固也，脉弦，宜滋阴分立方。

细生地 左牡蛎 茯神 甘草梢 川柏 金樱子 远志炭
炒丹皮 知母 白莲须 川石斛

《吴门曹氏三代医验集》

丁泽周

张左。旧有鼻渊痼疾，邇来遗泄频频，头眩眼花，阴虚精关不固，肝阳易于上升，今宜益肾固精，柔肝化痰。

左牡蛎四钱 花龙骨三钱 明天冬二钱 小生地三钱
朱茯神三钱 春砂壳八分 黄柏炭一钱 金樱子三钱 黑稻豆衣三钱
炒杭菊钱半 潼蒺藜三钱 嫩钩钩后入，三钱 白莲须钱半

王左。梦遗渐减，清晨痰有腥味。肾阴亏耗，肺有燥邪，宜益肾固精，清肺化痰。

南沙参三钱 川贝母二钱 瓜蒌皮二钱 抱茯神三钱
怀山药三钱 潼蒺藜三钱 左牡蛎四钱 花龙骨三钱 煎芡实三钱
熟女贞三钱 冬瓜子三钱 白莲须钱半 三才封髓丹包，五钱

叶左。心肾阴亏，肝火内炽，精宫不固，遗泄频频，左手臂酸楚，投剂合度，仍宜育阴固摄，和营通络。

大生地四钱 明天冬二钱 潞党参二钱 朱茯神三钱
黄柏炭一钱 春砂壳五分 左牡蛎四钱 花龙骨三钱 煎芡实三钱
潼蒺藜三钱 紫丹参二钱 西秦艽钱半 白莲须钱半 夜交藤四钱

刘左。胸脘胀闷，食入难化，甚则泛唾白沫，且有头眩，不时遗泄。脾肾两亏，精关不固，湿痰逗留中焦，宜和中化饮而摄精关。

生白术二钱 云茯苓三钱 仙半夏钱半 陈广皮一钱
带壳砂仁八分 潼白蒺藜各钱半 黑稻豆衣三钱 煅牡蛎三钱
花龙骨三钱 炙远志一钱 沉香曲包，三钱 白莲须钱半 佛手八分

另：五倍子一两，生晒研细粉，每用二分，用津唾做丸，每晚塞脐中，外以无药膏盖之，每晚换一次，以一月为度。

吴左。肾阴不足，肝火内炽，屡屡遗泄、多梦，头眩神疲，脉象弦小而数。拟三才封髓丹合金锁固精意。

明天冬三钱 大生地三钱 潞党参二钱 抱茯神三钱
左牡蛎四钱 花龙骨三钱 春砂壳八分 黄柏炭一钱 潼蒺藜三钱
剪芡实三钱 白莲须钱半

《丁甘仁医案续编》

陈在山

杨遇春，四十，素有滑精之患，脉来左手弦迟，右手缓大，一片是肾阳枯竭，下元寒盛之病，更因肝肾失和，阴阳不交而然，拟以补阳助肾之剂。

巴戟 牡蛎 韭子炒 苁蓉 台乌 附子 芡实炒 丝子
车前 覆盆 淫羊藿炙 野术 官桂 生姜

杨遇春，服前方平和，觉腹内虚寒转动，再增以培阳之品。

桂枝 韭子炒 苁蓉 乌药 茴香 牡蛎煅 芡实 巴戟
车前 茅术 炮姜 青皮 附子 丝子 覆盆 荔枝

第三方加补气之药。

人参 炙芪 牡蛎 巴戟 焦术 丝子 贡桂 附子 龙骨
炮姜 南茴 苁蓉 茯神 远志 炙草 故脂

《云深处医案》

病者：李春阳，二十一岁，奉天牛庄城住。

病名：心肾不交。

原因：读书用工，劳神伤血，嗜欲纵淫，损精耗气，遂致气血两虚，阴阳失和。

证候：四肢无力，骨节酸软，气促自汗出，食减胸下闷，后又患遗精、少眠、潮热、心烦等症。

诊断：脉来左手弦细而扎，重按若有若无；右手沉而微数，轻取不应手，皆不足之脉也。按细微之脉虽属虚，而虚脉之中兼弦兼数，故有宜补不宜补之症在焉，兹一一而晰明之。恙心属火为阳，手少阴经所司，在卦为离，两阳藏一阴，故为阳中之阴。能化人身之阴血，肾属水为阴，足少阴经所司，在卦为坎，两阴含一阳，故为阴中之阳。能运人身之阳气，且人之生也，必赖气血以生活，今病心肾不交，气血不足，补以劳神伤血，伤涸阳中一点真阴，阴虚血固不宁，致心火沸腾，不得下炎于肾，故阴虚而心烦潮热也。继则损精耗气，耗散阴中一点真阳，阳虚气何以敛，致肾水泛滥，不得上滋于心，故阳虚而气促自汗也。余症皆以二者之虚，而累及真元之为患也。此症虽虚，不可峻补，恐犯气滞血凝之忌法，当收摄心阴，以敛肾阳。俾阴阳和而心肾交，水火既济而气血自宁矣。

疗法：用莲须、生牡蛎、金樱子、芡实、粉龙骨、焦枣仁等药，皆有收摄之功，更能交通心肾，茯神安心，枸杞助肾，元肉养心营而益智，山药补肾气以涩精，寸冬益阴，续断通阳，此方之大义，理肾之中更兼益脾，宁心之外亦属柔肝，再加东洋参性缓之味，养脏生津助气。

处方：莲须四钱 生牡蛎三钱 金樱子三钱 焦枣仁三钱
芡实三钱 粉甘草二钱 云茯神三钱 龙眼肉五钱 寸冬四钱
粉龙骨二钱 淮山药四钱 枸杞果三钱

又方：东洋参三钱 茯神四钱 寸冬三钱 续断三钱
粉龙骨二钱 金樱子三钱 枸杞四钱 芡实三钱 粉草三钱
生牡蛎三钱

结果：服前方十余帖，汗止心宁热退，又服后方十余帖，气足精收，眠食大效，再后去龙骨、金樱子，加焦术、陈皮助脾等药，服三剂，霍然而愈矣。

《医学杂志》

曹惕寅

常熟某医，以求嗣续故，屡服温热补剂。遂起舌痛遗泄，就商于余。即拟一补益肝肾之方，如熟地、龟板、党参、归身、杜仲、川断、沙苑、菟丝、聚精丸等，连服三剂，舌痛精泄均愈。彼又私于方内加茸附煎服，前病又作，并致尿后见血，忧惧交并，复来索方，具以实情见告。余乃为之详说种子方之原理，解其疑虑。男子以气为主，气充则精足，精足则神完。就君之症，一派阴竭阳亢之象，而失冲和之用。为补牢之谋，当先从填补精髓入手，否则徒使烈火炽张耳。经言：独阴不生，独阳不长，阴阳和而万物生。今君计不出此，宜其败也。

《翠竹山房诊眼录稿》

孔继炎

潘开瑞次子，年甫十七，久病虚弱，将成怯症，父兄不以为意，适予在夏阳，病人自来求诊。诊毕，为立案曰：六脉细数，阴阳俱属不足，左三部更细于右，血分之亏较气分为尤甚。少年何以得此？此岂少年所宜有之脉哉？然此脉已见，不容不借资于药饵。先天不足，补以后天，此亦人事所宜尔。而补养之中亦有数戒，犯之则适以增病，此又不可不知也。一戒参、术太早。夫补气之品莫粹于参、术，然必阴能配阳，方可借之以滋气。此病真阴已亏，方恐发热，骤投参、术，是助阳而使之亢也。阳能骤长，阴则岂能顿生？朱丹溪曰：气有余便是热。此其不可犯者一也。一戒归、地太重。夫补血之药，莫善于归、地，然必气能载血，方可借之以滋阴。此病脾阳不宜，方

恐作胀，过用归、地，是阻气而使之滞也。气不能运，血又岂能自滋？张景岳曰：气不足便是寒。此其不可犯者二也。且以少年见遗精之症，封蛰之本不固，此非真元失养，必系邪火炽盛，则培补之中，滋肾阴先虑其助相火。平时有阴缩之疾，宗筋之润不周，此非暴寒内乘，必系热灼筋短，则调治之法，补脾阳尤患其燥肝阴。兼之小便前曾癃闭，近复见血，足少阴、太阳两经固属亏少真阴，实亦伏有邪阳。经所谓胞移热于膀胱，则癃闭溺血者，此也。此其症为尤甚，若不驱途，久必为累。若肆行清凉，势必伤其脏脏，元阳不运，少腹之疼立现，小便之闭难通矣。此其不可犯者三也、四也、五也。具此五戒，何施而可？惟于补之一法中分为六法：始用清补，中用侧补，末用平补、温补，此前后之三法也；上焦主以清，中焦主以和，下焦兼主以清和，此药中之三法也。神明于法之中，变而通之。阴阳不足，听之先天，莫鳌立极，归之人事，乌有少年男子气血方长不日健而日壮者？虽然，此病必有所由起，其渐积至此之故，惟局中人自知之，惩其前而愍于后，乃可与语药饵之功矣。夫病未形而其端已兆，知而不言是谓不仁，言之未免骇听，然已如此，犹幸咳嗽未作，泄泻未见，肌肉亦未甚损，及早图之，犹可挽回。请更质之高明，试问予言，其果谬焉？否耶？

赵氏之戚王氏亦以其子来就诊，年十六七，与赵氏之子相若也，而瘦弱甚于赵。大热大渴，滑精溺泄，亦阴虚症也。诊其脉，甚数而滑，右关尤甚。予谓王曰：汝子病甚剧，必养阴必清热，须药甚多，汝家贫，不能办也，吾以伤寒法治之。第先清其热，热退阴亦易生，效捷而药少矣。亲友笑曰：此又奇闻。几见有弱症作伤寒治者乎？予曰：借用一法，未尝不可，此有至理，诸君固未察也。夫阴虚至于泄泻，不治之症也。而此子之泻，由于饮多，饮多由于大渴，大渴由于胃热而火盛。夫胃家之火，阳火也，阳火炽昌，渴泻方亟，而骤投以养阴之药，药随泻下，为功几何？吾以清热之药治之，下咽之后，未尝不泻，然药下而热亦随之俱下矣。第恐苦寒伤胃，势不宜

頻，故借伤寒之白虎汤，重用以清胃家之热，即佐伤寒之猪苓汤，分利小便，护持肾阴，此于清热之中，已具养阴之义。渴泻得解之后，滑精一症，未必不因此而少止，可谓一举而两得也。且此子脉来虽数，而按之滑盛，尚未知今日之热果阴虚也，亦第阳火盛耶？俟渴泻止后，再为诊视，若果阴虚，用补犹未晚也。书方与之。服三剂，渴泻俱止，热亦大减。惟滑精一症，以其父伴宿，时时呼之，未及作，未知其真止否也。再诊，其脉数减，而滑盛俱退，沉部亦弱矣。曰：此子果系阴虚，非补不可。疏方用芍药地黄汤，加苡仁、芡实，又服四剂，热减十七八，精神亦健。其父吝于资，不复与市药矣。曰：赵病七剂而愈，今亦七剂矣，病已退，久必自愈，无以药为也。其子遂不复健，逾岁，予见之，面犹黄色。问其故，滑精之症犹在也。而赵氏子则竟愈，今黝然肥丈夫矣。

《孔氏医案》

贺季衡

步男。劳心作文，猝受惊恐。惊伤心，恐伤肾，且惊则气火上升，心肾遂失交通之妙用，精关不键，无故自遗，延今已久，洩后沥精，溺管作响，两足痿乏，脉沉弦细数，舌苔浮白。延有痿躄之虑，且防增咳。

大生地五钱，蛤粉炒 淮牛膝一钱五分，盐水炒 鱼腺胶二钱
煅牡蛎五钱，先煎 淮山药三钱，炒 川黄柏一钱五分，盐水炒 云神四钱
煅龙骨五钱，先煎 炙小草一钱五分 女贞子四钱 莲子五粒

另：知柏地黄丸三两，虎潜丸三两，和匀，早晚各三钱，开水送服。

二诊：洩后沥精虽减，而澄之仍如糊，且有如油浮于上者，溺管响，间或出气，或觉自遗，舌苔左畔已宣，右畔尚浊，左脉沉弦细数，右手濡数带滑。心肾暗伤，心阳上亢，暗吸肾阴，精宫得热而妄动故。

大熟地五钱，蛤粉炒 云神四钱 煅牡蛎五钱，先煎 女贞子四钱
煅龙骨五钱，先煎 炙甘草一钱五分 鱼鳔胶二钱 大白芍二钱
川黄柏一钱五分，盐水炒 莲子五粒，透心

三诊：日来溲后沥精日少，澄之如糊亦减，惟浮面仍带油光，坐则溺管出气，甚则有响声，或觉无知自遗状，脉之数象向安，舌苔已化。精宫之腐浊淘汰渐清，而肾元之精气未固也。

大熟地五钱 大麦冬二钱 女贞子四钱 云神四钱 潼沙苑四钱
煅牡蛎五钱，先煎 川黄柏一钱五分，盐水炒 小茴香五分，盐水炒
淡苡蓉四钱 大白芍二钱 桑螵蛸三钱

四诊：进清摄法颇合病机，溲后溺精及溲面油光俱减，溺管出气亦止，惟仍有响声，足部若电气内窜，舌苔发黄。心肾两亏，阴不敛阳之候。仍守原方出入。

大熟地五钱，秋石炒 大麦冬二钱 菟丝子四钱
川黄柏一钱五分，盐水炒 潼沙苑四钱 大白芍二钱
淮牛膝一钱五分，盐水炒 小茴香五分，盐水炒 煅牡蛎五钱，先煎
云神四钱 炙甘草一钱五分 桑螵蛸三钱

吴男。始由梦泄，误进鹿角胶，鼓动肾阳，精关不键，滑泄无度，头空耳鸣，腰脊痛，足跖酸，少寐多梦，便结，声嘶，多言则气不接续，脉弦大，舌红中剥。阴愈亏而阳愈旺，心肾不交，上下交病。最难速效。

大熟地五钱，盐水炒 甘杞子二钱，盐水炒 北沙参四钱
潼白蒺藜各四钱 云神四钱 煅牡蛎八钱，先煎 淮牛膝一钱五分，盐水炒
炙甘草一钱五分 净萸肉一钱五分，盐水炒 川黄柏一钱五分，盐水炒
莲须四钱

另：知柏地黄丸三两，每服三钱，淡盐汤下。

王男。操劳过度，心肾之阴暗亏，肝阳易于疏泄，溺管时欲沥精之状，劳则尤甚，五心烦热，脉弦细，舌红。当滋水抑木，以交心肾。

北沙参四钱 川黄柏一钱五分，盐水炒 远志苗一钱五分

大白芍二钱 大生地五钱，蛤粉二钱拌炒 黑料豆四钱
潼沙苑四钱，盐水炒 煅牡蛎五钱，先煎 大麦冬二钱 女贞子四钱
粉丹皮一钱五分 莲子五粒

《辑李衡医案》

沈绍九

耳鸣，腰疼，遗精，失眠，舌质红，脉细弱，左尺尤甚，乃肾阴不足所致，应予益阴，佐以固涩。

生熟地各三钱 山茱萸一钱 山药三钱 炒泽泻二钱 丹皮二钱
茯神三钱 炒枣仁三钱 菟丝子四钱 枸杞三钱 龟板四钱
龙骨四钱

《沈绍九医话》

汪逢春

杨左，二十三岁，八月二十九日

遗泄时作，心悸头晕，左脉细弦滑，右部细弱无力。青年禀质不足，相火有余。拟以养阴固泄，佐以安神之味。

粉丹皮钱五，盐水炒 朱茯神四钱 绿心黑大豆五钱 盐川柏钱五
远志肉钱五，川连七分同炒 首乌藤一两 生牡蛎五钱，先煎
桑螵蛸二钱 金狗脊四钱，去毛

孔圣枕中丹五钱，布包

二诊，九月之日

药后遗泄四日未发，头晕心悸减而不已，两脉细弦且弱。青年肾亏，再以泄其有余，补其不足。

粉丹皮钱五，盐水炒 远志肉钱五，炒 川续断三钱，盐水炒
盐水柏钱五 抱茯神四钱，朱砂拌 首乌藤一两 盐川连七分
生牡蛎一两，先煎 绿心黑大豆五钱 孔圣枕中丹五钱，布包

《泊庐医案》

周镇

柳剑南，甘露医家。先天不足，有遗精肝阳等症。甲子夏，为拟熄风化湿健脾丸剂，遗泄数日一发者，减至每月二次。案云：阴亏阳旺，头痛耳鸣，甚则颊胀筋惕，健忘心悸。藏阴不足，肝阳上扰，更有遗精洩黄，清泄相火乃验。治本之法，育阴潜阳，丸方常服，并忌烦劳动风发物。大生地蛤粉炒、山药、茯苓神、磁石、牡蛎、鳖胶、丹皮、泽泻、滁菊、龟板、阿胶、砂仁、白芍、枣仁、远志、莲子、黄柏、薏仁，研，用桑椹膏温水化，泛丸如黄豆大，晒极干。每晨、下午、卧前各服四钱。交冬为定膏方。

案云：遗精虽减，肝阳犹僭，烦心则头耳喉痛颊胀，面部烘热，络隧蠕动，牵制热痛，静养则定。经云肝主筋，又云风善行而数变。动则阳升，一定之理。气血皆虚，风火入络，络隧之中，液耗失养。惟脾运不健，暖气腹胀，遗泄频数，小洩色黄，湿热相火亦炽。夏秋健脾理湿，尚属相安，交冬湿浊退化，用药不滋其水，则风火终不得熄。拟上下分治，膏丸并进，膏则着重肝阳，丸则专治遗精。生玉竹、山药、党参、於术、茯苓、远志、砂仁、扁豆、莲肉、薏仁、泽泻、二冬、石斛、首乌、白芍、功劳、黄菊、天麻、女贞、黛蛤、丹皮、金铃子、柏子、枣仁、木瓜、磁石、生地、龟甲、珍珠母、稻豆、龙齿、牡蛎、鳖甲、淡菜、猪脊髓，水煎三次，去渣滤净，加阿胶、桑椹膏、炼白蜜、冰精收。每服开水冲服一调羹。

荣叔康，年廿岁时在上福新总公司。肾阴素虚，有梦遗疾。平居痰多兼黑，头晕健忘，四肢无力，阴虚火升，梦扰寐汗，胸膈或痛，目糊睛白红丝，面多疳瘤，肛痔足痒，小洩色黄，肠鸣便薄。脉软微弦，苔白多湿。肺病虚热，肝火易僭，挟痰挟湿。治虚碍实，用药不易，通盘兼筹，循用复方。细生地蒲黄拌炒、丹皮、山药、猪茯苓、泽泻、二冬、二至、黑木耳、百合、百部、獐肝、北沙参、於术、绵芪、薏仁、地肤、川断、车前、首乌、黑豆、小麦、珍珠母、白及、银花、远志、

石英、菟丝、丹参、兜铃、紫菀、黛蛤、柿霜、花粉、鳔胶、茧谷炭、芡、楝、预知、海藻、海粉、夜明砂、功劳叶、柏子、广木香、百草霜、益智仁，研末，用枇杷叶膏、龟板膏、阿胶、猪脊髓煮捣，丸桐子大。晨晚餐前各服三钱。

《周小农医案》

方公溥

周男。5月28日诊相火妄动，精关不固，梦泄频频，头晕，心悸，神困疲倦，脉弦微数，尺弱，法当潜相火，固精关。

花龙骨9克 生牡蛎12克 熟地黄9克 缩砂仁4.5克，打
大淮药9克 山萸肉9克 黄柏皮6克 赤茯苓9克 肥知母9克
天麦冬9克 建泽泻9克 粉丹皮4.5克

6月3日复诊：头昏眩晕，心悸频频，神疲乏力，相火妄动，梦泄仍多，再从前法出入。

处方同前，除天麦冬、熟地，加生地9克，金锁固精丸24，分二次服，晨家腹用淡盐汤下，晚用开水送服。

《方公溥医案》

翟竹亭

西门内赵姓，年十九，患梦遗，无隔宿。三月后面黄肌瘦，虚汗似雨，短气喘促，骨蒸潮热，饮食减少。涩精之药，服过无数，殊觉罔效。迎余往疗，诊得心脉虚数，肝脉又洪。此乃肝火过旺，心火上炎，不能下降，肾水亏极，难于上潮，成坎离不交之象。某医不明阴阳之理，若使坎离交济于肾宫，有何梦遗不除也？自制一方，名曰阴阳两交汤。四日服二帖，又遗两次。原方又服四帖，更轻。共服十帖，遗精已痊愈，以上诸虚证全瘳。

阴阳两交汤

熟地30克 山药24克 山萸肉9克 茯苓15克 泽泻9克

丹皮9克 知母6克 黄柏6克 炙远志6克 黄连4克 麦冬9克
炒枣仁9克 茯神9克 菖蒲9克 龙齿12克 甘草6克 水煎服。

《湖岳村叟医案》

孔伯华

于男，八月初九日。肝肾俱热，又兼气郁，每遇激怒，遂致少腹脘次发热，精关不固，时作滑精，昼犯亦不自禁，脉左关尺大，治以清平滋摄。

生牡蛎五钱，布包先煎 盐炒芡实米三钱 盐橘核四钱
盐知母三钱 旋覆花三钱，布包 生赭石三钱 生石决明八钱，先煎
朱莲心二钱 焦枣仁三钱 盐菟丝三钱 合欢花四钱 桑寄生六钱
朱茯苓三钱 朱茯神三钱 砂仁米三钱，盐水炒 藕两
川郁金二钱，生白矾水浸 盐黄柏三钱

二诊：八月十二日，加盐水炒胡桃仁一枚，黑芝麻三钱。

三诊：八月十六日，药后遗精渐少，头目眩晕，前方牡蛎改六钱，加磁朱丸四钱、杭滁菊三钱，石决胆改为两。

四诊：八月十九日。服前方药后，遗精止，脘闷纳差，时有恶心，前方再加厚朴花三钱，青竹茹四钱。

《孔伯华医集》

张汝伟

张左，年二十二，吴淞，遗泄多年，腰酸目花，失眠善忘，心跳气息，胸痞背痛，无一不全，而固阴壮水，益肾宁心，止涩填补，柔肝泄相之药，无一不服，而遗终不止，且加甚焉，甚至每夜一遗，或一夜数遗，恐怕万分。诊脉右关濡数，左尺微弦，苔布白而中心略剥，号属肝旺肾亏，实由心脾不交，宜用归脾丸合天王补心丹意，以补心脾治之。

生绵芪 炙淮药 北沙参 山萸肉 云茯苓 炒枣仁 湘莲
肉 煎芡实各三钱 远志肉炙 天麦冬各钱半 炙甘草一钱
北五味六分

二诊：据述上方，连服六剂，心跳已平，气急亦减，余症均较为轻微，遗精延长至五天未遗。自有此病，服药以来，未有如此方之奇效，今再从原意，复入固精益肾，以通奇经之法。

生熟地 北沙参 绵黄芪 菟丝子 茯苓神 炒枣仁 淮山
药 桑螵蛸 京元参各三钱 白莲须 淡天冬各钱半
左牡蛎一两，先煎

本证始末：此人是吴淞铁路工程处铜匠，因“一·二八”之役，惊恐伤心，心虚则脾亦伤，子病及母，以致君火失明，相火失位，而精关遂滑，所以徒然泄火止涩，固精补肾无效也。服镇心和脾之剂，母子相得，故第一方仅服六剂，即能见效，第二方服二十余剂，每剂服二日，调治二月，二年宿恙，竟告痊癒，冬令来书膏方，面容肥硕，判若两人矣。

方义说明：上列用药意义，在原案及本证始末条，已见一斑，不过遗精之症，是青年普遍病，寻常稍有遗精，亦不是重大症，寻常方案，亦不采集。今选此方，一以示遗精为非病者固不妥，二以示治病之宜活泼泼地，贵乎随机应变耳。

《临症一得》

冉雪峰

湖北王某，素弱多病，频年患遗精，时愈时发，工作如常，不以为意。初每三、五日一遗，继则每日必遗，最后不敢寐，寐而眼闭即遗，虽欲制止而不能，色夭不泽，困惫不支，甚至不能步履，经月不出卧室，即在室内起立，亦须靠桌靠椅，延予商治。诊其脉微细小弱而兼虚弦虚数，皮肉消脱，眼胞微肿，指头冷，少腹急结，恶寒甚，燥烦。予曰：下损及中，阴竭阳厥，下元败坏，真机几熄，诚难为力。观

前此历年所服方药均系遵照舌法，固肾宁心，滋培秘摄并进，原无不合，乃似效不效，终至危急若斯，无已，惟贞下起元，大力冲动，拟借用桂枝乌头煎，彼为大气一转，其结乃散，此为大气一转，厥阳斯敷。方用：乌头一两，水二杯半，煮取半杯，去滓，纳白蜜二两，再煮，令水尽，以桂枝汤一杯溶解之，初服半剂，越六时不知，余半剂尽服之，诃夜半三时许，吐两次，面如妆朱，昏顿不语，予曰：勿讶，金匱桂枝乌头煎方注云：其知者如醉状，得吐为中病，若药不螟眩，厥疾弗瘳。稍待，俟清醒再诊。明晨往诊，厥回神清，手足温，自觉两臂两膀较有力，有能起行意，病即从此转关，续以二加龙骨牡蛎汤、炙甘草汤等加桑螵蛸、覆盆子、菟丝子、补骨脂，随病机出入调摄全愈。病者三月后，曾步行约三十里，欣慰曷似。

《丹雪峰医案》

陆观虎

杨某某，男，24岁。

辨证：遗精

病因：脾胃湿热留伏，下于精藏，而致精关不固。

症候：小便后遗精，腿酸腰痛，自汗，咽间有痰。脉滑大。舌质红，苔薄黄。

治法：利湿清热，化痰固精。

处方：茯苓6克 大贝母6克 杜仲炭9克 焦苡米9克
陈皮6克 桑枝30克 冬瓜子6克 莲须6克 木瓜9克
粉丹皮4克 黛蛤散9克

方解：茯苓、苡米、丹皮祛脾胃湿热。贝母、陈皮、冬瓜子、黛蛤散清热化痰。木瓜、桑枝利湿，舒筋活络。杜仲固腰肾以治腿酸腰痛。莲须固肾涩精。

穆某某，男，20岁。

辨证：遗精

病因：肝气郁结，房劳过度而致精关不固。

症候：小便带精，脘闷，腹中不舒，头时晕。脉细弦。舌质红，苔薄白。

治法：疏理肝气，益肾固精。

处方：苏梗4克 莲须6克 金樱子4克 生龙骨9克
陈皮6克 木香2克 芡实12克 黑豆衣12克 杭甘菊6克
锁阳6克 知柏地黄丸9克。

方解：苏梗顺气。陈皮调中理气。木香疏肝气，散郁结以治脘闷，腹中不舒。莲须、金樱子、芡实、黑豆衣、锁阳、生龙骨益肾固精，以止小便带精。杭甘菊平肝降火。知柏地黄丸治虚火上炎，头晕遗精，肾气不足。

王某某，男，24岁。

辨证：遗精

病因：色欲不遂，耳闻目见，其精即出，又因时常手淫而致精关不固，肾气不足。

症候：遗精腰酸，小便频数。脉细。舌质红。苔薄黄。

治法：固肾气，涩淫精。

处方：金樱子9克 生山药6克 锁阳6克 白莲须9克
杜仲9克 益智仁9克 芡实9克 粉甘草2克 海金沙6克
女贞子9克 朱通草2克

方解：金樱子固精秘气，治遗精。锁阳补肾益精。莲须固精止遗。益智仁缩小便，补心肾之不足，能涩精。女贞子益肝肾固精。生山药补阴益肾。杜仲补肾治腰酸，小便余滴。粉甘草调和诸药，补三焦元气。海金沙除小肠膀胱湿热，治茎痛。通草利小便。芡实固肾益精，治小便不禁，滑精。

陈某某，男，25岁。

辨证：遗精

病因：积思不遂，肝肾两亏。

症候：遗滑四年，寐少头晕痛，胁痛，打呃，腿痛，臂痛，口干，自汗。脉细弦。舌质红有刺，边有齿痕，苔白。

治法：平肝益肾，固精。

处方：桑枝9克 生龙骨9克 沙苑子9克 莲须9克
牡蛎9克 丝瓜络5克 滁菊6克 女贞子6克 浮小麦9克
锁阳6克 金樱子6克。

方解：滁菊平肝除热，以止头晕痛。桑枝、丝瓜络利关节，通经活络，以治腿臂痛。生龙骨、生牡蛎敛汗治遗精。浮小麦止汗。金樱子、锁阳、沙苑子、莲须、女贞子益肾固精，以止精滑。

虞某某，男，39岁。

辨证：遗精

病因：素有肺癆，思虑伤脾。

症候：遗滑，右胁作痛，咳嗽，多思致夜眠不安，腿凉。脉细。舌红，苔黄。

治法：补肾固精，润肺止咳。

处方：冬瓜子9克 大贝母6克 夜交藤9克 丝瓜络6克
锁阳9克 茯神9克 忍冬藤9克 莲须9克 桔梗6克 枇杷叶6克
黑豆衣9克

方解：冬瓜子、大贝母、枇杷叶、桔梗润肺化痰止咳。丝瓜络活络，化痰散热。忍冬藤解毒，以治胁痛。夜交藤、茯神安神宁心，以治不眠。黑豆衣、锁阳、芡实、莲须益肾固精，镇心，以治遗精。

王某某，男，48岁。

辨证：遗精。

病因：色欲过度，精窍虚滑。

症候：遗精经久，脸肿，心悸，便秘，胸时作痛，头晕，脘堵，洩黄不利，腰酸。脉细濡。舌质红，苔薄黄。

治法：养心神，益肾固精。

处方：朱茯神9克 枣仁9克 芡实9克 远志6克 白芍9克

黑豆衣 9 克 夜交藤 15 克 莲须 9 克 冬瓜皮 9 克 合欢皮 9 克
扁豆衣 9 克

方解：朱茯神、枣仁、远志、夜交藤、合欢皮养心安神，定惊悸。芡实、黑豆衣、莲须益肾固精。杭芍敛阴利小便。扁豆衣、冬瓜皮健脾利湿以止便稀。

申某某，男，53 岁。

辨证：遗精

病因：心肾两亏，脾虚失运，肠胃不和。

症候：小便流精经久，大便干燥，舌干纳少。脉细弦。舌质红，苔薄黄。

治法：益肾固精，健脾开胃，兼泻心火。

处 方：莲须 9 克 芡实 9 克 黑豆衣 9 克 焦稻芽 9 克
全栝蒌 9 克 陈皮 6 克 川连 2 克 白芍 9 克 锁阳 6 克
粉丹皮 6 克 栀子 9 克

方解：莲须、芡实、黑豆衣、锁阳益肾固精，以治流精。焦稻芽、陈皮健脾开胃，以进饮食。全栝蒌清热润便燥。白芍和血敛阴，利小便。川连泻心火，益肝胆。栀子清三焦郁火。丹皮入心肾、凉血、生血。

二诊：服药五剂后，小便流精未止，再耳流水，纳食已增，大便亦顺。仍有脉细，舌质红，苔薄黄。心肾仍亏，脾虚见复，肠胃见和。仍按前方去栝蒌、陈皮、杭白芍，加熟女贞子 9 克 金樱子 9 克 益肝肾固精，以治遗滑。炒赤芍 6 克、蒲公英 9 克以泻肝火，散邪行血，化热毒，以止两耳流水。

许某某，男，45 岁。

辨证：遗精

病因：心肾两亏，兼有湿热。

症候：梦遗乏力，心神不稳，头热，脉细滑。舌红，苔黄。

治法：安心神，益肾兼利湿热。

处方：朱茯神9克 杭白芍9克 扁豆衣9克 远志肉6克
女贞子9克 黑豆衣9克 焦苡米12克 旱莲草9克 猪赤苓各9克
石决明12克 白莲须9克

方解：朱茯神、远志安心神，以定心神不稳。扁豆衣、苡米、猪赤苓健胃利湿热。女贞子益肝肾。黑豆衣补肾镇心。旱莲草补肾，和莲须益血，固精以止梦遗。杭白芍、石决明敛阴清相火以治头热。

赵某某，男，23岁。

辨证：遗精。

病因：色欲不遂而致精泄自遗。

症候：遗精气短，头热，脸部起瘰。脉细弦。舌质红，苔薄黄。

治法：益肾涩精，兼补心神，清虚火。

处方：茯神9克 莲须9克 扁豆衣9克 远志6克 芡实9克
黑豆衣9克 杭甘菊9克 白芍9克 益元散9克 冬瓜皮9克
锁阳3克

方解：茯神，远志，扁豆衣，杭芍，以补心神不足。莲须，芡实，黑豆衣，锁阳，益肾涩精。杭甘菊，益元散清虚火去头热。冬瓜皮利二便，散热毒，以治脸部起瘰。

袁某某，男，26岁。

辨证：遗精

病因：湿热扰动，肠胃不和，肾虚。

症候：梦后遗精，纳少，胸脘满，溲浊而赤，大便色黑，少腹作痛。脉细。舌质红，苔薄黄。

治法：利湿热，和肠胃，补肾固精。

处方：焦稻芽9克 苏梗6克 荷梗6克 枯藜皮9克
茯苓9克 锁阳9克 莲须6克 黑豆衣9克 山楂炭6克
焦苡米12克 猪赤苓各6克

方解：焦稻芽和胃补中，利小便，去湿热。苏梗顺气，利大小肠。荷梗通气。山楂炭行气，化瘀消食，和苏梗等以治纳少腹痛，胸脘脘

胀。栝蒌皮清上焦热。茯苓通心肾泻热。苡米益胃健脾渗湿。猪赤苓补心脾。猪苓入肾行水。黑豆衣治遗精补肾水以制火。锁阳补肾益精。莲须清下焦湿热，治胸脘闷，舌苔黄以止梦遗。

《陆观虎医案》

叶熙春

徐，男，三十六岁。上海。火有君相，相火为用，随君而动，心火下移，相火随之而炽。火动水不能静，神摇精荡，或有梦而遗泄，或无梦而滑渗。玉关频启，精神暗耗，腰脊时酸，足跗软弱。精亏髓空，记忆健忘；阳不入阴，时患失眠之累；胃不充旺，形体难丰；脉来虚缓少神，两尺欠静。为今之计，滋阴而扶阳，濡血而生精，兼养胃气以培中土，俾阴平阳秘，精神乃治。

燕根 60克 黄肉 60克 扁豆衣 90克 蛤壳 120克
米炒上潞参 90克 甘菊 90克 炒女贞子 90克 熟地 120克
怀山药 90克 茯神 90克 生珍珠母 300克 盐水炒大生地 120克
龙齿 120克 生左牡蛎 90克 芡实 90克 白术 60克 麦冬 90克
生杵枣仁 60克 丹皮 60克 桑螺蛳 120克 当归 90克 柏子仁 90克
潼蒺藜 90克 炙草梢 30克 制川断 90克 炙新会皮 45克
川柏 45克 夜交藤 120克 杭芍 60克 生炒杜仲各 45克 莲须 120克
龙眼肉 150克 白果肉、莲子、红枣仁各 120克 阿胶 90克
金樱子膏 60克，另炖烊化，收膏入 冰糖 480克，收膏入

《叶熙春专辑》

施今墨

费某某，男，22岁。六年前曾染手淫恶习，年幼无知，断伤过甚，嗣后时感头晕目眩，记忆逐渐减退，体力日衰，去年毅然戒除恶习，又现遗精，经常每周一次，甚则二、三日一次，时有梦，时无梦，饮食二便尚属正常。

辨证立法：断伤肾精，亏损之至，固摄无力，遗泄频频，汤剂难补，丸药图治。法当补肾填精。

处方：紫贝齿 30 克 生龙骨 30 克 刺猬皮 60 克 金樱子 30 克
生熟地各 30 克 莲须 30 克 五味子 15 克 五倍子 15 克
白蒺藜 30 克 益智仁 15 克 春砂仁 15 克 巴戟天 30 克
石决明 30 克 怀山药 60 克 左牡蛎 30 克 炒远志 30 克
朱茯神 30 克 炙甘草 30 克 杭白芍 30 克

共研细末，蜜小丸，每日早晚各服 10 克。

二诊：丸药共服六十日，头晕、目眩较好，遗精几乎每周必有一次，体力仍感虚弱。

处方：菟丝子 60 克 覆盆子 30 克 上肉桂 15 克 盞沉香 15 克
沙苑子 30 克 鹿角胶 30 克 生龙骨 60 克 炙黄芪 60 克
金樱子 60 克 春砂仁 15 克 巴戟天 30 克 酒川芎 15 克
於白术 30 克 酒杭芍 30 克 炒远志 30 克 左牡蛎 60 克
野台参 30 克 甘枸杞 60 克 白莲须 30 克 刺猬皮 60 克
益智仁 15 克 紫河车 30 克 广陈皮 15 克 山萸肉 30 克

共研细末，怀山药 500 克打糊为小丸，每日早晚各服 10 克。

三诊：前方已服二个多月，近日将即服完，精神体力均较前为好，遗精次数减少，一个月二、三次，但不能受异性任何刺激，如与女友出游，即觉尿道流出液体，看画报，读小说均有上述感觉，大便干燥，时现尿频。

处方：淡苁蓉 60 克 火麻仁 60 克 生龙骨 60 克
韭菜子 30 克，炒 菟丝子 60 克 刺猬皮 60 克 胡桃肉 60 克
盞沉香 15 克 覆盆子 30 克 春砂仁 15 克 益智仁 15 克
怀山药 15 克 巴戟天 30 克 白莲须 30 克 山萸肉 30 克
紫河车 60 克 石莲肉 60 克 左牡蛎 60 克 炒远志 30 克
大熟地 60 克 朱茯神 60 克 粉丹皮 30 克 炙甘草 30 克

共研细末，金樱子膏 600 克合为丸，如小梧桐子大，每日早晚

各服 10 克。

四诊：丸药已服三个月，近将服完，服药期间，只遗精两次，精神体力更见旺健，唯欲念易动耳。

处方：刺猬皮 60 克 石莲肉 60 克 韭菜子 30 克 白莲须 60 克
早莲草 60 克 女贞子 30 克 益智仁 15 克 春砂仁 15 克
车前子 60 克 菟丝子 60 克 山萸肉 30 克 生龙骨 60 克
金樱子 30 克 粉丹皮 30 克 川黄柏 30 克 天门冬 30 克
麦门冬 30 克 大熟地 60 克

共研细末，蜜小丸，每日早晚各服 10 克。

王某某，男，32 岁。早婚又少节制以致体力日弱，周身酸楚，记忆力减退，遗精早泄均现。舌苔薄白，六脉细弱。

辨证立法：早婚纵欲，肾精消耗过多，阴阳两亏，症现遗精早泄，体质日衰。肾生髓，脑为髓海，肾亏之极，脑力不足，故有记忆减退之象，法当补肾之阴阳。

处方：川续断 10 克 川杜仲 10 克 鹿角胶 10 克，另炖兑服
紫河车 10 克 砂仁 5 克 大熟地 10 克 益智仁 5 克 破故纸 10 克
山萸肉 10 克 金狗脊 15 克 甘枸杞 20 克 淮山药 25 克，炒
炙甘草 3 克 五倍子 5 克 五味子 5 克

二诊：服药甚平安遂连服十剂之多，服药期间，无遗精现象，周身酸软大为好转。

处方：前方加盐知母 6 克，盐黄柏 6 克，生龙骨 10 克，生牡蛎 10 克，再服十剂。

三诊：服药后情况甚好，二十日来无遗精，早泄现象亦有所好转，拟予丸方常服。

处方：紫河车 30 克 鹿角胶 30 克 山萸肉 30 克 覆盆子 30 克
破故纸 30 克 甘枸杞 30 克，炒 益智仁 15 克 春砂仁 15 克
金狗脊 60 克 川杜仲 30 克 五味子 15 克 五倍子 15 克
酒杭芍 60 克 老桂枝 30 克 功劳叶 30 克 桑螵蛸 30 克

蛇床子 15 克 大熟地 30 克 炒远志 30 克 节菖蒲 15 克
胡桃肉 60 克 桑椹子 30 克

共研细末，金樱子膏 180 克，再加炼蜜 300 克，合为小丸，每日早晚各服 10 克，白开水送。

邸某某，男，24 岁。患神经衰弱已数年，头痛不能看书，睡眠不实，多梦。近半年来腰酸、易倦、经常遗泄。舌苔正常，六脉软大微数。

辨证立法：肾为精气都会关司之所，相火听命于心，神有所思，君火不降；智有所劳，肾阴不升，心失其命，肾失其守。故多梦而常遗泄，腰为肾府，肾亏则腰酸，脉象软大是属虚损之象，拟抑相火以敛阳，补心阴以滋肾，宜服丸药缓图。

处 方：刺猬皮 30 克，煨 白蒺藜 60 克 珍珠母 30 克
生牡蛎 30 克 石莲肉 30 克 炒远志 30 克 柏子仁 30 克
生龙骨 30 克 制首乌 30 克 龙眼肉 30 克 桑螵蛸 30 克
川杜仲 30 克 紫贝齿 30 克 五味子 15 克 五倍子 15 克
肥知母 30 克 金樱子 120 克 黄柏皮 30 克 粉丹皮 30 克
益智仁 15 克 缩砂仁 15 克 鹿角胶 30 克，另烱兑入 酸枣仁 30 克
朱茯神 30 克 炙甘草 30 克

共研细末，蜜丸如小梧桐子大，早、晚各服 10 克，白开水送服。

二诊：服丸药三个月，诸症均见好转，但遗精尚未痊愈。再用丸方，以收全功。

处 方：黄菊花 30 克 刺猬皮 60 克 生龙骨 60 克 石决明 60 克
白蒺藜 60 克 石莲肉 30 克 生牡蛎 30 克 炒远志 30 克
五味子 15 克 五倍子 15 克 制首乌 30 克 枸杞子 60 克
桑螵蛸 30 克 酸枣仁 60 克 紫贝齿 30 克 缩砂仁 15 克
益智仁 160 克 朱茯神 30 克 鹿角胶 30 克，另烱兑入 川黄柏 30 克
节菖蒲 30 克 粉丹皮 30 克 白莲须 30 克 肥知母 30 克
炙甘草 30 克

共研细末，金樱子膏 480 克，炼蜜 420 克合为丸，如小梧桐子大，每日早、晚各服 10 克白开水送下。

马某某，男，20 岁。病将一年，初起时自感情欲易动，见异性阴茎即勃起，深以为苦，逐渐尿道经常流粘性物，努力排便时亦由尿道滴出粘液，腰酸无力势成漏精，切迫求治。舌苔正常，六脉细数。

辨证立法：相火妄动，欲念叶起，见色即遗，无力固摄，拟抑相火，固肾精为治。

处方：桑寄生 25 克 砂仁 5 克 金狗脊 15 克 盐知母 6 克
白蒺藜 10 克 炒丹参 10 克 盐黄柏 6 克 沙蒺藜 10 克
炒丹皮 10 克 石莲肉 20 克 五味子 10 克 生熟地各 6 克
芡实米 15 克 五倍子 10 克 金樱子 10 克

二诊：服药四剂，腰酸见效，漏精也少，近来心情稳定欲念减少，非如前时常觉心猿意马之状。

处方：前方加莲须 10 克，益智仁 10 克，再服数剂。

三诊：服药六剂，自觉心神安稳，杂念全消，漏精间或有之拟用丸方巩固。

处方：二诊方加三倍量，共三研细末，金樱子膏 600 克，合药为丸，如小梧桐子大，早晚各服 10 克，白开水送。

《施今墨临床经验集》

阳强

齐秉慧

曾治邑门陈患强阳不倒，延求诊治，按之右尺洪大而繁，全脉如常。视之满而红光，全无滞气，乃是肾中真阳之火飞越耳。遂与元参三两，麦冬三两，煎好取汁一大碗，入油桂末七分，调药水服。此方妙在用玄参最重，以泄肾中浮游之火，尤妙在用桂末少许，以引其入宅，而招散其沸腾之火。同气相火，火自回舍。况麦冬能助

肺金清肃之气下行，以生肾水，水足而火自得其养矣。此不求倒而自倒也。他日亦可重整戈矛，再图欢合耳。

《齐有堂医案》

阴缩

李铎

吴壬波上舍，年三十余，体丰面白，性和气平，向年曾患阳缩，心常恐惧，今虽无恙，属诊脉立案，为预防之计，亦卫生之道也。诊得尺寸脉皆虚濡，关脉大而微紧，是为真阳衰乏，内寒凝结之象。据述每一用心思索，必冷精自遗；遇道途稍险，则惕然畏怖；稍将息失宜及犯房事，则头晕目眩，此皆属阳虚痼冷之为病矣，最防最脱，亟宜及早图治。立法温补下元，健养心脾，祛阴寒固真阳，使阳气得复阴寒自除，而斯疾必愈。

人参 于术 炒姜 鹿茸 附子 丁香 肉桂 固脂 远志
白蔻 洋硫磺^{久制} 炙草

此回阳返本法，能治阳脱阴痿及急阴证，手足冷指甲青，少腹痛囊缩等症，屡有神效。

按痼冷者，谓痼久而冷也。痼者固也，冷者寒之甚也。人之禀受不同，亦或将理失宜，遂致偏废而成痼冷之证。其病多由真阳虚弱，胃气不实，复啖生冷冰雪诸寒之物，或坐卧阴冷久湿之地，侵夺阳气，以致脏腑久痼而冷。其为病也，或手足厥冷、或腹中久痛溏泄无度，或腰腿久痛如坐水中，或阴痿不举，冷精自遗，或外肾抽缩，面黑脱阳，或久呕逆不进饮食，或自汗战栗，大腑洞泻，或小便频数，余沥不禁，此皆痼冷之为病也。

邓坊王某，年三十五。客于津市，归里数月，患缩阳症。初则间常有之，近则频缩，惊恐不置，服大剂回阳固脱及黑锡丹，皆不能愈。闻余在荷岭陈善人家诊病，飞与延治，甫入门闻急极，即入房诊

视，见一妇人用口咬住阴茎，齟齬殊苦，令出房，无须尔尔，即以艾炷灸气海在脐下一寸五分 关元在脐下二寸、左右各灸七次，进挺生丸五钱。应手而愈，随服回阳法十余剂，自后不复发也。

凡缩阳症，多由真阳虚弱，色欲过度而致。然亦有因大吐大泻之后，四肢逆冷，大汗淋漓，元气不足，人事不省，外肾缩入者。或伤寒新瘥，误与女人交接，其症小腹紧痛，阳物缩而上升，面黑气喘，手足厥冷，冷汗自出者，皆为脱阳，须臾不救，倘或医药不便，急用葱熨法，更灸气海关元二穴，然后可服黑锡丹及加味理中汤、瘤阳汤。

《医案偶存》

朱增藉

李同朝病囊缩，治经月余不效，延余治。脉沉迟，此乃阴寒直中厥阴。阅所服方，皆纯阴滋补之剂，愈助其阴，则阴邪愈肆，宜乎病日臻也。余主大剂芪附理中汤，而其父沈吟终日不进。余诘曰：“令郎病尚可治，宜速服药，何迟疑乃尔。”曰：“前医某，初主方时，戒芪术恐其提升，戒姜附恐其燥烈，服之则愈缩不救。今先生正用其所戒，而分又极重，与某言大背，是以不敢。”余曰：“此说甚谬，夫阴寒直中阴经，得大剂姜附以挽回阳气，芪术以鼓荡中气，则大气盘旋，囊缩之证自愈。”伊疑释，即进一服，次日松戢夹，而囊信不缩。乃叹服吾用药之果，续进十余服，体全复。吁！医某不知思求经旨，省疾问病，务在口给，往往用药之下，多行震惊之术。如斯病不得吾力信其说，不死于病而死于药，反叹天命之短也。庸流之害，可畏也哉！

王怀四壮年力田，染病旬日。忽舌焦囊缩，延余治。诊得脉沉数，咽干，小便黄赤，大便燥结。以脉证审之，是厥阴大承气急下之证，然未经历炼，迟疑不敢。默思厥阴乃极阴之脏，而得极阳之证，非极阴之物，不足以制极阳之邪。取井底泥涂之，其囊即不缩入，速与大承气下其结粪，二服而愈。后与族兄克鄰，谈及此病，兄抵掌

曰：“吾在中湘时，因客感后亦患斯证，服温补剂，几濒于危，幸一老医进大承气汤而愈，与先生所治之证相同。甚矣！医道之不可不讲也。”余曰：“囊缩一证，在伤寒疫病，则有热有寒，而在杂病，则有寒无热，全在临证谛审，否则杀人在反掌间耳。”

《疫证治例》

马文植

某。勉强摇精，致阳缩囊纵，不但形弱伛偻，肛门，脐旁皆为牵引，咽喉牵绊似垂，食物渐渐减少，由精血之伤有形，最难自复。少阴厥阴脉循喉咙，开窍二阴，既遭损伤，其气不及充注于八脉，见症皆拘束之状。上年进柔剂阳药，服后头巅，经脉皆胀，耳窍愈鸣，想脏阴宜静可藏，试以乘舆身怖，必加局促不安，宜乎升阳动药之灵矣。夫少阴内脏，原有温蒸诸法，厥阴相火内寄，恶暖喜冷。潜阳坚阴，仿丹溪法，仍候高明定义。

玄武板 黄柏 知母 柏子仁 阿胶 远志肉 生地 茯苓
调入盐秋石，食前逾时服。

《马培之医案》

沈明生

丁又铭，食后动怒，复受风邪，恶寒发热，连日委顿，咸谓停食感冒耳。师曰：寒以时而来，热得汗而解，脉弦且数，虽素未患症，症从此开。已而果然。于是用清脾饮加减，寒热渐轻，但茎卵日缩回，类阳痿，又铭以为忧。师曰：无虑也，此非伤寒厥阴之危症，亦非阳衰者，此乃阳明热极不润宗筋，正所谓诸痿生于肺热，热极反兼寒化之象，若以虚而补之，是握苗之助矣！于是议用梔、芩等剂，火清而茎卵如故，症亦不复作，病邪日去。所未脱然者，唯便秘日久，然不胀、不疼，腹无所苦，师以为病疟者，必多汗，多则津液耗而肠胃燥溷矣。饮食渐进，参、芪滋补使气血充溢，其便自至，可弗治也。遂

立一调补之方而退。越两日，忽一友探望，知疾久未平，请于其尊人，愿效图治，诊毕云：邪气正实，安得用补转助燥结，及今下之尚可也。即进承气汤一服，又铭意虽犹豫，然重违父命，勉强下咽，服半日许，腹中毫不为动，茎卵忽又缩入，惶迫之甚，复延师以告，师为解释、慰藉，仍用调补三、四日后，计服参二两，始获畅。解得宿垢甚多，诸症悉遣。因于是症得三益焉，于其初也，知疴可验于受邪之始；于其中也，知痿不尽由阳事之虚泊，其末也，知便秘有服参、术乃通，不可据成迹。而信手攻下，若下非其时，虽硝黄亦不能荡涤，徒令真元耗损，在灵素固有明训，而时人但知，坚者削之，不详于塞因塞用耳！

《鹤圃堂治验》

白淫

黄凯钧

顾，二五，从前吐血，近起白淫，出于溺后，脉数而小，两尺尤微，自述逢劳更甚，补摄并施。

党参 黄芪 熟地 萸肉 山药 五味子 湘连 芡实
一服止，改丸料，吐血亦瘳。

《肘后偶抄》

精浊、血精

曹存心

白浊久而不痊，以致肾失封藏，梦遗更甚，少寐少纳，面痿脉小。

九龙丹合天王补心丹
另猪肚丸

原注：膏淋有便浊、精浊两种。便浊是胃中湿热渗入膀胱，与肾绝无相干；精浊牵丝粘腻，不溺亦有，是肾虚淫火易动，精离其位，渐渍而出，治宜滋肾清心、健脾固脱。九龙丹方中杞地归，滋阴以制阳，樱莲芡涩以固脱，石莲子苦寒清心，心清则火不炽，白茯苓甘平益土，以制肾邪，尤妙在山楂一味，能消阴分之障。前一案气虚挟湿热，故含清暑益气；后一案心火挟湿热，故合补心、猪肚。

《柳选四家医案》

张乃修

陈左。肾气不能收摄，临圜辄带精浊。宜补气固肾。

党参三钱 杞子三钱 潼沙苑盐水处理，三钱 淮山药三钱
茯神三钱 杜仲三钱 菟丝子盐水处理，三钱 制首乌四钱 建莲三钱
金樱子三钱

二诊：神情稍振，每至临圜，辄有精浊带出。肾气虚而不振也。

党参二钱 云茯苓三钱 淮山药三钱 金樱子二钱 建莲三钱
于术二钱 潼沙苑三钱 煅牡蛎四钱 菟丝子三钱

三诊：固肾气而益脾胃，脉证相安。前法扩充之。

炙上耆三钱 制首乌三钱 西潞党三钱 土炒于术三钱
炙黑草三分 原杜仲三钱 炒山药三钱 潼沙苑三钱 金樱子三钱
肥玉竹三钱

膏方。每至小便，辄有精浊遗出。此精病，非浊也。肾虚不摄可知。脾胃多湿，气虚不运可知。拟补气以健脾胃，益肾以摄阴精。

炙绵耆四两 山药三两，炒 制首乌六两 炙黑草五钱
厚杜仲三两 奎党参六两 扁豆子三两 于术二两，炒 剪芡实三两
肥玉竹三两 白茯苓三两 炒萸肉二两 大生地姜汁炒，八两
潼沙苑盐水处理，四两 甘杞子三两 巴戟肉二两 大熟地砂仁炙，六两
补骨脂盐水处理，三两 干苁蓉三两 西洋参二两 白归身酒炒，二两
杭白芍酒炒，二两 金樱子去核，四两 菟丝子盐水处理，三两

天麦冬各二两 清阿胶三两 龟板胶三两 鹿角胶二两 绵鱼胶二两，
以上四味，酒化收膏

陈左：败精失道，精浊久而不止。兹则旧咳复发，每至寅卯，气辄上升，不能着卧，痰色有时灰黑。脉形濡细。肾水不足于下，痰热凭凌于上。尚可抵御，难望霍全。

玉竹三钱 阿胶二钱 川贝母二钱 云茯苓三钱
菟丝子盐水炒，三钱 潼沙苑三钱 海蛤粉三钱 白果三枚，打
都气丸三钱，开水送下

二诊：每至寅卯，气辄上升，不能着卧。脉象细弦。肾虚冲阳挟痰上逆，并有精浊。法宜兼顾。

细生地四钱 女贞子盐水炒，三钱 炒萸肉三钱 青蛤散三钱，包
川贝母二钱 潼沙苑盐水炒，三钱 厚杜仲三钱 白芍一钱五分
白果三枚，打都气丸三钱，先服

三诊：咳嗽气逆，寅卯为甚，痰多盈盂，精浊绵下。肾虚不能固摄。前法进一步治。

大生地四钱 玉竹三钱 菟丝子盐水炒，三钱 萸肉二钱
补骨脂三钱 奎党参三钱 川贝二钱 潼沙苑盐水炒，三钱 山药三钱
厚杜仲三钱

四诊：精浊稍减，咳嗽稍松。的属肾虚不能收摄。效方扩充。

大生地四钱 炒山药三钱 菟丝子盐水炒，三钱
潼沙苑盐水炒，三钱 炒萸肉三钱 巴戟肉三钱 补骨脂盐水炒，三钱
厚杜仲三钱 胡桃一枚，蜜炙打烂入煎

《张聿青医案》

王旭高

高。脉细固属阴虚，若下垂尺泽，是相火下淫，故精血下流，小便便数，溺窍疼痛，大便干结也。补养肾阴，兼清相火为法。

大生地 龟板 黄柏 大黄酒炒 木通 小蓟炭 阿胶蒲黄炒

焦山梔 甘草梢 知母 茯苓 元明粉 车前子 牛膝

丁。水窍精窍，异路同门，二窍不并开。水窍开则湿热常泄，相火常宁，精窍常闭。若水窍为败精痰浊阻塞不通，则湿热不泄。病已二载，颇服滋补，使湿热败浊漫无出路，致下焦浊气上攻及胃，时时暖气，腹中不和，二便不爽，失下行为顺之理。诊脉细肢寒，肾阳与胃阳不布。法宜通阳渗湿，益肾化浊。

补故纸 韭菜子 茯苓 萆薢 小茴香 菟丝子

又：症势仍然，前方加减。

照前方加桂枝、白芍、龙齿、牡蛎。

又：杂药乱投，诸病不除，中气早戕，故腹中不和，大便不畅。至于本病清浊淆混，亦脾虚湿热所致。

萆薢 益智仁 半夏 陈皮 党参 黄柏 石菖蒲 乌药
砂仁

又：九窍不和，肠胃病也。胃以下行为顺，肠以传导为职。肠胃失司，则暖气，肠鸣，头眩，大便难，小溲浑浊，肛门溺窍皆痒。

白术 苦参 茯苓 陈皮 香附 泽泻 六神曲 桃仁 火麻仁 槟榔 青皮 茵陈草

又：湿热浊邪，混入清气之中，无路可出，外则肌肤生癢，如粟且痒；上则头眩；下则溺窍后阴俱痒，精浊时流，大便艰涩。三焦俱受其邪，虚实混淆之病也。疏泄浊邪从下而出，复入交济坎离，虚实同治。

朝服控涎丹十四粒，陈皮汤送下。暮肠磁朱丸三钱，沙苑子汤下。

渊按：借控涎丹以泻中焦湿热痰浊，磁朱丸以交济坎离，可谓善于腾挪。

须。精浊连年不断，兼有血块淋漓。肝肾大虚，八脉无以固摄，湿热混乱不清。舌苔白腻。法当脾肾双补，固摄下焦。

怀山药 茯苓 菟丝子 阿胶 赤石脂 炒 血余炭 五味子

杜仲 沙苑子 金樱子 莲须 旱莲草

渊按：肝肾八脉之虚，由湿浊混淆，精血频下。若不先清湿热以宁相火，徒事补肾固精，所谓不清其源而欲塞其流，能乎否乎？

《王旭高临证医案》

子痛、囊痛

薛己

给事陆贞山，肿赤胀痛，小便涩滞，寒热作渴，法当清肝火除湿毒。遂用柴胡、炒黑龙胆、吴茱、炒连、当归、银花、角刺、赤芍、防风、木通、生草节，一剂肿痛顿退；三四少加防风、木通、川芎、茯苓作饮；下滋肾丸，热肿亦退。但内见筋一条不消，此当滋肾水，养肝血，用山茱、山药、熟地、丹皮、泽泻、五味，二剂，其筋消矣。复用补中益气加茯苓送滋肾丸而愈。

朱京兆患囊胀痛，彼以为疝症。夜诊其脉数而滑，曰：此囊病也。脓已成，服活命一剂，黎明而脓溃，更用补阴托里而敛。

一儒者，考试不利。一夕饮烧酒而入房，不遂，至夜半寒热烦渴，小便不利。翌早，囊肿胀掀痛。与除湿热、清肝火之剂，城暮闭，不得归服。翌日报云：夜来囊悉腐，玉茎下面贴囊者亦腐，如半边笔帽。仍以前药，加参、芪、归、术，四剂腐肉尽脱，举丸悬挂，用大补气血，并涂当归膏，囊茎悉复而愈。

一男子醉后入房，囊肿大如斗，小腹胀闷，小便淋赤，发热口渴，痰涎壅盛，命在须臾。此肾水虚弱，阴亏难降，津液浊败。用六味丸料加车前、牛膝作饮下滋肾丸，诸症顿退。再加五味、麦冬，二剂而愈。

《名医类案》

薛立斋

一男子，囊痈未作脓而肿痛。以加味龙胆泻肝汤，二剂少愈；更以四物汤加木通、知母、黄柏而愈。

一男子，焮肿痛甚，小便涩，发热脉数。以龙胆泻肝汤倍用车前子、木通、茯苓，四剂势去其半。仍以前汤，止加黄柏、金银花，四剂又减二、三。便利如常，惟一处不消。此欲成脓也。再用前汤加金花、白芷、角刺六剂，微肿痛，脉滑数，乃脓已成。令针之，肿痛悉退。投滋阴托里药，乃紫苏末敷之，愈。

一膏粱之客，阴囊肿胀，小便不利。此中焦积热，乘虚下注。先用龙胆泻肝汤加黄柏、牛膝，四剂渐愈。后用补阴八珍汤加柴胡、山梔而愈。后不守禁忌，前症复发。仍用补阴八珍汤、补中益气汤、六味丸而痊。又因劳倦发热，自用四物知柏之类，虚症悉具，疮口大开，此五脏气血俱虚也。朝用补中益气，夕用六君加当归各五十余剂，疮口始敛。又用六味丸调理而愈。

知州黄汝道先嗜热发热，肢体倦怠，入房则腿足酸软，足心热至腿膝，六脉洪数，两尺为甚。此足三阴虚，欲滋补化源。彼反服苦寒降火之剂，后阴囊肿胀，用治疝药，肿胀益甚，形气愈虚。服温补之剂，肿痛上攻，小便不利，两尺脉洪，按之虚甚。曰：此囊痈也。因气血虚而不能溃。先用补中益气汤加山药、山萸、车前、柴胡、山梔，一剂肿胀顿消。随用六味丸料，加车前、牛膝、柴胡、山梔，一剂小便渐通。乃用活命饮与前二药消息间用至二十余剂，囊裂出秽脓甚多。乃用托里消毒散六剂，脓秽秽清。又用托里散数剂，脓水渐少，更用补阴托里散及十全大补，五十余剂而痊。

府庠李达卿素肾虚发热，久服知柏之类，形体渐瘦，遗精白浊，嗜热唾痰。此肾水亏损，虚火内炽。用补中益气之类加五味、麦冬，前症将愈。又别用清热凉血之剂，饮食少思，唾痰不止。此脾虚复损，不能摄涎归源。乃用前汤加茯苓、半夏而愈。后入房，头晕吐痰，

腰骨作痛，大小便道牵痛。此精已耗而复竭所致，危殆之症也。遂朝用前汤加麦冬、五味，夕用六味丸料加五味、萆薢，五十余贴，诸症顿退。后又入房，阴囊、阴茎作痛。别用淡渗之剂，阴囊内溃。乃用补阴托里之剂，出脓甚多。喜肿消痛止。竟不善调养，致大便不通，小便如淋，痰涎上涌。此肾虚之症复作矣。诚为可虑。有保其可生者，用礞石滚痰丸、牛黄清心丸之类，吐痰愈加。曰：非惟无一保其生，而反促其危矣！辞不治，果歿。

一男子患此，肿痛发热。以上柴胡汤加黄连、青皮，四剂少愈；更以加减龙胆泻肝汤而愈。

一男子脓熟作胀，致小便不利。令急针之，以小柴胡汤加黄柏、白芷、银花，四剂少愈；更以托里消毒散数剂而痊。

一男子囊肿，状如水晶，时痛时痒，出水，小腹按之作水声，小便频数，脉迟缓。此醉后饮水入房，汗出遇风寒，湿毒乘聚于囊为患，名水疝也。先以导水丸二服，腹水已去，小便如常。再饮胃苓散倍苓、术，更用气针引去聚水而痊。

一男子患久而不敛。以十全大补汤加五味子、麦冬，炙以豆豉饼月余而平。

一弱人肿痛未成脓，小便赤涩。以炙甘草、青皮、木通、黄柏、当归、麦冬，四剂少愈；以青莲子饮而消。

一男子病势已盛，脉洪大，可畏。用前汤二剂，肿少退；以仙方活命饮二剂，痛少止，脉之滑数，乃脓已成，须针之，否则囊皆溃。不信，遂更他医，果木溃，举丸挂悬。复求治。诊之，脉将静。以八珍汤加黄芪、知柏、山栀，更敷紫苏末，数日而痊。此症势虽可畏，多得保全，患者勿惧。

一弱人脓熟胀痛，大小便秘结，针之，脓出三碗许，即鼾睡，觉而神思少健。但针后虽敷解毒药，亦溃尽矣。故用托里药三十余剂，始痊。大抵此症属阴道亏，湿热不利所致，故滋阴除湿为要。常治肿痛小便秘涩者，用除湿为主，滋阴佐之；肿痛退，便利和者，除湿

滋阴相兼治之。欲其成脓用托里为主，滋阴佐之；脓成即针之，仍用托里滋阴。湿毒已尽，专用托里。如脓清或多或敛迟者，用大补之剂乃豆豉饼或附子饼灸之。如卢武选封君年逾五十患此，疮口年余不敛。诊之，微有湿热，以龙胆泻肝汤治之，湿热悉退。乃以托里药及豆豉饼灸之而愈。次年复患，湿热颇盛，仍用前汤四剂而退，又以滋阴药而消。若溃后虚而不补，少壮者成漏，老弱者不治。脓清作渴脉大者亦不治。朱丹溪曰：痈疽入囊者，予尝治数人，悉以湿热入肝经施治，用补阴佐之。虽脓溃皮脱，睾丸悬挂，皆不死。《外科心法》

《续名医类案》

薛立斋

胡同知，年逾五十，阴囊肿痛，得热愈甚。用蟠葱散等药不应。肝脉数。此囊痈也，乃肝经湿热所致。脓已成，急针之，以龙胆泻肝汤，脉症悉退。更以托里滋药，外搽杉木灰、紫苏末，月余而愈。此症虽溃尽而无害，患者审之。

柏道官年六十余，阴囊已溃，痛不可忍，肾丸露出。与龙胆泻肝汤服之及敷前末，不应。意此湿气炽甚，先以槐花酒一碗，仍以前药，少愈。更以托里加兹阴药，月余而平。设以前不应，加之峻利，未有不损中气以致败者也。聘陈士时用、沈汝和患此，悉用前药而愈。

《续名医类案》

裹材

一人，忽遍身拘急，来日阴囊连茎大肿如斗，六脉沉紧。此阴疽也。幸未服解毒凉药，若服之，则茎与睾丸必皆烂去而死。急令服救生汤五钱，又一服全安。

《续名医类案》

费伯雄

某。子痈已溃，脓尚未清，红肿仍未全退，内兼身热，小溲短痛，便溏作坠，中气不足，湿热不化。清托之中，佐以升提。

丹皮参各二钱 软柴胡一钱 肥泽泻二钱 赤芍一钱 生草五分
炒苡仁四钱 赤苓二钱 花粉三钱 银花三钱 川升麻四分
陈橘核三钱 煨葛根二钱 木香五分 车前子三钱 灯心十尺
另用苏叶、菊花煎水外洗。

《费伯雄医案》

柳宝诒

周。时病囊疡之后，营热不化，内结于络，则块痛如肠痈；下注于足，则痹痛如鹤膝。总之，营虚络阻，内热留恋，用药通补两碍。脉象虚数而急，舌红无苔，兼有阴损之象。方以养阴为主，佐以通络泄邪。

大生地炒 全当归酒炒 赤白芍各酒炒 川杯牛膝各酒炒 炒丹皮 嫩白薇 独活酒炒 秦艽酒炒 金铃子酒炒 延胡醋炒
宣木瓜酒洗 紫丹参 淡天冬 茅根肉

《柳宝诒医案》

陈莲舫

硃石，某。血疝变痈，痈复变漏。肾囊起瘰有脓，时平时发，脉息细弦。阴虚湿郁，湿复随气下陷，治以和养。

珠儿参 川石斛 黑川柏 川楝子 生白芍 陈皮 黑料豆 桑椹子 白苡米 小青皮 白茯苓 丝瓜络

金泽，陈。血疝将成囊痈，赤肿疼痛，势防溃头，脉息细弦，治以清解。

左金丹 黑川柏 粉草藓 黑牵牛 川楝子 陈皮 小青皮

肥知母 嫩滑石 白茯苓 大力子

《莲舫秘旨》

贺季衡

和尚。子痢赤肿及痛俱减，赤色亦消。属在淋浊之后，下元湿热未清，仍以清利分化。

当归尾二钱 川楝子二钱 京赤芍二钱 淮牛膝二钱
川黄柏一钱五分 童木通一钱五分 甘草梢八分 泽泻二钱
大贝母四钱 陈橘核四钱，炙 枸橘梨一个

《贺季衡医案》

前阴肿痛

马元仪

尤悔侄患阴茎作痛，痛甚而愤，遂昏迷不醒，几阅月。诊其两脉浮虚而涩，浮为气虚，涩为精伤。阴阴两虚之候，得之忧思劳郁而伤中也。《经》云：阳明主润宗筋。又：阳气者，精则养神，柔则养筋。今悒郁劳倦，气血两伤，故令作痛，以当归补血汤加人参、炙草，荣养气血。桂心、秦艽、红花，宣通血脉。一剂而痛止，复诊两脉沉微，连进大剂参附，诸症已平。惟彻夜不寐，用归脾汤调理而安。

有人阴肿，医以赤土涂之，令服八味丸而愈。一儿阴肿，医亦以赤土涂之，愈。若久病而阴肿，病已不可救，宜速灸水分穴，盖水分能分水谷。水谷不分，故阴肿。不特阴肿，他处亦肿也。尤宜急服禹余粮丸云。

陈良甫家婢患阴蚀，就疮家疗不差，蚀处作两疮，深半寸，良甫于《涓子方》中检得甘草汤方，仍以自处蝮蛇胆散，不经七日，疮乃平复，甚效。凡数十人，手下即活。遇斯疾者，请流布而传之。

葛氏云：比见人患茎头肿，攻下疮欲断者，以猪肉汤渍洗之，并

用黄连、黄柏末涂之。又方蜜煎甘草末涂之。

《续名医类案》

朱丹溪

吴江王氏子年三十岁，忽阴挺长肿而痛，脉数而实，用朴硝荆芥汤浸洗，又用三一承气汤大下之愈。

姚蒙字以正，巡抚邹来学尝使视脉。蒙既叙病源因，曰：公根器别有一窍出汗水。来学大惊，曰：此隐疾，何由知？蒙曰：以脉得之左关滑而缓，肝第四叶有漏洞下相通。来学改容谢。

《续名医类案》

王孟英

庆云圃观察令郎，陡患偏坠，医与茴香、葫芦巴、乌药、荔枝等剂，遂疼不可忍。因浼赵棠村鹾尹邀孟英视之。按其脉肤，甚热，曰：非疝也。睾丸肿痛，必偏于右，此湿热时邪也。设以疝治，则必成痈。乃按湿热时邪治之，果覆杯而痛减，三服而便行热退。因食羊肉，肿痛复作。再与清解，嘱慎口腹而瘳。

胡蔚堂，年近古稀，患囊肿，小溲赤短，寒热如疟。孟英曰：非外感也，乃久蕴之湿热下流，气机尚未宣泄，予五苓散合滋肾丸加楝实、栀子、木通，两剂后，囊间出腥粘黄水甚多，小溲渐行，寒热亦去，继与知柏八味去山药、萸肉，加栀子、楝实、芍药、苡仁等，久服而愈。

《王氏医案》

张乃修

顾左。囊肿较退，睾丸仍然肿硬。还是湿压气坠，气湿不行。再运脾渗湿；而温元藏。

连皮苓五钱 吴萸盐水炒，四分 木猪苓二钱 大腹皮二钱

查炭二钱 广木香五分 炒橘核三钱，研 炒小茴香五分 炒枳壳一钱
冬瓜子五钱 炙干蟾四钱

二诊：举丸作痛殊甚，又复身热。湿热内阻，营卫不宣，恐变外证。

青陈皮 草薢 延胡索 枳壳 大腹皮 炒橘核 香附 金铃子 泽泻 猪苓

《张聿青医案》

何长治

左。囊肿足肿，得小便而舒，咳呛，气逆不降，脉细数无力。关劳心肺液久枯，调理非易也。

潞党参钱半 五味子三分 煨瓦楞壳三钱 辰茯神三钱
橘核三钱 制於术钱半 款冬花钱半 炒白苏子钱半 佛手柑八分
炙草四分 加水炒竹茹钱半 沉香片七分

《何鸿舫医案》

王仲奇

张，宴乐安路，十一月廿八日。遗泄精浊未能输化，左举丸偏肿，前曾作痛，间有寒热，足肢微麻，脉弦。治以通泄。

紫贝齿煨先煎，三钱 石决明煨先煎，四钱 败龟板炙先煎，六钱
粉丹皮炒钱半 淮牛膝炒，二钱 忍冬藤三钱 橘络钱半
山查核炒，三钱 当归须二钱 红花八分 山甲珠二钱 青皮炒，一钱
茯苓三钱

二诊：腊月初三日。左举丸偏肿见消，痛亦较愈，惟腰痛腿酸无力，脉濡弦，仍守原意，参以强肾。

紫贝齿煨先煎，三钱 石决明煨先煎，四钱 龟板炙焦黄先煎，六钱
淮牛膝炒，三钱 忍冬藤三钱 续断炒，二钱 红花八分 全瓜蒌三钱
当归须二钱 茯苓三钱 粉丹皮炒，钱半 白蒺藜三钱

十大功劳叶三钱。

三诊：嘉平十二日。左辜丸肿消未尽，精浊亦稍有未弭，行动则觉脘酸。以固精强肾，化浊分清制丸。

龟板炙焦黄，三两 紫贝齿煨，一两 石决明煨，两半
左牡蛎煨，一两 粉丹皮炒，一两 川黄柏炒，一两 川草薢两半
西珀屑三钱 法半夏一两 茯苓三两 猪苓两半 淮牛膝炒，一两
白蒺藜二两 瞿麦一两 全当归一两 山甲珠一两

上药研为细末，炼为丸，每早、晚以开水送下三钱

《王仲奇医案》

曹沧洲

某左。腰酸，少腹胀，辜丸肿大，胸闷恶心，脉濡，宜疏泄厥少，宣畅痰湿。

制香附一钱半 黑山栀二钱 橘红一钱 车前子四钱，包
川楝子一钱半 枸橘三钱 法半夏一钱半 泽泻三钱
延胡索一钱半，醋炒 枳壳一钱半 楂炭二钱 丝瓜络二钱 橘核五钱
炮药方：苏叶一两 两头尖五钱 葫芦巴四钱 荔枝核五钱
小茴香五钱 水煎薰之。

《吴门曹氏三代医验集》

章成之

毛男。副辜丸炎由湿热所酿成。

黄柏6克 粉丹皮9克 冬葵子9克 土牛膝12克 泽泻9克
大小蓟各9克 桃仁泥9克 荔枝核12克 生侧柏叶30克，煎汤代水
另：银花12克 生山栀9克 代茶。

二诊：辜丸炎除局部疗法外，清凉解毒，通利二便。

银花12克 大小蓟各9克 丹皮9克 蚤休5克 土牛膝9克
桃仁12克 夏枯草9克 菊花9克 蒲公英9克 粉草薢9克

车前子叶各9克 甘草梢5克 生熟绵纹各6克

元明粉12克,分两次冲入

三诊:睾丸炎虽未消尽,但已不如前之焮红肿大。

土茯苓24克 凤尾草12克 生山栀9克 马鞭草12克
黄柏5克 银花15克 蒲公英9克 小蓟9克 蚤休5克
山慈菇3克,切片

四诊:治睾丸炎不外通利二便,消炎尚是次要。

郁李仁9克,打 小蓟12克 马鞭草9克 丹皮9克
冬葵子9克 桃仁泥12克 苦参片5克 黄柏3克 甘草3克

《章次公医案》

肿瘤

何书田

性情拘执,郁火蒸痰,右乳成块,不如覆杯;脉弦细而数。久恐延为乳岩之候,不易消去也。拟方,候外科名家酌之。

羚羊片 冬桑叶 川贝母 郁金 山栀 夏枯草 石决明
牡丹皮 瓜蒌仁 橘红 蒲公英汁

又方:生香附 冬桑叶 甘菊花 夏枯草 鲜荷叶 鲜首乌
牡丹皮 七味蒸露代茶,每日服二次。

《籍山草堂医案》

浅田惟常

一妇乳岩肿起颇难治。一夜梦友人来告曰,宜当归生姜羊肉汤,余从其言用之。大托脓血,因兼用闾逢丸、梅肉丸等全愈。(羊肉吾邦乏用,今代用牛肉。)

《先哲医话》

王旭高

许。肾岩翻花，在法不治。怡情安养，带疾延年。

鲜首乌 马料豆 银花 生甘草 朝服六味丸三钱，淡盐花汤送

《王旭高临医案》

马文植

某。气虚生痰，阴虚则热，气火夹痰，交并络中，乳岩坚肿，痛如虫咬。此阳化内风，动扰不宁，每遇阴晦之日，胸闷不畅，阴液枯燥，宜养阴清气化痰，缓缓图之。

天冬 羚羊 夜合花 橘叶 郁金 海蜃 菱仁 茯苓 川贝母 泽兰 连翘 荸荠

复诊：乳核掣痛已减，肝火未清，脉尚弦数。仍以前法。

白芍 全瓜蒌 当归 丹皮 夏枯草 连翘 北沙参 大贝 黑栀 泽兰 橘叶 合欢花

泾县，查。下焦积湿积热不清，致成肾岩，僵硬翻花，幸未出血，溺管不硬，尚可挽回。拟方速治乃佳，万勿轻视也。

川黄柏 盐水炒，一钱五分 泽泻二钱 小生地三钱 生甘草八分
龟板八钱 赤芍一钱五分 丹皮三钱 知母一钱五分 草薢二钱
风化硝四分

《外科集腋》

沈祖复

东河头巷曹君年已花甲，气体丰腴。据云小便龟头翻花，小溲艰难。或云肾岩，或云徽疮，数年不效。后至医院将玉茎齐根割去，愈后回家，一、二日左腿横痃大发，蔓延肿胀，且多脂水；肾囊下突生一梗，长约寸许，粗如小指头尖而微红。延先生诊视，曰：“此刀割

之后，湿毒未清，攻入海底之上，一时恐难消散。”重用黄柏、泽泻及赤猪苓、龙胆草、生薏仁、丹皮、淡芩、银花、甘草等。诃料二、三剂后，其梗全消，横痃亦愈。

《医验随笔》

赖松兰

乳岩紫色渐退，滋水甚多，心悸得宁，眩晕脉数，总属气郁伤肝，肝不藏血，营气不从，逆于肉理，乳房属胃，乳头属肝，再以清肝兼顾胃阴。

西洋参 石决明 炒白芍 抱茯神 柏子仁 扁豆衣 怀山药 真毛菇 乌辣草 青桔叶 全瓜蒌

《赖松兰医案》

何长治

左。操劳之体，营液素亏。自去年九月起，寒热后，左耳根遽发胀块，至今实如癭瘤下坠，不痒不痛；手臂常觉发麻，且酸；近更咳痰粘腻，舌干红，胃纳亦少；诊脉左部浮数，右部细弱，重按不克应指；难于熟寐。夫耳根属足厥阴之络，心液亏，肝必失所养，浮热时升，营液皆提及于上，娇脏亦经受烁，故致咳呛痰逆，所谓火日甚，阴精皆为之耗，虽属外症，总系内伤。鄙拟养营和络，扶滋化之源，以战进止。病久未易见功，炎夏更宜加注意焉。管见如何，候裁夺之。

生黄芪钱半 湖丹皮钱半 肥玉竹二钱 白茯神三钱
煨龙齿三钱 生草四分 中生地三钱 当归身钱半 赤茯苓三钱
酸枣仁三钱 海藻四钱 加姜汁炒竹茹钱半

《何鸿舫医案》

丁泽周

徐左。失营症破溃翻花，血水淋漓，内热口干，纳谷减少，阴分亏耗，肝郁挟痰瘀凝结，胃气不和，脉象细弱，已入不治之条，勉拟香贝养营汤加减。

川贝母三钱 生香附钱半 全当归二钱 大白芍二钱
紫丹参二钱 银柴胡一钱 川石斛三钱 粉丹皮钱半 广橘白一钱
生熟谷芽各三钱 藕节一两

马齿苋加平胃丹作饼帖之，一日一换。

《丁甘仁医案续编》

曹惕寅

苏州某姓幼女，背发一瘤，上下左右，流走无定，按之作酸，似寒似热，约五旬余，纳少面皯，余均如常。父母以其病久，拟以本元不足治之。忽来诊，见其腮外贴两膏，肌肉微肿，项背筋络俯仰转动，均不便利。据云，此瘤起于腮肿消灭之后，于此可征前列各症无非外欲求出路之象。爰令揭去两膏，外用牛蒡、防风、苏叶、僵蚕、土贝、桑枝煎汤，用布绞焯两腮及背瘤。内服牛蒡、白芍、赤芍、杏仁、土贝、丝瓜络、制蚕、马勃、莱菔子、泽泻、桑枝，照服三剂，竟得全解，转动如常。时毒风痰为流行病，风邪与内积痰浊痹络为病，泄风化痰为的要之治。风性慄悍，可散而不可抑；痰性粘腻，可化而不可凝。风挟痰而愈暴，痰得风而走窜。故风痰虽形诸外，面其致病之由，实通于内也。误治之，变症叠出，如喉闭、疝气或壮热不已。临证者可不慎乎？

洞庭东山叶姓年七十余，早年乳伏一核，逐渐滋大。商之疡医，先后服六神丸，小金丹等，均不获效。始则坚中带软，继则顶色现红，溃处见血，硬处似石，疮口既深且大，遇盛怒或懊丧则血溢如注。平时只浸润不敛，随其情志而见轻重。乳岩本肝郁症也。总由

营阴素亏，心肝不潜，非寻常外疡理治之法所可奏功。因令常服潞党参、熟地黄、归身、白芍、洋参、天条、川贝、橘络、石斛、茯神、合欢皮、夜交藤、料豆衣、糯稻根须，外用白膏药、八宝生肌散和珍珠粉之。强为图维，历延七载，溃口得收至如银杏大，后以感受时疔而终。

《翠竹山房诊眼录稿》

贺季衡

周男，乳岩发于左，坚硬如石，日以益大，间或作痛，乳头流脂，皮外无色，脉弦细，舌白。肝家气火与宿痰相薄于胃络，气脉不能所致。最防破溃翻花。

生石决一两，先煎 全瓜蒌六钱 大白芍二钱 大贝母四钱
川郁金二钱 白蒺藜四钱 细青皮一钱 生牡蛎八钱，先煎 当归二钱
黑山栀二钱 蒲公英五钱 夏枯草二钱

二诊：清肝家之气火，化络中之痰浊，合为丸剂，以消乳岩之坚硬，防其破溃翻花。

大生地五两 淡海藻二两 煅牡蛎五两 黑山栀二两 当归二两
大贝母三两 全瓜蒌五两 细青皮一两五钱 赤白芍各一两
白蒺藜三两 淡昆布二两 川郁金二两 蒲公英四两
金橘皮一两五钱 云苓三两

上为末，夏枯草四两、旋复花一两五钱包，煎汤加蜜水法丸。

另：龙泉粉二两，晒干 荆三棱五钱 蓬莪术五钱 大贝母五钱

上研末，每次加麝香一分和匀，醋敷，或加蜜少许，涂于白洋布上贴之。

另：赤石脂一钱 川黄柏五分 熟石膏一钱 广黄尖二分
轻粉三分 梅片一分 飞滑石一钱 寒水石一钱，煨

上味研极细末，后入梅片和匀，涂乳头，外以鸡蛋皮帖之。

《贺季衡医案》

翟竹亭

邑东南程寨王姓妇，六十余岁。头后风府穴上，生一疙瘩，大似瓜蒌，十一年不痛不痒，捏之甚软，未请余三月前，忽然大疼不止，疼过即痒，余详看再三，告伊曰：“此证内中绝非脓血，古有发瘤之证，是否或未可知。”余先针患处。约寸许，虚若无物，方用剪开一口，有五、六分，露出短发蓬蓬，用针挑出一团，大如桃许，其别无它物。外上玉红膏，内服十全大补汤五、六帖，半月完全收功。此证四十年来仅遇其一也。

余友杜海亭令正，因郁怒思虑，左乳中结一核。初得大似核桃，二月后大如碗许，渐疼甚，坚硬无比。请余调治，余曰：“此疮名为乳岩，患此证者实属难治，倘是他人，定然辞去，交属至厚，尽我之技，以投知己。”此疮近无生脓之理，仍当令其消散为要。先用火针刺之，十日一次，将乳针透，内服开郁活血、攻坚破锐之药，每天一服，无令间断，至少三十帖，或可消散，纵不能消完，亦可转重为轻。三月初间治起，至四月半共针五次，服药三十余帖，竟消于无有矣。方开于后。

当归 15 克 川芎 12 克 白芍 12 克 瓜蒌皮 10 克 穿山甲 6 克
皂刺 10 克 白芥子 6 克 红花 6 克 丹皮 10 克 乳香 10 克
香附 12 克 青皮 10 克 半夏 10 克 小柴胡 15 克 郁金 6 克
防风 10 克 白芷 10 克 花粉 6 克 甘草 6 克 水煎服。

邑东岗李姓小童，八九岁。头上生一肉瘤，大似核桃，根如指粗，不痛不痒，有时误触动则流血不止。余再三详看，患处无赤脉，必非血瘤。遂用药线将本根扎紧，每日紧线一次，七、八天后，患根尽成腐黑烂肉，如瓜熟蒂落。后上玉红膏，收口痊愈。

《湖岳村叟医案》

刘民叔

夫子既于一九四六年治愈今静安寺长老持松胃病以后，一时佛教界前来求治者甚众。近有上海市嵩山区淡水路圣仙禅寺惠宗长老者，久病胃癌至一九五一年六月三日突然溃裂，上呕血，下泄血。至六月八日出医院，昏迷沉睡，不省人事。由持松老法师暨胡厚甫、陈子和、刘瞻明、李玉良四居士电请夫子往救，夫子即偕唐书麟往焉。诊察甫毕，而医院所派输血五人亦随至。夫子曰：“病革，输血无益，而仅有害焉。不可。”持师曰：“何谓也？”夫子曰：“大凡血去多而内病者，可以输血，如伤折金创产妇之属，此以元气未夺者宜也。而元气已夺内病又甚者，不可以输血。何者，外血输入体内，必赖身中元气为运行。今脉微欲绝，元气将脱；兼之身面浮肿，水气内甚。若再输入外血，则此若断若续之元气为之运行能载而与之俱运否？且今不事全体治疗，徒见失血而输血。病既未除，益其血必复失之。往复为之，血不能益，仅损其气，势必不至耗尽元气不止。是何异资寇资敌者乎？今此垂亡之元气，必当保留以行药力，不则殆矣。宜速与云南白药先行救急，度服药三日，来苏可庆也。”乃遣去输血者。后果如夫子言。钱士良医师之太夫人为惠宗法师之皈依弟子，侍于侧，言及输血事。惠师戚然曰：“每输一次血，其痛苦有非言语所能形容者。”

附持师等四人笈示经过：“（上略）惠宗大师初病人院之经过，就鄙人等亲知亲见，一缕述之。溯自六月三日惠师以周甲之龄，急患呕血。当时来势甚猛，虑有不测。急召救护车送入虹桥疗养院，住一〇一室。经内科西医诊断为胃癌出血，极端危险。住院凡六日。除注射止血剂外，前后共输血五次，但随输随吐，终不能止。延至第六日势益危殆。西医云：开刀则心脏太弱，恐不能堪；不开刀亦无法挽救，数小时内即有生命危险。同人相顾愕然，不得已，与回寺中。鉴以西医既已束手，不若改延中医。乃决议求治于我公。亦最后作

万一之想耳。(下略)”

初诊：一九五一年六月八日。心腹内崩，血溢于上，并注于下。昏昏沉沉，不能与人言。面浮足肿，唇淡舌浊。脉微欲绝。肢缓不收。方用：黄附块一两 干姜五钱 甘草二钱 灶心土三钱 干地黄五钱 阿胶二钱 白及三钱 花蕊石一两 另用：云南白药急救，每三十分服一分。

二诊：九日。血渐止。方用：黄附块一两 干姜五钱 甘草二钱 灶心土三钱 干地黄五钱 阿胶四钱 党参五钱 花蕊石一两 另用：云南白药每三十分服五厘

三诊：十日 血全止。方用：黄附块二两 干姜五钱 甘草二钱 灶心土三钱 干地黄五钱 阿胶四钱 潞党参五钱 花蕊石二两 另用：云南白药每三十分服五厘

四诊：十一日。言而微，移时乃复言。能啜薄粥少许。方用：黄附块一两 干地黄五钱 灶心土五钱 干姜五钱 甘草二钱 阿胶四钱 潞党参五钱 茯苓五钱 阳起石五钱 另用：云南白药每四十分钟服五厘

五诊：十二日。舌上浊苔渐化。方用：黄附块一两 干姜五钱 甘草二钱 干地黄五钱 阿胶四钱 潞党参五钱 阳起石五钱 茅山苍术二钱 肉桂一钱 另用：云南白药每五十分服五厘

六诊：十三日。大便仍黑。能啜厚粥。声渐壮，能续言。方用：黄附块一两 干姜五钱 甘草二钱 干地黄五钱 阿胶四钱 潞党参五钱 阳起石五钱 茅山苍术二钱 肉桂一钱 防己一钱 茯苓皮一两 另用：云南白药每六十分钟服五厘

七诊：十四日。面浮渐消，足肿亦减。舌上浊苔化去一半。方用：黄附块一两 干姜五钱 甘草二钱 干地黄五钱 阿胶四钱 潞党参五钱 黄芪五钱 茅山苍术二钱 肉桂一钱 防己二钱 茯苓皮一两 另用：云南白药每六十分钟服五厘

八诊：十六日：胸脘安和。舌上无浊苔。面浮足肿都消。大便

色黄，仅觉秘结不滑。方用：黄附块一两 干姜五钱 甘草二钱 干地黄五钱 阿胶四钱 潞党参五钱 黄芪五钱 茅山苍术二钱 肉桂一钱 另用：云南白药每九十分钟服五厘

九诊：十八日。移居树荫楼间。足可屈伸，尚难行步。宜吸粥，勿吃饭。方用：黄附块一两 干姜五钱 甘草二钱 干地黄四钱 潞党参五钱 茯苓五钱 橘皮三钱 生白术五钱 肉桂一钱 鸡内金三钱 另用：云南白药每九十分钟服五厘

十诊：二十日。随时饥饿，欲倍饮食。方用：黄附块一两 干姜三钱 甘草二钱 潞党参五钱 茯苓五钱 橘皮三钱 半夏三钱 生白术五钱 肉桂一钱 另用：云南白药每一百二十分钟服五厘

十一诊：二十三日。宜闭窗，勿贪凉当风。节饮食。方用：黄附块一两 干姜三钱 甘草二钱 茯苓五钱 橘皮三钱 半夏三钱 孔公孽五钱 肉桂一钱 厚朴一钱 另用：云南白药每一百二十分钟服五厘

十二诊：二十六日。舌上水津四溢，不能自摄。胸满肠鸣自汗。方用：黄附块一两 干姜三钱 甘草二钱 茯苓五钱 半夏四钱 泽泻四钱 砂仁五钱 蔻仁五钱 孔公孽五钱 肉桂一钱 另用：云南白药每一百二十分钟服五厘

十三诊：二十八日。水湿渐化，舌津不溢。方用：黄附块一两 干姜三钱 甘草二钱 茯苓五钱 泽泻四钱 砂仁五钱 蔻仁五钱 孔公孽五钱 肉桂一钱 另用：云南白药每一百二十分钟服五厘

十四诊：三十日。胸不满，肠和。汗止。

方用：黄附块一两 干姜三钱 甘草二钱 茯苓五钱 桂枝三钱 砂仁五钱 蔻仁五钱 生白术五钱 孔公孽五钱 另用：云南白药每一百二十分钟服五厘

十五诊：七月二日。面目微浮。方用：黄附块一两 生姜皮五钱 茯苓皮五钱 五加皮五钱 橘皮三钱 桂枝三钱 甘草二钱 杏仁三钱 孔公孽五钱 砂仁三钱 蔻仁三钱

十六诊：五日。出寝门，扶杖走于廊下，健步可期。方用：
黄附块一两 茯苓五钱 桂枝三钱 生白术五钱 孔公孽五钱
砂仁三钱 薏仁三钱 甘草二钱

十七诊：八日。方用：黄附块一两 茯苓五钱 桂枝三钱
生白术五钱 孔公孽五钱 砂仁三钱 薏仁三钱 藿香三钱
薏苡仁五钱 甘草二钱

十八诊：十一日。方用：黄附块一两 茯苓五钱 桂枝三钱
生白术五钱 砂仁三钱 薏仁三钱 薏苡仁五钱 藿香三钱
芡实五钱 甘草二钱

十九诊：十四日。方用：黄附块一两 茯苓五钱 桂枝三钱
生白术五钱 砂仁三钱 薏仁三钱 薏苡仁五钱 芡实五钱
莲子肉五钱 甘草二钱

二十诊：十日。调理于今，安全康复。方用：黄附块一两
茯苓五钱 桂枝三钱 生白术五钱 砂仁三钱 薏仁三钱 黄芪五钱
潞党参五钱 甘草二钱 葡萄干五钱 大红枣十枚

《普楼医案》

杨达夫

徐某某，男，51岁。患者1959年初发现阴茎包皮内有乳头状肿瘤，肿物活体组织检查为“鳞状上皮癌Ⅰ级，尚无明确浸润”。至同年二月，冠状沟上面，下面及右侧皆有肿瘤长出。呈乳头状。西医建议半切除，患者不同意。当时龟头流臭水，疼痛不堪触及，经用土茯苓、金银花、紫草根、龙胆草、夏枯草、贯众煎水送服犀黄丸，每日3克，嗣后又服连翘败毒丸，并以苦参汤冲洗，外搽消癌散，数月后溃烂处日渐愈合，不流臭水。至同年底身体日渐强壮。至1961年秋季每月复诊，不断服前药，溃烂基本愈合。1967年7月随访，病人健在。

宋某某，男，35岁。患者自1954年开始经常上腹不适，1956年

发生泄泻、腹痛。1958年10月咽干，声音嘶哑。同年11月间发现颈部淋巴结逐渐胀大，全消化道检查未见异常。1958年10月21日和同年11月17日二次颈淋巴结活体组织检查，诊断为“转移癌”。1959年1月10日，胸部X光检查，“符合两肺转移癌”。最后确诊为“肺癌、淋巴结转移”。自1958年10月始，经辨证论治以海藻散坚丸、黄芪建中汤、地榆槐角丸、参苓白术散、四神丸、化核丸、海螵蛸雄黄粉出入加减为方治疗半年，病情逐渐好转，声音嘶哑消失，左侧颈部淋巴结肿块消减，食欲增进，精神体力亦佳，惟大便仍有时稀，伴腹痛，每日大便2~3次。于1959年5月恢复半日工作，1960年做轻工作，后间断治疗至1962年，1967年7月随访，病人仍健在，正常工作。

《津门医粹》

冉雪峰

武昌某氏，有女年十一、二，姿质秀丽，但嘴唇偏左上端，有指大一长块，硬化凸起，其色青紫，嘴为之尖，殊不雅观，病虽不重，已历五、六年，以为奇恒痼疾，中西方药不效，乃来我处求治。问之不痛不痒，但微感麻痹，欠灵活，说话吃饭均感不便，予想到徐澍溪医案，有恶风一条，与此类似，特彼在面间，此在唇上。徐法系用破气破血，软坚变质，以毒攻毒，诸暴悍药如蜈蚣、全蝎之类，内搽外敷，因仿其意，用：当归三钱，炒甲珠三个，蜈蚣一条，全蝎一个，红花三钱，薄荷一钱五分，三七、甘松、雄黄、硝石各一钱，为细末，酒调敷患处，日换药二次，若痛或肿起，即停敷来诊；内服药用：当归、白芍各三钱，秦艽二钱五分，薄荷八分，没药三钱，琥珀、甘松各一钱，同煎，日服一剂。第一日平平，无若何反应；二日患处微感痒痛，不时掣动；三日唇部肿起，查阅患处情况，风毒瘀滞，似已推动，但恐胶结未全活动，必留残余，又未便再敷日前重剂，因改用散瘀软膏，再敷二日，诊察颜色较好，开始收效。再改用消肿药膏外敷，内服银翘

散加活血通络之品，一星期肿消，硬处已消大半，停药，一月后肿硬消尽，惟留残余黑影，三月后恢复如常人。

《冉雪峰医案》

施今墨

丁某某，女，19岁。去年九月间左颈部生一瘤，发展甚速。虽经治疗亦未能控制，近日已破溃出少量血。经山东医学院病理科检查诊断为：颈淋巴腺瘤。饮食二便尚属正常，经期不规则。舌苔薄白，脉象沉涩。

辨证立法：肿瘤已见破溃，并无化脓现象，仍从消肿化坚法治之。

处 方：皂角刺 6克，去尖 生鹿角 20克 山慈菇 10克
炮甲珠 10克 海藻 10克 昆布 10克 夏枯草 15克 川郁金 10克
大力子 6克 青连翘 10克 忍冬花 10克 苦桔梗 5克 小蓟 10克
忍冬藤 10克 三七末 3克，分二次冲服

二诊：前方服六剂，肿瘤见轻，拟回山东，希予常服方。

处方：前方去生鹿角、青连翘。加：川贝母 10克，桃仁 6克，炒丹皮 10克，浙贝母 10克，杏仁 6克，炒丹参 10克，酒元参 12克。

三诊：两个月前，带回常服方，在山东除服药外兼用理疗，肿瘤已消减十分之八，情况良好，嘱照二诊方再服，至肿瘤全消为度。

《施今墨临床经验集》

疝

程从周

吴子余年近三旬，形色苍实。秋后，患疝气，疼之不已。诸医皆以茴香、茱萸辛热散寒之品，服之而痛益甚，小便淋漓。予脉之，知其湿热太盛，郁久而成。乃剂以苦寒渗湿之品。用姜汁、炒山栀、盐

酒炒黄柏为君，当归、川芎、山楂为臣，茯苓、泽泻、车前为佐，青皮、陈皮、生甘草稍为引，一剂而痛除，两剂小便利，数剂而痊愈。或曰：“夫疝症皆因受寒而起，药方俱系温暖。且七疝之中，未闻有热疝，乃今用寒凉而愈者，何也？”予曰：“医无定体，药不执方。子余饮酒御内，下焦湿热太盛，久郁而然。故茴香辛热之药不能中病，予故变例而用寒凉，效如桴鼓。若以七疝为拘，寒凉是禁，真乃执中无权之辈也，而医云乎哉！”

郑长富年近四旬，面色苍黄，旧有癰疝。今年二月，经商同关纳钞，忍饥一日，复受春寒之气，因而右肾子坠下胀疼，不能立，立则痛愈甚。易数医不愈，诣予求治。予思此必过饥伤脾，脾虚则中气下陷，是以不能立，立则痛甚者，皆中气下陷之所为也。经云：高者抑之，下者举之，其治此病之法欤？乃朝与橘核丸酒下，日与补中益气汤倍升麻，加減数剂胀痛随愈。

《程茂先医案》

郑重光

崔魏子病疝一月，清肝理气，消坚攻劫，无不备尝，最后招予。诊其脉，细濡如棉，惟有三至，羸瘦不堪，色枯貌瘁，卧床不起，疝坠于囊，全不知痛，时值秋暑，畏寒服绵。予曰：“虚寒极矣。元气下陷，须温而举之。”用人参、黄芪、肉桂、附子、当归、升麻、甘草、姜、枣为引，温肾升阳五、七日，疝方渐收起坐，温补而愈。越三年，又疝痛牵引胸背，胃中亦隐隐作痛，历医多人。有疏肝者，有理气者，有用安息诸香者，渐至阳虚自汗，惊悸不眠，较前病更甚，病两月矣。自惭不便请浼人求治。诊其脉细涩不堪，乃气血两亏，津枯髓减，肝肾病也。《经》曰：诸阳受气于胸中，转行于背，此气虚胸背痛也。又《经》曰：肝虚则令人胸痛引背，下则两胁胀满。此血虚之胸背痛也。肝虚不藏魂，故不寐；气虚不能冲，故自汗，脉又细涩，此伤精亡血之证。以熟地黄、当归、枸杞、山茱萸、枣仁补肾滋肝，以肉桂、破

故纸引气归肾，加人参、黄芪以益卫气，初服病知渐减，多服寻愈，两月方瘳。前医执痛无补法，岂定论乎？

《素园医案》

王三尊

缪姓体素健，六脉纯阳，膏粱喜饮，素多痰火，年五十，得寒症证，今已十余载矣。偶触微邪自发，有一年数发者，有一月数发者。发则寒热往来，脉愈大而痰愈甚，渴饮，症肿痛，或牵引腰痛。予每以小柴胡汤加青皮、槟榔、花粉一帖，汗出渴止而愈。今岁复发，适于他往，医等惟清痰火，不兼解表降气。以年老再娶，腰痛以为肾虚，加以补肾之药。数帖后经络愈滞，腰痛不能伸展。予还视之，仍治以平日所用之药，但因日久外邪已散，少用柴胡，只取人肝，不取解表；加威灵仙一钱，豁痰散结，腰痛遂减大半，余证俱减。然此药不敢再服，只得以平和药调之，两月始愈。愈后语予以理。予曰：“夫易於外感者表虚，腰痛属肾虚，年老属虚，晚年再娶属虚，久病属虚，时发属虚，膏粱善饮多虚，七者谁不知之。至於似虚而实实，则又不易明矣。盖人之元气，充塞乎一身，周流无间。若有一处之结，则必有一处之不充矣。小肠膀胱太阳经，主一身之表，故外感先从此经见证。既有症结膀胱之内，则气自不充乎膀胱之外，故最易外感也。此虽表虚，内结而致，非真虚证也。邪既感乎膀胱之外，则膀胱之内疝气愈结而痛。内外勾结不散，且久积之疝，寒变为火。兼以表热，则中宫痰火相引愈炽，故膀胱愈大，痰愈多而渴饮。若不用小柴胡汤以解表，花粉以化痰热，青皮、槟榔降气下痰而兼下破疝结，何能得愈乎？邪感太阳而用柴胡人肝者何？书云：疝乃受病於肝，而见病於肾。此肾字，当作小肠膀胱经言。故取柴胡人肝透胆而治其本，则膀胱之邪，不攻自解矣。其腰痛乃膀胱经本证，为风寒把持而然。痰袭於腰，亦致腰痛。足下腰疼，须知二证皆有，岂可补乎？古方治腰痛，以威灵仙煨猪腰食之。今屡妄补其肾，予又何复

辅以猪肾哉。日久之病而一帖顿愈大半者以此，足下其知之乎？”

《医叔补编》

周南

服部武右卫门，六十一岁。素有疝气，胃有积滞，饮食或臌滞、或作胀，大便酸臭，时时作泄。恙已有年，此食郁症也，而非脾胃虚也。若用止泄药而郁益甚矣。脉弦滑，宜用越鞠方，倍神曲以治食郁，加木香、川楝以治疝气。服三剂当效。彼初服一剂，去大便甚多，即骇而不再服。越数日，腹中觉和，犹疑是泻药而不敢服，复来询其故。明谕前所多去者，乃积垢也，终剂当愈。服之，果然腹中大快，疝亦平。复十剂而饮食增，不复作泄矣。

萨州仕官桦山休太夫，二十七岁。形长瘦弱，面色青黄憔悴，腹有中块，有疝，痛引小腹、阴囊，夜不可卧，卧则欲呕，时吐酸水。原其致此之由，因鼻生息肉，误多服寒剂，且食冷物，病成日甚也。但寒症与数脉不合，当论其数则为虚，非为热也。自十三岁病至于今，痰饮壅塞脾肺之道而不可卧，此症不解，不可为矣，宜急治之。方以桔梗开肺气，苍术升脾气，香附解诸郁，白芥子为右胁之引经，茯苓以伐肾邪，茴香以温肾气，乌药以理下焦之气，甘草和中。三剂而脉缓，乃加木香、附子，六剂而安卧，块与疝皆宽。改用香砂六君子汤去人参，块虽减而仍有痛。加人参一钱，鳖甲煨末一钱，二剂大便秘去黑粪而块痛止，连服六剂而取去其秽物或青或绿或黑不一。宿积既去，而块之形迹潜消，而色亦稍转也。

《其慎集》

任贤斗

吉黄伟，病疝，脐下左旁痛甚，乍痛乍止，痛时如刀刺，喜按不作胀，腿膝无力，脉濡五至，饮食精神如常。不作胀，无湿邪也；脉濡者，阳虚也；喜按者，亦虚也；肝主筋，肝虚则筋弱，故腿膝无力也；

乍痛乍止者，正气虚不能主持，致虚气往来也；痛如刀刺者，寒甚也，寒甚亦阳虚之所致，即气不足便是寒也。此属肝经本病，与他脏无涉，治宜补肝化气，并助筋骨之阳，与暖肝煎加杜仲、故纸、附片，十余剂疝痛全愈，腿膝亦健。

王宗书，小腹痛胀，彼自投小茴、川楝、橘核不效，即用八正散攻之。余适至，察其色淡神疲，脉细三至，轻按痛甚，重按不痛。余曰：色淡神疲脉迟者，皆阳虚也，脉细者，中湿也，寒湿贼阳之疝，岂宜大黄，如雪上加霜乎，即用火唧筒连打两筒，其痛如失。此证寒湿不盛，故火唧筒取效，不药而愈。第痛止后精神倦怠，小腹似胀非胀，此因本人精气衰弱，复遭耗气之药，故神疲脉迟，小腹不快，速宜峻补下焦，以保其后，与熟地、附片、吴萸、肉桂，数剂而痊。

《瞻山医案》

北山友松

五旬男，平素用心太过，仕官朝夕无暇。常犯疝症，小腹冰冷，及腰脊。或觉腹内如转索，或肝腹如絮柔，痰支心下，脚腿酸弱。脉沉细无力，或细动似弦。

十全大补汤 去肉桂 白术 加附子 羌活 防风 制半夏
干姜 陈皮 杜仲 牛膝

高田氏，患气郁。腹围作聚，少食，白浊。脉左右俱涩，五动一止，或三动一止。医为恶候，予曰：“是。然医书言疝之变症，恶候百出。”

初用方：行气香苏散 加青皮 山楂子 木香 或去三味加
茴香 青木香 三棱 莪术 木通

次用方：三和散

觉脐上下气动，脉三十动一止，二十五动一止。

终用方：人参 干姜 肉桂各一钱 甘草 黄柏 知母各五分

《北山医案》

永富风

有一壮夫病梅毒七年，两脚拘挛不起，易医三十余人，不愈，漫尔废汤药。余偶至其地，亲故来请就诊，气韵食欲如常，其脉迟缓，腹无它病，唯其脐下有一癖筑筑。余曰：“是疝也。攻毒频年，为药所劫，沉结而不解。”与附子梗米汤三十日，徐徐脚伸，时余将去，书方与之曰：“服之无怠。”尔后一年，便船言，经二百日而复旧。

《漫游杂记》

陈念祖

疝证自《素问》而下，诸家多以为寒。然是病之起亦有始时湿热在经，迨郁遏日久，又复感触外寒致湿热内郁而作痛，是岂得专属为寒？况宿疝有年，脉象沉紧兼大，每遇劳动即发，病系挟虚可知。久病必虚，兹拟温补主之，并佐疏导，斯为虚实兼施之法。

人参一钱五分 炒白术三钱 吴茱萸二钱 枳壳一钱
桃仁一钱，去皮尖 山楂肉二钱，炒 黑山栀二钱 荔枝核二钱，煨

厥阴肝脉络于阴器，上人少腹，故七疝之病其症难见于肾，其实则本乎肝。今阴囊睾丸肿硬如石，不知痛痒，是名癰疝。七疝中此即其一，拟用济生橘核法。

橘核三钱 川楝子三钱 厚朴一钱 木通一钱 枳实一钱，炒
木香一钱 海藻三钱 昆布三钱 海带二钱 桃仁一钱五分
延胡索一钱 桂心八分

经云：任脉为病，男子内结七疝。又曰：足厥阴肝病，丈夫癰疝。今睾丸控痛，囊冷结硬如石，脉沉而紧，是即七疝中所谓寒疝是也。拟主以二陈，并用温通佐之。

制半夏二钱 白茯苓二钱 陈皮一钱，去白 甘草五分
炒白术二钱 猪苓二钱 泽泻一钱 小茴香一钱五分 木通一钱五分
金铃子一钱 桂枝八分 干姜八分 泡附子五分

水同煎服

《南雅堂医案》

李炳

李艾堂病疝，医温之，不应。翁诊曰：阴疝也。用半夏汤通之愈。

《李翁医记》

许璣

杭垣后市街施医局金少爷，号有常，患狐疝偏坠，立刻举丸下坠，卧则上入少腹，阴囊赤肿而痛，延余诊之，脉左弦大，右虚濡。余曰：“阳明湿热郁蒸，厥阴风木内旋，故有此症。盖阳明、厥阴皆主宗筋，其脉皆循阴器，抵少腹。治当先用化湿疏气，乃从陈修园先生法，以二陈汤加木香、川楝、橘核、车前子、小茴香等，服三剂而稍安，复灸冲任而愈。

宁城应家胡同何世全，与施采成为邻。采成，余契友也，辛巳冬余遣友就同前酒楼小饮，而施亦在座。其子登楼云：“何某刻患急病，即请诊视。”余皆入其室，但闻其声长吁，问其致病之由，自言午尚无恙，至未刻少腹稍有胀急，申即暴发，阴囊肿大，如升如斗，坚硬如石，痛苦欲绝。上吐下泻，脉细而弦。阴茎入腹，囊底一孔如脐。为立理中汤，加生附子三钱，至二更服下。余就宿于施友家，盖恐病情有变，杂药乱投，反致危殆。谓其子曰：“若尔父病稍有变动，即来告我。”至三更后，其子来告曰：“父病已好大半。”余大喜，持灯速往。病者曰：我因久坐尻酸，移动觉如气泄，胀痛顿失。”视之，阴囊已小大半，而皮起皱纹，阴茎伸出其半。次日肿硬全消，平复如故，但觉精神困乏，后因境迫，不服药而愈。渠竟称为华佗再生云。

《清代名医医话精华》

张千里

平望李，证情错杂，历久迭发不已，多属寒疝宿饮二者为病。据述自幼有症，疝攻于下必致饮聚于中，盖疝为厥阴之气频扰于胃，则水谷皆易酿为痰浊，二者迭为宾主，冲逆于上则眩晕耳鸣，咳呕，络脉阻痹等症皆至矣，脉弦滑搏指，且曾失血，刚药难投，则取效不免难速。

蛤壳 海石粉 陈皮 竹茹 枳实 白蒺藜 茯苓 荸荠
白芍 左牡蛎 米仁 海蛇

湖州妇，肝阳郁勃，动必犯胃，久则胃气大伤，全失中和之用，以致肝之郁勃者，聚而为疝，胃之停蓄者，聚而为饮，疝动于下则饮溢于中，所以居常胃气不振，时有厥气攻逆，自下而上，懊恼痞满，必呕吐酸绿之浊饮，而后中通，便溺渐行，此所谓寒疝宿饮互为其病也。病经数年，宜缓以图之，若得怡神舒郁，或可渐愈也。

茯苓三钱 生冬术一钱五分 吴萸三分 干姜三分 桂枝三分
小川连三分 枳实五分 生姜三分 白芍一钱五分 炙甘草四分
法半夏一钱 竹茹一钱

姚光祖按：此乃苓桂术甘及温胆汤，戊己丸合成，正如淮阴将兵，多多益善。

又 寒疝宿饮盘踞于中，久而不和阳明，大失中和之用，今阳渐通降，屡次所下黑黄干坚之矢，既多且畅，则肠腑之蓄积者得以渐去，肠通然后胃和，此真数年来病之大转机也。盖饮疝互扰，皆在阳明，下流壅塞，则上流何能受盛传导，盆满必上溢，此理之易明者也。今宜专与养胃以充，复其受盛传导之职，机不可失，正在此时。至于痔瘕溺少，皆属阳明为病，可一贯也。

党参三钱 宋半夏一钱 黑芝麻三钱 麦冬一钱五分
陈皮一钱五分 火麻仁二钱 刀豆子三钱 杏仁二钱 茯苓三钱
白蒺藜二钱 梗米一合 棉饼半枚

又病纏三、四年，至今秋才得腸腑通潤，燥結漸來，繼以瀦潤，然後胃脈不至上逆，嘔吐止而飲食進，可見陽明之病，以通為補也。今秋深燥令，痔必稍愈，仍宜柔陽明，以期漸漸充復。

潞黨參三錢 陳皮一錢五分 驢皮膠二錢 棗仁二錢
法半夏一錢 茯苓二錢 生甘草四分 柿餅半枚 金石斛三錢
麥冬一錢五分 秫米二錢 荷葉一角

嘉興曹，腹痛無定時，亦無定所，攻鳴有聲而無形，得暖與矢氣則稍舒，經久不已，脈沉而澀，此屬厥陰氣郁，而為沖疝也，宜柔養其體，疏調其用，久久自可漸愈。

大熟地三錢 歸身二錢 小茴香一錢 火麻仁二錢 紫石英三錢
白芍一錢五分 金鈴子兩枚 炙甘草四分 胡蘆巴一錢 橘核二錢
青皮八分

又沖氣自左上逆，像擾于脘腹胸脇，或嘔或痛，作止不常，已經年許，脈左弦，舌黃，時有寒熱者，即厥陰之為病，病苦寒熱也。此屬肝陽郁結，聚為沖疝，宜滋養肝陰，以調其氣。

歸須一錢五分 小茴香一錢五分 茯苓三錢 吳茱萸三分
韭白兩枚 白芍一錢五分 元胡索一錢五分 青皮八分 荔枝核兩枚
陳皮一錢五分 川楝子兩枚 橘核二錢 海藻二錢

《千里匯案》

吳簾

相國戴可亭，述廿余年來，臨卧必服人乳一茶碗，如出差則服參乳丸。所以體質尚健而少疾病，皆人乳潤補之效。自文端侄亡后，心結作惡，精力日衰，供職已覺難支。近忽小腹陰囊時有疼痛，遇勞受寒其疼更甚。余曰：脈虛遲細，左關獨弦而急，由于年高命火陽衰，氣血虛寒，木郁邪甚，致成寒疝。凡疝病不離乎肝，又不越乎寒。以肝脈絡于陰器也。當進暖肝煎加吳萸、干姜以祛肝腎陰寒，使氣疏郁解，其痛自止。遂服之，甚效。后用右歸丸加人參、小茴香、肉

苡蓉、吴茱萸而安。

定侍卫述：自幼随任长沙，得疝气已十余年，嗣则阴囊肿坠，渐大如斗。虽不痒不痛，而当差骑射不便。余曰：肝脉弦急，大抵此证，始得之地气卑湿、先受寒湿，并犯生冷，以致邪聚阴分。及其病郁既久，则积而成热，火因邪聚，湿热相资，渐至顽肿不仁，而成癰疝。即用三层茴香丸以利湿理气，可期不至再大，然非戒酒色厚味不能速效。

第一料

大茴香拌盐五钱，炒和盐研 川楝子去核，炒 沙参 木香各一两

右为细末水煎，米糊为丸，桐子大，每服三钱，空心淡盐汤下，日三服，才完便接第二料

照前方，加革拨一两，槟榔五钱

共前药六味，重五两，为末，糊丸、服法如前。未愈服第三料

照前方加白茯苓四两 制附子一两

共前八味，重十两，糊丸、服法同前，但每服三钱，虽三十年之久，大如栲栳者皆可根除。

胡，肾子肿痛，小腹胀满，大便秘结，小水黄赤不利，烦热作渴，按脉数滑大，乃湿热火邪聚于阴分，而为热疝也。即服加味通心饮自愈。

木通 栀子仁 黄芩 瞿麦 连翘 川楝子 枳壳
甘草等分

长流水二钟，灯心甘根，车前草五茎，煎八分温服。

《临证医案笔记》

何书田

厥阴气下坠，辜丸胀大而痛，小便不利。治宜温通。

川桂木 制香附 煨木香 沉香汁 川楝子 川郁金 新会皮 荔枝核

下元虚寒，疝气时作。暂用温宣之法。

川桂木 炮姜炭 炒白芍 新会皮 炒橘核 川楝子 制香
附 炒归须 小茴香

复诊：

诸疝属寒，偏于左，则治在肝肾。急宜保养为要。

炒白芍 菟丝子 枸杞子 炙甘草 小茴香 炮姜炭 补骨
脂 焦白术 制香附 荔枝核

下元气亏挟寒，而结疝不消，兼患齿齲；脉形虚弦。当用温补之
剂。然须保重是嘱。

制附子 炙龟板 山萸肉 菟丝子 山药 茯苓 鹿角霜
炒熟地 五味子 枸杞子 小茴炒

下元寒湿，气滞积久而结为狐疝，形如茄子，不易消去也。惟有
温补一法而已。

制附子 炒白芍 补骨脂 制白术 小茴香 赤肉桂 菟丝
子 枸杞子 炒怀膝 荔枝核

肝肾本气不充，少腹结痞作胀，连及睾丸，兼有偏左头汗之患。
真阴大亏矣。

制附子 大熟地 补骨脂 五味子 炙甘草 肉桂心 山萸
肉 枸杞子 白术炭 荔枝核 小茴香炒

《屏山草堂医案》

王孟英

金元章，年逾七旬，久患疝厥。每病于冬，以为寒也。服热药而
暂愈，终不能霍然。孟英诊曰：脾胃虽寒，肝阳内盛，徒服刚烈，焉能
中肯？以（人）参、（白）术、枸杞、茯苓、当归、茴香、菟丝、鹿角霜、桂
枝、茯苓、揀实、黄连、吴萸、橘核等药为方，服之。今数年无恙矣。

《王氏医案》

林佩琴

王。腹左偏坠，举丸肿痛，寢息略定，乃举重劳力所致。盖肝脉络阴器，络虚努挣，气穿入囊，延久则成筋疝。古人治疝，必用辛香流动之品，以肝得疏泄，其痛乃缓，服药兼宜节劳。香附盐制、升麻、小茴香、橘核、延胡酒焙、丝瓜筋、薏米，长流水煎二服愈。

吕。因劳偏坠，脉软弱，少年宿疝，补以升之。路参三钱、鹿角霜、炙黄芪、当归、杜仲、熟地、杞子焙。各二钱、升麻六分、橘核酒炒、续断各钱半、姜、枣煎。十服效。

李。疝病不离乎肝。然经谓任脉为病，男子内结七疝，女子带下瘕聚，皆奇经主之。宿病不理，奇脉病结不解，今触寒辄发，动气有声，痛引举丸。宜导滞通络，仿茴香丸。小茴、橘核、葫芦巴、延胡俱酒炒、当归、鹿角胶，和丸，酒下效。

赵。疝发自下，冲上猝痛，下引举丸，此七疝中冲疝也。经言督脉生病，从少腹上冲心，而痛不得前后为冲疝。用山梔、川楝子去核酒炒、荔枝核、橘核、延胡俱酒焙、当归、赤苓、降香。夫暴疝多寒，久疝多热，导热疏滞，肿痛自己。

王。由吞酸传为少腹偏坠，囊肿丸痛。夫酸为肝郁，气注下为疝，皆湿热之邪。经云：邪客于足厥阴之络，令人卒疝暴痛，以肝脉络阴器也。子和治疝，用金铃子散，泄肝导逆，与此颇符。用吴茱萸、川楝子、橘核、茯苓、青皮、延胡、青葱管、木通，数服而安。

《类证治裁》

曹存心

脾宜升主健，胃宜降主和。此病气升而呕，胃不降也；疝气下坠，脾不升也。而所以升降不调者，由脾虚下陷，湿痰中结，而冲逆于胃脘也。理其中阳，则上下自调。

六君子汤加干姜 青皮 小茴香 草薢 九香虫

治按：此因呕吐有上逆之势，故不用补中，而变法治之。

又按：此证若用乌梅丸，则上下均在治中，缘痛呕，疝气均由肝病故也。

再诊：治中胃痛已和，疝气仍然下坠。拟于补脾之外，佐以补肾，使其火土合德，则阳旺于中，而生气勃然，不升自升矣。

香砂六君丸合金匱肾气丸

治按：此证从肝经着意，似较灵动，专补脾肾，犹恐涉于呆实。

狐疝，卧则入腹，立即出也。

补中益气汤

另金匱肾气丸合小安肾丸香附、川乌、茴香、椒目、川楝、熟地。

原注：疝气一症，论其本末，有不由气虚而湿浊随之下陷者，故以补中益气汤为主方，俾脾之清气得以上升，则小肠膀胱之浊气自然下降。又有挟劳倦外感而发者，方中柴胡借用亦妙，寒加温药，湿火甚加知、柏。

治按：此因下坠过甚，过用补中以升清气，其实亦非治疝正法也。

狐疝，原属肝经之湿，随气下陷，脾阳必衰。而今夏多食冷物，阳气又被所遏，苍白不干，指冷脉小，右睾丸胀大，当以温散。

大顺散干姜、肉桂、杏仁、甘草。加当归 木香 荔枝核

治按：此因生冷伤中，故用大顺，亦非治疝正法。

《柳选四家医案》

费伯雄

某。肝肾阴亏，寒湿下凝，疝气作痛。宜培肝肾而化湿浊。

制首乌四钱 赤白芍各二钱 焦白术一钱 胡芦巴三钱
当归二钱 青皮一钱 乌药二钱 毕澄茄一钱 小茴香一钱
金铃子三钱 炒橘核二钱 荔枝核炙研两粒 荔枝核炙打二枚

某。木不条达，气湿下凝，疝气肿胀。投药合度，理气清化。

柴胡梢五分 炙升麻三分 金铃子三钱 延胡索三钱
川石斛三钱 小茴香一钱 陈橘核炒，三钱 赤芍一钱五分 赤苓二钱
山栀三钱 草薢三钱 枸橘三钱

《费伯雄医案》

李铎

江某，年逾四十，形肥好内，久患狐疝，昼出囊中，夜卧入腹。据述病原由五年前，远馆山寺，适天气骤变，衣被单薄，勉强耐寒，旋因劳役入房，遂成此患。初起疝坠微痛，时肿时消，甚不介意，延至近年来愈发愈勤，每发时行动维艰，数月来心悸不寐，百药不效，求治于余。初以二陈加茯神、枣仁、吴萸、炒小茴、桂枝、金铃子、生姜煎服，十帖夜寐甚安，疝如故。按《难经》云：任脉为病，男子内结七疝，皆积寒于小肠间所致也。非大热之剂不能愈，为制沉香桂附丸，以沉香、附子、川乌炮去皮脐、良姜、川楝、木香、吴萸、官桂、半夏、茯神、甘草各一两，醋丸，如梧子大，每服五六十丸，空心食前、热米饮汤送下，日二服，忌食冷物。间服天台乌药散，以乌药、木香、小茴香、良姜、青皮各五钱，槟榔二个，川楝十个，巴豆五十粒，微打破，同川楝用麸炒黑色，去麸为末，每服一钱，温酒调下，温利之数月，举丸肿渐消而愈，后不复发。

附录：江少微自患狐疝，用八味地黄丸而痛止，继服打老儿丸而愈。时年五十余，此衰弱之躯，正气旺而邪无所容矣。予以此法治二人良验。

《医案偶存》

魏树春

西城赵某，秋季因受外邪，引动疝气旧患。寒热似疟，右辜坠大，牵引少腹而痛，凡解表及治疝之药均遍尝不效。特远道求诊于予。予用柴桂各半汤，加川楝、茴、木香、吴萸，以和解少阳兼散寒行

气，服二帖，寒热即退，疝痛亦轻，再服补中益气汤加味，而疝全除。按：前方见《温病条辨》，凡寒热似疟而又疝痛者，用此无不应验，是不可以不记。

《清代名医医话精华》

杨毓斌

妹丈句级莽病疝气，杂治十余日不效。尤谬者指为子癰，外用敷药，内用消散化毒之剂。予往省视，少腹向右筋结而粗，牵引辜丸赤肿痛甚，下及大腿上廉，不能转侧，时觉热气冲上，气逆郁结不舒，脉沉弱弦而迟，舌苔白腻，不思食，八日未更衣。语曰：此《内经》所谓冲疝证也，参验色脉，乃寒湿着里，肝气下陷怫郁，以致脾阳内困；寒则伤营，湿邪下袭，伏遏筋络，故狼狈如此。论疝证，本任脉与厥少二阴为病。自以温经散寒为法。此更当先降冲开郁，以阳明太阴为主。以阳明主宗筋，太阴土温则湿消而木调，余从末治。拟方两服，痛定、结散、饮食渐香。加温经和阳化湿而愈。

姜半夏三钱 醋炒当归三钱 生楂肉三钱 姜汁炒川朴一钱
米泔浸茅苍术一钱五分 甘草梢一钱 茯苓二钱 炒小青皮。后加吴茱萸、桂枝、炒小茴、杭白芍。

《治验论案》

陈菊生

《内经》云：任脉为病，男子内结七疝：冲疝、狐疝、癰疝、瘕疝、溃疝、水疝、厥疝是也。又有偏坠、膀胱气、小肠气。其病亦与疝等。或因寒积，或因湿热，或为气，或为血，或为虚，或为实，治之者，明辨无讹，可矣。乙未，余寓上海，有宁波孙某患疝症，据述腰以下牵引作痛，丸囊皆肿，午前轻，午后重，病经四年，屡治不效。余切其脉，虚数细弱，知是下焦湿浊未能早除，留恋四年，真元受损已极，非大为补正，更佐温化不可。用十全大补汤加川楝子、橘核、吴茱萸为

方，数十服而愈。丙申春，王君舒仲患左丸偏坠，有筋作痛，牵连及腰，脉来沉数，尺较有力，知是湿热蕴伏下焦，非急为清化不可。余用大力军汤加川黄柏、制僵蚕为方，十数服而愈。庚寅夏初，余客天津，杨艺芳观察之族侄某，病小腹痛，牵引睾丸，转侧呻吟，势不可忍，并时冗吐逆等症，医与温补药，不效，饮食少进，夜寐不安，病情尤剧，来延余诊。脉象迟缓而涩，余思温补颇是，而不见效，缘桂、附不得干姜不热也，仍前方加干姜五分，服后，吐逆即平，惟少腹及肾丸痛如故，而脉象颇数。盖前此火为寒郁，今则寒从火化，治有先清而后温者，亦有先温而后清者，阳以济阴，阴以济阳，调剂焉底于平而已。用地黄汤去山茱，加川莲、黑梔，数服而愈。以上三证，一则温而补之，一则清而导之，一则始温补而终清理之，均应手而效。可知疝症虽小，不能执一法相绳也。

《诊余举隅录》

张乃修

荣左。由睾丸痛胀，而致从上攻冲，直抵中脘，痛不可忍。恶心呕吐，忽寒忽热，大便不行，小溲浑赤。舌红苔白。湿热流入厥阴，而冲脉隶于肝，又属阳明，起于气街，而布散胸中，所以肝病不退，冲脉之气，挟湿热之气，上冲犯胃，的属冲疝重症。拟苦辛酸合方。

川雅连五分，炒 淡干姜三分 川楝子三钱 制香附二钱
延胡索二钱 盐水炒陈皮一钱 淡芩酒炒，一钱五分 杭白芍酒炒，三钱
白茯苓三钱 生薏仁三钱 姜汁炒黑山栀三钱 泽泻一钱五分

二诊：苦辛酸合方，呕吐稍减，痛势略缓。然腹中时觉攻撑，愈撑愈痛，痛处以热物摩熨，其势即缓，而热汤入口，其痛即甚，吐出均系痰涎。脉左部细弦，右部沉郁。肝经之气，横扰充斥，标热本寒。与甘仁先生同议温藏而泄气火之郁，化痰而降胃府之气。逸山先生意见相同。录方以备商用。

川雅连五分 淡吴萸三分，川连同炒 制香附二钱 黑山栀三钱
金铃子三钱 广皮二钱 熟附片三分 制半夏一钱五分
延胡索一钱五分 白茯苓三钱 白蛭螺壳二钱 粉丹皮二钱
上沉香二分 黑丑三分，二味研细末，先调服

三诊：苦降辛通，痛势渐轻，大便虽行未畅，呕恶不止，吐出之物，气甚酸秽。右脉沉郁稍起，渐见滑象。肝木之纵横肆扰，虽得略平，而厥气逆冲，胃土不降，气即为火，痰即为浊，酿成酸秽之味，逆从上出。与逸山甘仁两兄同议清泄郁结，降浊镇逆。

黑山栀三钱 制半夏三钱 块辰砂三钱 鲜竹茹三钱
炙紫菀肉二钱 香豆豉二钱 茯苓五钱 柿蒂四个 郁金一钱五分
旋复花二钱，绢包 金铃子二钱 鲜枇杷叶一两，去毛绢包煎汤代水

四诊：痛势大减，略能安寐，大便不行，仍然恶心呕吐，吐出不堪秽臭，胃中窒闷异常，面色晦浊，目有红光。脉左弦右滑。良由疝气上冲，胃之下口，即小肠上口，火府之气，不克下行，转从上逆，令糟粕从胃底翻出，胃浊不降，痰聚胸中，胆阳上逆，面晦目红不寐，宜有种种现象矣。夫大肠居小肠之下，与肺相表里。兹与逸山甘仁两先生同议，控逐胸中之结聚，使肺气下通于大肠，肠痹得开，则火府之气，或从下行，冀糟粕亦转旋顺下。未识能如愿否。

制半夏三钱 块辰砂四钱 细木通一钱五分 炙紫菀肉四钱
旋复花二钱 白茯苓五钱 姜汁炒山栀三钱 鲜竹茹三钱 柿蒂五个
控涎丹八分，开水先调服

五诊：攻逐胸中结聚之痰，使肺气下通于大肠，大肠居然开通，屡次畅下，糟粕之逆出于胃者，亦从下行，呕吐臭秽已定，胸中窒闷亦开，疝气痛胀大减，渐能安谷，脉数转缓。出险履夷，诚为幸事。再拟调和中气，疏泄肝木，分化湿热，以善其后，同逸山甘仁两兄商用。

制半夏一钱五分 鲜竹茹一钱 干橘叶一钱五分 泽泻二钱
生薏仁三钱 白茯苓三钱 金铃子一钱五分 荔枝核三钱 猪苓二钱

王旭高

王。肝经久有湿热，伏于下焦经络之中。疝气交春而发，夏甚秋衰，至冬而平。发时每有寒热，是属湿火无疑，断非寒疝可比。去冬迄今患疝，兼以咳嗽，舌底红裂而苔黄滑，此疝邪湿热伤阴之象。法以养阴化痰、和胃泄肝为治。

制首乌 鳖甲 陈皮 杏仁 桃仁 川楝子 青皮 延胡
川贝 沙参 红枣 生姜

周。中气不足，湿热下注厥阴之络，胯凹肾囊之间，每逢劳碌必发疝气攻痛，兼有寒热。前用搜络方法，未获效验。今用补中益气汤加搜络清里之药。

补中益气汤去黄芪、炙草，加黄柏、茴香、全蝎、吴茱萸、黑山栀、川楝子、橘核、丝瓜络。

又药酒方：

枸杞子 沙苑子 茴香 仙茅 川楝子 熟地 菟丝子 吴茱萸 杜仲 巴戟肉 党参

烧酒十斤浸，夏五冬十日饮，勿醉。

吴。子和论七疝，都隶于肝。近因远行劳倦，奔走伤筋，元气下陷，其疝益大。盖筋者，肝之合也。举丸者，筋之所聚也。大凡治疝不越辛温苦泄，然劳碌气陷者，苦泄则气益陷。今先举其陷下之气，稍佐辛温，是亦标本兼治之法。

补中益气汤加茯苓、茴香、延胡、全蝎、木香。

又丸方：

党参 白术 茯苓 吴茱萸 乌药 本香 小茴香 当归
枸杞子 川楝子 淡苁蓉

上药研末，用荔枝半斤，去壳煮烂，取肉捣烂，另将核炙脆，研

末，连前药末共捣成丸。朝暮用盐花汤送下三钱。

又，疝本属寒，久则化热。其热为标，其寒为本。当标本兼治。

金铃子散加木香、乌药、吴茱萸、橘核、小茴香、车前子、川黄柏、枸杞子、胡芦巴。

秦。湿热素盛，下注小肠厥阴之络，囊肿，胯筋胀痛，小有寒热已经匝月。拟泄肝络，兼通小肠。

金铃子散加柴胡、青皮、穿山甲、全蝎、龙胆草、枳壳、山楂肉、黑山栀、沉香、吴茱萸、橘核。

某。先天不足，肾气虚寒，膀胱失化，肾囊胀大，疝气上攻，呕吐不止。防其发厥。

肉桂 金铃子 乌药 巴戟肉 胡芦巴 半夏 吴茱萸 泽泻 小茴香 荔枝核

又末药方：

棉子肉四两，炒小茴香二两，盐水炒 糯米半升，炒黄
共研末，砂糖调服

渊按：水盛凌土之象，须崇土御水为主。

朱。腹满，面黄，足肿。近因戽水受寒，又加疝痛。脾虚有湿，肾虚有寒。防其疝气上攻，大腹益满。

平胃散去甘草，加茯苓、小茴香、神曲、吴茱萸。

《王旭高临证医案》

柳宝诒

于。疝气上逆于肺，喘促胸板，呃逆肢厥，病情颇深。舌色光红，阴液亦枯。病重正虚，殊难着手，姑与疏降法，得松为幸。

旋复花 西洋参 代赭石 姜半夏 前胡
淡干姜 川连 煎汁，炒 生甘草 广郁金 延胡索 醋炒 金铃子 酒炒
长牛膝 吴茱萸 煎汁，炒 公丁香 柿蒂 竹茹 姜汁炒

杜。左少腹掣及辜丸。寒湿中子厥阴于络，此筋疝证也。防其

上冲而厥。

川楝子酒炒 延胡索醋炒 橘络核各，炒 青皮 小茴香盐水炒
桂枝 白芍土炒 长牛膝吴茱萸汁，拌炒 当归酒炒 赤茯
木瓜酒炒 荔枝核炒

施。囊肿痛坠，病属癰疽。治当温调气分，疏利湿热。

金铃子酒炒 吴茱萸盐水炒 小青皮醋炒 苏梗 黄柏酒炒 黑山
梔 小茴香盐水炒 茯苓块 生甘草 荷梗 茅术炭 川郁金
陆。疝气偏坠，少腹胀硬。湿热下注膀胱，上及于脘。法宜疏
泄。

金铃子酒炒 延胡索 长牛膝吴茱萸汁，拌炒 青皮醋炒 归须炒
丹参 小茴香 橘核炒，打 桂枝 乌药 胡桃肉 荔枝核
另：葫芦巴丸，淡盐汤送下。

张。木气不平，挟湿热之邪结为疝气，甚则撑痛气升，上及于
脘。脉象弦细。治当疏泄肝邪。

金铃子肉酒炒 延胡索醋炒 青皮醋炒 青广木香各
长牛膝炭吴茱萸汁，拌炒 赤白芍各酒炒 归身尾各，小茴香煎汁，拌炒
橘络核各打，炒 紫苏梗 海南槟榔 白茯苓 陈木瓜酒炒

方。内热久恋，咳痰曾经带红。脉象虚细，热恋阴伤。少腹块
撑作痛，疝气并发，势必兼疗。姑与养阴疏肝。

南北沙参各 小生地 赤白芍各 归身 川百合 丹皮 白
薇 金铃子 延胡索醋炒 小青皮醋炒 橘核
长牛膝炭吴茱萸汁，拌炒 枇杷叶

丁。寒气袭于厥阴之络，少腹胀痛，上及于脘，甚则作呕，脉象
迟弦而细，舌苔厚浊。法当苦泄温通。

金铃子肉酒炒 延胡索酒炒 青广木香各 淡干姜盐水炒
牛膝炭吴茱萸汁拌炒 细川连姜汁炒 乌药 枳实生切 木瓜酒炒 制
半夏 橘络核各，炒，打

苏。疝气偏左，胀痛而不下坠，左脉弦硬。肝火与寒湿相搏，结

于经络。治当疏泄厥阴。

金铃子肉 延胡索 小青皮 吴萸川连煎汁炒黑 青木香 白芍 桂枝 归须 橘核络各 小茴香 黑山栀 茯苓 葫芦巴 荔枝核

金。由淋浊转为疝痛。湿热郁于阴分，蒸动伏邪。肢麻少汗，脉数，苔白底红。当疏透伏邪，而兼清化。

豆豉鲜生地同打 丹皮炭 紫苏细梗 黑山赤苓 川楝子 延胡索醋炒 青皮 乌药 橘核络各，炒，打 车前子 茅根肉 淡竹叶

二诊：疝痛得减，转作泄泻，病机自顺；舌苔浊厚，郁热甚重。胃气泄则外托无力，恐邪机外达不爽耳。

豆卷 葛根 淡黄芩酒炒 川连 枳实生切 苡米姜汁炒 广陈皮 半夏 广郁金 生甘草 干菖蒲根 荷叶

童。疝痛偏左，上引少腹。邪在厥阴，当与苦辛疏化。

金铃子肉 延胡索 青皮 细川连 吴萸煎汁炒 青木香 桂枝 白芍 小茴香 木瓜 牛膝 橘核络各 黑山栀 茯苓 苏叶 荔枝核

《柳宝诒医案》

马文植

广东，某。肝足厥阴之脉，循阴器而络睾丸。气虚湿寒下袭，狐疝坠痛。拟益气养营，温泄厥阴。

生黄芪 升麻醋炒 焦白术 炙草 泽泻 当归 白芍 肉桂 炒小茴 法半夏 云苓 潞党参

二诊：昨进益气温下，狐疝坠痛已减。原方进步治之。

原方加巴戟天、青皮。

三诊：气疝坠胀已减其半，而痰嗽又发，二者皆寒湿为患，湿痰随气升随也。仍以昨法参以肃肺。

生黄芪 潞党参 焦白术 白芍 茴香 肉桂 白前 炙草
云苓 橘红 半夏 破故纸 青皮 杏仁 姜 枣

四诊：气痞较平，夜半痰嗽未能尽止，积饮未清，用苓桂术甘加味。

茯苓 白术 党参 黄芪 青皮 小茴 杏仁 甘草 白芍
姜 破故纸 苏子 肉桂 制半夏

五诊：益气温下，诸症均减，饮亦渐化。前方进治。

云苓 白芍 旋复花 白术 肉桂 苏子 半夏 红枣 青
皮 白芥子 破故纸 炙草 小茴 党参 煨姜 炙芪

六诊：益气温下，颇合法度，痰嗽已止，气痞坠胀已减其半。从前法治。

原方去青皮。加杞子。

七诊：气痞已愈六、七，咳嗽止，惟湿热未清，痰即火之湿也。火原不足，脾乏健运。仍温养下焦，三阴并治。

原方去旋复花，加当归。

丸方：别直参三两 上黄芪三两 胡芦巴一两五钱 杜仲二两
茯苓三两 上桂六钱 破故纸一两二钱 炙冬花一两五钱 杞子二两
苏子二两 制半夏二两五钱 炒小茴一两二钱 白芍一两五钱
炙草六钱 广木香六钱 当归一两五钱 杏仁二两 陈皮一两

上药为末，生姜二两、红枣四两，煮烂为丸，每服三钱。

八诊：痰嗽已止，气痞又微坠胀，中气又弱，肝肾尚少固摄。以调中温摄下元。

炙黄芪 潞党参 陈皮 肉桂 炙草 煨姜 杜仲 炒小茴
红枣 制半夏 杞子 焦白术 白芍 破故纸 当归

九诊：经治以来，痞平喘止，坠气亦好，小溲长而色赤，气化已行，湿邪下达，均属佳兆。仍以原方进治。潞党参三钱
甘杞子一钱五分 木瓜一钱 炒小茴一钱 杜仲盐水炒，三钱 炙芪三钱
肉桂四分 茯苓三钱 红枣二枚 炙草四分 当归一钱五分

新会皮一钱 法半夏一钱五分 破故纸盐水炒，一钱 白术一钱五分
白芍一钱五分 煨姜二片

《马培之医案》

刘子维

张锡之肾子肿如鹅蛋大，行路下坠颇痛。

白术八钱 怀药五钱 益智仁三钱 黄柏一钱半，盐水炒 玄参五钱
橘核三钱 荔枝核八钱 白芍四钱 知母二钱 上桂二钱
沙蒺藜五钱 首乌五钱 甘草二钱 灯心三钱

五付，服二付痊愈。

李俊注：此疝气也。原批云：此因肝脾不足，亦是脾之不生。土为四象主，而其机在木，伊木之心火肆，而真阴受病，真阳亦渐少，奈何不生病？治须培其根，必要真火去生真水，而真阳乃可克阴火，即真水可以养肝阴，医理如此，宜究之。谨按：脾为后天生化之源，出五味以溉四象。故以后天论，则肝脾不足，亦是脾之不生也。然肝为先天生化之源，土在后天，虽为四象主，而以先天论，则其生机实不离木，故曰其机在木。心为火藏，肾为水藏，而火之精谓之真火，亦即真阴；水之精谓之真水，亦即真阳，此乃先天真气，不可太分。伊木之心火肆而真阴受病，故真阳亦渐少也。阴火者，水中之火，即相火也，相火之所以能蛰藏上下，而发为氤氲之气，以奉生身者，赖有真水以率之也。若真水不足，则阴火妄动，木先失养而灾害至矣。《热病论》曰：邪之所凑，其气必虚。木既失养则正虚，邪凑安得不为肿痛而下坠乎？

以后天气化言之，此本肝脾不足，水火不交之病。盖厥阴之脉，绕阴器，疝气不离厥阴肝经。肝既不和，则水升火降之机乱，脾土无所禀气，乃必然之势也。原批谓其伊木之心火肆而真阴受病，真阳亦渐少，是其病乃由心火有余，心阴不足，以至伤及肝阴，为之原耳。

《太阴阳明论》曰：土者，生万物而法天地。夫脾为后天主，水火之交，在此不足则斡运失职。水火不交，生化不出，故补以白术、怀药、甘草建立水火交媾之地。《生气通天论》曰：苍天之气，清静则志意治，顺之则阳气固。夫苍天之气在人身即肝气也，水火交媾之机，在此人不幸，而苍天之气逆，则莫要于和肝，故以白芍平之，沙蒺藜、首乌温之、养之，以抵于和而转其机，合之灯心引火下行，肉桂化水上行以任交媾之使，则南北气化无间而大功成矣。张某之病要真火去生真水，而后真阳乃可克阴火，即真水可以养肝阴。夫真火生真水、真水养肝阴者，乃后天火降水升如常，而先天真火、真水不至为后天乱气蔽隔，自复其生化克制之妙也。人生在后天，即不离后天气化，未有后天气化不和，以致先天气化不和，而不由后天以返先天者也。真阳渐少，则阴火渐炽，而肾水亦虚，故用知、柏泻阴火之炽，玄参补肾水之虚，以降之、宅之。阴火妄动则地气寒，肾囊肿痛则地气窒，故用沙蒺藜温肝肾以助阳气，益智仁温脾肾以开郁结，而荔枝核、橘核则专入肝肾膀胱，消肿止痛，以治疝气之用也。

五藏皆有先天真气以率后天凡气，故气从以顺，各从其欲，皆得所愿。所谓先天真气者，即前所云心属火而有真火，肾属水而有真水也。他藏仿此。然真气虽有五实，皆真阴真阳之化分也。《易》曰：太极生两仪，两仪生四象，而当未化分之时，即真阴真阳，亦非二也。人能恃之以静，由分而合，而复还太极，谓之道矣。此案以先天真气论病，医者不知，无须深求。但于后天水升火降之理而精研之，亦未尝不与先天气化暗合，盖逆生虽异，而和合于中则无异也。

《圣余医案詮解》

沈祖复

钱少和世丈。

子痛与疝气有别，实则异名同类。《经》云：“男子任脉为病，内

结七疝。”巢元方立“癰癢”之名，癢者内裹脓血是也，癰者小便不通之谓也。左辜丸属肝，脉象弦急，气逆口干，高年恐其痛厥。现在小溲三日不利，肾子胀痛，外皮红肿，湿热下注也。姑先通调水道，水道不通，湿热愈形阻滞矣。

赤芍、车前子、滑石、石决明、黄柏、龙胆草、甘草梢、竹茹、川楝、橘核、通草、薏仁、革薢。

《医验随笔》

方耕霞

陆。少腹癖块举发，痛及肩窝，甚至呕酸不纳，其势颇剧，此即《难经》冲疝之类也。夫少腹厥阴部分，呕为阳明之病，病由郁结伤肝，肝邪横逆，土不能御，以致于此。今姑温胃降逆，辛通解郁，庶几木土免其残贼。

肉桂 香附 茯苓 小茴香炒归身 车前 乌药 良姜 青陈皮 左金丸 半夏冲入炒盐壹捻

再诊：痛极几乎发厥，得药即止。可谓应病矣。脉尚微细，胃尚不饥，是木邪未平，土气不苏也。平肝即所以醒胃，毋庸双管齐下。

肉桂 香附 归身 茯苓 陈皮 半夏 砂仁 杜仲 车前乌药 吴萸 两头尖

《倚云轩医话医案集》

张锡纯

天津陈某某，年三十八岁，得大气下陷兼疝气证。

病因：初因劳心过度，浸觉气分不舒，后又因出外办事劳碌过甚，遂觉呼吸短气，犹不以为意也。继又患疝气下坠作疼，始来寓求为诊治。

证候：呼吸之际，常觉气短似难上达，劳动时则益甚。夜间卧睡一点钟许，即觉气分不舒，披衣起坐移时将气调匀，然后能再睡。至

其疝气之坠疼，恒觉与气分有关，每当呼吸不利时，则疝气之坠疼必益甚。其脉关前沉而无力，右部尤甚，至数稍迟。

诊断：即此证脉参之，其呼吸之短气，疝气之下坠，实皆因胸中大气下陷也。此气一陷则肺脏之翕辟失其斡旋，是以呼吸短气；三焦之气化失其统摄，是以疝气下坠。斯当各升补其下陷之大气，俾仍还其本位，则呼吸之短气、疝气之坠疼自皆不难愈矣。

处方：生箭芪六钱 天花粉六钱 当归三钱 荔枝核三钱
生明没药三钱 生五灵脂三钱 柴胡钱半 升麻钱半
小茴香一钱，炒捣

共煎汤一大盅，温饮下。

复诊：将药连服三剂，短气之病已大见愈，惟与人谈话多时，仍觉短气。其疝气已上升，有时下坠亦不作疼，脉象亦大有起色。此药已对证，而服药之功候未到也。爰即原方略为加减，俾再服之。

处方：生箭芪六钱 天花粉六钱 净萸肉四钱 当归三钱
荔枝核三钱 生明没药三钱 生五灵脂三钱 柴胡钱半 升麻钱半
广砂仁一钱，捣碎

共煎一大盅温服。

效果：将药连服四剂，呼吸已不短气，然仍自觉气分不足，疝气亦大轻减，犹未全消。遂即原方去萸肉，将柴胡、升麻皆改用一钱，又加党参、天冬各三钱，俾多服数剂以善其后。

《医学衷中参西录》

赖松兰

阴癰屏痛已松，泄溺频数亦愈，惟腰酸带下，里热脉数，阴虚湿阻，再以和阴摄下为治。

炒於术 云茯神 甘草 柴胡 炒归身 炒白芍 淮山药
煨益智 沙苑子 桑螵蛸 乌贼骨 台乌药

厥阴气滞，木失条达，是以睾丸偏坠，少腹为之屏痛，乃孤疝

也。拟疏肝理气法。

川楝子 小茴香 淡吴萸 制川朴 桔核 新会皮 焦查核
广木香 沉香曲 砂仁壳 官桂

《赖松兰医案》

陈莲舫

沈。疝气牵引腰腹，治以温养。

安肉桂 全当归 菟丝子 川楝子 制香附 广陈皮 路党
参 川杜仲 鹿角霜 生白芍 小青皮

《莲舫秘旨》

何长治

左。腹胀便溏，胸次痞闷，右疝偏大。肝脾同病也。

桂枝五分 白术二钱 泽泻钱半 橘核三钱 茯苓三钱
茴香五分 山查炭三钱 猪苓二钱 青皮钱半 白芍钱半

左。疝痛睾丸肿，遇劳则发，痛必子寅卯间；鹭泄经久；脉浮数。
宜从厥阴疏化。

焦冬术 归尾 炒小茴香 吴萸 山栀 草薢 广木香 酒
炒白芍 白苓 查炭 黑姜 青皮 酒炒枸橘李 砂仁壳

《何鸿舫医案》

王仲奇

梁，芜湖 三月九日 小肠疝气，前曾在左，业经治愈，今发则
偏着右边，胀痛作坠，脉弦滑。年逾七旬，恐非服药可痊。

锁阳二钱 油当归三钱 巴戟天二钱 补骨脂炒二钱
川楝子煨钱半 益智仁一钱 葫芦巴钱半 橘核炒二钱
九香虫炒，一钱 青皮炒，钱半 革拨一钱 沉香曲炒，钱半

二诊 三月十二日 小肠疝气，前发在左，既经见瘥，今复发

则偏著右边，日来虽未胀痛作坠，而有形未消，脉缓弦滑。年逾七旬，究难疗治。

锁阳三钱 油当归三钱 补骨脂炒二钱 巴戟天二钱
葫芦巴钱半 益智仁一钱 川楝子煨钱半 小茴炒，六分 萆薢钱半
升麻炙，六分 青皮炒，钱半 宣木瓜六分

三诊：三月十六日 疝气日来较瘳，已不胀痛作坠，行动努力则现，卧下则隐，脉濡弦。仍守原意为之。

锁阳三钱 油当归三钱 补骨脂炒，二钱 益智仁一钱
葫芦巴二钱 巴戟天二钱 小茴炒，八分 肉桂子八分 升麻炙，一钱
川楝子煨，钱半 九香虫炒，一钱 川椒炒黄去闭口，四分

四诊 三月十九日 疝气年前在左，业经见愈，今发在右，日来已不胀痛作坠，惟行动努力则现，安卧则隐，脉弦滑。仍以温下可也。

锁阳三钱 油当归三钱 川楝子煨，钱半 小茴炒，八分
葫芦巴二钱 巴戟天二钱 益智仁一钱 肉桂子八分 泡吴萸六分
青皮炒，钱半 补骨脂炒，二钱 台乌药钱半

《王仲奇医案》

王靖

常少张炳堂同乡，甲寅得疝病，肾囊重坠，膀胱时作痛楚，适入值圆明园，出城门路砌以石，长数十里，行者车倾侧，车中人四肢竭力支持，多以为苦。炳翁一往返，疝痛甚，肾囊欲肿。延医视之，仓卒不暇细诘病状。因曰：肾囊肿多是湿热下陷，利水清火痛自除。炳翁于歧黄素愤愤，急服其药，痛增甚，腰胁不可屈伸。乃命余视，诊其脉象沉迟，季胁九丸，直上直下。乃曰，此寒疝也。病由肝气凝结，胁下如柱，非温血养胁不可，利水清火，不增甚何为。乃为合茴香丸一料送之，服未一两而痛减。适有盛京视学之命，炳翁即束装出关。

冬季来函，则曰，药已服完，疝不再发，余犹以温养告之云。

《醉花窗医案》

袁焯

郭某年六十余，腊月间患疝病。外肾根部，肿硬如鸡卵，疼痛非常，恶寒不热，口干，舌光无苔而色不红。盖寒疝也。其坚硬如鸡卵者，寒邪搏结，得温则消散也。乃以乌头桂枝汤：蜜炙乌头三钱，桂枝、白芍各二钱，甘草一钱，加党参二钱，干姜八分，小茴香、当归各三钱，木香一钱。作煎剂，服后至夜间痛始定，肿硬亦消，口干亦止。翌日以原方用羊肉汤煎药，并令其食煨羊肉而痊。

《丛桂草堂医案》

曹沧洲

某左。疝气偏大久不消，温痰隐伏，不易见功。

苏梗三钱 葫芦巴一钱半 川楝子一钱半 川断三钱
制香附三钱 两头尖三钱 延胡索一钱半 丝瓜络一钱半
广木香二钱 淡吴萸三钱 枸橘二钱 荔枝核四钱 橘核丸三钱

某左。湿热下走肝肾，营络内痹，睾丸偏大作胀，腰酸，脉微弦，当疏泄厥少。

苏梗一钱半 川楝子三钱，小茴香七分同炒 猪苓一钱半
楂炭一钱半 四制香附一钱半 延胡索一钱半，醋炒 泽泻一钱半
白蒺藜四钱 青皮炭一钱半 两头尖三钱，包 丝瓜络一钱半
橘核四钱 荔枝核四钱，打

《吴门曹氏三代医验集》

曹南笙

某左。立冬前一日，寒战后热属厥阴，食蟹咸寒沉坠，浮肿囊大，溲溺甚少，至晚肿胀愈加，显然阳微浊聚，治从气分开泄冷湿。

桂枝 吴萸 川楝子 茯苓 生牡蛎 泽泻 摩青皮汁十匙

某左。初诊：久有疝症，十年来寒热劳形，则右胸胁中一股气坠，直走少腹，凡大小便用力皆然，面赤亮，痰多，食腥腻更令病加，此湿热久壅隧中，缓攻为宜。

控涎丹四分，间日服。

二诊：脉沉、痰多，手肘赤疮，宿疝在下，右胁气坠少腹，前用控涎丹逐痹未应，想久聚湿热沉痼，非皮膜经脉之壅，用浚川丸四十粒匀二服，间日一进，先通腑聚，然后再议。

三诊：通腑宜壅，枯痰既下，其疝仍聚于右，且盛于寒天冬月，卧安必有声自消，行走劳动必有形，直坠阴囊，久病急攻无效，议辛甘化风方法，古人以疝为肝病，十居八九。

当归 鹿角 桂枝 肉桂 小茴 川芎 炙草 茯苓 生姜 羊肉胶丸

某左。病自肾囊，渐踞少腹之左，夫厥阴之脉绕乎阴器，操持谋虑，都主伤肝，肝气结聚，变幻形象而痛，病名曰疝。疝分有七，暴疝多寒，久疝多热，泄气痛缓，宜通可以却病，只因下焦乃清远之乡，气热湿郁概可知矣。

川连 小茴 黑山栀 橘核 川楝子 青木香 郁李仁 冬葵子

某左。老年久疝，因嗔怒而肿大热痛，肝失疏泄，火腑湿热，蕴结不通，温补升阳固谬，盖肝性主刚，湿闭反从燥化，龙胆苦坚不应，议柔苦制热，反佐辛热以开血中郁痹。

东垣滋肾丸

某左。脉右弦左涩，当脐痛连少腹，已属凝聚有形，呕吐黄浊，大便欲解不通，若患处漉漉有声，痛热稍减，惟外著体不转移，其痛更加，此属肝气疝瘕，辛香流气，所称通则不痛耳。

桃仁 橘核 金铃子 炒延胡 韭白汁 两头尖 小茴 青皮

此通泄厥阴气血方也，痛甚于下，浊结有形，非辛香无以入络，非秽浊无以直走至阴之域。

《吴门曹氏三代医验集》

丁泽周

李左。湿火挟厥气下注，劳动过度，偏疝坠胀疼痛，口干内热，小溲浑浊，纳谷不香，胸脘闷胀，脉弦数，苔腻而黄。脾胃清气不能上升，小肠膀胱浊气不得下降，肝气失于疏泄，脾虚生湿，湿郁生痰，痰火瘀凝，清不升而浊不降，然皆素体气虚之所致也。姑拟健脾胃，清湿火，俾清气自升，浊气得降。

炒白术二钱 赤茯苓三钱 陈广皮一钱 陈橘核一钱五分
炒知母二钱 炒黄芩三钱 粉草藓三钱 荔枝核三钱 软柴胡五分
酒炒黄柏一钱 小茴香五分 清炙草五分

又诊：前进健脾胃，清湿火，偏疝略收，疼痛渐止，胸闷不舒，清气有上升之象，浊气有下降之势。拟原方更进一筹。

原方去柴胡，加金铃子一钱五分、延胡索五分。

黄左。劳倦奔走，元气下陷，睾丸坠胀，不能行动，胸脘不舒。肝主筋，睾丸为筋之所聚。先建其中气，俾得元气上升，睾丸自能不坠。

炙黄芪三钱 炙升麻一钱 小茴香五分 炒潞党三钱
柴胡梢五分 陈广皮一钱五分 炒白术三钱 清炙草五分
广木香五分 橘核丸吞服，三钱

又诊：坠痛已止，举动亦便。前进补中益气汤，甚为合度，仍守原法治之。

炙黄芪三钱 云苓三钱 炙升麻六分 炒潞党三钱
细青皮一钱五分 金铃子一钱五分 清炙草五分 荔枝核三钱
延胡索五分 佛手柑八分

《丁甘仁医案》

赵左。厥阴之脉，循阴器而络睾丸，厥气失于疏泄，右胁痠痹，时作胀痛，卧则入腹，势成狐疝，缠绵之症，难于痊愈，姑拟疏泄厥气。

全当归二钱 炒赤芍二钱 柴胡梢七分 金铃子二钱
陈橘核四钱 小茴香八分 细青皮一钱 紫丹参二钱 葫芦巴钱半
枸橘打，一枚 丝瓜络二钱

蒋左。狐疝卧则入腹，坐则出腹，惊骇伤肝，厥气下注，缠绵之症。宜泄肝理气。

全当归二钱 京赤芍钱半 金铃子二钱 小茴香八分
陈橘核四钱 柴胡梢七分 葫芦巴钱半 路路通钱半 丝瓜络二钱
枸橘打，一枚 荔枝核炙，五枚

孙左。偏疝坠胀疼痛，小溲淡黄，腑行燥结。宜泄肝理气，淡渗湿热。

全当归二钱 京赤芍二钱 柴胡梢八分 全瓜蒌三钱
黑山栀二钱 金铃子三钱 延胡索一钱 丝瓜络二钱 陈橘核四钱
通草八分 路路通二钱 陈木瓜二钱 枸橘打，一枚 荔枝核炙，五枚
《丁甘仁医案续编》

陈在山

唐述德，脉来沉缓，询其素有疝气之证，常觉腹痛，今则左目骤然昏花，不红无翳，此肾寒肝郁之证，宜舒散利气之剂。

香附 南茴 茅术 皮苓 潞参 厚朴 甘草 薏米 缩砂
木香 乌药 山药 当归 澄茄 生姜

唐述德服前方，诸症皆效，惟疝气一证如故，专拟破气暖肾法。

南茴 青皮 木香 山药 芡实 香附 醋芍 厚朴 汾草
橘核 荔枝 皮蔻 皮苓 玉实 元胡 生姜

唐述德服药二十余剂，似觉病体全愈，惟胸中稍有不舒，亦无关紧要，乃余寒未净之故，再服汤药一剂，后服丸饵，可保全愈。

青皮 南茴 砂仁 木香 紫朴 蛇床 韭子 故脂 人参
荔枝 澄茄 附子 车前 官桂 橘核 生姜

丸药方：人参 茅术 紫朴 青皮 南茴 官桂 台乌 韭
子 蛇子 澄茄 木香 元胡 醋芍 汾草 砂仁 玉实 车前
香附 皮苓 枳壳 榔片 橘核 荔枝 山药 故脂 良姜
巴戟 共末蜜小丸

《云深处医案》

曹惕寅

近邻顾某以余向好济人之急，谓其友年逾六旬，家有老妻，寡女寡媳，并两孙女，向业拍丝。忽患疝气，举丸胀大，囊亦肿坠。彼以一家六口，嗷嗷待哺，故不愿停其业，仍逐日工作，忍痛强事。乃致举囊巨大如升，仍然讳而不宣。孰知努力气坠，囊竟豁然开裂，血出如注，旋即晕倒，血出七昼夜。面无人色，四肢僵冷，舌苔光红，脉细如丝，不言不语，神迷昏睡，特来商治于余。余深悯其家贫如洗，病又险重，姑尽力救之。内服党参、生地、沙参、天冬、牡蛎、白芍、凤斛、糯稻根须、丝瓜络、鸡血拌炒、料豆衣，并于方后签字；俾其免费摄药。外用翠凤消坚菜油调敷肿处。出血处用八宝生肌散、白膏药。如法调养半月，竟得复原工作。该病者感余至深，以活伊一人，则一家生命寓焉。余费仅数十元，亦云小惠，惟尽心力而为之，得有成效，于我心至足乐也。

疝之病受子厥阴，而源子任脉，肝脉环阴器而人少腹，任脉同足厥阴并行腹里。故男子内结七疝之症，未有不系子肝、任二脉也。昔人论之详矣。然余于沪上所诊之郑海翔君，彼自谓疝气，少腹并不胀滞，举囊亦未肿坠，惟自觉举丸下落，似痠似痛，不可言喻。病前既无醉酒房劳，亦未狂奔急走。治以疏和之法，用苏梗、香附、川楝、乌药、青皮、橘核、荔枝、丝瓜络、米仁、两头尖、路路通、小茴香等，并用苏叶、川楝子、延胡、香附酒炒焙之。数剂后绝无应响。据

云：伊向无此患。因询以君之疾莫非起于便艰努力之后乎？前药无效，姑于煨药内加升麻五钱。一宿病势十愈六七。盖升麻轻宣，足升滞气于至阴之分，再佐诸辛温之品，气散血行，血气融和，其病自瘳。故治病之旨，以能见病治病为务，处方尤以能运用心灵为贵。竭其诚，明其机，其得之矣。未可拘执成见也。

《翠竹山房诊暇录稿》

傅松元

疝气之症，属于酒客湿热者居多，或因劳而发，或感寒而发。感寒者，身不甚热，但寒邪与湿热相并，下坠气街，与睾丸进结不散，胀痛欲死。因劳者，劳火与湿热相并，身心热，热甚则多汗如脱。其胀痛而有变化者，为狐疝，多发于右丸，俗谓昆仑气。前人皆视为寒湿，而以温通利湿法治之，然多不应。有南京人张小亭者，素患狐疝，忽作痛甚剧，身热汗多如脱。余亦以温通利气为治，小亭见方药与前医所用者相类，亟谓余曰：“方非不佳，但我已粘汗三身，剧痛不止，如无他策，必不支持。”言犹未已，渐有发厥之象。余急用蜘蛛散法，以大蜘蛛一枚，肉桂三分，为末调服。服下片刻即腹中盘旋作响，登时痛止汗收，其病若失。

《医案摘奇》

贺季衡

周男。双疝，两睾丸坠大已久，不时作痛，痛减则腹胀作痛，气喘不已，脉小数，舌白。寒湿结于肝肾之络，阳气不通而来。最难速效。

当归二钱 大白芍二钱，吴萸三分拌炒 上肉桂五分，去皮切
广木香八分 炒茅术一钱五分 炒白术二钱 青陈皮各一钱
台乌药一钱五分 云苓三钱 炒苡仁五分 旋复花一钱五分，包
荔枝核三钱，炙 生姜一片

二诊：双疝，两睾丸坠虽减，而仍不时作痛，连及少腹腰部，脉沉细而滑，舌苔腐白。寒湿久积肝肾之络，气运不和。最难速效。

白归身二钱 川杜仲四钱 大白芍二钱，吴萸三分拌炒
上肉桂五分 小茴香一钱，盐水炒 台乌药一钱 炒茅术一钱五分
炒白术二钱 炙甘草八分 陈橘核三钱，炙 川椒五分
淮牛膝一钱五分 葫芦巴三钱 红枣三个

丸方：疏肝益肾，理气化痰。

炒茅术一两五钱 炒白术二两 小茴香一两五钱 白归身二两
上肉桂五钱 川杜仲三两 大白芍二两，吴萸三钱拌炒
淮牛膝一两五钱 葫芦巴三两 炙甘草五钱 川楝子一两五钱
川椒五钱 泽泻一两五钱 潼白蒺藜各二两 陈橘核三两，炙

江男。偏疝发后，气分已虚，余湿未尽，少腹急胀，气从下陷，脘下不畅，痰多食少，日形消瘦，脉虚数而细，舌苔糙白。肾虚肝逆，调中化浊为先。

潞党参二钱，姜汁炒 焦白术二钱 淮牛膝一钱五分 大砂仁八分
大白芍二钱，吴萸三分拌炒 炙甘草五分 小茴香八分，盐水炒
云苓三钱 泽泻二钱 青木香八分 补中益气丸三钱 包

二诊：两进调中化浊，少腹胀、气从下陷已退，腑通未爽，脘次不畅，胃纳未复，间或口泛甜味，脉弦细。肠胃湿浊初清，肝气横逆未和也。

旋覆花一钱五分，包 焦白术二钱 大白芍二钱 黄郁金二钱
姜半夏一钱五分 新会皮一钱 沉香曲一钱五分 炒枳壳一钱五分
白蒺藜四钱 焦谷芽四钱 冬瓜子四钱 佛手八分

三诊：少腹急胀及气从下陷先退，口泛甜味继消，腑通未爽，胃纳初增，脘次尚仄满，得噫则松，脉细滑，舌白。当再通阳化浊，以运中枢。

厚朴花八分 干薤白四钱，拌 焦白术二钱 大砂仁八分
姜半夏一钱五分 云苓三钱 贡沉香五分 新会皮一钱 焦谷芽四钱

炒枳壳二钱 生姜一片 佛手八分

四诊：日来大腑复通，少腹胀、口泛甜味俱退，胃纳渐复，而胸宇尚有不适状，脉弦滑无力，舌红苔白。当培土调中。

潞党参二钱，姜汁炒 焦白术二钱 大砂仁八分 陈橘皮一钱
沉香曲一钱五分 焦谷芽四钱 炒苡仁五钱 姜半夏一钱五分
炒枳壳二钱 旋覆花一钱五分，包 生姜一片 佛手八分

王男。冲疝延久，由右少腹上冲心而痛，漉漉有声，痰涎上泛，食入或作噎，便结，小溲勤数，脉虚弦，两尺濡细，舌红而光。心肾两亏，肝气横梗，冲气因之上逆也。拔根不易。

当归二钱 小茴香五分炒 大白芍三钱，吴茱五分拌炒 葫芦巴三钱
淮牛膝一钱五分 川杜仲四钱 青木香七分 潼白蒺藜各三钱
台乌药二钱 上肉桂五分，去皮切 川楝子二钱，醋炒 云苓三钱
荔枝核三钱，炙打

二诊：冲疝痛势虽减，痛时由少腹上冲心而痛，坐卧不安，食少胃呆，气鸣则散，或作噎，痰涎上泛，或便结溲勤，切脉虚数而细，重取少力，舌红无苔。病起忧劳抑郁，心肾虽亏，肝木多郁，冲气因之上逆也。

潞党参三钱 炒白术二钱 潼白蒺藜各三钱 川楝子二钱
小茴香五分，盐水炒 上肉桂五分 云苓三钱 大白芍二钱，沉香二分拌炒
台乌药二钱 旋覆花一钱五分，包 荔枝核三钱，炙打

另：补中益气丸三两，每日三钱，开水下。

朱男。癰疝延久，睾丸日以益大，阳具紧缩，水道不利，脉沉滑，舌苔浮黄。肝肾两亏，湿热下注之候。速效难求。

当归二钱 川楝子二钱 葫芦巴三钱 川黄柏二钱 川桂枝八分
炒苡仁六钱 云苓三钱 炒茅术二钱 炒白术三钱
淮牛膝一钱五分 泽泻二钱 枸橘梨一个

二诊：通阳化浊，以治癰疝。

当归一两五钱 淮牛膝一两五钱 熟附片一两 上肉桂五钱

葫芦巴一两五钱 川椒五钱 炒茅术一两五钱 炒白术二两
淡苡蓉一两 云苓三两 青木香六钱 炙甘草五钱 泽泻二两
川楝子二两 青陈皮各一两

上为末，蜜水泛丸。

潘男。狐疝延久，日来萌发益甚，腰俞痠楚，咳则尤甚，痰无多，头目或眩痛，幸胃纳尚充，切脉左手弦滑鼓指，舌苔黄腻。水亏木旺，痰湿乘虚下注，气运不和之候。调肃和理为先。

南沙参四钱 白苏子二钱炒 川杜仲四钱 炒苡仁五钱
淮牛膝一钱五分 旋复花一钱五分包 青木香五分 净橘络一钱
净橘核三钱 白归身二钱 云苓三钱 丝瓜络二钱，连子炙
桑寄生三钱

二诊：今日舌苔满腻已化，左脉弦数亦减，而滑如故，狐疝不时堕胀，则腰脊痠楚，不能久坐。肝肾之阴气久亏，痰湿乘虚下注也。姑为培补肝肾，理气通络。

白归身三钱 鹿角霜三钱 川杜仲四钱 炙黄芪三钱
淮牛膝二钱 金狗脊五钱 桑寄生三钱 左秦艽二钱 净橘络一钱
云苓三钱 猪脊筋一尺，破开洗 红枣三个

王男。气疝又复举发两月有余，举丸或大或小，气逆于上，则胸腹胀满，矢气则退，二便不利，饮食减少，脉沉细而滑，舌苔黄腻。湿随气陷，调化为先。

当归二钱 大白芍二钱，吴茱三分拌炒 川楝子二钱
青木香一钱五分 葫芦巴三钱 小茴香八分，盐水炒 陈橘皮一钱
陈橘络八分 云苓三钱 泽泻二钱 炒苡仁五钱 台乌药一钱五分
荔枝核三钱，炙打

二诊：气疝，举丸或大或小及气逆则胸腹胀满俱减，两胁当胀，不耐久坐，二便已利，胃纳未复，脉弦滑，舌苔尚黄腻。余湿未清，而随气陷也。

当归二钱 大白芍二钱、沉香二分炒 焦白术二钱

小茴香八分，盐水炒 台乌药一钱五分 白茯苓四钱 炙黄芪二钱
青木香一钱五分 川杜仲三钱 淮牛膝一钱五分 桑寄生二钱
红枣三个

另：补中益气丸三两，每日三钱，开水下。

章男。筋疝年余，发则少腹筋梗，痛掣睾丸，小水点滴不爽，寒热迭作，脉沉滑，舌白。向日好饮，寒湿下注，郁而化热，交结厥少之络，拔根不易。

当归二钱 柴胡一钱 大白芍二钱，吴茱五分拌炒 川楝子一钱五分
云苓三钱 青木香一钱五分 泽泻二钱 宣木瓜三钱
淮牛膝一钱五分 甘草梢八分 丝瓜络二钱，炙 生姜两片

另：补中益气丸三两，每日三钱，开水下。

邵男。寒疝年余，愈发愈勤，偶尔蔬食则随发，腹左痞硬，气逆攻窜，甚则阴茎吊痛，呕吐酸水粘涎，四末厥冷，失气则散，脉沉细而滑，舌根腐白。肾虚肝旺，寒气久客厥少之络，肠胃不和而来，铲根不易。

当归二钱 大白芍二钱，吴茱五分拌炒 川楝子二钱，醋炒
青木香八分 青陈皮各一钱 台乌药一钱五分 炒茅术三钱
上桂心五分 小茴香一钱 姜半夏一钱五分 云苓三钱 川椒五分
生姜两片

二诊：寒疝发时之势大减，惟仍不能蔬食，脾肾真阳已衰，寒气久客不祛，肠胃不和，拟丸方图治。

潞党参二两，姜汁炒 炒茅术二两 炒白术二两 上桂心五钱
姜半夏一两五钱 炮姜五钱 鹿角霜二两 大白芍二两，吴茱五钱拌炒
云苓二两 葫芦巴一两五钱 青陈皮各一两 川楝子一两，醋炒
炙甘草五钱 青木香六钱 川椒五钱

上为末，煨姜二两，红枣五两，煎汤泛丸。

《贺季衡医案》

沈绍九

足厥阴之经脉循少腹络阴器，湿热下注肝经，阻碍气机通畅，以致少腹痛引睾丸，小便短黄，脉弦数，治以疏肝理气，佐以清热祛湿。

薄荷梗一钱 吴茱萸六分 川黄连一钱 广木香一钱
橘子核三钱 金铃炭一钱五分 木通一钱 栀子二钱 茯苓三钱
肉桂五分

《沈绍九医话》

刘云潮

病者 龙行之君，年五十六，与愚同年。

病因 据云因喜打牌夜坐，为寒气所袭，遂病疝气痛症。

症候 其痛在少腹右侧，隐痛牵引右睾丸，亦觉烦闷，略为胀大，如此三年不绝，时愈时发，发时则较剧数日。

诊断 愚诊六脉沉弦无力，此内虚为寒气所袭也。

疗法 与加减逍遥散主之。

处方 淡苡蓉、补骨脂各三钱，杭白芍、当归、小茴、川仲各二钱，北柴胡、广橘核、正桂楠各一钱五分，炙草、圆肉各一钱。

效果 服五剂全安。

理论 疝病亦腹痛类也，其痛在膈下。《素问》黄帝曰，诊得心脉而急为何？歧伯曰，病名心疝，少腹当有形也。又方书三阳急为瘕，三阴急为疝。男子有七疝：寒、水、筋、血、气、狐、癰是也。由是推之，疝类甚多，大要不外肝肾筋气之病。叶香岩云，男子结疝，在《内经》则曰冲任为病。又曰：寒入厥阴之脉，结为气疝，痛则胀升，气消绝无踪迹。今龙君之少腹右侧隐隐作痛，两三年来，时愈时发，发时右侧气胀牵引右睾丸。夫少腹右侧，据新生理之研究，为肝体部位（国医向以肝居于左，殊属错误）。今隐隐作痛，正合叶氏寒人

厥阴之脉等语。况晚年下元已亏，而寒气易为袭人也。彼云因打牌夜坐而得，恐不尽然，是必房事劳顿之后，而寒气因之乘隙也。

方论 此方以升气化湿养下元为主。凡寒气之郁，郁在肾肝，若不用以升发，则气结而不散，故以柴胡升厥阴之郁气，使气不内聚。再以归芍和之，苡蓉、故纸、川仲、炙草、圆肉以温养之，小茴、橘核以化之。其重要在桂楠一味，大破阴寒凝聚，且充式微之真阳，直如亚夫之师从天而降也。

《临床实验录》

周镇

董家麟乡级直隶，为江苏水警无锡三区巡官。丁巳二月患淋浊，自服药止后，寒热，小腹痛，睾丸肿大色红。他医未应，痛楚难制，昼夜不安。余诊脉弦数，苔黄糙。是肝火湿热阴塞而为热疝，恐成囊痈。即疏山梔、川楝、玄胡、橘核、海藻、昆布、黄柏、鼠矢、萆薢、通草、葱苡、楂炭，以忍冬藤一两，煎汤代水。另当归龙荟丸，先服。得汗痛止，惟睾丸红肿未退，原方增损。嘱用鲜地骨、生姜皮捣烂，绢包外擦，渐消。此阴虚木火旺挟湿热之症。

《周小农医案》

方公溥

吴男。5月30日诊，疝气缠绵日久，膈胁闷满，右少腹疼痛颇甚，睾丸肿大脉象沉弦。舌苔白腻，病根已深，急宜舒肝理气。

川楝子9克 小木通3克 台乌药9克 橘桔叶核各9克
广木香4.5克 小青皮4.5克 小茴香4.5克 荔枝核9克
山查核9克 赤茯苓9克

吴男。6月2日复诊：投以舒肝理气，症势大有转机，药既见效，再进一步调之。

处方同前，加白芍药9克。

9月9日复诊：进疏肝理法，疝气坠痛大见轻减，再进一步调之。

《方公博医案》

孔伯华

冀男，十月初十日。肝郁脾湿发为气疝已久，左半下腹中坚胀，脉弦滑、盛于左关，但六脉皆有濡象，拟渗化调气，兼育阴分。

生牡蛎四钱 金铃子三钱 旋复花二钱 布包 代赭石二钱
盐橘核四钱 元胡三钱 山楂核四钱 云茯苓三钱 荔枝核三钱
生枳实钱半 泽泻二钱 车前子三钱 大腹绒二钱

徐男，九月十八日。肝气郁滞，迫湿邪下行入络，发为狐疝，业经数月，脉关中弦滑、两尺细伏，当柔肝渗化，以通膀胱。

连皮苓五钱 槟榔炭一钱 代赭石钱半 炒秫米五钱
小茴香钱半 川楝子二钱 盐炒橘核五钱 旋复花钱半 大腹绒钱半
苏子霜钱半 升麻二分 车前子三钱 佛手片钱五分 山楂核五钱
荔枝核三钱 法半夏三钱 川柴胡三分

《孔伯华医集》

章成之

潘男。此古人所称之疝气痛，牵及睾丸故也。致此之由，仍在痢后。古人以痢后健脾。健脾者，恢复肠之蠕动能力，使痉挛者恢复弛缓；而有气体蓄积者，则排泄之。

炮附块 4.5克 补骨脂 9克 制香附 9克 杭白芍 9克
鸡内金 12克 全当归 12克 生白术 9克 晚蚕沙 15克，包
炮姜炭 6克 粉甘草 6克

二诊：其便已能自行通畅，而腹之瘕块牵引睾丸掣痛者如故；自觉两睾皆痛而坠，则不同于偏疝。仍守和营行气，健脾升提之法。

全当归 12克 绿升麻 4.5克 小茴香 9克 淡吴萸 2.5克

橘核皮各6克 潞党参9克 台乌药9克 荔枝核12克 焦白术9克
川楝子9克 延胡索9克

赵男。古人之所谓疝，一是肠脱；二是睾丸炎。今右胯青筋隆起，肠脱也。内服药无非恢复局部肌肉之紧张力，但其效甚缓。

生黄芪6克 春柴胡2.2克 川楝子9克 升麻2.2克
小青皮6克 台乌药6克 全当归6克 荔枝核12克
炙乳没各2.5克 粉甘草2.5克

另：炙地鳖虫3克 蝎尾1.5克，共研末，分四次吞。

《章次公医案》

张汝伟

余玉莲，年五十九，黔县，狐疝一年余。立则有形，走则胀痛，坐则缩小，眠则无踪。高年肝郁气滞，服疏肝流气之法，胀痛减已七八，有形之时亦少，惟左脉结代未除，每三至而一停，五至而一顿，三五不调。正在春令，何以滋生？拟生脉复脉二方并用，以固其根蒂，勿以脉病人不病而忽视之也。

吉林参须一钱 锦黄芪 生淮药 炒枣仁 茯苓神
生白芍各三钱 制熟地 灵磁石各四钱，同打 大麦二钱 五味子
炙甘草各八分，同打。津红枣三个

二诊：前方连服十二剂，狐疝已无形踪，脉代能延长至十六七至一停，或廿一二至一顿，可知老年根本之漓散，得气血两补之功效已见，再从前方之意加减之。

前方去枣仁、麦冬、五味子三味加山萸肉、补骨脂、甘枸杞、厚杜仲各三钱。

本证始末：余君是沪南大东门街隆盛牛皮号经理，曾为之诊治过六次。以上两方是第四、第五两次所诊之方，第五诊方，亦服十剂，其后再来复诊，脉已平和，神气飞扬矣。

方义说明：经言七疝，冲、狐、厥、癰、瘕、瘕、瘕是也。又云，肝所

生病，为狐疝，言卧则入腹，立则入囊是也，实则七疝均不离乎肝，而此症立方，注重肺脾，第二方如山萸能补肝之气外，骨脂枸杞则补肾，此合金匱治肝必先补脾之意，水能养木，是又肝虚必先滋肾，经文隔三之论治，合之以实验试用，洵不诬也。

《临症一得》

陆观虎

于某某，男，60岁。

辨证：疝气（肺疝）

病因：肺肾两虚、湿痰下注

症候：咳嗽作喘，时日已久。右侧睾丸坠痛。脉弦细。舌红，苔黄。

治法：理气化痰，佐以温下行气。

处方：冬瓜子9克 荔枝核9克 苏梗9克 苏子9克
橘红9克 炒银杏6克 海浮石9克 川通草3克 制枇杷叶9克
小茴香6克 橘核丸9克

方解：苏梗、苏子、海浮石、橘红散寒下气宽中，定喘消痰。冬瓜子、制枇杷叶消痰止咳。荔枝核、小茴香、橘核丸暖下元祛寒气，行气活血软坚。川通草引热下行而利小便。

二诊：

症候：咳嗽止，右睾丸坠痛已轻。脉细数。舌质红，苔薄黄。

处方：按前方去苏子 海浮石 加炒竹茹 制半夏各6克，以降逆化痰止咳

杨某某，男，22岁。

病因：湿热蕴结。

辨证：疝气（颓疝）。

症候：发热，发冷，喉间有痰。阴囊肿大，少腹作痛，痰多，不思饮食。脉细数。舌红，苔黄。

治法：散风清热，理气化湿。

处方：连翘6克 通草3克 山楂炭9克 银花6克 橘核9克
荷梗6克 桑叶6克 炒赤芍6克 蒲公英9克 白蒺藜9克
大贝母6克 薄荷3克 焦苡米6克

方解：银花、连翘、桑叶、薄荷清热散风解毒。白蒺藜平肝散风。蒲公英清热散结消肿。大贝母、赤芍、焦苡米、通草清热利湿，祛痰散结。荷梗升清通气。山楂炭理气消积。橘核理气散结止痛。

许某某，男，41岁。

辨证：疝气（颓疝）。

病因：湿热下注，风寒外束

症候：左睾痛坠，全身酸痛，疲乏，头晕作痛。脉弦滑。舌根苔黄腻中裂。

治法：清热化湿，散风祛寒。

处方：云茯苓9克 丝瓜络6克 陈皮丝6克 焦苡米12克
忍冬藤9克 制半夏6克 桑枝9克 秦艽6克 杭甘菊4克
橘核丸9克包

方解：陈皮利气。茯苓、半夏除湿化痰。秦艽、桑枝、丝瓜络、忍冬藤散风通经活络利湿。杭菊、桔苈清热散风。焦苡米利湿健脾和胃。橘核丸行气活血，软坚祛寒。服三剂症消。

张某某，男，63岁。

辨证：疝气（颓疝）。

病因：肝郁乘脾、湿热下注。

症候：右侧阴囊、睾丸肿痛，少腹攻痛，口干，纳少，作吐。脉虚大。舌质红，苔黄。

治法：平肝健脾，清热化湿

处方：炒莢连3克 蒺藜9克 益元散9克包煎 杭白芍6克
焦稻芽12克 猪赤苓各9克 瞿麦9克 川通草3克 伏龙肝30克
大腹皮9克 川石斛6克

方解：炒萸连清泻肝火，行气解郁。杭白芍伐肝安脾。薏麦、萹蓄利小便除湿热。川通草利湿引热下行。大腹皮下气行水。川石斛清热而益阴。焦稻芽健脾消食。益元散宁心清热利水。猪赤苓利湿热。伏龙肝降逆止呕。

王某某，男，20岁。

辨证：疝气（厥疝）

病因：因怒，肝郁气滞，寒邪客之。

症候：左侧睾丸坠痛肿大，脉细弦。舌质红，苔白。

治法：祛寒理气，舒肝解郁。

处方：苏梗6克 小茴香9克 炒赤芍6克 木香3克
炒橘核9克 青陈皮各3克 川楝子6克炒 荔枝核9克
橘核丸9克包煎 代代花3克 佛手3克

方解：本方以苏梗、木香理气和中止痛，炒赤芍、青陈皮活血破结，理气开郁。佛手、代代花舒肝理气解郁。小茴香、炒橘核、炒荔枝、橘核丸、川楝子行气活血止痛，软坚破瘀，治寒疝。

王某某，男，26岁。

辨证：疝气（厥疝）。

病因：肝气素郁，寒气内盛。

症候：左辜卒然肿大而痛数日。脉弦。舌红，苔薄白。

治法：理气散寒。

处方：苏梗6克 荔枝核6克 猪赤苓各6克 木香3克
台乌药6克 通草3克 小茴香6克 橘核6克 金铃子6克
香附6克 橘核丸9克

方解：苏梗、木香理气散寒止痛。金铃子、香附、乌药暖下元，行气治寒疝、小茴香、荔枝核、橘核、橘核丸暖肝肾，散寒止痛、解郁。猪赤苓、通草益脾助阳行水渗湿，引热下行。

二诊

服前方后左囊睾丸肿大见小。脉弦细，苔薄白。原方去台乌药、

金铃子、香附，加淡姜炭 3 克、大腹皮 9 克散寒止痛，消肿利水。又服 3 剂症消。

张某某，男，26 岁。

辨证：疝气（狐疝）。

病因：下元虚冷。

症候：右髂少腹引辜丸肿痛，腰痛下坠，大便次数多。囊肿时隐时现。脉细弦。舌质红，苔薄白。

治法：温通理气，散寒解郁。

处方：苏梗 6 克 焦建曲 12 克 胡芦巴 6 克 木香 6 克
淡姜炭 6 克 扁豆衣 9 克 淡吴萸 3 克 橘核 12 克 枳炒 炒小茴 6 克
荔枝核 9 克 制香附 6 克 枳炒 酒延胡索 6 克 山楂炭 9 克

方解：苏梗、木香理气散寒止痛。吴茱萸行气解郁。橘核、荔枝核理气散寒消肿。焦建曲、扁豆衣、山楂炭导滞消食，健脾行水。淡姜炭、炒小茴香温下元，散寒止痛。制香附、酒延胡行气血散郁止痛。胡芦巴暖丹田，壮元阳，治虚冷疝瘕。服三剂而瘕。

任某某，男，34 岁。

辨证：疝气（狐疝）。

病因：下元虚冷。

症候：右侧少腹痛引及辜囊肿痛，卧时则症减疝入腹中，立时则下注囊中。痛连腰尻。脉细。舌质红，苔薄白。

治法：温中理气散寒。

处方：苏梗 6 克 炒橘核 9 克 大腹皮 6 克 广木香 3 克
荔枝核 9 克 炒 代代花 3 克 吴茱萸 3 克 小茴香 9 克 佛手 3 克
淡姜炭 3 克 橘核丸 9 克包煎

方解：苏梗、木香理气散寒，止痛。佛手、代代花疏肝理气开郁。大腹皮消胀利水。淡姜炭温经散寒燥湿。炒橘核、荔枝核、小茴香、橘核丸温通理气，散寒疝气。淡吴茱萸温中下气解郁，逐风寒治狐疝。

白某某,男,46岁。

辨证:疝气(冲疝)。

病因:素有疝气,遇寒即发。

症候:右睾丸肿痛,打呃,脘堵,腹痛。脉细弦。舌质红,苔微白。

治法:散寒疏气。

处方:苏梗6克 广木香3克 焦稻芽15克 山楂炭6克
建曲炭9克 大腹皮9克 川楝子6克 炒橘核6克 荔枝核9克炒
小茴香9克炒 橘核丸9克包冲服

方解:苏梗散寒以温通而治痛。焦稻芽、山楂炭、建曲炭、大腹皮和胃补中,调肠胃、利小便。川楝子舒肝行气以治疝痛。荔枝核、橘核散滞气,辟寒邪,止痛治睾丸肿痛。小茴香暖丹田,疗小肠冷积。橘核丸(橘核、川楝子、海藻、海带、昆布、核仁、桂心、厚朴、枳实、延胡索、木通、木香)行气血,导湿祛寒散结,行木软坚。

刘某某,男,30岁。

辨证:疝气(冲疝)。

病因:寒气郁结上攻。

症候:少腹抽痛,疝气上冲,腹鸣攻痛,足跟痛,恙经叁年。脉细弦。舌质红,苔薄黄。

治法:祛寒暖下,理气化郁。

处方:苏梗6克 小茴香9克 杜仲炭8克 广木香3克
炒橘核9克 制香附6克 云茯苓9克 荔枝核9克 橘核丸9克
沉香曲6克 肉桂丸3克包冲吞 吴茱萸6克 川楝子9克

方解:苏梗、木香理气和中,祛寒止痛。云茯苓宁心助阳渗湿。沉香曲、小茴香、制香附开肝郁,温中散寒下气。炒橘核、荔枝核、橘核丸温下元散结而理气治疝。杜仲炭、肉桂丸强腰膝、助肾以止腰痛足跟痛。吴茱萸行气解郁,治厥气上逆攻痛。川楝子舒肝理气治心腹痛。为治疝要药。

二诊

症候：少腹遇寒仍抽痛，气冲已轻，腹鸣攻痛亦轻，腰痛、足跟痛均减，二便不畅。脉细弦。舌质红，苔薄黄。

处方：按原方去橘核 沉香曲 加车前子6克 火麻仁9克

方解：车前子渗湿利溲。火麻仁润肠通便。

三诊

症候：少腹抽痛，腹鸣攻痛均减，气冲、腰痛，足跟痛均止。脉细。舌质红，苔微黄。

《陆观虎医案》

赵海仙

七疝统属于肝，肝木络于阴器。曾患疝气，已延数年，时愈时发。岁末因劳发疝。疝发受风，肿自下起，渐至高原。咳逆气短。舌苔浮白。脉象左大于右。症情若此，恐成肺胀。当法开太阳之表，获效乃吉。

麻黄三分 杭白芍二钱 制半夏二钱 杏仁一钱五分
粉甘草五分 北细辛三分 淡干姜五分，五味子同拌 川桂枝一钱
建泽泻一钱 鲜枇杷叶三片，去毛布包

次日复诊：

去麻黄 加川朴八分 赤茯苓三钱 熟附片一钱 十枣丸五分
九宝丹一粒

《寿石轩医案》

施今墨

韦某某，男，17岁。左阴囊肿大已八日，按之作痛，卧时可以回缩，站立行动则下坠增大。经同仁医院诊断为腹疝，本人不欲手术，求诊中医治疗。舌苔正常，六脉沉弦。

辨证立法：疝气多属虚寒，盖寒主收引，引抽作痛；虚则气陷故下坠也。脉沉为里，弦则肝气不行，宜于补中益气汤加减治之。

处方：北柴胡 5 克 炙升麻 3 克 盐橘核 6 克 杭白芍 10 克
炙甘草 3 克 盐荔枝 6 克 米党参 6 克 炙黄芪 12 克 野於术 5 克
陈广皮 6 克 酒当归 10 克 川楝子 10 克 醋炒 醋元胡 10 克
台乌药 6 克 醋青皮 5 克

二诊：服药八剂，左阴囊已不下坠，亦未作痛，希予丸方巩固，以防再发

处方：每日早晚服补中益气丸各 10 克，午服茴香橘核丸 6 克，连服二十日。

《施今墨临床经验集》

脱疽

高锦庭

张某某，脱疽一症，古人谓五败之所。五败云何？内由五脏，外则筋骨血肉皮是也。偏中十年之体，亏损可知，所赖者饮食如常，药饵纳补。兹乃痛楚日增，势必伤胃纳减，为可虑耳。

八珍汤

二诊：诸疮痛痒，皆属心火。心为主血之藏，营阴素耗者，不能灌溉络脉，痛之所由来也。左脉似嫌太旺，痛来夜卧不安，须用归脾加减。幸勿性躁，性躁则阴火生。

黑归脾汤加黄柏 川连炒枣仁

三诊：疽疡黑腐，五指皆脱，足跗新肉亦见渐有敛意。当此气血重伤之后，自须营卫兼顾，俾得阴阳交泰。但草木之功，仅能以偏补偏，欲求恒久安和，须赖息心静养。所谓静能息火，静则阴生也。慎之。

大补阴汤 黄芪 党参

《谦益斋外科医案》

王旭高

吴。足大指属厥阴肝经，太阴脾经由此起。今足大指干烂，乃肝经血枯，脾经湿热也。延及数月，防成脱疽。兼上唇麻木，亦脾虚风动。殊非易治。

革藓 当归 牛膝 枸杞子 苡仁 丹参 川断 茯苓 桑枝

《王旭高临证医案》

臃疮

江应宿

金上舍患两臃疮赤痛痒，疮口无数，脓水淋漓，四畔小白黄水泡如铺黍状，上至三里，下至胫，殊苦污浊沾裳袜。予得方生所验之方，用猪板油熔化一两，铅粉、黄蜡各五钱，收起，用时摊在油单纸上，少加轻粉扫面（妙方），先以花椒葱水洗洗净疮口，拭干贴这，外用绢包裹，旬日愈。

予自昔患外臃，肿溃出紫黑血，屡月不愈，疮口多歧，脓紫痛楚。得族叔授一方，以嫩白松香一两，乳没各五分，同入铜铫溶化，倾水中候冷，研为细末，用真麻油调（妙方），取箬一斤，大如疮口，用针刺小眼无算，将药涂箬皮外，隔箬贴疮，洗如前法，更用油纸盖在药上，以软帛包裹，旬日愈。此方生肌止痛，神良，勿以浅近而忽之。

《名医类案》

薛立斋

一妇人患臃疮，因入朝步履劳复。恶寒发热，倦怠懒食而疮出血。此元气虚而不能摄血归经也。用补中益气汤而愈。

陶九成曰：辛酉夏，余足疡发于外臃。初甚微，其后浸淫，涉秋

徂冬不良于行。凡敷膏濯之剂当试略尽，痛痒杂作，大妨应酬。一日友人俞和父见过怪其蹢躅。举以告之，和父笑曰：吾能三日已此疾。法当先以淡藿水涤疮口，浥干，次用局方驻车丸研极细加乳香少许，干糝之，无不立效。如其说，用之数日，良愈。盖驻车丸本治血痢滞下，而此疮亦由气血凝滞所成也。（芥东野语）

《续名医类案》

张子和

小渠袁三因强人忽人家，伤其两胁，外臃作疮，数年不已，脓水常涓涓然。但饮冷则疮间冷水浸淫而出，凝为湿疮。张曰：尔中焦当有绿水二三升，凝数掬。袁曰：何也？曰：当被盗时感惊，气入腹，惊则胆伤，足少阳经也。兼两外臃皆少阳之部，此胆之甲木受邪，甲木色青当有绿水，少阳在中焦，如渎。即伏惊凝在中焦，饮冷水，咽为惊凝所阻，水随经而旁入疮中，故饮水则疮中水出。乃上涌寒痰，汗如流水，次下绿水果二三升，一夕而痂干矣。

《续名医类案》

薛立斋

一室女，年十七，腿外臃忽肿起一红点作痒，搔破，日日鲜血如注及飞小虫甚多。审其由，每先寒热两耳下或结核。盖外臃、耳下俱属胆经，胆为肝之腑，肝主风，热生虫，血得风而妄行，肝火旺而血出，其肝胆阴阳俱虚矣。凡病虚则补其母，用六味丸滋肾水以生肝木；四物、柴胡、山梔、钩藤生肝血以抑风热而瘥。

陈湖陆懋诚素因阴虚，过饮入房，发热腿痛，似臃疮。用发表之剂，两腿肿胀，热气如雾，欲发疮，脉皆洪数，两尺尤大。此属足三阴虚，酒湿所乘，元气损而邪益甚耳。用十全大补加山药、山萸、附子，一剂脉症顿退；去附子，又二剂全愈。

李绛记武元衡相国在西川且苦胫疮，熈痛不可堪，百医无效。

及到京城，呼供奉石礮等数人，疗治无益。有厅吏上此方，用之更瘥。其方云：疗多年恶疮百方不差或痛痒走不已者，并烂捣马齿苋敷上，不过三两度愈。

章字泰传治臃疮方，六郎乳母试之，神效。松香一两，轻粉三钱，乳香五钱，细茶五钱，四味共打成膏。先将葱头、花椒煎汤熏洗净，用布摊膏，厚贴患处，以绢缚定，黄水流尽，烂肉生肌。

陈仪部年逾五十两臃生疮，日久不愈。饮食失节，或劳苦，或服渗利消毒之剂愈甚。脾脉大而无力。此脾虚而无湿热也。以补中益气汤，数剂少愈；更以六君子汤加苍术、升麻、神曲治之而愈。尝治下部生疮，痒痛或发寒热，或脚气肿痛，以人参败毒散加槟榔、紫苏、苍术、黄柏，并效。久不愈者，以四生散治之，愈后以补肾丸补之，庶不再发矣。

槎庵小乘云：臃疮以淡藿水涤疮口，浥干，次用局方驻车丸研极细，加乳香少许，干掺之，无不立效。

王洪绪治马悠也，左足背连小腿转弯处，初因汤毒而成烂腿三十余年。其肿如斗，孔可容拳，有时出血，以布围填塞，否则空痛。时年七十有四。令以老蟾破腹身，刺数孔以肚杂填患孔，蟾身覆之。早晚煎葱、椒汤温洗一次，以蟾易贴，用醒消丸早晚二服。三日后取地丁、大力、鲜草捣烂填孔，外贴为乌金膏。日服醒消丸，其四围硬块出水处以嫩膏加五美散敷。其发痒者，以白花膏贴。内有硬块如石者，以生商陆捣烂涂。孔内出血时，先以参三七末掺之，然后填药。如此二十余日肿退痒止块平，黑肉渐红活，孔亦收浅。以止草填，日以五宝散掺，仍贴乌金膏。因老人精神不衰，饮食不减，始终不用补而收功。

《续名医类案》

蒋仲芳

胡明甫，年五十余，患臃疮三载，沿皮瘙痒，微肿色紫黑。用膏

药盖之则流水，鞋袜尽湿。去膏药即又燥烈，痒痛难忍。此湿热下流也。人但知燥湿清热解毒，而不知湿热之原从脾家下陷耳。遂用补中益气汤升举其气，更加黄柏清热，苍术燥湿，茯苓、泽泻利水。盖治湿不利小便，非其治也。外用陈石灰调侧柏汁，以燥湿散瘀清热，稍加火酒为从治敷之。明日疮干，数日而愈。

《续名医类案》

王埤

臃疮外症，极为缠绵。幼时尝见患此者，脓臭浸淫，经年溃烂。治之法亦颇多，而奏效殊非易事。

辛亥岁，家君曾患此病。洗敷百施，时发时愈。继有县之西堡村多福寺僧，名钟灵者，祖传外科数世矣，极有把握，乃请治之。钟灵来视，则曰，此臃疮也，最畏散药、膏药。若用膏散，必致增盛。生豆腐最好。但切薄片，用暖水泡过，日日更易，不半月必愈矣。家父如言贴之，果克期而愈。

后余亦因磕伤发溃，渐致成此疮，亦用豆腐贴之，口渐敛而痛时作，又有邻人教以黄腊化融去尽烟，加松香末少许，摊竹纸上贴之，果痛止而愈。

以不紧要之药，治最缠绵之病，功如反掌。乃药病贵相投，不在贵贱也。故志之。

《碎花窗医案》

丁泽周

朱先生。始由腰痛起见，继则形瘦骨立，内热口燥，神志不宁，谵语郑声，舌质红，苔糙黄无津，脉象细数无神。臃疮腐烂，气虚阴液枯竭，神不守舒。《经》云：“九候虽调，形内已脱难治”，况脉象细数无神乎？颇虑气血涣散，阴阳脱离之兆，勉拟益气生津，敛阳安神，尽人力以冀天眷，尚希明正。

吉林人参另煎汁冲，钱半 煅牡蛎四钱 花龙骨三钱 朱茯神三钱
生黄芪三钱 川石斛三钱 川象贝各二钱 炙远志一钱
北秫米包，三钱 浮小麦四钱

《丁甘仁医案续编》

张山雷

胡左，高年宿恙，臃疮无水而痒，是血虚也，不宜理湿。

大生地 9 克 生龟板 12 克 生鳖甲 9 克 川柏，炒 3 克
炒茅术 2.4 克 丹皮炒，6 克 焦栀子 4.5 克 白鲜皮 9 克
全当归 4.5 克 银花 4.5 克 焦米仁 9 克

《张山雷专辑》

破伤风

万密斋

一妇人年四十余，形黑而瘠，性躁急。先患左腿发内痈，溃后起坐。万曰：疮口未合，当禁风。其妇自恃强健，不听。忽一日眩仆，目眨口喎，身反张，手足挛曲，亟求治。曰：此破伤风，瘥病也。用桂枝汤加熟附子、黄耆、防风一剂而病减，再服十全大补汤三剂而安。

胡念庵曰：一人因茎髻一拔，忽然肿起，不食。有友人询余，余曰：此破伤风也。速灸为妙。疡医认作髻疔，治以寒凉，不数日发瘥而死。

有男子年六十一，脚肿生疮，忽食猪肉，不安。医以药利之，稍愈。时出外中风汗出，头面暴肿，起紫黑色，多睡，耳轮上有浮泡小疮，黄汁出。乃与小续命汤加羌活一倍服之，遂愈。

薛立斋云一男子背疮未敛，以膏药剪孔贴之，患破伤风症而殁。此先失于内补，外邪袭其虚耳。余见此症贴膏药剪孔，欲其通气而反患破伤风，搽敛药生肌欲其收口而反助其余毒，以致殁者多

矣，可不慎哉！

一男子风袭疮口，牙关紧急，腰背反张。以玉真散一服而愈，仍以托里药而敛。

《续名医类案》

薛立斋

一妇人臀痛将愈，患破伤风，发热搐搦，脉浮数。以当归地黄汤治之，不信。乃服发散败毒药，果甚，始信，服数剂而痊。是症须分表里，别虚实，不可概治。原病式云：破伤风因疮热甚，郁结营卫，不得宣通，怫热遍身，故多白痴。是时疮口闭塞，气难通泄，热甚则生风也。不已，则表传於里，但有风热微甚兼化，故殊异矣。大凡风热燥甚，怫郁在表而里气尚平者，善伸数欠，筋脉拘急，时或恶寒，或筋惕而搐，脉浮数而弦者，宜以辛热治风之药开冲结滞，是与伤寒怫郁而以麻黄汤辛热发散者同也。凡用辛热，宜以寒药佐之，则免致药中病而风热转甚也。如治伤寒发热用麻黄、桂枝加黄芩、石膏、知母之类是也。或以甘草、滑石、葱豉，寒药发散甚妙。若表不已，渐入里，里又未甚而脉在肌肉者，宜以退风热、开结滞之寒药调之，或微加治风辛热亦得，犹伤寒半表半里，以小柴胡和解之意也。若里热已甚，舌强口噤，项背反张，惊搐惕搦，涎唾稠粘，胸腹满塞，或便溺闭结，或时汗出，脉洪数而弦，此由风热郁甚於里而表热稍罢，则腠理疏泄而心火热甚，故汗出也。法宜除风散结，寒药下之，后以退风热、开郁滞之寒药调之，热退结散则风自愈矣。凡治此亦宜按摩、导引及以药干开牙关，勿令口噤，使粥药不得下也。

治破伤风及金刃伤、打扑伤损，方名玉真散，本事必用，两方皆有，但人不知。张叔潜知府云：此主极奇，居官不可阙。是斋宰清流日以授直厅医，救欲死者数人，奇甚。用天南星、防风二味等分为末，破伤风以药敷贴疮口，然后以温酒调下一钱，如牙关紧急，角弓反张，用药二钱，童子小便调下。或因斗殴相打，内有伤损，以药二

钱，温酒调下。打伤至死，但心头微温，以童子小便灌下二钱，并进三服。天南星为防风所制，服之不麻。

按：《卫生宝鉴》以此方兼治狂犬所伤并诸犬咬，神效。

《续名医类案》

郑重光

贡姓武弁，年二十余，取耳时为同辈所戏，竟以铜挖刺通耳底，流血不止。延外科治耳，初不以为楚，仍行走街衢如常，旬日即头痛。又延内科治之益甚。迎余往治，则头痛如破，身体僵直，烦躁面赤，脉弦而紧，仰卧于床，口流脓血。余沉思良久，以为此必破伤风也。检前所服之药，皆石膏、栀子、芩、连，作火头痛治。病人云：“口吐脓血，不是喉出，不知从何而来？”予曰：“此的系破伤风也。脑中脓血，流入鼻内窍而渗于口中，非由咯吐而出也。破脑伤风颈强已属不治，此幸未柔汗厥冷。”用小续命汤重加桂枝、附子、干姜，去黄芩。一剂微汗，头痛减半，两剂颈柔，十数剂后，耳内结疤，脑涎亦不流，但其耳囊然无闻矣。

吴瞻大兄冬月足背生疮，久溃不敛，一医者令用刀去顽皮，并无新伤。春日苦寒，跣足就医，又敷以冷膏，随即作痒，更乘舆河畔，迎面大风，遂遍身麻痒，面肿唇紫，舌强语涩，俨似中风。先医未辨何证，杂用风火痰药，服后呕啰不止。余至，诊脉则弦紧，面赤舌紫，手冷多汗，乃肝经风病，定属患处刀伤，为风寒所袭，又兼冷膏外敷，证类破伤风，不宜缓纵。急用桂枝、赤芍、独活、细辛、附子、苍术、天麻、半夏、生姜，日投三剂，夜半患足方温，又二剂，微汗身轻，疮方知痛，如斯八剂乃愈。若非急治，缓则传里，不易医矣。

《素园医案》

王燕昌

常见疮口、伤口忽微青肿，捺之内如醇发之而，乃破伤风也。在

头为重，须速发汗，避风数日，若迟而见牙关不利，胸中有痰，则死矣。阳盛者发狂，阴盛者发迷。

按咸丰十年，豫省祥藩宪颧疮破伤风，头项皆肿，医误作大头瘟，夕服大黄，至半夜卒。一士取弓伤右眉，稍皮破，未血，五日后青肿，牙关不利。失治，数日危。

一村佣，二十余岁，因斗伤皮三日，头肿，逾墙上屋。用四物如天麻、南星、荆芥、防风，捉而灌之，厚被取汗愈。又学子十九岁，与同学戏，误伤右肩鱼尾，皮破未血，不肯避风，三日后青肿渐甚，牙关紧闭，服药亦未成汗，痰甚，心烦，几日成危证。彼此皆破伤风，一发狂，一不发狂。盖彼得汗愈，此无汗不愈，故凡伤肿须汗也。

《王氏医存》

翟竹亭

高阳周凤书之子，三岁余，与他儿戏耍，木棍误触头面，破皮出血甚多。六七日后，渐觉口噤，言语蹇涩。又二日，两手握固而难伸，角弓反张，饮食难进。邀余往治，六脉浮紧，此为破伤风也。余曰：“此证最为凶险，十中不过愈其四五。”周曰：“此证虽凶，情属父子，人事不忍不尽。乞先生念余年四十余，惟有此子，万一痊愈，没齿难忘。”怜其恳切，遂制一方，名曰逐风丹。全蝎一条，麝香0.3克，艾叶3克，蓖麻子2个，天麻5克，羌活6克，防风6克，荆芥5克，当归5克。共为细末，香油调抹患处，每日十余次，内服活血除风汤。外抹内服。二日口渐开能言，诸症皆轻，五日共服四帖，竟获十全。

活血除风汤

当归10克 黄芪10克 羌活6克 川芎6克 防风10克
生白芍10克 荆芥10克 全蝎2条 白芷6克 天麻5克 秦艽6克
生地10克 甘草6克 水煎服。

《湖岳村叟医案》

咬伤

薛立斋

一男子被犬伤，痛甚恶心。令急吮去毒血，隔蒜灸患处数壮，痛即止。更贴太乙膏，服玉真散而愈。

一男子风犬所伤，牙关紧急，不省人事。急针患处出毒血，更隔蒜灸，良久而醒。用太乙膏封贴，用玉真散二服，少愈。更以解数散二服而痊。若患重者，须先以苏合香丸灌之，后进汤药。

《针灸经》云：外邱穴治獠犬，即风犬所伤，发寒热，速灸三壮，更灸患处，立愈。春末夏初，狂犬咬人，痛过百日，得安终身，禁犬肉、蚕蛹，食此则发，不可救也。宜先去恶血，灸咬处十壮，明日以后灸一壮，百日乃止。忌酒七日，捣韭汁饮一、二盞。又方治狂犬伤，令人吮去恶血，灸百壮，神效。

治蛇人七窍，急以艾灸蛇尾。又法以刀破蛇尾少许，入花椒七粒，蛇自出。即用雄黄、朱砂末煎人参汤调灌之，内毒即解。山居人被蛇伤，急用溺洗咳处，拭干以艾灸之，立效。又方用独头大蒜切片置患处，以艾于蒜上灸之，每三壮换蒜，多灸为妙。

立斋治陈鉴，居庸关人，蝎螫手，疼痛彻心，顷刻揪痛至腋，寒热拘急，头痛恶心，此邪正二气相搏而然。以飞龙夺命凡涂患处及服止痛之药，俱不应。乃以隔蒜灸法灸之，遂愈。薛母及薛皆尝被螫，如前灸之，痛即止。薛母又尝为蜈蚣伤指，亦用前法而愈。凡蛇毒之类所伤，依此疗之，并效。本草谓蒜疗疮毒，有回生之功。

一猎户腿被狼咬，痛甚。治以乳香定痛散，不应。思至阴之下，血气凝结，药力难达。令隔蒜灸至五十余壮，疼痛悉去。仍以托里药及膏药贴之而愈。

王生被门犬伤腿，顷间揪痛至股。翌日牙关紧急，以玉真散治之不应，亦隔蒜灸三十余壮而苏。仍以玉真散及托里消毒药而愈。

立斋父尝睡间有虫入耳，痛聒。将生姜擦猫鼻，尿自出，取尿滴耳内，虫即出而愈。又百户张锦自谓耳内生疮，不时作痛，痛而欲死，痛止如故。诊其脉皆安静，谓非疮也。话间忽痛作，度其有虫入耳，令回急取猫尿滴耳，果出一臭虫，遂不复痛。或用麻油滴之，则虫死难出；或用炒芝麻枕之，则虫亦出，但俱不及猫尿之速也。（此案耳门亦收之，非重出也。恐患此者不知是虫使聒耳耳）

《华佗传》彭城夫人夜之厕，舐螫其手，呻呼无赖。佗令温汤近热，渍手其中，卒可得寐。但旁人数为易汤，汤令暖之，其旦即愈。

一僧为蛇伤，一脚溃烂，百药不愈。一游僧以新水数洗净腐败，见白筋，挹干，以白芷末入胆矾、麝香少许，掺之，恶水桶出，日日如此，一月平复。

苏轲光寓婺州城外魁星馆，有人书一方于壁间曰：此方治诸虫咬神妙。轲光屡以救人，皆验。其方用贝母为末，酒调，令病者量饮之，饮不得即止。顷之酒自伤处为水流出，水尽为度。却以贝母塞疮口，即愈。虽伤已死，但有微气可以下药者即活，神效不可信。

崇宁末年，陇西兵士暑月中无事，一卒跪立厅下，为蚯蚓所中，遂不救。后数日又有人被其毒，博识者教以先饮盐汤一杯，次以盐汤浸足乃愈。

《谭氏方》治蜘蛛咬遍身疮子，以葱一枚，去尖头，作孔将蚯蚓入葱叶中，紧捏两头，勿泄气，频摇动即化为水，点咬处，差。

孙真人以武德中六月得蠮螋尿疾，经五六日，觉心闷不佳，以他法治不愈。又有人教画地作蠮螋形，以刀子细细尽取蠮螋腹中土，就以唾和成泥涂之，再涂即愈。方知天下万物相感，莫晓其由矣。

《续名医类案》

薛立斋

一男子犬伤，青肿作痛，以萝卜汁调梔子末敷之，以四物汤加

柴胡、黄芩、花粉、川山甲，二剂少愈；更以托里散加生地、柴胡、红花，数剂而溃；再以托里健脾药而愈。

马铭鞠传治蜈蚣伤，取蜈蚣涂土，其痛立止，屡试神效。又一法用旧竹筋火中将头上烧黑，取下少许，研细敷患处，立愈。

《续名医类案》

余听鸿

后汉华元化刮骨疗毒，传为千古绝技。吾孟河马氏之刀针手法，素有家传。余见马日初前辈，治一小童，年十五岁，因割草为土灰蛇咬伤手背，漫肿干瘪，皮皱肉黑，臭不可近，黑色渐近尺泽。踵门求治。先生曰：肌肉已死，治亦无益，若再延下，黑至肩腋，毒攻人心，必死无疑，不如去之。先用参一两，煎汤与服，待半日许，饮以麻药，用红带两条，一扎上白肉处，一扎下黑肉处，俱扎紧，中空一寸，乃黑白交界之处，以锋刃将肉割开，上止血丹，割至露骨寸许，骨亦青黑，即用铍将骨四围铍断，取下其手，以止血生机药敷之，包以玉红膏，调理一月，其肉长复。此等手法，较之古人，亦无愧色，疡科中有几人能望其项背哉。

《余听鸿医案》

烫火伤

薛立斋

一男子孟冬火伤臂作痛，喘咳发热，此火毒克肺金之症。用人参平肺散治之，喘咳乃止。因劳又恶寒发热，此气血虚也。以八珍汤加桔梗、白芷治之而退。再加薄桂三分以助药势，温气血，坏肉溃之而愈。若初起焮赤作痛，用神效当归膏敷之，轻者自愈，重者自腐，生肌神效。或用侧柏叶末蜡油调敷，亦效。若发热作渴，小便赤色，其脉洪数而实者，用四物、茯苓、木通、生甘草、炒黄连。脉虽洪

数而虚者，用八珍。若患处不溃而色黯者，四君、芎、归、黄耆之类。若肉死已溃而不生肌者，用四君、黄耆、当归、炮姜。若愈后而恶寒，阳气未复也，急用十全大补汤，切勿用寒凉，反伤脾胃。

一男子因醉被汤伤腿，溃烂发热，作渴饮水，脉洪数而有力。此火毒为患，用生地、当归、芩、连、木通、葛根、甘草，十余剂诸症渐退。却用参、耆、术、草、芎、归、芍药、白芷、木瓜，新肉将完。因劳忽寒热，此气血虚而然也。仍用参耆之药加五味、枣仁而安。又月余而疮敛。

一男子火伤两臂焮痛，大小便不利，此火毒传於下焦，用生地、当归、白芍、黄连、木通、山栀、赤苓、甘草，一剂二便清利，其痛亦止。乃以四物、参、耆、白芷、甘草而坏肉去，又数剂而新肉生。

一妇人汤伤胸，大溃，两月不敛，脉大而无有力，口干发热，日晡益甚。此阴血虚，火毒乘之而为患耳。用四物汤加柴胡、丹皮，热退身凉；更用逍遥散加陈皮以养阴血、壮脾胃，腐肉去而新肉生。

凡汤荡火烧，痛不可忍，或溃烂，或恶疮，用松树皮剥下，阴干为细末，人轻粉少许，生油调稀敷。如敷不住，少绢帛缚定，即生痂，神妙不可言。然宜预先合下以备急。自剥落而薄者尤妙。李蕃安抚方用牛皮交人少汤于火上溶稠，狗毛剪碎，以胶和毛，摊软帛封之，直至痂脱不痛，吴内翰家婢夜炊，米釜翻，伤腿膝，以夜不敢白。比晓已溃烂，用此治之而愈。

《续名医类案》

薛立斋

冯氏子患火疮，骤用凉药敷贴，更加腹胀不食。以人参败毒散加木通、山栀治之，外以柏叶炒为末，麻油调搽渐愈。当用煮火汁上浮脂调银朱涂之，更效。若用凉药逼火毒入内，多致不救。

《续名医类案》

王洪绪

一妇小腿经烫，医用冰片研雪水敷之，不一刻腿肿如斗，痛极难忍。曰：幸在小腿，若腰腹间，逼毒入内，难挽回矣。以地榆研细，调油拂上，半刻痛止。再拂数次全愈。

一使女炭火烫足背，烂一孔，以伏龙肝散乳调敷，不三日而愈。

一孩被滚汤浇腹，因痛抓破皮。麻油拂上，一次痛止。以地榆末干糝破处，次日肌生，未破者全愈。

钱国宾曰：余欲之遂昌，宿旅次，闻隔房人呼痛，夜不安枕。次日问店主，对曰：小价提滚水一桶上楼与客洗面，其子拿盆后上，旧桶底脱，滚水灌子之头，今肿如斗，面目皆平，七日不食矣。余即往视，满室皆臭。用夏枯草一斤为末，以香油调肿处，厚厚敷上，即时此痛止臭，三日消肿，八日痂落。切忌食酱，面有黑斑。店主如言，药治而愈。后余回，其子叩谢。

曾世荣曰：元贞乙未春，有王千户来自广西，安船河下。一子仅二周，患头疼，服药、针灸不效，召曾诊视。色脉俱好，惟额上微红，以手法验之，大哭泪下。其母怒而见绍，曾亦置之勿论。但究心以病为事，再问当时得病之因，千户云：初在静江时，大风吹簷仆著便不快。曾曰：此疾若令细揣头上，便知其症。彼诺之。遂遣家人出外探亲，其父自抱，曾揣之，果有小篾签刺在卤上皮下，即簷签也。以酥油润透，用镊取出，痛定即安。若以匹妇饶舌而退，则及幼之心不搏矣。后之医流倘见婴儿色脉好而病者，用药不应，必有他故，宜推心推原，切勿拘泥可也。

富次律云：治竹木刺出，《圣惠方》曾用救一庄仆，极妙。其人有一脚心刺，痛楚濒死。黄昏敷药，痛尤甚，至四更视之，刺已出，遂安。用乌羊粪烂捣，水和罨伤处，厚敷之为佳。 《续名医类案》

燙瘡

安甯川君令媛，兩歲，冬月間因傭婦不慎，將沸水潑於其腿，潰爛如手掌大，啼哭不休。初延西醫治之，不能定痛，乃邀予診。予用“藤黃膏”塗之，旋即止痛。未及兩星期而長肉收口矣。

附“藤黃膏”方：

藤黃一兩 黃蠟一兩 麻油八兩

先將藤黃敲碎，置入麻油內，慢火煎之。俟藤黃枯焦，其汁盡出，即離火，濾去渣，將黃蠟置油中熔化，和勻成膏。置冷地出火毒，專治湯火傷。止痛生肌，效驗無匹。用時將膏塗患處，以油紙蓋之，外加布包紮，每日換一、二次。

《叢桂草堂醫案》

金傷

李用粹

周浦顧公鼎暮夜遭劫，左半身自頭至足計傷三十七刀，流血几干，筋骨斷折。百日以來濃血淋漓，肉腐皮黑，痛苦不堪，不能轉側。專科俱用滋陰養血，止痛生肌，反凝滯胃口，左寸關部位，刀傷淋漓，濃水迸流，大都虛微不堪尋按耳。蓋虛為陰傷，微為陽弱，陰陽失職，榮衛空虛，氣血衰殘，肌肉潰爛。《靈樞》云：衛氣者，所以溫分肉，而充皮毛，肥腠理，而司開合。故瘡口不收，皆由衛氣散失不能收斂耳。即有流膿宿血內藏其穴，能使陽和，生動火氣。周流自然，膿收瘡斂，長肉生肌旬月之間，可許步履如初，觀者咸疑予言為迂，為此危重，不過苟延時日，安得無恙，如果回春，則先生非李乃呂先生也。遂力担承用養營湯大劑，服二十帖瘡口盡斂，飲食亦進。至百帖即能起坐，復用藥酒及還少丹出入加減，四、五月后可以倚仗

行步。越明年便能却仗，迄今荣壮胜常，此亦偶然不可多得。

《旧德堂医案》

王燕昌

一命妇，夜被盗刀破十七创，右乳分裂。邓姓医者，以玉真散搽之，大效，并无痛楚。忽一日伤口皆痛，问之乃月信至也。用四物加小柴胡，疼止。计四十日，伤全愈。盖金疮苟无致命，皆易愈也。

明都统偕胜帅逐匪于马头桥，被匪扎伤左臂，落马获救。治用玉真散，月余而愈。

《王氏医存》

其它

东垣

一人前阴臊臭，又因连日饮酒，腹中不和，求治。曰：夫前阴者，足厥阴肝之脉络，循阴器出其挺末。凡臭者，心之所主，散入五方为五臭，人肝为臊。当于肝经中泻行间（行间在足大指、次指夹缝中间动脉），是治其本，后于心经中泻少冲，乃治其标。如恶针，当用药除之。酒者，气味俱伤，能生里之湿热，是风燥热合于下焦为邪，故《经》云下焦如渫，又云在下者引而竭之，酒是湿热之物，亦宜决前阴以去之。治以龙胆泻肝汤。又治阴邪热痒，柴胡稍二钱，泽泻二钱，车前子二钱，木通五分，生地黄、当归稍、草龙胆各三分，作一服水煎，以美膳压之。（凡下药皆宜食前服压法不特有桂附为然也）

《名医类案》

丹溪

一人，年少，玉茎挺长，肿而痿，皮塌常润，磨股不能行，二胁气上冲。先以小柴胡加黄连大剂行其湿热，次又加黄柏降其逆上之

气，挺肿渐收及半，但茎中有一坚块未消，遂以青皮为君，佐以散风之剂，为末服之，外以丝瓜汁调五味子末（一作五倍子），传之而愈。（外治法佳）

《名医类案》

吕沧州

陈枢府内人病，切其脉，左手弦而芤，余部皆和，即起密告陈曰：夫人病当阴中痛而出血，且少阴（心午）对化在玉泉（肾子），心或失宁则玉泉应心痛，痛则动血而与经水不相关，盖得之因内，大惊神慑而血菀。陈曰：公诚良医也，致病一如公言。乃为制益劳之剂，且纳药幽隐，再剂而愈。

一人色苍黑，年五十余，素善饮，忽玉茎坚挺，莫能沾裳，不能屈腰作揖，常以竹篦为弯弓状拦于玉茎之前，但小渡后即欲饮酒，否则气不相接，盖湿气流入厥阴经而然也。专治厥阴湿热而愈。

一宠妾，年三十余，凡交感则觉阴中隐痛，甚则出血。按其脉，两尺沉迟而涩。用补血散寒之剂不愈。因思药与病对，服而不效，恐未适至其所也。偶检《千金方》，用蛇床子散绵裹其中，二次遂愈。

一人在山亭裸体而卧，其阴茎被飞丝缠绕，阴头肿欲断。以威灵仙捣汁入水浸洗而愈。

一人茎头肿大如升，光如水泡。以二陈加升麻、青黛、牡蛎二剂而愈。

一少年新婚欲交媾，女子阻之，乃逆其意，遂阳痿不举者五七日。以秃笔头烧灰洒下二钱而起。

一妇产后，因子死，经断不行者半年。一日，少腹忽痛，阴户内有物如石硬，塞之而痛不禁。众医不识。青林曰：此石瘕病也。用四物加桃仁、大黄、三棱、槟榔、元胡索、附子、泽泻、血竭为汤，二剂而愈。

一人玉茎硬不痿，精流不竭，时如针刺，捏之则胀，乃为肾满漏

疾。用韭子、破故纸各一两，为末，每三钱，日三服即止。

《名医类案》

薛立斋

一妇人胸膈不利，内热作渴，饮食不甘，肢体倦怠，阴中闷痒，小便赤涩，此郁怒所致。用归脾加山梔、芎、归、芍药而愈。但内热晡热，用逍遥散加山梔亦愈。后因劳役发热，患处肿胀，小便仍涩，用补中益气加山梔、茯苓、丹皮而愈。

一妇人阴中突出如菌，四围肿痛，小便频数，内热晡热，似痒似痛，此肝脾郁结之病，盖肝火湿热而肿痛，脾虚下陷而重坠也。先以补中益气中益加山梔、茯苓、车前、青皮以清肝火升脾气，渐愈。更以归脾汤加山梔、茯苓、川芎调理，更以生猪脂和藜芦末，涂之而收。（外治法妙）

一妇人阴中挺出一条五寸许，闷痛重坠，水出淋漓，小便涩滞，夕与龙胆泻肝汤分利湿热，朝与补中益气汤升补脾气，诸症渐愈，再与归脾加山梔、茯苓、川芎、黄柏，间服调理而愈。后因劳役或怒气，下部湿痒，小水不利，仍用前药而愈。亦有尺许者，亦有生诸虫物者，用此法治之。

一妇人腐溃，脓水淋漓，肿痛寒热，小便赤涩，内热作渴，肢体倦怠，胸膈不利，饮食少思，三月余矣。薛以为肝脾亏损，用补中益气加柴胡、升麻、茯苓各一钱，炒梔二钱，数剂少愈，又与归脾加山梔、川芎、茯苓三十余剂，诸症悉退。惟内热尚在，再与逍遥散倍炒梔而愈。

一妇人素性急，阴内或痛，小便赤涩，怒则益甚，或发寒热（此肝经湿热所致），治以芎、归、炒梔、柴胡、芩、术、丹皮、泽泻、炒芍、车前、炒连、生甘草，数剂渐愈，乃去黄连、泽泻，数剂而痊。

一妇人素郁闷，阴内痛痒，不时出水，饮食少思，肢体倦怠（此肝脾气虚湿热下注）。用归脾加丹皮、山梔、芍药、柴胡、生甘草主之愈。

一妇人阴内痛痒，内热倦怠，饮食少思（此肝脾郁怒，元气亏损，湿热所致）。用参、芪、归、术、陈皮、柴胡、炒梔、车前、升麻、芍药、丹皮、茯苓，治之而愈。若阴中有虫痒痛，亦属肝木，以桃仁研，和雄黄末纳阴中以杀之，仍用清肝解郁。或以鸡肝纳之，取虫之法也。

一妇人每交接，出血作痛，发热口渴，欲呕，误服寒凉之药，前症益甚，不时作呕，饮食少思，形体日瘦，此症属肝火，而药复伤脾所致也。先用六君子加山梔（旧刻脱山梔）柴胡，脾胃健而诸症愈，又用加味道遥散而形气复。

一妇人每交接，则出血作痛，敷服皆凉血止痛之剂，不时出血甚多，此肝伤而不能藏血，脾伤而不能摄血也。用补中益气，济生归脾二汤而愈。或用熟艾帛裹入阴中。或用乱发青皮烧灰敷之，而血自止。若血出过多，而见他症，但用前药，调补肝脾，诸症悉愈。

一妇人阴门不闭，肿痛发热恶寒。用十全大补加五味四剂，肿消而敛。若初产肿胀，或厥痛而不闭者，当用加味道遥散。若肿既消而不闭，当用补中益气汤，切忌寒凉之剂。

一妇人脾胃素弱，兼有肝火，产后阴门肿痛，寒热作渴，呕吐不食，敷大黄等药，服驱利之剂，肿及于臀，虚症蜂起，此真气虚而邪气盛也。先用六君子以固脾胃，乃以补中益气以升阳气，不数剂而全愈。

一妇产患此失治，肿溃不已，形体消瘦，饮食少思，朝寒暮热，自汗盗汗半年矣。用补中益气加茯苓、半夏以健脾胃，脓水渐少，饮食渐进，用归脾汤解脾郁，五十余剂，元气复而愈。

恭己曰：余奉侍武庙汤药，劳役过甚，饮食失节，复兼怒气，次年春，茎中作痒，时出白津，时或痛甚，急以手紧捻方止（通），此肝脾之气虚也。服地黄丸及补中益气加黄柏、柴胡、山梔、茯苓、木通而愈。丁酉九月，又因劳役，小便淋沥，茎痒窍痛。仍服前汤加木通、茯苓、胆草、泽泻及地黄丸而愈。

司厅张检斋阴囊肿痛，时发寒热，若小腹作痛则茎出白津。用

小柴胡加山梔、胆草、茺莢、芍归而愈。

一男子阴肿大如升，核痛，医莫能治。捣马鞭草涂之愈。

一小儿阴囊忽虚肿痛，以生甘草调地龙粪涂之。

《名医类案》

李东垣

一人病痲风，满面连发须极痒，眉毛脱落，须用热水沃之稍缓，或砭刺亦缓。《风论》中云：夫痲者，荣卫热附，其气不消，故鼻柱坏而色败，皮肤痒溃，风寒客于脉面不去，名曰痲风。当刺其肿上（先刺），锐针刺其处，按出恶气，肿尽乃止。宜蔬食粝饭，用药当破血去热，升阳去痒，泻荣以辛冷散之，甘温升之，行阳明经，泻心火，补肺气，乃治之正也。升麻、连翘各六分，苏木、当归、全蝎、黄连、地龙、黄芪各三分，生黄芩四分，甘草五分，人参二分，生地黄四分，桃仁三枚，桔梗五分，麝香少许，胡桐泪一分，虻虫去翅足微炒，水蛭二个，炒令烟尽。（去子并碎，用石灰炒紫黄色，去灰用之。水蛭慎用，制不得法，入腹生子）。

右剉，除连翘另剉，胡桐泪研，白豆蔻二分为细末，二味另放，麝虻虫，水蛭三味为细末另放，外都作一服，水二盏，酒一匙，入连翘，煎至一盏至一盏六分，再入白豆蔻二味并麝等三味，再煎一二沸，去渣，稍热，早饭后午饭前服，忌酒湿面生冷硬物。

《名医类案》

张子和

一人病痲风，十余年，曰：足有汗，尚可治。当发汗，其汗当臭，涎当腥。以三圣散吐之。大吐，汗果臭，痰胜如鱼涎。次以舟车丸、浚川散下五七次，数服乃安。

一人病风，爬搔不已，眉毛脱落。刺其面，大出血如墨，刺三次，血变色，每刺，自额至颐，钜针上下俱刺，间日一次，至二十余日方

已。

《名医类案》

吕沧洲

一女子病癆，診其脉来疾去迟，上虚下实，盖得之酒醉接内而风毒乘之。今虽发秃眉堕，然鼻根幸未陷，肌肉幸未死。遂以防风通圣散加以下药，下瘀血数升及虫秽青黑等物，并进蕲蛇、长松等汤丸，复佐以雄黄、大枫子油作膏摩之，逾月瘥。

《名医类案》

丹溪

一贫妇，寡居病癆。曰：是疾世号难治者，不守禁忌耳。是贫而无厚味，寡而无欲，庶几可疗也。即自具药治之，后复投四物汤数百剂，遂不发动。

一人面浮油光，微肿色变，眉脱痒，二世癆风，死者三人。与醉仙散，出涎水如盆而愈。（辨度：此起以德案）

一人面肿，色变黑，燥痒，眉发脱落，手足皮燥，厚拆，痛痒无全肤，有时痒入骨髓，爬至血出，稍止复作，昼夜不眠。与醉仙丹、再造丸二药而愈。

一妇两足胫疮溃，眉落。与再造散一服，愈。年少不能断欲忌口，一年复发。其前二人不发者，亦非能如法调摄，由病得之未深，鼻柱未坏，疮未溃腐故耳。故人抱病，不可不早治也。

《名医类案》

罗谦甫

段库使，春初病大风，满面连颈极痒，眉已脱落，须以热汤沃之则稍缓，昼夜数次沃之，或砭刺亦缓。先师曰：脉风者，癆风也。荣卫热附，其气不清，故使鼻柱坏，皮肤色败。大风者，风寒客于脉而

不去。治之当刺其肿上，以脱针针其处，按出其恶气，肿尽乃止。泻心火补肺气。

释普明，齐州人。久止灵岩，晚游五台，得风疾，眉须俱堕，百骸腐溃，哀号苦楚。忽有异人教服长松，明不知识，复告之云：长松，生古松下，取根饵之，皮色如芥苳，长三五寸，味微苦，类人参，清香可受，无毒，服之益人，兼解诸虫毒。明采服旬日，毛发俱发，颜貌如故。今并代间土人多以长松杂甘草、干山药为汤，煎服甚佳。然本草及诸方书皆不载，独释慧祥作《清凉传》始序之。

泉州有客卢元钦，染大风，惟鼻根未倒。属端午，官取蚺蛇胆欲进，或言肉可治风，遂取一截蛇肉食之，三五日顿渐可，百日平夏。

商州有人患大风，家人患之，山中为起茅舍。有乌蛇坠酒缸中，病人不知，饮酒渐瘥。缸底见蛇骨，方知其由。

一僧得病，状如白癞，卒不成疮，但每旦取白皮一升许，如蛇蛻。医者谓多啖炙煿所致，与《局方》解毒雄黄丸三四服愈。

赵瞿病癞历年医不愈，乃赍粮送弃于山穴中，瞿自怨不幸，吁嗟叹泣。经月，有仙人经穴，见而哀之，具问其详。瞿知其异人，叩头自陈乞命。于是仙人取囊中药赐之，教其服百余日，疮愈，颜色悦，肌肤润。仙人再过视之，瞿谢活命之恩，乞遗其方。仙人曰：此是松脂，彼中极多，汝可炼服之。长服身转轻，力百倍，登危涉险终日不困，年百岁，齿不堕，发不落，夜卧常见有光如镜。

高骈镇维扬之岁，有术士之家延火烧数千户，主者录之，当死，临刑谓监刑者曰：某之愆，一死何以塞责。然某有薄枝，可以传授一人，俾其救济后人，死无恨矣。时骈延待方士如饥渴，监刑者即缓之，驰白于骈。骈召人亲，问之，曰：某无他术，唯善医大风。骈曰：何以核之？对曰：但于福田院选一最剧者，可以试之。遂如言，乃置患者于隙室中，饮以乳香酒数升则懵然无知，以利刀开其脑缝，挑出虫可盈掬，长仅二寸，然后以膏药封其疮口，别与药服之而更节其饮食动息之候，旬余疮尽愈。才一月，眉发已生，肌肉光净如不患

者。骈礼术士为上客。

真腊国人，寻常有病，多人水浸浴及频频洗头便自痊可。然多病癩者，比比道途间，土人虽与之同卧同食，亦不较。或谓此中风土有此疾，曾有国主患此疾，故人不之嫌。以愚意观之，往往好色之余便入水澡浴，故成此疾。闻土人色欲才毕，入水澡洗，其患癩者十死八九。亦有货药于市者，与中国不类，不知其为何物，更有一等师巫之属，与人行持，尤可笑（说选。江云南人，或因纵酒，居处半湿，或以盖酒瓮被以盖身，一夜遂成是疾者有之，不可不知也。）

《名医类案》

湿疮

费伯雄

某。风湿热兼浸两耳，疮痂破津，延蔓全身，更发瘡垒。宜清热消风。

荆芥穗一钱 淡黄芩一钱 六一散包三钱 牛蒡子炒三钱
生首乌切四钱 赤苓二钱 净蝉衣一钱 嫩苦参一钱 丹皮二钱
赤芍一钱 青防风一钱 桑叶十张

《费伯雄医案》

过铸

同邑殷君春乔馆于杭。余见其行走伛偻，询其患何证，曰四弯风也。询其服何药，曰服阳和汤，数十剂迄无效。余曰：“阳和汤非治风药也。四弯风本于肝阴亏损，虽有伏痰，非白芥子一味所能治。且姜、桂之性热而燥，多服则血液被劫，宜乎手足曲而废也。”余有亲串亦患四弯风，延洋医治不效。又延无锡大德桥治风医治之。大德桥医以治风名，未见其治愈一人，用刀刮刺出血甚多，筋无血养，遂致手弯曲而色转紫。殷来浙求治。余曰：“是非内外并治不可。若仅内治，

徐氏有云：即使见效，只愈其半耳。”遂用生黄芪、甘杞子各四两，当归五两，鲜赤首乌八两，舜莖草、川楝子、白芥子、苍耳子、制半夏、白术各二两，防风、侧柏叶各一两，秦艽、草薢各八钱研末，用酒炒，桑枝六两煎汤冷丸，日服四钱，桑枝汤送下。再用杏仁一两，硝六钱，白附子、南星、大贝母各五钱，轻粉三钱为末，以大枫子油捣和，日擦数次。不可间。又觅到结子树巅之蜂房，大如栲栳，取其外皮如槟榔片者，间日煎洗大足。小蜂房均可洗。两旬后手能伸直，稠水无而色转白，半载后始愈，愈后复发，再用前药服，擦至断根为止。

《过氏近诊医案》

丁泽周

黄 右。血虚生热生风，脾弱生湿，钮扣风焮红起粟作痒。治风先治血，血行风自灭也。

京赤芍二钱 白通草八分 苦参片钱半 肥玉竹三钱
肥知母三钱 鸡苏散包三钱 甘菊花三钱 黑芝麻三钱 小生地三钱
粉丹皮二钱 天花粉三钱 茯苓皮四钱

《丁甘仁医案续编》

章成之

舒幼。湿疹一身皆是，痒不可耐，口糜。凡皮肤病，用药清其肠胃一也；局部保持清洁二也。

苦参3克 地肤子3克 苍术3克 黄柏3克 牛膝5克
苡仁18克 草薢6克 冬瓜子皮各6克 银花6克 山梔皮9克

按：先生认为，风疹、湿疹一类皮肤病，在稚子多因胃肠不洁引起。此案用四妙散加苦参、地肤子、银花、梔皮等清热利湿。

卢幼。皮肤有湿疹者，如有热而小瘦短，慎防一身浮肿。

连翘9克 黄芩5克 荠菜花9克 嫩白薇5克 金银花9克
绿豆衣9克 苦参5克 冬葵子6克

按：病理学告诉我们，凡化脓性皮肤病等由链球菌感染引起的疾患，多能产生变态反应，而发生急性肾小球肾炎。先生的揭示，对临床医生有所助益。

《章次公医案》

冉雪峰

汉口蒋某，重庆人，在汉患浸淫疮。初起发现在心胸部分，渐浸淫至四肢、周身、头面，破皮流浊液，医治无效，剧则不寐不食，神志时或恍惚，外观情势颇急，初以为疮疥不置意，继乃大惧。时在抗日战争期间，日寇侵犯已逾南京，乃乘由汉直航重庆客轮入川，适予亦为轮客之一，病人闻予在轮，因请诊视。予曰勿恐，浸淫疮由四肢走向心胸者不治，由心胸走向四肢者可治，因热毒较重，蒸化变质。内服解毒撤热、消炎散结，稀释酷厉中药汤剂治之。方用：银花、连翘各三钱，栀子二钱五分，黄柏、丹皮各三钱，蒲公英四钱，土茯苓六钱，土木香、土牛膝各三钱，大黄一钱，日服汤药一剂，三日生疮处水干结疤，又三日疤渐剥落，由汉至重庆，历程不过十日，比到重庆，疮疤全落，欢欣曷似。

《冉雪峰医案》

陆观虎

李某某，女，42岁。

辨证：皮湿

病因：湿热流皮，痰滞气逆。

症候：肤痒起癣，咳嗽痰多，作喘，不闻香臭，鼻塞一年。月水未净，量少。脉细弦。舌质红，苔浮黄。

治法：利湿清热，化痰，佐以调经。

处方：前胡5克 大贝母6克 海浮石9克 白前5克
炒赤芍9克 玄胡索9克 冬瓜子皮各9克 苏子5克 益母草9克

生枇杷叶 6克 焦苡米 12克 茯苓皮 6克 焦稻芽 15克。

方解：前胡、白前降火消痰止喘，降气止嗽。苏子、海浮石下气定喘止嗽。焦苡米、焦稻芽健脾宽中。茯苓皮、冬瓜子皮渗湿消肿，止咳化痰。大贝母、炒赤芍，生枇杷叶散结化郁，宣肺化痰止嗽。玄胡索，益母草行血中气滞，气中血滞，治月经不调。

曹某某，女 40 岁。

辨证：皮湿。

病因：湿热流皮，风火郁结。

症候：皮肤发痒，起瘰、喉痛。脉细数。舌质红，苔黄白腻。

治法：散风热利湿。

处方：连翘 6克 大贝母 9克 薄公英 9克 金银花 9克
炒赤芍 6克 生甘草 2克 紫花地丁 5克 炒栀子 5克 金灯笼 5克
粉丹皮 5克 鲜茅根 30克。

方解：连翘、金银花清热解毒散风。蒲公英、紫花地丁清热解毒，消癰止痒。大贝母、炒赤芍、粉丹皮散结化瘀、清热化痰。栀子清三焦郁火。鲜茅根除伏热，消瘀血，利小便。金灯笼、生甘草清咽解毒止痛。

《陆观虎医案》

黄水疮

王三尊

次亡儿生数月，面患黄水疮。脂流处即害，遍治外科药不痊。予思解毒散瘀者，莫如大黄与紫花地丁。以二物煎浓汁，新笔蘸扫之，旋干旋扫，应手而愈。

《医权初编》

天泡疮

薛立斋

一儒者患天泡，色焮赤作痛，大便秘而不实。服祛风败毒等药，舌痛口干，脉浮而数。此邪气去而阴虚所致。用六味丸料加山梔、当归，四剂脉症顿退；又用八珍汤加山梔、丹皮，疮色渐白；后用四君加归芪而愈。

一儒者患之，误服祛风消毒之药，复伤元气，因劳役过度，内热口干，齿齦作痛，右关脉洪数而虚。此脾胃受伤而火动，用清胃散之类而愈。

一儒者患之，或成粒，或成片，或出水，脾肺脉俱洪数。此风邪所伤，先用荆防败毒散加草薢、钩藤，数剂渐愈，但口干内热；用四物加山梔、钩藤、银花、甘草节而愈。后遍身搔痒，内热口干，佐以六味丸而瘥。

一商人每劳役饮酒后则遍身生疮，服被动风败毒之剂，面目、胸背、臂肘结一块，如桃栗凹凸痒痛，脓水淋漓，气血虚甚，寒热往来，作渴痰涌。此湿热壅盛，元气虚而不能愈也。外敷当归膏，内服补阴八珍加草薢五钱并换肌消毒散加干葛、钩藤各一钱，二十余剂诸症渐退。仍以前药为主，佐以调理之剂，两月余气血复而疮愈。

一男子焮肿痛发热，服祛风清热药愈炽。诊其脉沉实，乃邪在内也。用防内通圣散一剂顿愈；又荆防败毒散二剂而安。夫此症虽属风热，当审表、里，治无误矣。

一小儿患此，焮痛发热，脉浮数。挑去毒水，以黄柏、滑石末敷之，更饮荆防败毒散二剂而愈。

一小儿焮赤发热，以黄柏、滑石末敷之，饮大连翘汤二剂少愈，更以金银花散而瘥。

毛阁老孙年十余岁，背侧患水泡疮数颗，发热脉数。此肺、胃经

风热所致，名曰天泡疮。遂以荆防败毒散加芩、连服之，外去毒水，以金黄散敷之，又四剂而愈。

杨文魁腹患此症及腰背焮痛，饮冷脉数，按之愈大。乃表里俱实也。以防风通圣散一剂，更敷金黄散，势减大半；再以荆防败毒散二剂而痊。

《续名医类案》

许豫和

张笠江兄子，七岁，发天泡疮，大如棋子，天寒发不透，数日而收。医用清凉解毒药，面目浮肿，肚腹膨胀，请予治。诊其脉沉细，身寒，四肢冷。予曰：“此风湿未解，结为肿胀。当以阳药化之。”用五苓加防风、生姜。四剂，愈。

天泡疮，大如白豆，或如棋子，皮薄，一包清水，擦破，水惹处即成疮。此脾、肺二家风湿。用平胃散加防风、腹皮、木通以治湿。外以新棉拭去毒水，三妙散干扑之，则易愈。若与丹疹同法，用表散之药，表气益虚，必至延蔓无已也。

《橡村治验》

杨梅疮

郑重光

瓜镇胡宅之内眷，隔幕诊脉，两尺弦数，左关单弦，独异他部，默不言病，似俗考医者。余因脉言病，谓两尺弦数，定为下部之痛，数则为热，必有血证，但不知为何病。彼家然后直告，谓一月前小便淋秘而痛，因其夫常宿青楼，疑为梅毒。疡医以斑蝥毒剂下之，致血大下而痛愈甚，经数医杂治，而病不减。非敢试医，因衰病不能直陈耳。余遂以脉辨证，弦者肝病，数者火证，少腹乃肝部，妇人肝经，内络廷孔者，尿孔之端也。郁怒生肝火，火循经而结于廷孔，所以初病

小便淋秘而痛。误行攻劫，以致益甚。因属隐疾，不便明言，以道遥散去白术，加生地黄、炒山栀、龙胆、木通，连进二剂，次日痛减。因复再招，遂以阴疮证书对问其夫，合病则治，否则当别延医也。其夫云的是此病，即以前方服十余剂，痛止。减去胆草、木通，加丹皮、白术、香附，十数剂而愈。

《素园医案》

周南

三元弥平次，中年之人，病久体弱，杨梅毒疮满于头面咽喉，先延外科疗治，久之耳鸣目盲，筋骨挛痛，外症毒势充斥内，又虚症蜂起。高氏致书属治，但余不长外科，仅为代庖之计，诊其脉沉细无力，此因治毒不顾其本元，以致变病百出，今当用且战且守之法，一日攻毒，两日调养气血。如此五日一大利，三日一小利；五日一大汗，三日一小汗。半月后疮痂渐脱，月余耳目之力亦觉稍复，诊其脉亦和缓，大毒已去，筋骨已利，但左手不能举高，左耳常鸣，目尚昏花。此皆虚候，惟宜大补精血，略兼解毒，连进数剂，得效甚捷。即以四物与六味相间，作汤作丸而成功。

山口清右卫门，年二十六岁。曾患毒疮，鼻破咽伤。今左咽常痛，略略不利。因服土茯苓甚多，四肢常冷，大便难，脉迟涩，寒在太阴、少阴矣。宜调养荣卫而兼导火之药。方以归、地调荣，芪、甘养卫，牛膝佐附子以导火下行，少加桔梗、银花为舟楫，使由上而下。六剂而咽利气顺，肢暖脉和，乃去附子而加麦冬、玄参、花粉，又五剂而咽鼻大利，又服六味地黄丸三十日而安。按：土茯苓《本单》谓其“健脾胃，祛风湿，治筋骨拘挛”，杨梅疮毒何以多服土茯苓反肢冷便难、脉涩，竟将成虚寒之症？似书所载，其功效大不相同，更见有多服以至筋骨挛痛，不能行动者。谅甘淡平之药必不有损于气血，然服至百斤，疮毒未愈，鲜不为害，疑信之际尚俟参究。

田中肋右卫门之母，四十五岁。形体清弱，脉小急疾，患毒疮三

年，常服土茯苓，时发时愈，月事渐少。今毒聚于喉，鼻咽亦介介然，如衣领紧扼之状，咽如梅核，左右鼻中常塞，语音不清，鼻梁肿高，左颌肿硬，两肩筋骨疼痛，不思饮食，药餌无效。此因传染毒气，服寒凉以伤正气，所以血虚经少，内热脉数也。其毒之聚于上焦者，皆在肺之部分，肺主气，气中之毒流连不解者，以所服攻毒之药多峻剂，徒伤脾气肝血，所以食减筋痛也。治之当于健脾养血之中加轻清芬芳之品，以解毒清火，庶或有当。方以逍遥散以治血虚内热，亦取其苓、术以健脾，加甘、桔以开肺道，桑白皮、金银花以解毒。服旬日痛减肿消，又旬日脉亦和缓，但沉细无力，久病体虚，脉固宜然。咽喉时或不利，仍以甘桔汤加玄参、麦冬、花粉滋养肺金，匝月而安。

《其慎集》

北山友松

一男患瘡疮，逾年不愈。状如残烛，脸肿溃脓。脉弱散而似滑，或弱数。

初用方：黄芪尾 人参各三钱 甘草节五分 当归 白芷 皂角刺各二钱

次用方：黄芪六钱 当归二钱 川芎 柴胡 生地黄 芍药 甘草节各二分 白芷二钱

终用方：人参败毒散去人参 加金银花防风 薏苡仁 连翘 黄柏 皂角刺 木瓜 木通

户田氏患鱼口，愈而结块，手足时发红点。脉实。

防风通圣散 去芒硝 石膏 加黄柏 木通 牛膝 红花 再去四味 倍防风 加大力子 蝉退

林氏患疮毒下疳，愈后肢体弱，两腿紧痛，缺盆肩井左右发数十块，或溃或愈，脉动而弱。

初用方：十六味流气饮加木瓜

次用方：疏经活血汤

次用方：四物汤加黄柏 木瓜 槟榔子 苍术

次用方：同方加黄芪 防风 杜仲 羌活 人参 牛膝 甘草 附子 黄柏 槟榔子 没药

终用方：当归拈痛汤加附子 细辛 干姜 防风 茯苓 山茱萸

《北山医案》

永富凤

有一男子病梅毒，两胫挛痛，不可行步，颌下肿起如梅核大，中气郁结，饮食不进，虚羸日甚一日，医与滋补之药数百日，益不可，其脉沉微，其腹皮逼脊，只熟按其心下，则到底痞硬。盖其肚里固有痼癖，为梅毒所胁，上逼入胸，乃与家方解毒，用大黄仅二分，微利日二行。数日后，心下见动物，腹气渐复，饮食有味，于是增大黄，每日四、五分，快利日三、四行，益利而益健。经四十余日，颌下核消，肌肤生肉，日行一、二里，经百余日复旧。

长门府一男子患下疳，修治不顺，如愈如不愈，荏苒经数月。秋间浴温泉，二十日毒气大发，骨节如刺，偏身肿胀，不能起作，遁遁还家。过十余旬，经三医师之手不治。其兄在赤关就余谋，于是舟楫一日，往问其疾。男子不出一室百余日，脉数气促，夜夜不睡，目光荧然，常怀悲愁，发乱面肿，溃烂如桃花新发，诊其腹脉，则脓汁涂手。乃作再造散六十钱、三黄汤二十帖与之，曰：“后十日间须服尽。”十日后，一人来乞药，且曰秽物日下六、七行。又经十日往再诊，病形半退，寤寐徐安。谓余曰：“今兹七月十六日，为亡父大祥忌，期已不远，得躬自办供养之事，非分之幸也，速治之术亦有之乎？”余曰有。乃作五宝丹，如法服之，二剂得愈。既面至祭期，拜僧封宾，陈佛饔，供香火，一无缺。事竣延余，喜甚。余曰：“吾子勿太甚悦，五宝丹可散毒，不可尽毒。今之得愈非全愈也，散耳，偏身

犹尚多毒，不日而再发。”不信。修养有间，居三十日，果然再发。于是遽服前方，从秋至冬，连延越春夏，渐得克平，而疮根坚硬者未散。余曰：“是余毒未尽也，宜益服前方。”服又一年，凡三十余月而痊愈。呜呼！梅湿浸润之毒，难急除如此！

一男子病梅毒，愈后十岁，膝下腐烂透骨，有时出骨片如柿核者，动作悉废。又三年，按其腹脉，坚实而无它异，乃与轻粉丸一剂，七日而服尽，咽喉肿满，日吐涎沫三、四合，齿龈断续，出黑血九日，后隔日进备急圆三分或五分，以取峻泻，每与数十行。经二十日，腐肉复旧，杖而步行。经三十日，日啖倍常，就耕稼如十余年前。

有一歌姬患肿毒，左肘肿起如馒头，偏身肉脱，脉数气息，咳嗽潮热，一与传尸相符。审问其病状，比年来骨节疼痛，腰背冷，月事不下，盖得之梅毒壅于经脉，干血攻中也。乃与湿漆丸壹钱。十余日，大便下臭秽物，偏身发紫疹，阴门突出，痒痛不可堪，而脉数气息急减半。于是作泻心汤与湿漆丸并进三十日，觉肌肤肉生，咳嗽潮热徐徐而退，约二月许而愈。

《漫游杂记》

中神琴溪

僧某，年三十余，患咳嗽潮热，声音哑，肌肤无润，有疮痕数点在颈头及手足。曰：“三年前发便毒时，未十日而自收，卒罹此患矣”。先生脉之，沉而细数，曰：“毒积于里深矣，今非轻粉、朱砂辈以攻之，命不逾岁。”僧素畏其猛剂，又有他医禁之，不听于先生。居月余又招，先生问之，又告如初。如此者三四，遂可之。即与七宝丸二十一钱，如法服之。反不腐烂，而吐出如黄水者日升许。十余日，而瞋眩稍止。时天行疫病，更感之即死。

一男子，年二十有七，患梅毒。来视之，总身黎黑而处处坟起，皮肤之间，隐然含疹，耳蝉鸣不能听，眼中赤，而隐涩不开，咳嗽吭吭，声为之哑，其脉虚细。即与大剂浮萍加川芎汤，门人问曰：“此汤

是发越表毒之剂耳，而斯人耳目既失用，按其腹有沉结，岂非里毒倍于表者耶？而今先生攻毒于表之轻者，而遗其里者何也？”曰：“何其器器，我有所见，当解疑于效验。”居一二日，果来报曰：“服药后，才觉恶心呕血块之大如鸡子者，后又泄泻紫黑血，目始清凉，脉亦甚和。”更用薰药，月余全差。

一男子年六十余，患梅毒，来请治于先生。先生诊之曰：“毒甚深矣，今不以轻粉朱砂辈治之，则后必悔。”其人惮而辞。后半年余，又来请，即诊之，其毒殆结瘤，先生为言曰：“毒非发于耳目，则必发于口鼻四肢，不急除之，恐为废人。”又不肯。比及三年，总身麻痹烦疼，不能转侧，目盲耳聋。其族来谢罪，且谓渠前不用先生教，故今果如此，死无日矣。不忍坐视其死，渠纵令不治，一蒙辱先生之治，死且无恨。万一得开生路，何惠如之，恳请不已。先生谓之曰：“今百倍于初所见，非一旦以其最峻者攻之，则病势不可挽屈。”乃与七宝丸八钱四分，朝六分，暮六分。服之七日，咽喉大肿，齿龈断切，吐出紫黑血及涎沫约二斗许。凡二十有七日，始得起。由是诸症稍退，但目未明，更与风流汤，期年复常。

富小路松原南某氏妻，年二十有三。初其未嫁也，家道严肃，而女亦谨慎。既嫁后一岁，身体疼痛，痛处无定，召师诊之。有梅毒之情，师异之。乃顾见其主人，额有疮痕，大如钱。随熟视之，面目及手足梅候备焉，因之所传染。即与龙门丸三十丸，取泻数行。而某氏未服师术，因谋之他医，医曰：“嗟呼！如此殆速其死耳，况琴溪氏丸散之峻烈，譬犹发火炮于腹内也。”某氏大惧，而谢罢。托之其医，医缓补逾月，屈伸不随，病势弥留。有某氏之好友信先生者，苦谕之，彼服其言，再趋师门，叩头谢罪曰：“向者蒙先生之庇也，未几为俗医所间沮，遂令病毒滋漫，若此今甚悔之，幸得蒙再顾先生之惠也。”恳请甚切也，因诊之，腰下至左膝肿起，按之痛，曰：“此处既酿脓。”便命熟生某行熨法。法详方函，且敷膏，凡五日脓全成，乃割放取其毒脓数日，约三升余，仍与浮萍汤兼龙门丸，每服十三丸，数日里

毒悉尽，眉宇方舒。

一少年传梅。惭父母闻之，且为世人所笑也，深秘之不言，因一友私买药治之。居一年，其毒入骨节，头痛身疼，犹托以为他病。已而两跟生翳，左不视物，于是因其家奴始告诸父母。父母闻大骇且惧，速轿之来请治。先生诊之曰：“毒今已痼于上部矣，非薰之以轻粉水银，恐失明。”病者有惮色，先生谕之以无害，强与其药，五日使人报曰：“口中腐烂，涎沫流滴，发热重语，总身含痂。”先生往视之，谓曰：“毋忧，此痂得尽发，而热亦自止。”与浮萍汤。越五日，又迓先生，先生往视之，其痂大发，热益炽，加之以微喘，其脉浮洪，先生叹曰：“此虽病毒拔于外，而精气不续于内，吾误虚实而投药，予罪不知所谢也。”三日赳死。

釜坐樵木街北石野长右卫门之家保，年三十余，患梅毒日久矣。自肛门至阴囊，其间溃作巨孔，腐脓淋漓。食饮颇禁，形体粹羸，而烦热盗汗等诸症日笃，治理百端，功皆不就。偶闻先生一代名医也，急延视之。其脉数而暗带力，日可治矣。与风流汤兼龙门丸，每日服三十九。百余日，毒尽除。唯以胸中彭满，饮食犹未进。先生谓病夫曰：“今疾既已矣，而独所以食之不进者，无他。佳味珍羞常不撤枕边，而饱厌其气之所致也。请屏之绝食三日，以开胞内。”病者慎守教，一日半饥不自堪，乃就食，则觉菜羹当肉味云。

一娼妇，患梅毒解后，独阴门腐烂，入其内者深二寸许。诸帖膏插药辄溺洗濯之，遂不能就其效。先生治以巴豆轻粉，亦延月无寸效。因作坐药，兼用之复故。

坐药方 轻粉

右一味作红假囊如食指大，长可二寸者，充药其内寸余，而以线扎住之，深蓄之阴内。三日外以汤熨小腹及腰以下而后换。

一男子，患梅疮，初多服轻粉而无效。尔后唯气上焰，头大重，时时昏冒而不能步，耳蝉鸣，舌强不能言，精神为之散乱，大便或秘或自利。先生脉之紧数，其腹拘急，曰：“此轻粉之所祟乎？夫轻粉

之于梅可谓神药，虽然，由是误生命者，亦不可胜数。此无他，在其剂之过不及耳。”即服黄连解毒汤兼江秋散，以去粉毒。

一少年，得梅毒。骨节烦疼，屈伸不便。先生诊视之曰：“毒未结，今尚可以攻之。”其人未服，更就他医治之。处三年而咽喉腐烂，鼻准崩颓，而缺骨如小豆大者，往往自口出，臭气不可近，声泄于鼻。于是来谢罪，且请治。脉力大衰，其口鼻四边毒最猛烈。即七宝丸二钱一分，如法服之。口烂环唇反肿，脓痰绵绵流出，或紫血粘胶，口中则以指括去之。已而水谷不下，其间三十余日，而始得吸粥。犹不至死者，盖以药气之养其精软，不可解也。于是更与驢骝丸十五粒，三日一次，或五日一次。二旬余，毒全除。先生问其人曰：“所吐涎沫几何也？”曰约可入斗云。

一男半二十，患下疳疮，其毒遂上攻左耳，聾聋，咽喉腐烂，喉外自发疮。嗣后咽中肿痛，米粒不能下久矣，唯待死耳。先生省之，且使门弟子诊之，谓曰：“二三子以何等之方治之？”皆曰七宝丸或龙门丸。先生笑曰：“不。尔等既泥于我规则焉，正以杀人而已。古谚曰，欲投鼠而忌器。斯人也，而有斯病，犹鼠之近器，岂可不追？然而粮道已绝，胃气急者久矣。二三子之言，虽当乎损其器，亦如之何？”先与半夏苦酒汤，衔而饮之，明日使人来曰：“咽痛如忘，肿亦随消。”居旬余，其腹颇当毒矣，因与桃仁解毒汤，行熏法，后以龙门丸下之，一二月耳亦有闻。

一娼妇二十岁，患梅，先生诊之。脉沉涩，而非全无力。颜色青黄，肌肉消瘦，咳唾白沫。额有一疮，其口流脓，滴滴然。阴门亦腐烂崩塌，臭气掩鼻。自谓曰：“贱妾始所请医药，皆如应而不应。羁迟数年，荏苒至此。病最奇，胸中郁闷，饮食减少，今愿委治于公，生死唯命。”先生即与凉膈散，并以七宝丸三分服之。居二三日，口为之将腐烂，因以龙门丸三十许丸下之。如此者十数次，口遂不烂，疾亦渐渐而愈。

王孟英

吴芸阁，因壮年时患梅疮，过服寒凉之药，疮虽愈，阳气伤残，虚寒病起，改投温补如金液丹、大造丸之类，始得获安。奈医者昧於药味为补偏救弊而设，漫无节制，率以为常，驯至血溢於上，便泻於下，食少痰多，喘逆碍卧，两足不能屈伸。童某犹云寒湿为患，进以苓姜术桂汤多剂，势益剧，且瘦渐少而色绿如胆汁，医皆不明其故。延孟英诊之，脉弦硬无情。曰：从前寒药戕阳，今则热药竭阴矣。胃中津液，皆灼炼以为痰，五脏咸失所养，而见证如上，水源欲绝，小瘦自然渐少，木火内焚，乃露东方之色，与章虚谷之所治暑结厥阴，用来复丹攻其邪从溺出而见深碧之色者相同，然彼实此虚，判分天壤，恐和缓再来，亦难为力矣，寻果歿。

《王氏医案》

费伯雄

某。湿火炽盛，广疮。

人中黄八分 炙冬花三钱 大杏仁三钱 大贝母三钱
粉丹皮一钱半 大力子二钱 夏枯草二钱半 马勃六分 瓜蒌皮三钱
土茯苓二两 金银花二钱 天花粉三钱 淡竹叶二十张

常服加减八珍化毒丹：

大濂珠二钱 真牛黄二钱 真琥珀二钱 大梅片二钱
飞朱砂一钱 真川贝三钱 人中白研极细末二钱

上药共研末，加白飞面四钱，水糊为丸。

某，下疳溃烂，服五剂。

丹皮三钱 银花四钱 生军三钱 玄明粉二钱 枳实一钱半
生甘草梢一钱半 大贝四钱 麦冬三钱 白鲜皮四钱 山栀三钱
连翘三钱 黄柏三钱

原注：凡杨梅结毒疮，可服少量三仙丹，继服利湿通便解毒数

剂，再用扶胃清化药善后。

泻下解毒方：

川军 玄明粉 升麻 琥珀屑 蛤粉 银花粉 青果

《费伯雄医案》

李 铎

上舍徐某，年五旬，脉息浮濡，时疮遍发未罢，肢体虚浮，是营卫不和，气血凝涩，兼受梅毒不洁之气而致。盖时疮之症，原有二因，乃气精而化也，气化者由传染而化，精化者由欲染而业。据按斯疮，显属气化之症，议调营和血，清热解毒，归灵内托散意，忌投丹药及峻攻之剂戕败胃气，变生结毒，便难速愈。

洋参 土茯苓 茅山术 白芍 当归身尾 生地 黄连 银花 胡麻 白鲜皮 浙贝母 草节

此方服七日，使内毒将尽，再用点药，忌鸡、鹅、羊肉、房事，继服二苓化毒汤，白茯苓、土茯苓、金银花各四钱，当归身尾二钱，紫草一钱，甘草节一钱，水酒各半煮，半月而愈。后以此法屡效。

附点药方

杏仁去皮去油取霜，一钱 胆矾 轻粉 明雄各八分 共研匀，搽疮上。

《医案偶存》

王燕昌

一武弁，年二十余岁，患杨梅疮月余，捺其肌肤，起指而色白，缓缓乃复红。此气血凝滞尚浅也。用旧方虾蟆一个（去肠杂），金银花一两，独蒜十余枚，水煎烂服，取汗。次日疮发全身，三日后结痂，七日痂落全愈。

按杨梅非如疔也，杨梅痘如痘也，杨梅结毒，毒聚成大颗烂也。詹珍圃得一方，用麻黄一钱，经霜紫背浮萍五钱，鳖鱼一个，重五六

两，去肠杂，同麻黄、浮萍共入罐，加水煮极烂食之，七日全愈，且不致肛疼。其法最妙。近刊《新选验方》用水银、枯白矾、皂矾，口津调之，手中揉治，亦妙。

杨梅初起，必口角生白核而烂，掌心似鹅掌癬；久则掌心与肘皆生厚癬如皴。若见此据，定是此疮。

《王氏医存》

马文植

海安，王左。袖口疳腐烂已停，新肌渐生，惟头昏耳鸣，夜不安寐，心阳肝火俱旺，口干喜饮。还宜养阴清心肝之热。

南沙参三钱 天麦冬各一钱五分 丹皮二钱 羚羊片一钱
黄柏一钱五分 玄参二钱五分 花粉二钱 甘草四分 川胡连各三分
茯神二钱五分 知母二钱五分 蔗浆冲，一杯

外上银青散、甘石散加牛黄。

复诊：疳痈渐见收敛，夜寐亦甜，惟耳尚鸣，头尚昏，毛际疮疹作痒，湿热未尽。还宜清解。

南沙参二钱 天麦冬各二钱 羚羊一钱 丹皮一钱五分 黄柏一钱
玄参一钱五分 甘草四分 花粉二钱 胡连一钱五分 泽泻一钱五分
龙胆草二钱 蔗浆一杯

常州，汪左。袖口疳内外俱肿，由小洩淋浊而起，延今百日，或痠或痒。当清肝渗湿热并进。

川胡连 草薢 泽泻 甘草 云苓 丹皮 黄柏盐水炒
知母盐水炒 车前子 木通 飞滑石

二诊：袖口疳痠痒俱减，肿亦较消。宗前法治。

原方加黑山栀、连翘。

三诊：肿势渐退，惟袖口破碎，余毒未清。仍宜前法进治。

熟军 龙胆草 丹皮 黄柏 荆芥 泽泻 土茯苓 粉草
胡黄连 赤芍 小生地 肥皂子 皂角子

江阴。王右。四肢疮毒，缠绵已久。值春生之令，藉毒上攻，头痛额骨肿胀，时恶寒热，防其结毒。急为清透。

当归 防风 丹皮 荆芥 僵蚕 玄参 粉草 赤芍 黑料豆 连翘 蝉衣 仙遗粮 菊花

二诊：头额胀痛已减，疮毒未平。尚宜清透。

原方去蝉衣，黑料豆，加龟版、丹参、北沙参。

三诊：疮毒缠绵已久，正气又弱。当扶正达邪。

川芎 陈皮 当归 黑料豆 大贝 茯苓 首乌 忍冬藤 法半夏 红枣 土茯苓 木瓜 党参 甘草

四诊：颜骨肿胀渐平，而痛未止，四肢骨节亦疼，毒邪走窜经络，正气极弱。还宜固本达邪。

川芎 法半夏 党参 银花 蚕沙 当归 木瓜 白芷 陈皮 稻豆 乌贼骨 桑枝 红枣 土茯苓 大贝

五诊：头颜肿痛已减。宗前法治。

原方去广皮，加秦艽。

六诊：正气渐复，毒邪渐解。宗前法进步治之。

党参 白术 当归 川芎 银花 白芷 陈皮 大贝 法半夏 黑料豆 土茯苓 桑枝 红枣

《外科集腋》

沈祖复

光绪庚子，先生与凌君伯升明经赴沪，寓大东轮船局。一日晚，鲍君郎州以包车迎先生至棋盘街妓寮诊病。有妓头痛如劈，顷刻无停，呼号万状，甚至昏眩倾仆。诸医用平肝息风不效。先生诊其脉洪，舌绛，曰：“此非肝阳，是毒火上炎也！下部阴处必碎烂无疑。”始则隐讳，继以实情相告。因嘱其女佣以骨簪卷棉花拭去其腐肉，用西黄、熊胆、猪胆汁调糊，少加冰片灌入。服方用犀角、鲜生地、银花、龙胆草、黄柏、生粉草，仙遗粮，大剂，一帖而头眩止，再帖而头

痛若失矣。

一妓云肛门作痛，自觉发碎。诊之见肛门两边白腐如大拇指，先生曰：“此泻毒未尽，留毒于肛旁，是名‘蝴蝶梅’也。”用大黄，犀角、川连、黄柏等服之，外掺银青散，数日而愈。

《医验随笔》

巢崇山

某。火湿下趋，淋浊溺管痛，下疳肿碎，茎皮掀赤，而火毒上攻，咽喉痛，龈肉肿、苔黄，脉小数。用龙胆泻肝汤治之。

龙胆草 细木通 黑山 芦根 薄荷 川连 枯芩 竹叶
牛蒡 玄参 制军 桔梗 知母 甘草梢

二诊：涤肠解毒，腑气已松，下疳退而未尽，脉小数，苔黄。仍守前法加减。

生军 肥知母 玄明粉 玄参心 人中黄 桔梗 鲜生地
连翘心 银花 天花粉 枯芩 滑石。

《玉壶仙馆外科医案》

赖松兰

下疳腐烂，久而不已，余毒上蒸，头面致发赤瘰，此绵花疮也。姑以凉泄解毒。

鲜生地 鲜首乌 炒丹皮 白鲜皮 金银花 黑山栀 连翘
滑石 草梢 川连 紫草

《赖松兰医案》

杜钟骏

辛亥革命后，予蛰居沪上，以三指禅消遣。吴赞臣中丞廷斌，亦流寓沪滨，曾患久咳失音，经予治愈，遂相往来。一日造予而请曰：予侄东升病势危笃，现在医院，西医断为不起，且云：如在医院，可

延两礼拜，如出院则一礼拜必死。先生高明，敢请到院一决。予辞以未便。吴公强之。往诊时，躺卧榻上，眼胞，鼻梁、颧骨悉肿而腐黑，满涂西药，模糊不可辨识，眼、鼻、上腭、牙龈处处流出秽脓，按其脉，细而带数，来去有神，乃告之曰：以见症论，万无生理；以脉神论，万无死理，鄙见如是，公自酌之。并询从前有无花柳传染，东升誓云：平生无二色。予慰之曰：不必辨论花柳有无，第此症实秽毒所致，感受传染之因姑不必究，中国医书论外症，大纲最要关键，以毒胜元气者死，元气胜毒者生。今脉神如常，两礼拜内决其无意外之变。即日移归本寓，为订托里消毒散，重用参、芪、佐以结毒紫金丹，汤丸并进，外以猪蹄汤洗之，以去秽毒；又以生肌玉红膏调珠黄散，摊于膏药之上贴之，两、三日来，秽水转为稠脓，下眼胞及颧骨、鼻梁两处，腐黑之肉随脓腐脱，溃烂之处，窅然而深，望之生骇，仅余印堂至鼻梁一条宽皮未经腐坏。又两、三日，腐烂凹处现出若石榴子之新肉，四围之肿日渐消退，当此之际，右肩连臂及缺盆卒发大痛，按之肿硬。予为之喜曰：面上之毒已移至肩臂矣，由险要移至不关重要之处，性命足保无虞。未久，肩臂肿处变软，知已成脓，以穿山甲、龟角刺加入前方，越日自溃，脓出盈碗，肿痛痛释，旋亦渐渐收口，面上溃烂之处业已长平，其未腐一条宽皮与新生之肉隔面不粘，直至百日，其口始完。此病自始至终，俱用托里消毒、归灵内托及归脾、八珍加黄芪、仙遗粮、金银花等出入加减，竟收全功。西医善用刀割，而对于面部肉薄骨多之处，亦无所施其伎俩，且西医重有形而略无形，对于此症，宜其束手。

镇江钱店夥诸姓者，因狎邪游，传染秽毒。病之始起，身发热，肾囊痒，流水，以衣揩之，衣湿十余件而水不止，心烦口渴，起而索饮，黑夜摸索间跌地，腕腿皆伤，次晨大肿。渡江来邗，延予至舟中诊视，肾囊之皮全变黑色，眼赤如鸠，且有血出。秽毒淫火，势若燎原。次日囊皮脱而睾丸亦腐。予辞以不治，他医亦不敢著手，复来恳予，且云：如肯下药，死亦无憾。惟时两肾子腐烂，仅余一裔，行将

尽矣。予亦从未见如此恶症，迫于彼母之固求，以犀角地黄汤加银花、甘草、土茯苓大剂投之，另以土茶苓汤调服五宝丹，外以珠黄十宝丹和生肌玉红膏摊于银皮纸上，裹于下部，以帛覆之。越日，水止烂定，热退烦平，迭进前法，内服外敷，溃烂之肾于由一膏而渐生新肉，状如石榴子。下部甫定，手腕大腿两处肿痛大作，手腕溃处脓出一碗，大腿溃处脓出两碗，肿痛方定。以溃瘍论理，应补托化毒，而参、芪皆不受，稍用些微则烦热不安。日以凉血败毒之品如犀角、地黄、银花、甘草、龟板、石决明、土茯苓等损益为治，经一月而囊与肾子居然生长完全，实非始念所及，腕腿溃脓之处亦将收口。咽喉忽腐烂，左右两边白如绵絮，堆砌口中，臭秽逼人，汤水不下，内蕴秽毒复冲肺胃，为之骇然。气血亏耗之余，恐无生理，力辞再三，转就著名喉科施治，以毒重无法可施却之。彼母又来求予，且云：一息尚存，不甘坐毙。即不起，断不归咎。仍以大剂犀角、羚羊、生地、元参、麦冬、银花、甘草、结毒紫金丹、五宝丹相间而进，以箸裹绵，蘸银花甘草汤轻轻揩洗去其喉中白腐，吹以锡类散。两三日，腐烂渐退，汤水渐入，复用清肺养阴及六味地黄逐秽败毒之品调理而愈。此症险恶迭出，卒以病家信任不移，克奏全功，亦幸矣。

《药园医案》

丁泽周

徐左。湿热瘀凝，营卫不和，横痃肿硬疼痛，日晡寒热，宜消托兼施，消未成之毒，托已成之脓也。

生黄芪三钱 青防风一钱 当归尾三钱 京赤芍二钱
生草节八分 忍冬藤三钱 连翘壳三钱 杜红花八分 大贝母三钱
炙僵蚕三钱 炙甲片一钱 泽兰叶钱半 黑白丑各八分

姚左。横痃溃后，得脓渐多，四围肿硬渐消，宜和营托毒。

全当归二钱 紫丹参二钱 生草节六分 赤茯苓三钱
赤芍二钱 福泽泻钱半 大贝母三钱 炙僵蚕三钱 生黄芪三钱

香白芷五分 陈广皮一钱 丝瓜络二钱

《丁甘仁医案续编》

江少董

花柳染毒，毒由溺窍而入，用药施治，亦必从溺窍而出。毒轻尚为易治，惟棉花疮一症，遍身头面俱有，在中法用泻药以驱毒，西法用放针以洗毒。若施于壮实之人则可，倘施于虚弱之人，贻害匪浅。余治王清吉花柳染毒，毒已上行，头面小点，背脊大如天泡，红赤非常，中药不效，西药放针亦不见功，求诊于余。脉息细缓，遂用生黄芪三钱，当归二钱。银花三钱，连翘三钱，荆芥二钱，防风一钱半，苦参二钱，黄柏二钱，蒺藜三钱，粉草二钱。先以土茯苓二两，水五碗，先煎土茯苓至三碗去渣，后入诸药煎一碗服。连进四剂，红色转青。再进四剂，青色稍退，疮泡收小。又进四剂，遍身疮毒尽解，体气无伤，健旺如常。又治李玉官两膝疮毒，此消彼发，数年不愈，脉息微细。余用此方加入附子一钱，亦服十二剂全愈。

《奇病实验》

傅松元

海口上顾春泉，船户也。秋月邀余治，切其脉，弦数而带涩滞。问其有痹痛否？云肢节痠疼，致步履不便。启衣示余，浑身紫黑块，如钱大者五六十枚，形如杨梅。余曰：“此杨梅疮也，予以大价买之，是有专科，非我之能治也。”顾自称家寒力薄，所以特请施治。余曰：“试一为之，若不应，速求他医。”乃为其书荆芥、当归、银花、乳香、制军、土茯苓、皂荚子、甘草，加胰脂油，每服四两，土茶苓每服一两，吃服五剂。后六年，余至其宅，问一人云：“前年此地有生杨梅疮者，后如何？”其人曰：“即我是也，向求先生医治，服先生方五剂而疮如失，今六年矣。”余云：“竟未请他医治乎？”顾云：“若请他医，恐

至今未必脱体也。”

《医案摘奇》

张山雷

胡左。湿火下注，小溲闭塞，下疳肿而且腐，为日已久。其势甚盛，急宜清理。

土茯苓 30克 鲜生地 9克 丹皮 4.5克 茵陈 9克 大腹皮 9克
生紫草 9克 车前子 6克 胡连 2.4克 黄连 4.5克
紫花地丁 9克 粉萆薢 9克 银花 9克

吴左。湿热下注，股阴结核，形巨痛炽，势已酿脓，脉数细小，正气已亏，舌浊腻异常。先宜清化。

炒茅术 6克 当归尾 6克 川柏皮 6克 桃仁泥 12克
九菖蒲 1.8克 炒枳壳 1.5克 独活 3克 川黄连 1.5克 红花 4.5克
土茯苓 12克 粉萆薢 9克 西茵陈 6克

二诊：湿热阻下，股阴形块作痛，势且酿脓，脉涩小，舌根腻，仍宜清化。

炒茅术 4.5克 土茯苓 12克 当归肉 4.5克 延胡索 6克
大腹皮 9克 桃仁泥 6克 独活 3克 怀牛膝 4.5克 原红花 3克
川断肉 9克 生苡米 9克

《张山雷专辑》

范文甫

张。本属横痃，破口多日，去年十月起，脱血至今，精神疲惫，脉九候失调，面色少血，脱气虚，姑尽人力而已。

淡附子 3克 西党参 3克 生白术 9克 归尾 9克 生白芍 9克
黄芪 30克 陈皮 3克 姜半夏 9克 炙甘草 3克

二诊：前方去半夏 加茯苓 9克 杞子 12克 地龙 9克
熟地 30克 土黄芪 45克

三诊：稍见效，脓汁稀薄，可用洗方。

前方去附子、地龙，加蒙自桂 3 克、五味子 3 克、生黄芪 54 克。

又洗方：蜂房 9 克 紫河车 9 克 猪肉皮 30 克 白芷 9 克
清甘草 9 克 川芎 9 克 羌活 9 克 苍术 9 克

《范文甫专辑》

冉雪峰

重庆贺某，在解放以前，沾染梅毒，久经汞制剂治疗，筋经死坏，两腿不适，膝盖肿硬独大，膝委中凹处，筋经卷曲，瘀血死津，因之足腿不能伸直，右腿为甚，似短寸许，蹠蹠不能步履，嗒然若丧，急归故里，似已无恢复健康希望，遂来我处诊治。初来时，手撑木棍，行时以肩代足，吊脚蹠蹠，不另用人扶持，即不能进堂屋（四川堂屋门限高尺余），查如前状。处方，内服：归尾四钱，地龙三钱，怀牛膝四钱，灵脂、蒲黄各三钱，桑寄生、山萸肉、地骨皮各三钱，土木鳖（醋拌）、三七、没药、甘松各一钱，日一剂，分二次服。外熏洗剂用：鲜橘刺二两（此物万县多有），土牛膝二两，红花、桃仁各三钱，乳香、没药各三钱，酸枣皮、木瓜各四钱、木鳖（酒拌）、甘松各二钱，罐煮去盖，取气熏蒸，上复旧被，俟温洗涤，乘势按摩引蹠，推拿摇扯，日二作。二星期膝部略软，换方一次，内服剂减去木鳖，熏洗剂如前。三星期腿渐能伸，四星期复诊时已丢去木棍一支，疗效优异，熏洗改为三日一作，内服剂减去灵脂、蒲黄、原归尾、山萸、地骨皮、牛膝各加为五钱。又一月，腿全伸，勉可步履，自始至终未出百日，竟全愈。

《冉雪峰医案》

疥疮

姚应凤

一人遍体发小疥如粟。应凤曰：是名净海疮，不治生，治死。其人不信，治之死。

元希声侍郎治卒发疥秘验方：石灰随多少和醋，浆水调涂，随手即灭。一法用石灰炒红出火气，香油调敷。

《续名医类案》

薛立斋

稽熏李龙冈患疥，腿足为甚，日哺益痒，口干作渴，小便频赤。此肾经虚热，用补中益气汤、六味丸而痊。

一儒者善嚏，患疥。以为内有湿热，腠理不密，外邪所搏也。与补中益气汤加白芷、川芎治之，不从，自服荆防败毒散，痛处发肿，小便赤涩。此肺肾阴虚，用补中益气汤加五味、麦冬而愈。

一儒乾患疥误用攻伐之剂，元气虚而不能愈。用补中益气汤加茯苓，其疮顿愈。又因调养失宜，日哺益甚。用八珍汤加五味、麦冬，五十余剂而愈。

一男子患疥，色黯作痒，出黑血，日哺益甚，其腿日肿夜消。以为气血虚而有热。朝用补中益气，夕用加味道遥而愈。

一男子时疫愈后，所患如前。用前药补养而愈。有同患用砭法出血而死。此因阴虚血热，色黑作痒也。何乃反伤阴血哉？

一妇人疥久不愈，食少体倦。此肝脾亏损而虚热，先用补中益气汤加川芎、炒栀，元气渐复。更以逍遥散而愈。若复间谗语，此热入血分，用小柴胡汤加生地治之。血虚者，四物合小柴胡汤，热退却用逍遥散以补脾胃，生阴血。或有寒热如疟，亦治以前药。

一妇人患疥作痒，脓水不止，脉浮无力。以消风散四剂少愈；更

以四生丸，月余而平。

一男子痒少痛多，无脓水。以芩、连、荆、防、山梔、薄荷、白芍、归梢治之而愈。

一男子痲痛发热，脉浮数。以人参败毒散，四剂少愈。更以当归饮，服数剂而愈。

一男子痲痛寒热，便秘脉数有力。以防风通圣散，二剂少愈。更以荆防败毒散加黄芩、山梔，四剂而愈。

一妇人作痒，午后尤甚。以当归饮服数剂少愈。更以人参荆芥散，数剂而安。

一男子久不愈，搔起白屑，耳作蝉声。以四生散（白附子、黄芪、独活、蒺藜），数服痒止；更以当归饮，服数剂而痊。

一男子下体处多痲痛，日晡尤甚，腿腕筋紫而胀，脉洪大。此血热而然也。就于紫处刺去瘀血，以四物汤加芩、连、地骨、丹皮、柴胡，四剂而安。患在上体，若臂腕筋紫胀，亦宜刺去其血，以前汤加紫胡、黄芩即愈。

一男子搔痒成疮，日晡痛甚。以四物加芩、连、荆、防，数剂而止。更以四物加蒺藜、首乌、黄芪，二十剂而愈。

智化寺一僧患疮疥，自用雄黄、艾叶等药燃子被中熏之，翌日遍身痲肿，皮破水出，饮食不入。投以解药，不应而死。盖药毒熏入腹内而散真气，其祸如此。

丁丑予举家生疮，家人亦用此方熏之，疮不愈。未几壺儿出痘症，极凶，药不能下咽而歿。迨亦受其毒耳。

一男子患疮疥，搔破出脓水，而赤作渴，大便坚实，脉洪数，左关寸为甚。此木火相搏也。先用泻青丸料煎服，热势顿减。又用梔子柴胡散、加味逍遥散而痊愈。

一儒者遍身生疮痒，脓水淋漓。自知医，服八珍、荆防之类，益甚。脉洪大，按之无力。谓此气血虚热也。用八珍汤加丹皮治之而愈。继娶后，两足生疮，久不愈，尺脉数而无力。用地黄丸、八珍

汤而痊。

一男子时疫愈后，遍身发痒作痒。服补中益气汤而愈。因人言，不信，乃用砭法，出血而死。此因阴虚血热，色黑作痒也。何乃反伤阴血哉？

一男子患瘰，干痒作痛。以芩、连、荆、防、山梔、薄荷、白芍、归梢治之而愈。

《续名医类案》

蒋仲芳

一僧，初患疥，自以水银、薪艾熏之，遂喘息胸满，遍身浮肿。或投五皮饮而不效。投椒目大黄等，喘肿愈甚。曰：气道皮肤肺气热也。复以火熏，火毒伤肺遂失降下之令，气道塞，水道闭，喘息潮湿，浮肿之所由来也。今复推荡，阴血又伤，若非童真，难免于死矣。以麦冬、黄芩、山梔、桑皮、花粉、滑石、木通、灯草与之，四剂而愈。（案有一僧亦用熏法致死）

胡氏了年二十余，生脓窠已一年。服药无算，长卧床席。二、三日间，昏晕数次。其室秽气盈，溢脓血，痛苦仰卧，不能转侧，两手皆疮，不能诊候。问其饮食恶心否？云：尚可饮食。曰：胃气在，可生也。即以黄芪、白术、当归、甘草、广胶为主，佐以银花、乳没，煎之以酒，六剂疮愈大半，二十剂而全愈。

姚氏妇有子而自乳，肥疮如桃，背及下半身俱满。异痛异痒，脓血淋漓，已经三月，不时寒热，渐作恶心。蒋曰：病急矣。但喜其日未久，因乳子而血气骤虚，因多卧而饮食不运也。亦以前方加黄柏、连翘、陈皮、香附，外以大黄、朴硝、松香、东丹为末，少加飞盐，麻油调敷。亦不久而愈。此二人者，胡子清热消运之品，俱为日久虚弱者设也。若初起壮实者，粒如小粟而多痒，曰疥疮，风热为胜，理以苦参、黄柏、荆芥、防风为君。脓泡如痘而多痛曰脓窠，湿热居多，理宜苍术、秦艽、银花、连翘为主。俱加天、麦门冬，酒炒黄芩以清肺。

盖肺主皮毛，肺热则皮毛有是疾也。若日久则肺虚，又宜补肺而不宜清肺矣。此意先哲未及，故附之。

《续名医类案》

丹溪

一邻人，年三十余，性狡而躁，素患下疳疮，或作或止。夏初患白痢，膈上微闷。医与理中汤四贴，昏闷若死。片时而苏。脉之两手皆涩，重按略弦似数。曰：此下疳疮之深重者。与当归龙会丸支磨四贴而利减；与小柴胡去半夏加黄连、白芍、川芎、生姜，煎五六贴而安。

《续名医类案》

薛立斋

一男子下疳肿痛不消；一男子溃而肿痛发热，小便秘涩，日晡或热；一小儿肿痛，诸药不应，俱以小柴胡汤吞芦荟丸，数服而愈。

一小儿十五岁患前症，杂用消毒之药，虚症悉具，二年余矣。询之乃禀受所致。用草薢汤月余，诸症渐愈；又用补阴八仍汤、补中益气汤而瘥。

一男子阳事肿痛，小便如淋，自汗甚苦，时或尿血少许，尺脉洪数，按之则涩。先用清心莲子饮加牛膝、山梔、黄柏、知母、柴胡数剂，更以滋肾丸一剂而痊。《玉机微义》曰：如自汗小便少，不可以药利之。即已自汗则津液外亡，小便自少，若再利之则营卫枯竭，无以制火而烦热愈甚。当俟热退汗止，小便自行也。兼此症乃阳明经病，大忌利小便。

《续名医类案》

张景岳

一少年因偶触秽毒，遽患下疳，始溃龟茎，敷治不效，旋从马口

延入尿管，以渐百深，直至肛门，遂节肿痛，形如鱼骨。每过夜则脓结马口，胀不得出。润而通之则先脓后尿。敷洗皆不能及。张曾遇一山叟传得槐花蕊方，因以治之，不十日茎根渐愈，半月后自内达外，退至马口而痊。后疮湿尚未净，复与五加皮饮十余剂而愈。向传方者曰：此方善治淫疮热毒，悉从小便泄去。且服此者可免终身疮毒后患。然犹有解毒奇验则在发疮之时，但见通身忽有云片红斑，数日而没者，即皆疮毒应发之处。疮毒已解，疮形犹见，是其验也。张初未之信，及此人疮发之时，疮固不多，而通身红斑果见，见两日而消。

《续名医类案》

薛立斋

州守姜节甫患下疳，脓水淋漓，作渴吐痰，午前恶寒，午后发热。曰：午前恶寒属阳气虚弱。午后发热属阴血不足。不信，反服二陈、知柏之类，饮食益少，大便不实，又日晡热渴，小腹重坠，患虚痼肿。恪用四物、知柏之类，饮食不思。此脾气虚而下陷。先用补中益气汤调养脾胃，以升阳气，诸症渐愈；又用六味丸滋补肾水，以生肝血而痊。

一男子患此肿硬，痼痛寒热。先以人参败毒散二剂而止；更以小柴胡汤加黄连、青皮治之而愈。

一男子溃而肿痛，小便赤涩。以加减龙胆泻肝汤加青皮、黄连，二剂少愈；又以小柴胡汤加知、柏、当归、茯苓，数剂愈。

一男子因劳，茎窍作痒，时出白物，发热口干。以清心莲子饮治之而安。

一男子溃而肿痛发热，日晡尤甚。以小柴胡汤加黄连、知母、当归而愈。

一男子已愈，惟茎中一块不散。以小柴胡汤加青皮、荆防、服之，更以荆、防、牛膝、首乌、滑石、甘草各五钱，煎汤熏洗，各数剂而

消。

一男子阴茎或肿或作痛，挺纵不收。一男子茎中作痛，筋急缩，或作痒，白物如精，随溺而下。此筋疝也。并用友胆泻肝汤治之，皆愈。张子和曰：遗溺闭癰，阴痿浮痹，精滑白淫，皆男子之疝也。不可妄归之肾冷。若血涸不月，月罢膝上热，足皴、咽干、癰闭，少腹有块，或定或移，前阴突出，后阴痔核，皆女子之疝也。但女子不谓之疝而谓之瘕。

一男子下部生疳，诸药不应。延及遍身突肿，状似翻花，筋牵骨痛，至夜尤甚。此肝肾二经湿热所致。先以导水丸五服，次以龙胆泻肝汤数剂，再与除湿健脾之药外贴，神异膏吸其脓，隔蒜灸拔其脓而愈。若表实者以荆防败毒散，里实者以内疏黄连汤，表里俱实者防风通圣散，表里俱虚者八珍汤，气虚者四君子汤，血虚者四物汤，俱加兼症之药治之，并愈（《医科大法》略具于此）。若服轻粉等药，反收毒于内，以致迭发，概服防风通圣散，气血愈虚，因而不治者多矣。

《续名医类案》

缪仲淳

数友下疳，用黄柏、官粉、膩粉、杏仁、珠末、冰片敷之，无不愈者。后去膩粉、杏仁，加黄芩，更以小、小蓟、地骨皮汤洗净敷之，效更良。

《续名医类案》

仲淳

下疳极秘神方：解小蓟，解地骨皮各五两，煎浓汁浸之，不三、四日即愈。一切极痛者，屡用神效。

《续名医类案》

薛立斋

一老人患疳，小便淋漓，脉细体倦。此气虚兼湿热也。用清心莲子饮及补中益气汤治之而愈。又一弱人拗中作痛，小便淋漓。此因火燥，下焦无血，气不能降而渗泄之令不行。用四物汤加黄柏、知母、茯苓、牛膝、木通，十余贴痛止便利。先君气短，拗中若疮，小便不通，制四物汤加参、芪，煎吞滋肾丸而愈。盖前症以虚为本，以病为末，益其本则末自去。设若不固元气，专攻其病，害滋深矣。

王锦衣年逾四十，素有淋，患疳疮，掀痛倦怠。用小柴胡汤加黄连、黄柏、青皮、当归而愈。

《续名医类案》

冯楚瞻

张姓人曾患梅疮，清凉解毒而愈。未几忽头烦、面颊、鼻柱、牙床疼痛不堪，饮食难进。谓余毒为害，复用清凉解毒，渐至饮食俱废，坐卧不能，精神疲困，六脉微弱。冯曰：果属阳毒，脉宜洪大；此为寒凉久服，致阴阳失职耳。即恶疮初发，亦由精血元阳亏损，斯阴寒凝沍之气得以乘之。乃与大剂熟地、麦冬、白术、牛膝、五味、附子兼八味丸并服，半月全愈。

《续名医类案》

孙文垣

吴东星疔止腰痛白浊，咳嗽，肌肉大消，百治不应，痛剧欲死。脉之左弦细，右滑大，俱六至。口渴眼赤，知其昔患梅疮，余毒尚伏经络，因疔后气血不足，旧毒感动，故痛而暴也。以当归、白芍、甘草、牛膝、钩藤、苡仁、木通、白藓皮，用土茯苓四两煎汤，煎药服下，痛止嗽除，脉缓其半，数贴大效，精神渐复。冬至日乘酒纵欲，次日腰如束缚，足面疼，右眼赤，小水短，足底有火从两胯冲上，痛不可

言。再以归、芍、钩藤、甘草、牛膝、苡仁、红花、生地、黄柏，三日症略减。适大雪寒甚，有女医因其大便燥结，一日夜进元明粉一两五钱，后大去而腰痛愈猛，两足挛缩，气息奄奄，面青燥，六脉俱伏。痛使然也。知服元明粉所致，曰：症虽热但病在经络筋骨间，徒泻汤胃，无益也。足挛腰痛者由天气寒极，经络凝涩，法当散寒邪之标，使痛定，然后治本。乃用桂心、杜仲、炙草、苍术、破故纸、五加皮，二剂痛定，四肢柔和，饮食始进。嘱曰：疾在经络，俟春和始可除之，勿亟也。不信，更服滋阴降火之剂，两月无功，再求治。乃以煨肾散进大泻五、六度（仍是碍其肠胃矣），四肢皆冷，咸以为泻之非也。曰：病从此减矣，夫何忧？再进理脾药数帖，神气遂转，腰胯柔和，渐能步履。乃以威灵仙末二钱，入猪腰内煨食入。又泻一、二度，审其梅毒湿热已清，改用苡仁、当归、生熟地、白芍、牛膝、黄柏、丹参、龟板调理全安。

朱怀竹壮年客外不谨，患杨梅疮，恐人知之，欲归。乃求速愈，用药熏洗，不瘳。又用药末点之，日服煎药三贴，治两月毒且入内，下则肛脱，疮满如草，上则肺壅喘盛，胸胀不能仰卧，内热恶寒谵语，阴囊疮瘡肿痛，两足疮延肿大，脉之俱洪大而数。曰：病重甚，幸壮年，犹可治。第胸中有瘀血毒物，俟出后乃可与药，否则反。用致疑，另延医，果大发喘嗽，吐紫黑血块如脓者碗许。腥秽不可近。此熏药迫毒入肺，瘀壅肺窍，故喘嗽。必俟吐尽，从而消之，斯易为力也。乃用丹皮、桑白皮、白鲜皮、木通、前胡、枳壳、桔梗、甘草、杏仁、苡仁、葶苈，服后大便急重二十余次，所下黑紫脓血甚多，喘咳稍定，红痰稍淡。二、三剂能卧。改用白芍、当归、白鲜皮、贝母、黄连、银花、皂角、苡仁、麦冬、木通二贴，足疮肿渐消，阴囊出脓血二碗许，两尺已不洪大。前方加丹参，又二贴，囊结疤，三日后落下，厚可半寸，洞见两丸系一光薄白胞。用红粉霜加生肌药敷之，日三次，脓水干。再以人参、归、芍、白芷、甘草、白鲜皮、皂角、苡仁、首乌调理一月悉愈。令日用土茯苓、猪肉各半斤同煮，烂入酱盐，如常食之。

汤当茶饮，遂瘳。次年生女。

谭公亮患结毒，医用五宝丹饵之，三年不效。仲淳云：五宝丹非完方也。无红铅、灵柴不能奏功。时无红铅，姑以松脂、铅粉、麻油调敷，应手而减。公亮先用乔伯珪所赠乳香膏，止痛生肌甚捷，反用此二味，功效弥良。乃知方药中不在珍贵之剂也。

《续名医类案》

陆养愚

朱少川因感冒寒热咳嗽，筋骨疼痛，服发散药寒热已除而疼痛咳嗽不止。或以羌活治痛，杏仁治嗽，不效。又以其渔色必阴虚，投六味，月余反口渴异常，身热疼痛益甚，脉之沉细弦数而有力。因问其曾患梅毒否？答曰：已过矣！曰：此症正其遗毒也。疼痛者，毒在经络、骨髓也；咳嗽、口渴者，毒火上弦也。用养血解毒之剂倍土茯苓，数剂而减，十剂便愈。

《续名医类案》

薛立斋

一男子遍身皆患梅疮，左手脉浮而数。以荆防败毒散治之，表症乃退；以仙方活命饮，六剂疮渐愈；兼饮草薢汤，月余而愈。

一男子患下疳，诸药不应，延及遍身突肿，状如翻花，筋挛骨痛，至夜尤甚。此肝、肾二经湿热所致。先以导水丸五服；次以龙胆泻肝汤数剂；再与除湿健脾之药，外贴神异膏吸其脓，隔蒜灸拔其毒而愈。

一童子外肾患之，延及小腹数枚，作痛发热。以小柴胡汤吞芦荟丸，更贴神异膏月而安。

一儒者患前症，先外肾作痒出水，后阴囊、股内、小腹、胁臂发小瘤，或干或脓窠。误服祛风等药，肢体倦怠，恶寒发热，饮食渐减，大便不实，脉见浮弦，两尺浮数。此肾水虚热，肝木乘脾土也。用六

味地黄丸、补中益气汤为主，佐以换肌消毒散而愈。

一人患此，服攻毒等药，患外凸而色赤作痛，肢体倦怠，恶寒发热，脉浮而虚。此元复伤而邪气实也。用补中益气汤二剂而愈。

进士刘华甫患之数月，用轻粉、朱砂等药，头面、背、臀各结一块二寸许，溃而形气消弱，寒热口干，舌燥唇裂，小便淋沥，痰涎上涌，饮食少思。此脾胃伤，诸脏弱而虚火动也。先用六君子汤二十余剂，又用补中益气汤加山药、山萸、麦冬、五味服之，胃气复而诸症愈。惟小便未清，痰涎未止，用加减小便丸而痊。

一男子患杨梅疮，后两腿、一臂各溃二寸许一穴，脓水淋漓，少食无睡，外而不愈。以八珍汤加枣仁、茯神服之，每日以蒜捣涂患处，灸良久，随贴膏药，数日稍可。却用豆豉饼灸之，更服十全大补而愈。

一妇人患之皆愈，惟两腿、两腋各烂一块如掌，兼筋挛骨痛，三年不愈，诸药无效，日晒热甚，饮食少思。以萆薢汤兼逍遥散，倍用茯苓、白术，数剂热止食进。贴神异膏，更服八珍汤加朱膝、杜仲、木瓜，三十余剂而痊。

一妇人患此，燃轻粉药于被中熏之，致遍身皮塌，脓水淋漓，不能起居。以滑石、黄柏、绿豆粉末等药铺席上，令可卧；更服神功托里散，月余而痊。（一云枕金钗花散）

一弥月小儿先子口内患之，后延于身上，年余不愈。以萆薢为末，乳汁调服；母以白汤调服，月余而愈。

青浦四十二保一大家，娶妾生杨梅疮，遍身溃烂，临终弃之于野。一乞丐收养之，数日不死，女忽思食肉。适有数盗在孟婆墩祭赛，丐者乞肉，即与一肩，怀归食妇。食未尽者悬之树枝，为蜈蚣所食，毒侵肉中，妇食之，疮为毒发，旬日全愈。其色更丽于前，丐欲送归，妇不许，曰：我当终身从君矣。遂为伉俪，生一子。丐者日操舟乞食龙潭，其妇言笑不苟，亦云贤矣。

薛立斋

一男子咽间先患，及于身，服轻粉之剂稍愈，已而复发，仍服之，亦稍愈。后大发，上腭溃蚀，与鼻相通。臂腿数枚，其状如桃，大溃，年余不敛，神思倦怠，饮食少思，虚症悉具。投以革薺汤为主，以健脾胃之剂兼服之，月余而安。

一妇人患之，脸鼻俱蚀，筋骨作痛，脚面与跟各肿一块，三月面溃，脓水淋漓，半载不敛。治以前药亦愈。

一男子阴茎患之，肿痛。先以导水丸、龙胆泻肝汤各四服，少愈，再以小柴胡汤加黄柏、苍术、五十余剂面平。

一男子阴茎肿溃，小便赤色，肝脉弦数。以小柴胡汤加木通、青皮、龙胆草四贴，又龙胆泻肝汤数贴而痊。

一妇人喉痛，便秘作渴，脉沉实。以内疏黄连汤二剂，里症已退；以龙胆泻肝汤数剂顿退；间服革薺汤，月余而愈。

一男子患之，发寒热，便秘作渴，两手脉实。以防风通圣散治之面退。以荆防败毒散兼龙胆泻肝汤面痊。

一男子愈后腿肿一块，久而溃烂不敛。以蒜捣烂敷患处，用艾隔蒜灸之，更贴神异膏及服黑丸子并托里药，两月而愈。

一男子皆愈，但背肿一块，甚硬，肉色不变，年余方溃出水，三载不愈，气血俱虚，饮食少思。以六君子汤加当归、藿香，三十余剂少愈；更饮革薺汤，两月余而愈。一男子患之势炽，兼脾胃气血皆虚，亦服前药而痊。

《续名医类案》

马铭鞠

李行甫患霉疮，（俗呼广疮）误用水银、番碗等药搓五心，三日间舌烂齿脱喉溃，秽气满室，吐出腐肉如猪肝色，汤水不入，腹胀，二便不通。医皆谢去，独用治喉药吹喉，痰壅愈甚，痛难忍，几死。按

其腹，不痛，虽胀满，未坚，犹未及心。知水银毒入腹未深，法宜以铅收之。急用黑铅斤余，分作百余块，加大剂甘桔汤料，银花、甘草各用四五两，水二、三十碗，锅内浓煎，浓取三、四碗入汤注中徐灌之，任其自流。逾时知渐转动，口亦漱净。即令恣饮数盏，另取查再煎，连前浓汁频濯手足。次日二便去黑水无算始安。方用吹口药及败毒托里药数剂而愈。后贾仆有颜孝者，亦患霉疮，误用水银熏条，其症如一。行甫即以前法治之，次日立起。

《续名医类案》

永富凤

一男子病疥疮，以散药摩擦，数日而愈。后作药汤浴，浴后中风，发寒热，毒气内攻，满身暴胀，两便绝不下，气急脉数，不能移一步，请余。余谓家人曰：“斯症死不回踵，非急攻之剂则难争锋。”与备急圆五分，快利三行。其明作东洋先生赤小豆汤，服三大碗，又利二行。其明又与备急圆，利十余行，毒气渐减，疮痕发脓，续与前方，二十余日而全愈。

《漫游杂记》

费伯雄

某。湿热浸脾，始发疮疥，继则足肿。治宜清化。

生地三钱 丹皮二钱 赤芍一钱 蝉衣一钱 木通一钱
泽泻一钱半 猪苓二钱 防己二钱 忍冬藤切，三钱 六一散包，三钱
川牛膝二钱 连翘二钱 生苡仁四钱 绿豆衣三钱

又搽药：火纸卷硫黄末，浸菜油于灯盏火上烧，滴下油，搽擦极效。

《费伯雄医案》

王燕昌

一国学，五十余岁，患脓疥。医用红砒、枫子、胡桃、枯矾、硫黄、猪油等药，彼不知忌，而误搽肾囊，疼甚，二日而囊烂落，致肾子双悬，粘疼欲死，求救。用紫苏为细末，渗子肾子及烂处，外用油纸作笼护之，数日而愈。此方可略加制乳香。凡治疥癣等药，皆宜净护肾囊。盖一身之外，惟此壳无筋，烂即脱落矣。

《王氏医存》

翻花疮

薛己

判官张承恩，内股患痈，将愈，翻出一肉如菌。薛曰：此属肝经风热血燥，当清肝热，养肝血。彼不信，乃内用降火，外用追蚀，蚀而复翻，翻而复蚀，其肉益大，元气益虚。始信薛言，治之而痊。

一男背疮，斂如豆许，翻出肉一寸余。恪用消蚀药并系法，屢去屢大，三寸许矣。用加味道遥散三十余剂，外涂藜芦膏而消。疮口将斂，乃用八珍散倍参、芪、归、术峻而斂。

一妇人素善怒，臂患痈，疮口出肉，长二寸许。用加味道遥散藜芦膏而愈。后因怒，患处胀闷，遍身汗如雨，此肝经风热，风能散气而然耳。仍用前散并八珍汤而愈。

一儒者顶患肿硬，乃用散坚行气化痰破血之剂，肿硬愈甚，喘气发热，自汗资汗，形体倦怠，饮食少思。薛曰：此属足三阴亏损，当滋化源。彼惑众论，乃用追蚀，患处开翻六寸许，巉岩色赤，日出鲜血，三月余矣，肝脉弦洪紧实。薛用十全大补汤加麦冬、五味，五十余剂，诸症稍得，血止三四。复因怒，饮食顿少，血自涌出，此肝伤不能藏血，脾伤不能摄血。乃用补中益气为主，加五味、麦冬，饮食渐

进，其血顿止；再以六味丸加五味常服，疮口渐敛。

《五潮温闻》

疔疮

薛己

一妇左手指患疔，麻痒，寒热恶心，左半体皆麻，脉数不时见。曰：凡疮不宜不痛，不可大痛，烦闷者不治，今作麻木，尤其恶也。用夺命丹二服，不应；又用解毒之剂，麻痒始去，乃作肿痛。薛曰：势虽危，所喜作痛，但毒气无从而泄。乃针之，诸症顿退，又用解毒之剂而瘳。

苏痒盛原博掌后患疔，红丝至腕，恶寒发热，势属表症，与夺命丹一服，红丝顿消；又用和解之剂，大势已退。彼又服败毒药，发渴发热，红丝仍见，脉浮大而虚，此气血受伤而然，以补中益气汤主之而愈（红丝再见而用补亦须细审）。盖夺命既服，疮邪已散而复用败毒之剂，是诛伐无过，失《内经》之旨矣。

一儒者患疔，元气素弱，薛补其气血，出脓而愈。后因劳役，疮痕作痒，乃别服败毒散一剂，以致口噤舌强，手足搐搦，痰涎上涌，自汗不止（虚症悉见），此气血复伤而复痊也，用十全大补，加附子一钱，灌服而苏。

一男子患疔，服夺命汤，汗不止，疮不痛，热不止，便不利，此汗多亡阳，而真气伤矣，用参、芪、归、术、芍、防、五味，二剂诸症悉退，惟以小便不利为忧。薛曰：汗出不利小便，汗止则阳气复而自利矣。仍用前药，去防风，加麦冬，倍用黄芩、当归，四剂而便行，疮溃而愈。

一老妇手大指患疔，为人针破出鲜血，手背俱肿，半体俱痛，神思昏愤五日矣，用活命饮二剂，始知痛在手，疮热虽恶，元气复伤，

不宜大攻；用大补汤及活命饮各一剂；外用隔蒜灸，喜其手指皆赤肿而出毒水；又各一剂，赤肿渐溃；又用托里药而瘥。

表甥居富，右手小指患疔，色紫。或云小疮，针刺出血，敷以凉药，掌指肿三四倍，黯而不痛，神思昏愤，烦躁不宁，此真气虚而邪气实也。先以夺命丹一服，活命饮二剂，稍可。薛因他往，或遍刺其手，出鲜血碗许，肿延臂腕大如瓠，手指肿数倍，不能溃。薛用大剂参、芪、归、术之类，及频灸遍手而肿渐消。但大便不实，时常泄气，以元气下陷，以补中益气加骨脂、肉苁、吴茱、五味；大便实而气不泄，又日以人参五钱，麦冬三钱，五味二钱，水煎代茶饮之；又用大补药，五十余剂而渐愈。此症初苦不用解毒之剂，后不用大补之药，欲生也难矣。

一人年二十，唇患疔四日矣，有紫脉自疮延至口内，将及于喉。薛曰：此真气虚而邪气实也，若紫脉过喉，则难治矣，须针紫脉并疮头，出恶血以泄其毒，则可。乃别用解毒之剂，头面俱肿，求治甚笃。薛曰：先日之言不诬矣！诊其脉洪数按之如无，口内肿胀，针不能入，为砭而与唇出黑血碗许，势虽少退，略进汤，终至不起。

都宪张恒山，左右指患之，痛不可忍。急隔蒜灸三十余壮，即能行步。欲速愈，或用凉药敷贴，遂至血凝肉死，毒气复炽。再灸百壮，服活命饮，出紫血，毒才得解。脚底通溃，筋烂肉甚多，将愈，误用生肌药反助其毒，元气亏损而不能愈。薛治以托里药，喜其稟实客处，三月余方愈。大凡疔患于肢节，灸法有回生之功。设投以凉剂，收敛腠理，隧道壅塞，邪气愈甚，多致不起。若毒未尽骤用生肌，轻者反增溃烂，重者必致危亡。

一男子足指患疔，肿焮痛赤。用隔蒜灸、人参败毒散加金银花、白芷、大黄，二剂痛止。又用十宣散加天花粉、金银花，去桂，数剂而愈。《外科枢要》有论宜考。

《淮阳传》云：万历丁亥，金台有妇人，以羊毛遍鬻子市，忽不见，继而都人身生泡瘤，渐大，痛死者甚众，瘤中惟有羊毛。道人传

一方，以黑豆、荞麦为末，涂擦，毛落而愈，名羊毛疔。

《名医类案》

背痛疽疮

罗谦甫

一人，年逾六旬，冬至后数日，疽发背，五七日，肿势约七寸许，痛甚。疡医曰：脓已成，可开发矣。病者恐，不从。三日，医曰：不开恐生变症。遂以燔针开之，脓泄痛减。以开迟之故，迨二日，变症果生，觉重如负石，热如蝦火，痛楚倍常。六脉沉数，按之有力，此膏粱积热之变也。邪气酷热，固宜以寒药治之，时月严寒，复有用寒远寒之戒，乃思《内经》云：有假者反之，虽违其时从证也。急作清凉饮子，加川黄连一两五钱，作一服服之。利下两行，痛减七分。翌日复进前药，其证悉除，月余平复。

京师人司仲父患背疮，若负火炭，昼夜呼叫。司仲泣于途，遇道人，曰：子何忧之深也？子当求不耕之地，遇野人粪，为虫鸟所残，即以杖去其粪，取其下土，筛而敷之。乃如其言，用之立愈。父曰：岂以冰著吾背耶？吾五脏俱寒矣。

房州虞候张进本北方人，因送郡守还，逢道人，饮之酒，得其治痈疽方。文录曹子病背疮，医不能疗，闻进有此方，索之。进元无手诀，但以成药敷之，旬日而愈。一儿五岁，鬓边生疮，继又发于脑后，症候可忧，亦以敷进，凡所用皆一种，不过三夕，二患皆平。其方但择阿胶透彻者一两，水平升，煎令消，然后入虢丹一两，慢火再熬，数数搅匀，俟三五沸乃取出，摊令极冷，贮磁瓶中。用时以毛扫布疮四围；而露其口，如疮未成，则遍涂肿处，良久自消，切勿犯手，更无他法，一切恶疮皆可敷，不特痈疽也。

虞奕待郎背中发小疮，不悟，只以药调补。数日，不疼不痒，又不滋蔓，疑之，呼外医灸二百壮，已无及。此公平生不服药。一年来，

唯觉时时手脚心热，疾作，不早治，又误服补药，何可久也？盖发背无补法。谚云：背无好疮。但发于中正者，为真发背。

扬州名医杨吉老，其术甚著。有一士人，状若有疾，厌厌不聊，莫能名其为何苦，往谒之。杨曰：君热症已极，气血消铄且尽。自此三年，当以疽死，不可为也。士人不乐而退。闻茅山观中一道士，医术通神，但不肯以技自名，未必为人致力。士人心计交切，乃衣童仆之衣，诣山拜之，原执役左右。道士喜，留置弟子中，海以诵经，日夕只事，颐旨如意。经两月余，觉其与常隶别，呼叩所从来，始再拜谢过，以实告之。道士笑曰：世岂有医不得的病？当为子脉之。又笑曰：汝便可下山，吾亦无药与汝，但日日买好梨啖一颗，如生梨已尽，则取干者，泡汤饮之，仍食其滓，此疾自当平。士人归，谨如其戒，经一岁，复往扬州。杨医见之，惊其颜貌腴泽，脉息和平，谓之曰：君必遇异人。不然，何以至此？士人以告，。杨立具衣冠，焚香望茅山设拜，盖自咎其术之未至也。

《名医类案》

程明佑

魏克胡姬，年六十，疽发背，大如盂头如蜂巢，呕逆咽不下。疡医药之，毒虽杀而胃寒泄。程曰：病必分阴阳虚实，胃伤于寒，令人呕逆，温补则荣卫充而气血周贯，则毒随脓出而肌肉渐生。依方投药四五剂，咽遂下，呕止，已痈溃体渐平。

《名医类案》

陈斗岩

王主政福建人，臂患一痈，痛甚，发咳逆，十余日水谷不下，脉伏如绝，医皆不治。陈视之曰：此寒凉过甚，中气下陷，以四珍加姜桂，三进而病如失，痈亦渐愈。

《名医类案》

丹溪

一人，背痈径尺，穴深而黑，急作参、芪、归、术膏饮之，三日，略以艾芍汤洗之，气息奄奄，然可饮食，每日作多肉馄饨，大碗与之，尽药膏五斤，馄饨三十碗，疮渐合。肉与馄饨补气之有益者也。

一老人背发疽，径尺，已与五香十宣散数十贴，呕逆不睡，素有淋病。急以参芪归术膏，以牛膝汤入竹沥饮之，淋止思食，尽药四斤，脓自涌出而愈。

一人发背痈疽，得内托十宣多矣，见脓，呕逆发热（发热决非如烟火），又用嘉禾散加丁香，时天热，脉洪数有力，此溃瘍尤所忌。然形气实，只与参膏竹沥饮之，尽药十五六斤，竹百余竿而安。后不戒口味，夏月醉坐水池中，经年余，左肋旁生软块；二年后成疽，自见脉症呕逆如前。仍服参膏等而安。若与十宣，其能然乎？

一妇因得子迟，服神仙聚宝丹，背生痈，甚危，脉散大而涩急。以加减四物汤百余贴补其阴血，幸其质厚，易于收救。

一人形实色黑。背生红肿，近髀骨下痛甚，脉浮数而洪紧。正冬月，与麻黄桂枝汤加酒黄柏、生附子、栝蒌子、甘草、人参、羌活、青皮、黄芪、半夏、生姜，六贴而消。

一男子年五十余，形实色黑，背生红肿，及髀骨下痛甚，脉浮数而洪紧，食亦呕。正冬月，与麻黄桂枝汤加酒黄柏、生附子、栝蒌子、甘草节、羌活、青皮、人参、黄芩、半夏、生姜，六贴而消，此亦内托之法也。

周评事观患背痈，疮口久不合，召疡医徐延礼疗治，恒以托里十宣二散与服，不效。徐谓周曰：更请盛用美来，共事料理则可，否则吾技穷矣。既而盛至，按脉用药，率与徐类，但多加人参五钱，附子稍行功耳。服后两足俱暖，自下而上。谓其子曰：今之药何神哉！顿觉神爽快。服之旬日，而宿口平复。俞子容曰：国初，吾吴中老医多见其用附子，往往治病如庖丁解牛。近医者多弃而不用，何耶？

(近日则以附子为常服之品，所谓过犹不及)

一人患发背，肠胃可窥，百药不差。一医教以楸叶膏敷其外，又用云母膏作小丸子，服尽四两。不累日，云母透出肤外，与楸叶膏相黏著，疮口遂平，功亦奇矣。其方立秋日太阳未升之时，采楸叶熬为膏，敷疮疡，一切恶疮肿毒立愈，谓之楸叶膏云。

《南史》曰：薛伯宗善徙痛，公孙太患发背，伯宗为气封之，徙置斋前柳树上，明日而痛消，树边倏起一瘤如拳大，稍稍长，二十余日，瘤大脓溃烂，出黄赤汁升余，树为之痿损(此祝由法)。

一方土尝货药淮西，值兵变窜入深山，遇老姥年二百许岁，自谓金亡避兵来此，元完颜氏之医姥也。传以背疮方，用鲜射干一味，每用三钱，研细，温酒调服，干者为末，每服一小钱许，酒下，在上即微吐，在下即微利，功效如神，仍用膏药收口。又传寿星散治恶疮痛莫当者，掺之不痛，不痛者知痛，大天南星一味为末。

《名医类案》

古朴翁

一人患背痛，有医者已为驱热拔毒，痛肿已炽，告技穷，翁诊之，曰：此易易耳，无用药也。遂煎醋一碗，入盐少许，以纸数量溃塌肿上，再以铜斗盛火熨之，不数易而病如失。

《名医类案》

汪石山

一老人患背痛，请汪诊视，脉洪缓而濡，痛肿如碗，皮肉不变，按之不甚痛，微发寒热。乃语之曰：若在*一胛，经络交错，皮薄骨高之处则难矣。今肿去胛骨下掌许，乃太阳经分，尚可治。遂用黄芪五钱，当归、羌活、甘草节各一钱，先令以被盖暖，药熟热服，令微汗，寝熟肿消一晕，五服遂安。

《名医类案》

薛己

进士张德宏背疽，微肿微赤，饮食少思，用托里药，脓成而溃；再用大补汤之类，肉生而敛。忽寒热作呕，患处复肿，其脉浮大，按之若无，形气殊倦，薛谓之曰：此胃气虚惫，非疮毒也。彼云：侵晨登厕，触秽始作，仍用补药而敛（立斋名重一时，所治俱膏粱富贵之家，故每以温补取效，若执此法以治背疽，是痴人说梦）。

一人大背患疽，年余疮口甚小。色黯陷下，形气怯弱，脉浮缓而涩，此气血虚寒，也用十全大补，加附子少许数剂而元气渐复；却去附子，又三十余剂全愈。

一妇人五十余，四月初，背当心生疽如粟大，三日渐大，根盘五寸许，不肿痛不寒热。薛诊其脉微而沉，曰：脉病而形不病者，忌也。实则痛，虚则痒，阴症阳症之所由分也。不发不治，溃而不敛亦不治。乃与大补阳气之剂，色白而黯，疮势如故。至下十二日，薛复诊其脉沉，疮势不起，神疲食减，小便淋涩，乃与大补气血加姜桂二剂，疮亦不起。十五日，因怒，呕泻并作，复大补药一剂，疮仍不起。薛留药二剂而去，病者昏愤不服。或劝之，省悟，依方连进七剂。十六日，疮起而溃，色红而淡，脓亦如之。十九日，薛至，喜曰：疮已逾险处，但元气消铄，尚可忧，连与大补二十余剂。五月十一日，病者因劳自汗，口干舌强，太阳发际脑顶俱胀。复延薛至，诊之曰：此气血俱虚，肝胆火上炎。用补中益气汤加山梔、芍药，顿愈。但内热少睡，手足发热，不时霍热。用逍遥散加山梔，热退，复用归脾汤，疮乃愈。计疮发及敛四十二日。

内翰杨皋湖孟夏患背疽，服克伐之剂，兼旬，漫肿坚硬，重如负石，隔蒜灸五十余壮，背遂轻快（先服克伐又灸，则毒尽矣！且无壮热，故温补而愈）；乃以六君子加砂仁二剂，涎沫涌出，饮食愈少，此脾虚阳气脱陷，又用温补，反呕不食，仍用药，作大剂，加附子、姜桂；又不应，遂以参、芪各一斤，归、术、陈皮，各半斤，附子一两，煎膏服三日而尽，

流涎顿止，腐肉顿溃，饮食顿进；再用姜、桂等药托里健脾，腐脱而疮愈（此等治法，非明眼不能）。

儒者顾大有，年几六旬，仲冬，背疽初起，入房，患处黑死五寸许，黯晕尺余，漫肿坚硬，背如负石，发热作渴，小便频数，两耳重听，扬手露体，神思昏愤，脉沉而细，右手为甚（以脉为主症，属假阳症），便秘二十七日许，进饮食百余碗，腹内如常。众欲通之，薛曰：所喜者此耳。急用大剂六君子加姜、附、肉桂三剂，疮始焮痛，自后空心用前药，午后以六味丸料加参、芪、归、术五剂，复用活命饮二剂（看他先温补，后解毒），针出黑血甚多，瘀脓少许，背即轻软，仍用前药，便亦通利。薛他往四日，神思复昏，疮仍黑陷，饮食不进，皆以为殒，薛以参、芪、归、术各一两，炮附子五钱，姜、桂各三钱，服之，即索饮食，并鸭子二枚，自后日进前药二剂，肉腐脓溃而愈。

少参史南湖之内，夏患疽，不起发，脉大而无力，发热作渴，自汗盗汗，用参、芪大补之剂，益加手足逆冷，大便不实，喘促时呕，脉微细，按之如无，惟太冲不绝（太冲乃肝俞，在足大指本节后二寸半或一寸半。初大而无力的，用补而反见虚症并见细脉，所谓真虚。若投凉解之剂，脉必愈大搏指，此中玄机识者有几），仍以参、芪、归、术、茯苓、陈皮，计斤许，加附子五钱，煎膏作二服，诸症顿退，脉息顿复。翌日疮起而溃，前药仍用四剂后，日用托里药，调理两月而愈。

操江都宪伍松月背疮愈后，大热，误为实火，用苦寒药一钟，寒热益甚，欲冷水浴身，脉浮大，按之全无。薛曰：此阳气虚浮在肌表，无根之火也，急用六君加附子一剂，即愈。

一男子背疮不敛，焮肿发热，小便赤涩，口干体倦，脉洪数而无力。用参、芪、归、术、熟地黄、芎、芍、陈皮、麦冬、五味、炙草、肉桂，补元气，引虚火归经，脉症益甚，此药力未能及也；再剂顿退，却去肉桂，又数剂而愈。此症因前失补元气故耳。

宪副陈鲁山，年五旬，居官勤苦，劳伤元气，先口干舌燥，后至丙午仲夏背发疽，漫肿中央色黯，四畔微赤，微痛，脉举之浮大，按

之微细，左寸短而右寸若无，十余日，肿未全起。薛曰：此属病气元气虚寒，当舍时从症。朝用参、芪、姜、桂、归、术、陈皮、半夏、炙草，温补其阳，夕用加减小味丸，滋其肝肾，各四剂而腐溃。但脓水清稀，盗汗自汗，内热晡热，脉浮而数（用补而见数浮）。改用八珍汤，复发热而夜阳举，此肾虚而火妄动，仍用加减小味丸料煎服而安。又因怒动肝火，疮出鲜血二盏许，左关弦数，右关弦弱，此肝木侮脾，致肝不能藏血，脾不能统血也。用十全大补兼用前药料各二剂而血止，再用前药调理而安。

一人仲夏疽发背，黯肿尺余，皆有小头，如铺黍状四日矣，此真气虚而邪气实也。外用隔蒜灸，内服活命饮二剂，其邪稍退，仍纯补其气，又将生脉散代茶饮，疮邪大退。薛因他往三日，复视之，饮食不入，中央肉死，大便秘结，小便赤浊。曰：此间断补药之过也。盖中央肉死，毒气盛而脾气虚；大便不实，胃气虚而肠不能送；小便赤浊，脾土虚而火下陷；治亦难矣。急用六君加归、柴胡、升麻，饮食渐进，大便自通；外用乌金膏，涂中央三寸许，四围红肿渐消，中央黑腐渐去，乃敷当归膏，用地黄丸料，与前药间服，将百剂而愈。

中翰郑朝用背疽溃，发热吐痰，饮食无味，肌肉不生，疮出鲜血。薛曰：此脾气亏损，不能摄血归源也。法当补脾。朝用不信，用消毒凉血，加恶寒呕吐，始悟其言。用六君加炮姜、半夏、茯苓数剂，诸症悉退矣。又用十全大补，疮口渐敛。后因饮食稍多，泄泻成痢，此脾胃虚寒下陷。用补中益气送四神丸而痢止，继以六君子汤而疮愈。

御医王介之之内，年四十，背疽不起，泄泻作呕，食少厥逆，脉息如无（纯是虚寒），属阳气虚寒。用大补剂，加附子、姜桂而不应，再加附子二剂，泻愈甚；更以大附子一枚，姜、桂各三钱，参、芪、归、术各五钱，作一剂，腹内始热，呕泻乃止，手足渐温，脉息遂复；更大补而溃，托裹而敛。十年后，终患脾胃虚寒而没。

职方王的塘背疽溃后，小便淋沥，作渴引饮，烦势不寐，疮口掀

赤如灼，时或小便自遗（溃后不寐自遗，虽眠赤，亦属无根之火）。此肾虚之恶症，用加减八味丸加麦冬、五味，数剂而痊。

太守朱阳山患背疽，漫肿色黯，微痛作渴疮头数十。左尺脉数，按之有力，此肾经之症，先用活命饮二剂，以杀其毒，午前以参、芪、归、术之类壮胃气，午后以加减八味丸料固肾气。喜其未用败毒之药，元气未损，故脓出肉腐而愈。

驾部林汝玉，冬不衣绵，作渴饮冷，每自喜壮实，诊其脉，数大无力。薛谓：至火令当发毒。不信。三月间，果背热，便秘，脉涩，用四物加芩、连、山梔数剂，大便始和；却去芩、连，加参、术、茯苓，二十余剂，及八味丸半斤许，（考案：此等症必舍六味而用八味，其义何居？）渴减六七，背热亦退，至夜背发疽，纯用托里之药而愈。

封君彭怀雪，背疽发热作渴，脉数无力。用四物加黄柏、知母、玄参、山梔、连翘、五味、麦冬、银花，脉症渐退；又加白芷、参芪，腐肉悉溃。因停药且劳，热渴仍作，乃与参、芪、归、芷、炙草、山药、山黄、茯苓、泽泻、肉桂而安；又以六味地黄丸及十全大补而敛。

一男子背疮出血，烦燥作渴，脉洪大，按之如无，此血脱发躁。用当归补血汤，二剂，又以八珍加黄芪、山梔不数剂而愈。

一妇人背疮溃后，吐鲜血三碗许，薛用独参汤而血止，用四君、熟地、芎、归痊愈。此血脱之症，当补其气，使阳生阴长。若用降火凉血沉阴之剂，则脾胃生气复伤，不惟血不归源，而死无疑矣。

都宪周宏岗，在南京刷卷时，背患疽，肿而溃，脉大而浮，此阳气虚弱，邪气壅滞。用托里消毒散，溃而色欠红活，此气血俱虚也。用托里散，倍用参、芪，反内热作渴，脉洪大数指（清而脉洪大数指，所谓阴成格阳），用前散加肉桂，脉症顿退，仍用托里而愈。若误为热毒而用寒凉，则殆矣。

太仆王的塘，初起大劳，又用十宣散之类，加喘渴肉热，脉大无力。此阳气自伤，不能升举，下陷于阴分而为内热。以补中益气加酒炒芍药、麦冬、五味治之而愈。

秋官高竹真患之，色黯坚硬，重如负石，神思昏愤。遂以蒜杵烂，置疮头，以艾如钱大，灸二十余壮，竟不知。又以蒜随摊黯处，以艾铺蒜上，灸亦不知。乃著肉灸良久方知，再灸方痛（灸法可师），内用大温补剂而起。

上舍张克恭，涂贴寒凉及服败毒之类，遍身作痛，欲呕少食，哺热内热，恶寒憎恶。薛曰：遍身作痛，荣卫虚而不能营养肉理也。欲呕少食，脾胃虚寒，而不能消化饮食也。内热哺热者，阴血内虚，阳气下陷于血分也。恶寒憎寒，阳气外虚，不能护卫肌肤腠理也。皆脾胃之气不足所致。治以补中益气汤，诸症悉愈；更以十全大补汤，腐肉渐溃；又以六君，芎、归，肌肉顿生。

儒者周在鲁，怀抱久郁，背患疽，宛然如一栗，有数头如黍五日矣，肝脉弦洪，脾脉浮大，按之微细。以补中益气加桔梗、贝母，少用银花、白芷，二剂肝脉顿退，脾脉顿复，肿起色淡。乃以活命饮二剂，脓溃肿消，肝脉仍弦，此毒虽去，而胃气复伤，仍用补中益气加半夏、茯苓而愈。夫脉纵有余，当认为不足（此句非先生不能道，亦非先生不能如此用补）。故先用前汤补脾解郁怒，则脾气既充，肝脉自退。若不审其因，遽用败毒以伐肝，非惟无以去毒，则反害之。前汤所用银花、白芷，非取其治疮，特解患者之疑耳。

上舍蔡东之，年逾五提，患背疽，用托里之药而溃，但疮口少许久不收敛，时值仲冬，兼咳嗽不止。薛曰：疮口未敛，脾气虚也。咳嗽不止，肺气虚也。盖脾为母，肺为子，治法当补其母。一日与蔡同会宴，见其忌食羊肉，因谓羊肉性与人参同功，误以为毒可乎？自是更不忌，不旬日而疮口敛，嗽亦渐愈。嗣后每岁至冬，虽常膳亦不撤，嗽亦不复发矣。

顾色泉老医，年六十有五，因盛怒疽发于背，大如盂，四围色黑。召疡医治之，用冷药敷贴，敷已觉凉，约曰：七八日后，为后刀去瘀肉。顾俟其去，曰：四围色黑，乃血滞（妙理），更加冷药，非其治也。乃更治热敷药，去旧药敷之觉甚痒，终夜。明日色鲜红，焮肿亦消，

惟中起数十孔如蜂房。一日许，又觉恶心作嘔，视一人头如两人头，自诊曰：此虚极症也。用参附大剂进二服，视已正矣。不数日竟愈。

一人患肿毒，溃后，不时出一细骨。用生桐油调蜜陀僧如膏，绢摊贴妙。

《名医类案》

马嗣明

杨令患背肿，以练石涂之便差。作练石法，以粗黄石鹅鸭卵大，猛火烧令赤，内醇醋中自屑，频烧至石尽，取石屑晒干，捣下筛，和醋以涂肿上，无不愈。

《北齐书》

余南桥

上虞葛通议公，年九十余，患背疽，初进仙方活命饮，穿山甲（蛤粉炒黄），甘草节、防风、真没药、赤芍、白芷（各六分），当归尾、乳香、（各一钱）贝母、花粉、皂刺（各八分），金银花、陈皮（各三钱），作一服，酒煎服；继服蟾矾丸，黄蜡熔化，入细矾末，等分为丸，百沸汤下八十丸；次服忍冬丸，金银花晒干一斤，同粉草二两，共为细末，无灰酒打糊为丸，酒下八九十丸，日三服，若以金银花趁湿捣烂，水酒各半熬成膏。丸前末，尤效。毒未溃，以麦饭石膏围之，白麦饭石二两，（火煨，米醋淬十二次，水洗）白敛二两，鹿角灰四两，三味各研极细末，用经年米醋入砂锅内调匀如稀酱，文武火熬，以槐枝不住手搅起鱼眼泡，取出入大磁瓶封固，勿使尘垢，顿井水中一昼夜，先将猪蹄汤洗净，雄猪后蹄约二斤半，不用盐，井花水瓦罐煨烂其肉，取出，著盐少许，与病者下饭，其汤吹去油，以鹅翎蘸汤洗患处，以瓶子涂麦饭石膏，但有红晕处尽涂遍。毒既尽以神异膏贴之，玄参，（五钱不见缺）黄芪、（三两）杏仁、（一两，去皮尖）全蛇脱、（五钱，盐水洗、焙干）男乱发、（五钱，洗净、焙干）露蜂房、（一两有蜂多者）黄丹、（五六两，水飞、罗细）真麻油一斤同乱发入铜铫中，文武火熬，候发溶尽，以杏仁投入，候黑色，用

布滤去渣，再后人玄参、黄芪，慢火熬一二时，取出，稍冷旋入露蜂房、蛇蛻，将槐枝急搅却移火上，慢火熬至紫黄色，用布滤去，复入桃，乘冷投黄丹，急搅片时，又移火粘熬，候油变色，滴火成珠，再熬少时，候将冷倾入水中三日，退其火毒，取出置器内封收，待用。前药品皆临时制备，效亦随手而应，脓干肉长，百日奏功。其孙太守葛焜刻而传布，名曰广仁编（此法《千金方》亦有，《本草纲目》言之甚详，有中流一壺，妙本竟挾前人之美为己有秘本，岂非欺人）。

余姚史嗣元祖母，年六十余，三月背心偏右四五分生核如粟大，上一白头仅如绿豆，初不为异，但痒甚，令婢摩擦，数日而白头内出脓不许，痒如故，旬日，满背掀肿，周回阔尺许，日夜呻吟，背若负石米，非壮妇莫能扶起。迎外科马医视之，云毒已成，非药所能，必开刀乃可。举家犹豫不忍，马曰：譬之救火，火在屋下，必穴其顶，否则不尽不止。若复一日，必内溃不可为矣。不得已从其说。马举刀用麻札，露刃止四分，曰：外科不得已用刀针，唯背上不宜针，缘肉薄，破其膏育即死矣。刀亦不敢深用，但破其腐肉。举家惧甚。马举刀纵横审视，各寸许，去腐肉若鸡卵大，脓血迸流，随以米醋煎滚，用羊毛笔蘸洗之。人人遑惧不忍视，而病者称快，且云：背上轻若干矣。马云毒势正甚，疮口即合则不可再破。即用桃枝竹，以瓦镰去其上青皮，取次层竹衣，揉擦若软绵，以香油润湿，塞在疮口，朝夕一易之，易时仍以滚醋洗，有腐肉黑色者，用竹枝摘起，剪刀剪去，乃日服十全大补之剂，又十余日，方见长肉。嗣元年十四，日侍汤药，颇得其详，因述其颠末，以仁后世，恐畏惧刀针而坐视其毙也。

《名医类案》

麻风

费伯雄

某。游面风眉发尽脱，项疼。宜真丹加減。

生地三钱 菟丝子三钱 桑叶三钱 玄参三钱 川石斛三钱
黑芝麻四钱 沙参四钱 地骨皮五钱 女贞子四钱 甘菊花三钱
刺蒺藜四钱 羌独活各六分 鲜柏叶五钱 桑枝五钱 红枣五枚

洗方：羌活二钱 蕲艾五钱 松毛一两 角刺三钱 侧柏叶一两

又搽药：皂角 鹿角 松毛各一两 烧灰存性研末，姜汁、大枫子油调搽。

某。血虚不能荣润肌肤，阳明湿热浸淫。恙始手足，继之游及遍身，幸而未上头面，皮肤搔痒，似如虫行，已成蛇皮风癩，业已有年，不易速瘳。治宜养血活血为主，佐以祛风胜湿，以和阳明，经谓治风先治血，血行风自灭。惟恒心服药可效，否则难治。

归身二钱 白芍二钱 生地三钱 党参三钱 菊花二钱
蝉衣一钱 丹皮二钱 玉竹三钱 苦参二钱 秦艽二钱 车前子三钱
天麻一钱 羚羊片一钱 浮萍草二钱 川芎八分 独活二钱
桃仁泥一钱 槐枝三钱

又丸方：丹参二钱 川怀牛膝各二钱 赤苓三钱
生熟苡仁各三钱 焦茅术一钱 黄柏二钱 地肤子三钱 大胡麻三钱
桑枝三钱 梧桐花三钱 豨莶草三钱 五加皮三钱 大枫子一钱
海风藤三钱 防风己各三钱 老鱼鳞三钱

某。足底漏底之风毒，窜溃烂久不愈。

用独瓢大蒜贴患处，再用艾火灸，煨牡蛎研末掺之。

某。大麻风肢麻肌木，伸缩不利。

大胡麻三钱 桑枝一两 紫背浮萍二钱 大生地六钱 桃仁三钱

白藓皮三钱 甲片三钱 制川乌一钱 胆星一钱

《费伯雄医案》

马文植

高淳，陈左。阴虚，湿热下注，右足麻木，掌趾穿破，足胫破损，左手指麻木，筋脉不舒，气血不能周流。夜分气升呛咳，寝汗淋漓，阴虚肺虚，气不外卫。拟标本兼治。

北沙参 当归 杏仁 浮小麦 黑料豆 苡仁 胡麻 红枣
甘草 茯苓 黄柏 生地 桑枝

二诊：麻风有年，阴分已亏，兼受寒邪，呛咳，腰骨吊痛。先为治肺。

《外科集腋》

陈莲舫

钱。癩皮风，肺脾湿毒外游肌肤，治以宣解。

焦茅术 穉荳蔻 大力子 藕皮 绿豆衣 焦山梔 元生地
川连 苦参 侧柏叶 生甘草 新会皮 金银花

用直，某。大麻风，脚底已漏，肢麻面胖，有方兴未艾之势。

元生地 川桂枝 梧桐花 晚蚕砂 宣木瓜 陈皮 川杜仲
白附子 海风藤 炙虎胫 桑梗 威灵仙

烧香山，沈。将起大麻风，足裂眼歪，险重之至。

焦茅术 川桂枝 香独活 宣木瓜 木防己 炙虎胫 全当
归 元生地 五茄皮 粉草藓 天仙藤 广陈皮 丝瓜络

倪。大麻风，勉力敷衍。

香独活 西绵芪 粉草藓 桑寄生 全当归 大力子 侧柏
叶 左秦艽 青木香 宣木瓜 川杜仲 元生地 新会皮 丝瓜
络

沈。将起大麻风，足裂，眼歪，险重之至。

焦茅术 五茄皮 川桂枝 木防己 粉草藓 元生地 香独活
炙虎胥 天仙藤 宣木瓜 广陈皮 全当归 丝瓜络

《蓬斋秘旨》

丁泽周

章幼。风湿热蕴袭肌肤之间，血凝毒滞，遍体湿痹如水痘状，肌肉麻木，久成麻风。治风先治血，血行风自灭也。

净蝉衣八分 粉丹皮二钱 紫丹参二钱 京赤芍二钱
黑荆芥一钱 杜红花八分 茯苓皮四钱 通草八分 苦参片钱半
六一散包，三钱 全当归二钱 白鲜皮钱半 黑芝麻三钱

《丁甘仁医案续编》

章成之

朱男。两手指尖麻，面色不华，此属于营养方面事。左掣丸往日曾有性病。

全当归 9克 黑大豆 12克 粉草藓 9克 粉丹皮 9克
五茄皮 9克 秦 艽 9克 稀莩草 15克 杜赤豆 30克

二诊：据其往日之经过，颇类麻风。仲景诊王仲宣四十当眉落，亦是斯症。厥后唐初四杰之卢照邻，因此症而终身不治。故诊治之宜早！今予下方：

苍耳子 90克 大枫子 60克 蜈蚣连头尾五条 全蝎 6克
雄黄 15克 绿豆衣 150克 蕲蛇四条 海藻 90克 昆布 90克

上药共为细末，如梧子大，每次二十粒。

《章次公医案》

痒风

中神琴溪

一妇人，举身发痒，搔掬不禁，不须更措爪。岁余肌肤为之甲错，百医不能治。先生与之浮萍加大黄汤，兼龙门丸一钱，酒服泻数行，痒乃止。

《生生堂治验》

何书田

血去则发热生风，肤痒所由作也。

生地 丹皮 苡仁 白薇 稀莩草 阿胶 归身 茯苓 黄芩 十大功劳

《辨山草堂医案》

费伯雄

某。脾有湿热，肌肤作痒。宜祛风利湿。

当归二钱 茯苓二钱 生熟苡仁各三钱 黄柏三钱 五加皮三钱
地肤子三钱 稀莩草三钱 梧桐花一钱 苦参片一钱 川牛膝二钱
统车前子三钱 焦茅术一钱 秦艽一钱 白花蛇二钱 桑枝三钱
槐枝一尺 蛇床子二钱

《费伯雄医案》

张士驥

郭炳堂如君，二十余岁，体素强。忽然脚心痒不可忍，心里烦躁不堪，自欲投海悬梁。诊其脉，惟左手尺寸略见洪数，此外又不见别病。遍查方书，不识病名。惟忆经云，诸痛痒疮皆属于火。知其为火无疑。脚心为涌泉穴，属少阴，想必系肾火下泄为痒，上浮而为烦

躁也。欲用知柏八味，则不宜于心；欲用犀角地黄，则恐其引热入荣而为斑疹。遂单用元参一味，取其直入少阴，用至一两五钱。服后一点钟之，其痒止，烦躁已退。越日身有微热，再用参、知母、黄连、黄芩，一服而安愈。后某以为神奇，殊不知症本变幻无穷，总不离于六经，分经治症，万无一失。因忆及孟英案中治阴虚火炎，而赤如饮酒，用一味元参汤亦即此意耳。

《雪雅堂医案》

刘子维

某，周身发痒不止，现有红点，痒已极。

沙参五钱 干姜三钱 白术五钱 薄荷八分 土茯苓五钱
黄芪八钱 制附片五钱 艾叶三钱 官桂三钱 牡蛎二两
生粉葛一钱 生姜五钱 生白芍五两

五付服毕愈。

李俊注：此虚痒也。原批云：此人素不足，宜回阳收纳为要，如作风疹治之，则误矣。按：风疹似疹而痒不已，本属邪实，此症则由正虚，故不同治。《刺本篇》曰：淫气往来，行则为痒。夫淫气者，以邪实言之，则为郁，而不泄之气。以正虚言之，则为壅，而不运之气。故皆妄行于肌肉、皮肤而为痒也。

《生气通天论》曰：苍天之气，清静则志意治，失之则内闭九窍，外壅肌肉。又曰：营气不从，逆于肉理，乃生痈肿。夫五方五色，东方在色为苍，在藏为肝。苍天之气，即东方生气。人体受气于天，天气清静则志意治，而气血从，虽弱者亦能却病。否则乱而无纪，未有不随体质之偏，而为有余、不足之病者。五藏治乱之机在肝，此人之体素不足，复逆苍天清静之气，故卫气不运，壅于肌肉，营气不从，逆于肉理，而为形似风疹之虚痒，与痈肿之虚实虽异，而因则无异也。

人身有外卫之气，有内守之气。外卫之气，宜运行不息；内守之

气，宜深藏不露。本相辅而行，如纸鸢之有系也。苟或失之，则不运不藏，倚伏为害，如此证是已。周身发虚痒者，乃皮肤、肌肉外卫之气不归治节，壅而不行也。夫既外卫之气不归治节，壅而不行，则阴阳有离决之势，其脉之浮大而空可必，故不可作风疹治，而偏用内清、外散、下引之剂也。《阴阳别论》曰：阳气破散，阴气乃消亡。夫阴阳之义如影随形。内弛者，外必壅；外散者，内必绝。而将欲破散者，则必鼓壅。此证之阳，已鼓壅于皮肤、肌肉矣，可不畏哉？

《藏气法时论》曰：肝苦急。《本藏篇》曰：志意和，则精神专直，魂魄不散。夫人身以神为主，形病而神不病者，虽剧无害；神病而形不病者，虽轻亦危。此证发痒，以至奇痒，其肝之苦急，志意之骚乱可知，是形神俱病也。苟不有以定之，则精神魂魄将日以散而不收矣。故重用白芍平肝敛阴，并用牡蛎纳肾潜阳，如泊舟之下锤石，以资镇定而免漂没，此为治命。附、桂、姜、术、参、芪补火生土，补土生金则阳虚补阳也，生姜上开，艾叶下散，则静守之气宜藏，而运行之气宜通也。薄荷、甘、葛升散阳邪，土茯苓降泄阴邪，则为皮肤病通治法，不因回阳收纳而废也，此为治病。命病双调，则正固而邪去矣。

虽然卫气外壅而用参、芪，得无犯盛盛之戒乎？不知虚胀宜补虚，壅亦宜补。《五藏生成篇》曰：诸气皆属于肺，盖统气者，肺也。虚则不统而逆满生，补之则治节如初，而胀壅自己。《至真要大论》所谓塞因塞用是也。惟下虚不可用黄芪，否则升气于表而里愈虚。此证内气不藏，固不宜用，而外气不运，则在所必用。权衡至当，惟有强其内守而用之，乃无所失，此白芍、牡蛎之所以特重也。

《圣余医案论解》

方耕霞

邱。肺风外走，肝热内盛，为游风瘙痒，走及头面四肢，以熄风凉血。

鲜生地 赤芍 归尾 泽泻 桑叶 稻豆衣 连翘 黄芩
黄柏 丹皮 茅根

《倚云轩医案医话集》

白屑风

李铎

临邑黄姓妇，年二十余，头上生白屑风，初起发内微痒，久则渐生白屑，瘙痒非常，头发脱散，皮肤光亮，白屑叠叠成片，抓脱见血，过夜又生，乌云之髻十去其八。此皆起于产后及经后，热体当风，风热所化，以致血虚不能随气营养肌肤，故毛发根空。诊两手脉缓而弱，始以祛风换肌丸方，十服如故，继以神应养真丹二十帖，并以润肌膏搽之而愈。

神应养真丹

熟地 当归 川芎 白芍 天麻 苦参 羌活 真茅术 胡
麻 菖蒲 木瓜 菊花 甘草

润肌膏

麻油八两 奶酥油八两 全当归一两 紫草五钱 黄蜡一两
洋水片五分，不用亦可 零陵香五钱，后入煎

上药依分秤足，先将奶酥油熬出去渣，和麻油浸药二三日同煎，药枯去渣，滤清，加黄蜡化尽，倾入磁罐收贮，擦搽头上，能长新发。

按：发者血之余，血盛则发润，血衰则发衰，血热则发黄，血败则发白，白枯则发落。然发落亦有由厚味成热，湿痰在上而熏蒸，发根之血渐枯而脱者，及火炎血燥而落者，有风气盛则血燥而枯者，有虚损之疾，一损肺，皮槁毛落者。治宜审究其由，按其病之虚实立法可也。

病皆起于经后产后，必是血枯所致，此虽不常概见，而据理设

法，治无不宜。寿山

《医案偶存》

癰疹

薛立斋

一男子面赤作渴，面常患小疮作痒。服祛风药，遍身发赤癰；服花蛇酒，更发赤晕。遍行砭刺，又服消风散，发热口渴，饮水不止。谓：肝经血虚而风热也。用梔子清肝散及地黄丸料煎服，热渴渐止，疮渐结靨。用八珍汤、地黄丸，疮靨渐脱。又服月余疮渐愈。

一男子面生粉刺，或生小癰，服消风散疮益甚，服遇仙丹加遍身赤痒。仍服前药，发热焮肿。又服旬余，溃而出水，形体骨立。先用四君子、当归、桔梗四剂饮食稍进；又用八珍汤，数剂而痊。

一男子嗜膏粱炙煖、醇酒辛辣之物，遍身生痞癰，甚痒。服消风散之类，更起赤晕。又砭出血，其痒益甚。敷败毒之剂，遂各成疮，脓水津淫，眉毛渐脱，赤痒益甚。此脾经积热伤血所致，先用犀角地黄汤，诸症稍退；乃用济生犀角地黄汤加黄连治之，脓水渐止；乃以八珍汤加山梔、丹皮，眉毛渐生。因饮食失宜，胸腹作胀，饮食少思，或大便下血。用五味异攻散加升麻，饮食渐进；又用补中益气汤而血止；仍用异攻散加当归、丹皮而痊。

一女子性急多怒。月经先期，患痞癰色赤作痒，搔破脓水不止。服祛风药其疮益甚；服花蛇酒四肢癰疽，眉毛脱落。先用柴胡清肝散加钩藤数剂，又用加味逍遥散加钩藤，诸症渐愈。又用易老祛风丸而安。

一女子年十四，腕软睡生物如黄豆大，半在肉中，红紫色，痛甚，诸药不效。一方士以水银四两，白纸二张，揉熟蘸银擦之，三日自落而愈。

《续名医类案》

朱丹溪

朱院君，三十余，久患瘾疹，身痒而紫。可与防风通圣散加牛蒡，为极细末，每二钱，水盏半入姜汁，令辣煎，食前热饮之。

汪石山治一人年逾六十，形瘦苍紫，夜常身痒，搔之热蒸，皮肉磊如豆粒。痒止热散，肉磊亦消。医用乌药顺气，升麻和气等，不效。诊之脉皆细濡近驶。曰：此血虚血热也。而为顺气和血。所谓诛罚无辜，治非所宜。遂以生地、元参、白蒺藜、归、芎、芪、芍、黄芩、甘草、陈皮煎服，月余而愈。

一老人患疹，色微赤，作痒发热。以人参败毒散，二剂少愈；以补中益气汤加黄芩、山栀而愈。

一妇人遍身搔痒，秋冬则剧，脉浮数。此风邪客于皮肤而然也。名曰血风疹。饮以消风散及搽蛇床子散，少可。更以四物汤加荆、防，数剂而愈。一妇患此，夏月尤甚，脉洪大。以何首乌散。一妇患赤斑搔痒，搔破成疮出水，久而不愈。内服当归饮，外搽蛇床子散，并愈。又一妇患此，诸药不应。以四生散数服而愈。大抵妇人体虚，风邪客于皮肤则成白疹；寒湿客于肌肉，郁热而为赤疹。色虽有异，治法颇同。凡人汗出，不可露卧及浴。经云：汗出见湿乃生痱痹。雷公云：遍身风疹皆由汗身受风也。

《续名医类案》

风实夫

冯左。脉象细涩，营气交虚，肌肤风块发无定处，搔痒如针刺状。此由肝风绕络，宜养血熄风。

制首乌五钱 明天麻一钱 白菊花焙，钱半 白归身酒炒，二钱
白蒺藜炒去刺，二钱 桑叶蜜炙，钱半 白芍酒炒，二钱 姜蚕炒，五分
粉甘草五分 加黑芝麻五钱

复诊：经云血虚必热，热必生风，风生燥，遂令肤内发痒，搔之

细颗垒起。今风块虽退，而肝脏内风未熄，尚有绕络无处不到之地。是以眼耳口鼻诸窍悉燥痒，脉缓左虚，转以养血熄风之剂，多进自安。

制首乌一两 煨天麻钱半 炒僵蚕七分 白归身四钱
白蒺藜三钱 蝉衣去翅足，五分 白芍酒炒，三钱 白菊焙，钱半
桑叶蜜炙 生甘草各一钱 仍加黑芝麻一钱

《凤氏医案》

朱增籍

门人族芳斋染病，延余治。诊之脉微而浮，腹大痛。述日前浑身不和风疹，疹隐则腹痛甚。余知疹邪传布太阴，出则风疹，入则腹痛，法宜提邪外出，则腹痛自愈。主以桂枝汤加人参防风，服一剂风疹出，而腹痛顿止。奈余毒留恋不出，喉舌麻木，心慌内乱，片刻难耐，即以银花甘草煎汤与之。药方入口，如醍醐灌顶，沁入心脾，喉舌内府安然。信乎银花、甘草，外科书称为化毒神品。此吾芦根方中选用二物之所由来也。

《疫证治例》

沈祖复

师母张夫人素来阴虚，每交冬令，喜用脚炉，春时易生温病。一日遍体奇痒，渐发无数之块，大者如盘，小者如碗不等，肿而微红，攻于头面则目红，攻于胸肺则气逆神糊。搔痒不止，几欲挖去其肉；日夜不寐，呼号三日，困苦莫可言状。他医惊而却走。先生以为非风疹，乃疙瘩瘟也。热毒蕴于营分，外发肌肤，防其毒陷心包则大险。重用犀角、鲜生地、鲜大青、银花、连翘、黑山栀、丹皮、牛蒡子、人中黄、绿豆、茅根等，服三、四剂而块渐小渐减，痒亦渐止。调理六、七剂而愈。

《医验随笔》

陈莲舫

陆。治风块屡发，脉见浮弦。

冬桑叶 炙豨莶 川石斛 焦山栀 粉草藓 益元散 蝉衣
黄防风 光杏仁 焦米仁 连皮苓 广陈皮

许。浑身痒痒，游风根必须调复。

黄防风 左秦艽 杭甘菊 焦茅术 粉草藓 炒当归 制豨
莶 净蝉衣 大力子 焦山栀 焦米仁 广陈皮

陶。游风支蔓，治以清解。

焦茅术 焦山栀 制豨莶 粉草藓 焦米仁 广陈皮 制川
军 大力子 净苦参 嫩滑石 生甘草 侧柏叶

李。游风遍体，肺脾风湿外游，营阴受烁，脉细滑，治以清解。

焦茅术 黑山栀 光杏仁 元生地 蝉衣 广陈皮 生甘草
炒防风 飞滑石 绿豆衣 侧柏叶 白鲜皮 金银藤

《莲航秘旨》

何长治

左。风邪外袭，身发风块，面浮，脉数。法以散风。

荆芥钱半 大力钱半 僵蚕二钱 前胡钱半 薄荷八分
桑叶钱半 生草五分 桔梗一钱 加蝉衣四只

《何鸿舫医案》

张山雷

某左。血分蕴热，肌表糜烂痒搔，上身为甚，此游火游风之类。
脉带弦劲，舌滑，治宜清热熄风。

焦栀皮 6克 炒丹皮 4.5克 炒川柏 6克 鲜生地 12克
肥知母 6克 玄参 12克 瓜蒌壳 6克 银花 9克 白茶菊 4.5克

粉草藓 9克 茵陈 9克 赤苓 9克 象贝 9克 蚕砂 12克

《张山雷专辑》

朱应征

胡左 燥金用事，热伏于内，肺胃火结，风动痰甚，两脉均滑而有力。清解利水之品主之。

酒黄芩 鲜芦根 杭菊花 焦梔皮 赤茯苓 辛夷 净连翘
桑叶 赤芍 檀豆皮 甘草梢 淮木通

复诊：风淫于内，其行最速，发于皮肤之间，为点为痒，欲称风疮。实是血热生风，流行乎肌肉，宜清风泻热为合。

蜜全蝎 洗腹绒 皂角刺 净蝉衣 桑白皮 伏龙肝 赤茯苓 莲心炭 荠菜花 蜜僵蚕 茯苓皮 天麦冬

三诊：肺主皮毛，郁则作嚏，肝不藏血，睡眠欠适，两脉弦滑，左关为甚。亟宜平肝宁肺，以清风调血，疾白除矣。

石决明 蜜全蝎 蜜远志 辛夷 杭白菊 青防风 桑白皮
明天麻 桑椹子 霜桑叶 北沙参 茯苓神 夜交藤

四诊：肝风已熄，六脉平和，而固有之嚏症亦复较减，仍宜稍事清滋，再接服散剂，以治嚏之根源。

菟丝子 赤白芍 夜交藤 车前子 茯苓 炒枣仁 桑寄生
茯神 广橘络 枇杷膏

又散剂 诸痒出于肝，皆由虫之作用，鼻痒则嚏，职是故也，以沙参保至气，辛夷专行肺经，全蝎祛风，草果散太阴独胜之寒，风靖虫自伏矣。

北沙参 草果 辛夷 全蝎 共研细末，以桂木煎水兑服

余于丁卯年曾创一方，治愈叔丹陈夫人久年嚏症，方用别直参、辛夷、草果、僵蚕研细末，以桂园十枚煎水冲服，一料断根，与此症相仿佛，而叔母年齿较高，故用药稍异，其功效则同也。

《湖滨实验录》

刘云湖

病者 孙镇王小三之子，年十五病。

病因 患发病。

症候 遍身起疹，扪之糙手，痒彻人心，必烦闷乱。

诊断 脉浮数，此风毒也。

疗法 与荆防败毒散加减之。

处方 土茯苓、刺蒺藜、白扁豆、老连翘、淮木通各三钱，二花二钱五分，广郁金、芥穗各二钱，防风、牛蒡子各一钱五分，蝉蜕、粉草各一钱，灯芯三只。

效果 二剂而安。

理论 风疹与湿疹不同，湿疹乃热由肺胃而发，多发热而渴，病由内以达于外也。风疹乃风中挟毒，浸于皮肤，滞于血络，毒向内攻，血液循环受滞碍，所以痒彻于心，心烦闷乱，病由外以入于内也。不急治，亦能使风毒攻心，能致人于死。

夫风中何以挟毒，毒又何至令人发疹。要知风乃空中动气，四时皆有风，四时皆有不正之气，其中或挟有菌毒，或挟有污秽，即谓之毒，风为媒介，浸入人身，由毛窍而入，达于血管，阻塞血液流行，是以滞碍而起墩。由渐而致于大血管大动脉管，影响心瓣膜之循环，故烦而闷乱，痒者，毒害为之也。内经云，诸疮痛痒，皆属心火，火即毒之互词也，是以知风毒之为害矣。

方论 荆防败毒散，驱表邪风毒之剂也。此症本风邪由表而入，亦当使之从表而出，故以芥穗、防风、牛子、蝉蜕托里散风。痒彻人心，毒欲内攻，故以郁金开胸，蒺藜疏络，土苓、二花、连翘、甘草以解毒，白扁豆以奠安胃气。因外表不了，尚有余邪，故以木通、灯心引之从下窍而出也。

此方专用轻药外托，因毒在肌肤也，不用寒凉以内胜，因无大热也，若用重剂或甘苦寒，则引毒内入矣。治病者须识疹疫有表里

寒热之分，庶用药不误矣。

《临床实验录》

周镇

吴妇，三十二岁。丁丑四月，患凛热咳嗽，寒时毛窍起粟，旬余，来诊。痰不爽利，独能食饭。风邪内袭肺胃。制僵蚕、前胡、杏仁、荆芥、瓜瓣、薄荷、瓜蒌、火麻仁、牛蒡、象贝母、黑山栀、金铃子、黄芩、茅根、梨肉、蜜、宁嗽丸等。六剂。得汗，热嗽均止，腿膝发风疹。仍不避风，且食腥鱼，风毒即隐。

复诊：辍药十日，受热又发，咳逆痰多，脉数。邪未退清。生蕙、瓜瓣、兜铃、黄芩、紫菀、金铃子、木蝴蝶、丹皮、杏仁、前胡、象贝母、荆芥、茅苇茎、竹茹、青蛤散、半贝丸、宁嗽丸。服后即发风疹甚畅，但烦懊不舒。再清解血络之风，冀减轻肺间蕴热。桑、翘、僵蚕、蝉衣、绿豆衣、豆豉、郁金、薄荷（鲜生地洗同打）、黑山栀、地肤子、前胡、牛蒡、茅苇茎、玳瑁、葛根、荆芥、宁嗽丸研末冲。二剂，风疹已透，咳多，气逆恶心。再清余蕴。竹茹、前胡、象贝、牛蒡、桑叶、黄芩、紫菀、木蝴蝶、金铃子、丹皮、旋复、代赭、火麻仁、茅苇茎、款冬、白蜜、宁嗽丸。循愈。

邹士生之妇，西园弄。幼有风疹，不时常发。前寓沪就诊，以和营泄风之剂，迟至半年方作。近岁不服药，每月必发，腹痛寒热，或旬余不愈。丙辰春来诊，述用绿豆所制索粉，腹痛略减。头痛，恶风，脉数右盛。风邪袭于血分，枢机窒而不通。疏苍耳子、枫果、牛蒡、郁金、连翘、绿豆衣、银花、鸡苏散、白僵蚕、蝉衣、防风、归须、红花、豆卷。另服玉枢丹少许。二剂大减。复诊：增损原方，再剂，热退疹化。余谓营气窒痹，风邪易袭，螭妇肝郁，必须丸药久服以缓调之。为定全当归、赤白芍、柴胡、黄芩、银花、葛蒲、丹皮、山栀、生地、川芎、绿豆衣、蒺藜、羌独活、僵蚕、蝉衣、乳香，六神曲糊丸。每日饭后

服二三钱。许其可以不甚举发，即发亦可以减少时间即平耳。

《周小农医案》

孔伯华

郭男童，八月十九日。脾湿肝热两盛，汗出当风，遂致周身发风包作痒，脉大而滑数，右寸较盛，邪在皮毛，当凉化疏解。

生石膏六钱，研先煎 麻黄梢二厘 桃仁泥钱半 全蝉衣五分
地肤子三钱 蒲公英三钱 知母三钱 通草一钱 枯黄芩二钱
栀子炭三钱 龙胆草钱半 滑石块三钱 鲜茅根八钱 杏仁泥三钱
牛黄抱龙丸一粒(分化)

《孔伯华医集》

章成之

孙女。连日夜间发热，每热必风疹，痒不可耐。凡风疹发于稚孩，多属胃肠病，以往曾七日一更衣。此其候也。

海南片 12 克 桃仁 9 克 草决明 12 克 蒲公英 18 克
当归 12 克 丹皮 9 克 赤芍 9 克 茅根 30 克

《章次公医案》

张汝伟

陈凤英(女)，年四十，苏北，住富民路富民村四弄四号。寒邪外袭，食滞内蕴，大腹绞痛，大便不通，上则吐逆不止，此滞阻在胃，而未入于肠，外发风疹块，密密层层，搔痒难熬，真是痛痒两难熬，内外两有病。脉细弦滑，苔白根微黄。拟先内后外，用化滞温中，理气安胃，先平上逆之气，呕止便通为要。

上肉桂二分，研末 沉香片二分，研末 二味用藕粉糊为丸，药汁吞服
淡吴萸六分，同 川连一钱炒 焦枳实二钱 带子腹皮 地枯罗
车前子包 焦六曲 焦楂肉 生白芍 全瓜蒌各三钱 元明粉钱半

二诊，进前方后，呕吐止，腹痛定，大便通，肠中之粪行后，胃中之滞动，而脘中胀痛矣。本不头痛而头亦痛，风疹之风，与先受之寒，从阳明太阳外透，宜从阳明论治，用枳椇加味。

大豆卷 淡豆豉 焦枳实 焦六曲 全瓜蒌 大腹皮各二钱
元明粉钱半，后入 台乌药 清防风 广郁金 炒广皮各钱半
苏薄荷八分 姜竹茹钱半

三诊：热退，脘中痛止，大便又通，溲少而赤，风疹亦稀。宜轻疏清营治之。

炒赤芍二钱 炒川芎一钱 地肤子三钱 炒防风钱半 粉草藓
车前子包 益元散包 赤茯苓各五钱 山梔仁 炒丹皮各钱半
丝瓜络 生苡仁各三钱

本证始末：此方刘姓之劳动大姐，体质尚健，受邪较深，故三易方而诸症退。方亦由重而转轻也。

方义说明：第一方，注重止呕。因为必呕止而气乃可平，肉桂、沉香、藕粉为丸，温中散寒，降逆和胃以止呕，左金平肝止痛，余化滞通小便。第二方，采取外感治法，转入正途。第三方，治风疹余波。以化湿清热疏风为主，一步轻一步，合治病规程。

《临症一得》

陆观虎

孙某某，男，44岁。

辨证：风疹块。

病因：湿热郁积，外感风邪。

症候：风疹块，发痒身痛，发冷发热。脉滑数。舌红布刺，苔黄白。

治法：祛风解表，清热利湿。

处方：桑叶6克 土贝母6克 通草2克后下 薄荷2克后下
赤芍6克 丝瓜络3克 紫草茸3克 忍冬藤9克 蒲公英9克

茯苓9克 冬瓜皮9克。

方解：桑叶、薄荷、忍冬藤祛风解表，清热解毒以除发冷发热。蒲公英清热解毒消肿。赤芍散邪行滞止痒。紫草茸凉血活血利窍。土贝母泻火散郁消痰。丝瓜络除风化痰，通经络，行血脉。通草通络利湿。冬瓜皮、茯苓皮利湿行水，消肿除胀，散毒以治风疹块发痒。

徐某某，男，55岁。

辨证：风疹块。

病因：湿热郁积，积食受风。

症候：风疹块发痒，时隐时现，时日已久。脉浮数。舌质红，苔黄腻。

治法：散风清热，利湿化食。

处方：白蒺藜去刺炒9克 山楂炭9克 猪苓6克 赤苓6克
杭甘菊9克 建曲炭9克 鲜芦根去节30克 冬瓜皮9克
炒赤芍9克 蒲公英9克 茯苓皮9克 薄荷2克后下。

方解：白蒺藜、杭甘菊、苏薄荷散风清热解表。蒲公英、赤芍、芦根清热消肿，活血解毒以止痒。山楂炭、建曲炭磨积开郁以消食。猪苓、冬瓜皮、茯苓皮利湿清热，消肿解毒。

二诊

症候：风疹块见退，仍痒，左臂酸痛。脉细弦。舌质红，苔薄黄。

处方：前方去山楂炭 建曲炭 苏薄荷 白蒺藜 杭甘菊
加青黛5克 连翘9克 金银花9克 嫩桑枝30克洗 宣木瓜9克
丝瓜络炙5克。

方解：银花、连翘清热解毒散风。丝瓜络、嫩桑枝通经活络，除风解毒。宣木瓜祛风行水，利筋骨去湿热。

《陆现虎医案》

叶熙春

孙，男，三十五岁。六月。杭州。初起形寒，继而身热，稍有数

声咳嗽，渴不喜饮，纳食不佳，遍身骨节酸楚。昨现风斑，隐于肌肤，痒而喜搔，面颊微肿，脉象浮数，舌苔薄白。风湿相并，郁于肌表，邪已化热。治拟清热宣肺，透表行湿。

麻黄 5 克 白杏仁 9 克 浙贝母 9 克 蝉衣 5 克 苡仁 12 克
白蒺藜 9 克 地肤子 12 克 白鲜皮 9 克 生甘草 5 克 炙陈皮 8 克
秦艽 6 克

二诊：前方服后，汗出身热已解，咳嗽差减，斑块续现，脉象濡缓，苔薄白。前方已效，原法出入。

麻黄 3 克 白杏仁 9 克 生甘草 4 克 生苡仁 12 克
白鲜皮 9 克 紫荆树皮 9 克 地肤子 12 克 秦艽 6 克 白蒺藜 9 克
丝瓜络 15 克 蝉衣 5 克

三诊：斑块渐消，搔痒亦差，咳嗽无几，肢节酸痛减轻，脉浮苔白。再清余邪。

炒枇杷叶 12 克 白杏仁 9 克 生苡仁 12 克 地肤子 9 克
白鲜皮 9 克 炒橘红 5 克 浙贝母 9 克 冬瓜子皮各 9 克 前胡 6 克
白蒺藜 9 克 秦艽 5 克 生甘草 3 克

钱，男，十七岁。八月。寒湿内蕴，外挟风邪，形寒肢冷，身热头疼，疹发全身，隐见无常，皮肤作痒，腰背酸楚，脘闷食减，腹内阵痛，口不渴饮，便艰溲清，脉浮弦，舌苔薄白，先拟疏风散寒，佐以宽胸化湿。

桂枝尖 2.4 克 粉葛根 5 克 鹿角霜 5 克 制苍术 5 克
带皮苓 12 克 五茄皮 12 克 白鲜皮 9 克 蝉衣 4 克 白蒺藜 9 克
栝蒌皮 9 克 浙贝母 9 克 紫背浮萍 5 克

二诊：前方服二剂后，形寒身热已减，疹发未透，风湿尚未尽达，是以脘闷未宽，纳谷不馨，腹中仍有隐痛，头目尚感昏眩，小溲短少，舌苔白，脉浮缓。原法加减再进。

制苍术 6 克 藿香梗 6 克 蝉衣 4 克 炒秦艽 6 克 白鲜皮 9 克
焦苡米 12 克 制川朴 2.4 克 焦山楂 9 克 佩兰 9 克

炒蒺藜 9克

丁女，三十八岁。二月。嘉兴。湿热内蕴，风邪外袭，形寒身热，数日未退。始则胸脘满闷，腰背骨节酸痛，继而遍体风斑作痒，口渴喜饮，胃纳不振，溲赤便秘，舌苔黄腻，脉象浮数，先拟解肌清热化湿。

粉葛根 5克 紫背浮萍 8克 蝉衣 5克 秦艽 6克 白蒺藜 9克
白鲜皮 9克 生苡仁 12克 青蒿梗 6克 飞滑石 12克，包
带皮苓 12克 川石斛 9克 淡竹叶 8克

二诊：前方服后，风斑续透，胸脘满闷得宽，骨节酸痛减轻，渴饮已差，二便通利，饮食得增。唯肺不肃降，又增咳嗽，咽痒痰多，舌苔黄腻转薄，脉象浮数。再拟肺胃同治。

桔梗 5克 炒牛蒡子 6克 清炙前胡 8克 象贝 9克
粉葛根 6克 白蒺藜 9克 蝉衣 5克 天花粉 6克 生甘草 1.5克
白鲜皮 9克 干芦根 18克

三诊：形寒身热已瘥，风斑渐退，而肺气未宣，咳嗽日夜不宁，咳甚胸背刺痛，舌苔薄黄，脉滑。清宣肺气继之。

炒牛蒡子 9克 泡射干 4克 苦杏仁 9克，杵 炒枇杷叶 12克
清炙前胡 8克 清炙冬花 9克 蝉衣 5克 炒甜葶苈子 6克，杵包
盐水炒橘红 6克 白蒺藜 9克

《叶熙春专辑》

施今墨

张某某，女，19岁。遍身易起红色痒疹，时发时愈，已有七、八年之久。平时消化不良，大便干燥，有时呕吐，腹部胀痛，喜食酸味。近日上述胃肠症状又现，并伴发痒疹。舌苔垢腻，六脉滑数。

辨证立法：平素饮食无节，胃肠消化不良。积滞生热，郁久入于血分，外感风邪，即发痒疹。治宜消导胃肠积滞，并疏风、清热化。

处方：炒谷芽 10克 青皮炭 5克 炒麦芽 10克 广皮炭 5克

炒半夏曲 10 克，旋复花 6 克同布包 莱菔子 6 克 醋柴胡 5 克
炒皂角子 10 克，晚蚕砂 10 克同布包 莱菔缨 6 克 杭白芍 6 克
焦山楂 10 克 酒当归 6 克 黑芥穗 6 克 炒防风 5 克 蝉退衣 5 克
宣木瓜 10 克 乌梅炭 5 克

二诊：服药六剂，痒疹全消，大便通畅，食欲增进，消化力好转。
嘱留此方，再发痒疹，即连服数剂。

赵某某，女，42 岁。突于昨夜，全身搔痒、遍起红疹，逐渐连及
成片，一夜未能安睡，晨起发现颜面、手足均肿，皮肤自觉灼热，头
晕、腰、小便深黄。舌苔薄黄，脉浮数。

辨证立法：血热受风，遍身痒疹，素蕴湿邪，随风而发，故作浮
肿，急用清血热、疏风邪法治之。

处方：北防风 5 克 黑芥穗 6 克 淡豆豉 12 克 桑寄生 20 克
赤白芍各 10 克 北细辛 1.5 克 嫩桑枝 20 克 炒山栀 5 克
绿升麻 1.5 克 蝉退衣 5 克 甘草梢 5 克 北柴胡 3 克
川桂枝 1.5 克 东白薇 6 克 川当归 6 克 川黄柏 6 克 沙蒺藜 10 克
白蒺藜 10 克 黄地丁 10 克 紫地丁 10 克

二诊：服药四剂，疹痒全消，惟感腰痠，四肢关节疼痛，头晕，小
便短、风热已消，湿气未净，再进通络利湿剂为治。

处方：川桂枝 3 克 桑寄生 20 克 生熟地各 6 克 北柴胡 3 克
嫩桑枝 20 克 杭白芍 10 克 春砂仁 5 克 北细辛 1.5 克
片姜黄 10 克 金狗脊 15 克 川黄柏 6 克 川续断 6 克 车前草 12 克
川革薜 10 克 川杜仲 6 克 旱莲草 12 克 川石苇 10 克
宣木瓜 10 克 酒川芎 5 克 炙草节 6 克

《施今墨临床经验集》

斑

周南

权平，壮年之人。六脉洪滑，而又非外感，必有大毒将发之兆也。曰：曾患便毒，既溃且愈，今复筋骨不利。视其遍身隐隐于皮肤中者，大小斑痕如锦，但未透出于外。宜先下之以逐其在内之毒，次汗之以散其在外之毒，即有疮发势必轻矣。以三黄汤加朴硝二剂，利三、四次，体不觉倦，斑痕已消一半。乃以荆防败毒散连进三剂，取微汗，表虽疏解，脉尚带洪。再进通利之剂微下之，脉既和平。乃以清凉解毒和平之药日尽一大剂，二旬日而竟潜消。忽而腮下肿起，恐成结毒，又下一次，仍以和解，一月痊愈。此全不用土茯苓，以汗下驱其毒，使无留余，不遗后患。倘以芩、连、大黄为苦寒而不敢服，或以荆、防为发毒而不欲服，甘心止遏，其害可胜道哉？世之患毒者，慎毋因循而不攻发之早也。

《其慎集》

北山友松

寺本氏，肌体壮热，发斑有汗，不食，面赤，眩暈，足弱。

玄参升麻汤倍白芍药

《北山医案》

王孟英

胡季权令郎珍官，右颧偶发紫斑一块，当时季冬。孟英与：犀角、石膏凉解之药，二、三帖后，始发热，斑渐透。犀角服至二十余帖始撤去。又素有目疾，余热复从目发，令以石膏药久服，居然渐愈。且能食肌充，略无他患，闻者莫不异之。

《王氏医案》

陈莲舫

朱。紫云风斑点未除，治以和养。

制 荃 五茄皮 粉草藓 川郁金 川杜仲 全当归 侧柏
叶 黄防风 左秦艽 焦米仁 黑料豆 沙蒺藜 生白芍

《莲舫秘旨》

癖

张子和

一女子，年十五，两股间湿癖长三四寸，下至膝，发痒时爬搔，汤火俱不解。痒定黄赤水，又痛不可耐灸炳熏漂。硫黄、茺如、僵蚕、羊蹄跟之药皆不效。其父母来求疗，张曰：能从予言瘥。父母诺之。以铍针磨尖快，当其痒处，于癖上各刺百余针，其血出尽。煎盐汤洗之。如此四次，大病方除。此方不尽以告后人，恐为癖药所误。湿淫于血，不可不砭者矣。

《续名医类案》

薛立斋

一人生风癖，似癖，三年不愈。五心烦热，脉洪，按之则涩。此血虚之症也。当以生血为主，风药佐之。若专攻风毒，则血愈虚而热愈炽。血被煎熬则发瘰癧，或为怯症。遂以逍遥散剂及人参荆芥散二十余剂而愈。

刘禹锡《传信方》云：予少年曾患癖，初在颈项间，后延上左耳，遂成湿疮浸淫。用斑蝥、狗胆、挑根诸药，徒令蜚蠊，其疮转盛。偶于楚州卖药人教用芦荟一两，研甘草炙半两，相和令匀，先以湿浆水洗癖，乃用旧干帛子拭干，便以二味合和傅，立干差。神效。

《续名医类案》

薛立斋

一男子，面青，腿内膝患癣类，色赤作痒。或为砭刺出血，发热熾痛。服消风散而益甚。服遇仙丹愈加发热作渴。仍服之。脓水淋漓，其脉洪数，左关为甚。此肝经血虚，火内动，复伤其血而疮甚。先用柴胡清肝散数剂，又用四物、山梔治之，诸症渐退。用八珍汤、地黄丸，两月余而痊。

《续名医类案》

张子和

一童子病满胸腹湿癣，每爬搔则黄水出，已年余。先以末作丸上涌，次以舟车丸、浚川散下三、五行，次服凉膈加朴硝少许，时时呷之，不数日而愈。

《续名医类案》

中神琴溪

一男子，年五十，腰间发二三顽癣。尝药之者数次，差而复发，毒遂蔓延，周总身暖，辄发痒抓爬不止，来请治于先生。乃诊之，曰：“外药以拔之，内药以发之，则已。夫二三顽癣，其毒犹不可除。待以托诸外药，恐陷攻骨髓，况今患至此乎。”即与浮薄加大黄汤，兼漆漆丸，每服五分，日一服，寻作敷药用之。顽癣为之怒发，其密不容发，所爪脓血如泥。十余日，尽结痂。因浸巾热汤，以拭之，于是痂落。至翌年腰间复发余毒，刺取黑血，数日竟愈。又双目赤痛，不能开。即使病者袒视其背，风府穴上，有瘰如桃核大，色紫黑，病者曰：“自五六日前发起如此。”曰：“此郁也。”即刺之出脓血，双眼痛遂止。

敷药方 巴豆去皮拾钱 蓖麻子去皮五钱 干姜二钱

大风子三钱

右四味末之，和轻粉一钱，渍酒作泥。

《生生堂治验》

费伯雄

某。四肢颈项顽癣搔痒。

生南星一钱 生半夏一钱 川槿皮三钱 炒白芥子二钱
番木鳖二钱 枯矾一钱 月黄二钱 皮硝二钱 冰片四分
斑蝥去头、足、翅三只

用法：患处碎烂痛，用清水调搽；若不痛，用镇江好醋调搽。日三、四次，搽两月可除根。

又顽癣搽方：

蜜陀僧 吴萸 胡椒 川连

研末，玉红膏调搽。

《费伯雄医案》

汪廷元

江南耀兄，予同寓友也。体质壮实，性豪饮，素多湿热。五月间，小腹发出红癣成片，向予索淋洗方。与蛇床子、荆芥、苦参、独活、白鲜皮等。伊云：“夜来痒甚，不能安卧，奈何？”予令加明矾少许。一日晚间饮酒回店，少腹痛引睾丸，浑身麻木，肢冷如冰，辗转床席，呻吟欲死，寸口沉伏。予察其病原，决其湿热内闭，热极生寒。剂以苍术、柴胡、黄柏、梔子、青皮、金铃子、木香、猪苓、滑石。初饮，呕出不纳。夜半，饮下一服，立刻痛止，安睡已刻方寝。次日，人遂如常，惟小便短涩。前方去木香，加海金沙、龙胆草、病既愈。始知其欲求速效，竟将明矾二、三两一块，入水中擦洗取快，其癣即没。又席上多饮烧酒，致有此奇痛耳。又云：“吾昨痛时，阳事全缩，今始如旧。”予乃谓之曰：“兄病疑难，易至错误。若请他医来，乍见如此脉症，必

谓寒入厥阴，至于厥逆而囊缩，非吴茱萸四逆辈不可。人亦劝服此药，以为至当不易。倘示以予方，且惊畏而色沮，而孰知正有大谬不然者乎？故求其有无，责其盛虚，病机诚未易审也。”

《广陵医案摘录》

方耕霞

唐。酒湿生热，热郁生风，发为遍体风痹。谢绝杜康，方可言治。

川柏 灵仙 山梔 茅术 独活 葛根 秦艽 苡米 鸡距子 白藓皮 丝瓜络

《倚云轩医案医话集》

赖松兰

鹅掌风燥烈不堪，脉涩，涩属血虚，虚则风动，眩晕腰酸带下，月事止而复来，乃肝脾失统，冲任暗损故也。

炒阿胶 北艾炭 生地 归身 白芍 大川芎 绵杜仲 女贞实 旱莲草 乌不宿 络石藤

《赖松兰医案》

陈莲舫

朱。鹅掌风，治以清解。

焦茅术 焦山梔 制稀莖 粉草藓 金银藤 元生地 侧柏叶 广陈皮 嫩滑石 生甘草

《莲舫秘旨》

张山雷

郑右。禀体多湿，脚癣年发，兼以肌肤搔痒，则血分热也。脉右手重按颇弦，舌尚不腻，宜清热理湿。

炒茅术 3克 川柏皮 4.5克 茵陈 9克 白藓皮 9克

丹皮 4.5克 山梔皮 9克 大腹皮 9克 赤苓 9克 生苡仁 9克
银花 9克 怀牛膝 6克

《张山雷专辑》

朱南山

有一周姓病人，患湿痹，兼有身热，奇痒难忍，入夜盖棉被后，搔痒更甚，常致不能安眠，痛苦万分。先君处以清热渗湿汤（鲜生地二两，淡竹叶四钱，焦山梔四钱，川柏皮一钱五分，茯苓皮三钱，冬瓜皮三钱，五加皮三钱，连翘二钱，野菊花三钱，赤芍二钱，板蓝根五钱，芦根二尺，灯心五扎），数剂而愈。

《近代中医流派经验选集》

脱发

焦循

欧阳制美，无故忽须眉萎落。医投细辛等药，十剂不效，且及于发，将秃矣。遍求医，莫能治。翁曰：此风淫于皮肤间也。令炼松脂，和粥食之，两月而须发皆长。至今犹服松脂也。

《李翁医记》

孙采邻

时象明侧室年近三旬，头发脱落。头为阳之首，发乃血之余。头皮何以痒，血以热而风生也；发根何以腐，血以热而湿蒸也；血何以热，血虚故也；血虚何以发脱，或因新沐当风，或因头汗湿郁，邪气袭虚，而真阳不能固济也。再请验之于脉，左关弦浮，卜肝风之上扰；右关濡数，知脾湿之上蒸；左尺沉涩而虚，益见肾阴之不能上达。况经事不调，后期而至，其为血虚也何疑？

大生地六两，不切。先用当归三两，川芎一两五钱，白芍一两五

钱，陈酒煎浓汁。去渣，煮生地，候发松时取出。先晒后蒸，九次为度。余汁留入药用。生首乌四两。先用马料豆四两，水煮浓汁。去豆，入首乌煮熟，切片。先晒后蒸，九次为度。余汁留入药用。羊脑一具，用荷叶包裹，蒸熟。去荷叶，捣入药。羊脑须用生羊脑。晚蚕砂二两，用真黑芝麻二两同炒同研。生香附四两。一用醋浸两日，捣碎焙研；一用陈酒浸两日，捣碎焙研；一用来泔浸两日，捣碎焙研；一用盐水浸两日，捣碎焙研。鲜旱莲草捣汁，煎膏三两。

元武胶三两，烊化 鹿角胶一两五钱，烊化 白茯苓二两，酒炒
血余五两 建莲肉四两，去心炒

上为细末。量用西党参、炙黄芪等分，煎膏，代蜜为丸，如桐子大。每服五钱，清晨滚水送下。

《竹亭医案》

孔伯华

马男。闰月初八日。血虚而燥，发脱颇甚，口渴喜饮，阳明亦盛，脉弦脉而大，左部尤甚，治当清滋凉化。

生石膏八钱，研先煎 地骨皮三钱 龙骨草二钱 鲜地黄五钱
炙升麻一分 忍冬花五钱 忍冬藤五钱 鲜荷叶一个 杭菊花三钱
石决明六钱，生研先煎

桑麻丸四钱（分二次吞下）

陈男，七日二十七日。血分虚燥，发忽暴落，新者色白，足证血不能上泽。脉细数，当养血清热，使之上泽。

大生地三钱 玄参心三钱 升麻一钱 川柴胡二钱 忍冬藤五钱
稻豆衣三钱 丹皮一钱 川黄柏二钱 桑寄生五钱 鸡血藤三钱
知母三钱 杭白芍三钱 辛黄一钱 鲜荷叶一个 当归四钱
生侧柏叶三钱

桑麻丸二钱（分两次吞）

《孔伯华医集》

丹毒

张子和

黄氏小儿面赤肿，两目不开，以铍针刺轻砭之，除两目尖外，乱刺数十针，出血乃愈。此法人多不肯从，必欲治病，不可不谨护。

《名医类案》

朱丹溪

一中年男子，痈溃后发热干呕，背发丹爆，用诸般敷贴丹爆药，乃用刀于个个丹头出血，皆不退。后半、陈、生姜加补剂，治呕不效。遂纯用参半两、归、术各一钱五分，浓煎，一帖呕止，二三贴丹渐缓，热渐减，约五十余贴热始除，神气始复。

鲍允中年五十岁，风丹痒甚，腹微疼，咽不利，面身微肿，五六日不退，两寸脉滑大实，右浮大，左浮弦小，以炒芩、炒连、四物、桔、草、鼠粘、紫葳各一钱，防风、黄耆各半钱，凡五六贴而安。

《名医类案》

黄师文

一妇人苦风丹，每酒沾唇，则风丹重迭而起，痒刺骨，殆不可活。令服五积散约数服，以杯酒试之，如其言饮酒已，丹不作。德昭一婢，亦苦风丹，亦以此闻其说，遂服五积散亦瘥。又师文用五积散治产泻有奇功。

《名医类案》

薛立斋

一妇人，素清苦，因郁怒患游风，晡热内热，自汗盗汗，月经不行，口干咽燥，此郁气伤脾，乃以归脾汤数剂，诸症稍退，后兼逍遥

散五十余剂而愈。

一妇人患此性躁，寒热口苦，胁痛耳鸣，腹胀溺涩，乃肝脾血虚火旺也。用六君加柴胡、山栀、龙胆数剂，更与逍遥散兼服渐愈，又与六味丸、逍遥散七十余剂，诸症悉退。

一妇人患前症，误服大麻风药，破而出水，烦渴头晕，诚类风症，六脉洪数，心脾为甚。曰：风自火出，此因怒火，脾胃受邪，血燥而作，非真风症也。与逍遥散、六味丸以清肝火、滋脾血、生肾水而愈。

一妇人患前症，久不愈，食少体倦，此肝脾亏损，阴虚发热也。先用补中益气汤加川芎、炒栀，元气渐复，更以逍遥散而痊愈。

一妇人患赤游风，晡热痒甚，用清肝养血之剂，不信，乃服大麻风药，臂痛筋挛，又服化痰顺气之剂，四肢痿弱。又一妇患前症，数用风药，煎汤泡洗，以致腹胀并殁。

一妇子十五岁患瘰癧赤晕，形气倦怠，此肝火血虚所致，用加味逍遥散而赤晕愈，用益气汤、六味地黄丸而瘰癧消。

一妇人身如丹毒，搔破脓水淋漓，热渴头晕，日晡益甚，用加味逍遥散而愈。

《名医类案》

许豫和

族孙子，周岁，壮热啼吵，下身赤肿，医作风热治不退。予曰：“此赤游丹毒也。”丹毒近腹即防入肾。病家误用数药，热甚腹胀，急以荆、防、羌活疏其表；赤芍、枳壳、木通清其里。更于腿臀红肿处，砭去恶血。乃去羌活，加炒黄柏。二剂，丹渐退。

张谔苍兄次子，出胎四十日，壮热、目斜、左足红肿。服疏散惊风，一剂。次日，热不退，足肿至膝，色红紫，丹毒上攻也。改用生地、丹皮、赤芍、黄柏、栀仁、木通、料豆、甘草，一剂。红紫处砭出恶血，热稍松。次日，肿至囊腹。书云：人腹、人肾者不救，险矣。询其去

血甚少，复令以芦获草，割蠹去恶血甚多。仍服前剂，热退肿消。尝见服疏散药，外用敷药者多死。血热为患，当服凉血药，砭去恶血，所以得痊。且此症胎毒所发，无表邪，何用疏散？

《橡村治验》

李铎

苏林生，年七岁，遍身红点，赤如丹砂，又如蚊迹。发前两夜发热作寒，状类伤寒，今则寒热皆退，惟口牙出血，小水短赤，此名丹毒，用升麻防风汤。

升麻 防风 山梔 元参 荆芥 丹皮 牛子 葛根 木通 甘草

引加灯芯，水煎服，二帖全愈。

按：赤游丹毒皆由心火内壅，热与血搏，或起于手足，或发于头面胸背，游移上下，其热如火，痛不可言，赤如丹砂，故名丹毒。凡自腹出四肢者易治，自四肢入腹者难治。治丹之法，先用辛凉解表，使毒渐消，方可搽敷，若先不解表，遽用搽敷，必逼毒入腹，以致不救。小儿一岁以外者易治，未周岁者难治。

《医案偶存》

丁泽周

金左。湿火下注，营卫不从，左腿足流火肿红焮痛，不便步履，寒热晚甚，姑拟清疏消解。

清水豆卷八钱 荆芥穗钱半 京赤芍二钱 当归尾三钱
茯苓皮三钱 通草八分 六一散包三钱 金银花三钱 连翘壳三钱
大贝母二钱 丝瓜络二钱 桃仁泥钱半 杜赤足一两

流火药冷粥汤调敷。

篮小。咳嗽气逆，咯痰不爽，吮乳呕吐，赤游丹发于面部，肿红色紫，胎火上升，痰热逗留肺胃，生甫月余，犹小舟之重载也。

净蝉衣八分 象贝母二钱 炒银花二钱 胖大海二枚
赤茯苓二钱 连翘壳二钱 生赤芍一钱 嫩钩钩后入，二钱
炙兜铃八分 薄荷红五分 炒竹茹一钱 淡竹沥五钱冲服
真猴枣粉一分冲服

《丁甘仁医案续编》

李桂平

幼童，年五岁，忘其姓名住址。

病名：赤游风。

原因：偶感外邪。前医皆作痧症治，用开药表药不愈。

症候：两臂两腿发痞瘤而色红，浮肿焮热，痒而兼痛。

诊断：脉现浮缓，遂断以赤游风，非痧也。由脾肺燥热而兼表虚，腠理不密，风邪袭入，怫郁日久，与热相搏，滞于血分，故色赤。

疗法：针药并用。先针刺百会（在前顶后一寸五分，适当头之正中）及季中（当膝髌窝之正中）二穴，寻按爪弹，俾气散而风解；继以四物汤活血止痛，加荆、防、蝉、独、柴、薄、桑皮等散风解热。

处方：细生地三钱 全当归二钱 赤芍一钱 川芎一钱
荆芥钱半 防风钱半 苏薄荷一钱 生桑皮一钱 蝉蜕一钱
川柴胡七分 独活七分

效果：服一剂，病稍减轻。次日复刺一次，又进一剂，至三日而痊。总使气血调和，针功收效。西医之刺神经，中医之刺经穴，名虽殊而实则一也。

廉按：赤游风惟小儿最多，皆由胎毒内郁，风热感触而发。其治法针刺与药物互用，自然奏功更速，手到病除。然针与药其功相等，药之治病，一服不愈，必须再服，再服不尽，继以三服，针亦犹是，观此案而益信矣。

《全国名医验案类编》

周镇

周左，慧山，石工。甲寅九月病流火，两足红肿。或专用水浸海蛇皮敷贴，足胫冷遏，湿火内闭，转筋而痛，胀坠不能行走。脉濡数，苔白。即疏薏仁、茵陈、防己、茯苓、泽泻、归尾、海桐皮、松节油、白茄根、丝瓜络、蚕沙、炙乳香、路路通。外用蚕沙、木瓜、樟脑、红花，煮酒搽之。一二次，痛定胀消。

《周小农医案》

翟竹亭

北关江姓一小儿，甫六月，胎毒未去，偶然大啼不止，乳食减少。迎余往视，见小儿手背红点如豆，余命宽衣细看，左腿膝上红如云片，此是赤游丹毒。古云：“此证起于四肢，入于腹者死”。急用二花解毒汤，以免后患。一剂即效。二剂痊愈。

二花解毒汤

金银花 5 克 荆芥 4 克 防风 5 克 生地 5 克 当归 5 克
紫草 3 克 连翘 6 克 木通 2 克 玄参 5 克 知母 4 克 乳香 2 克
甘草 3 克 水煎服。

《湖岳村史医案》

孔伯华

王妇，九月十三日。血分湿热，遏于皮肤，发为游丹，两关脉大而滑数，心脉亦盛，兼有邪扰心包络，夜不能寐，舌赤苔白，治当从血分清化之。

云苓块 四钱 嫩白芷 钱 防风 钱 栀子炭 三钱 地肤子 三钱
薄公英 四钱 知母 三钱 忍冬藤 四钱 芥穗炭 二钱 朱莲心 钱半
滑石块 四钱 川黄柏 二钱 地骨皮 三钱 桑叶 三钱 薄荷叶 钱半

首乌藤两 桑皮三钱 六神丸三十粒(分吞)

《孔伯华医集》

缠腰火丹

过辨

张某患抱腰火丹，起疱处两头将接。余曰：“再迟一、二日，丹毒将内攻，则昏愤不治矣”。当令其将泡挑破，挤去毒水，用龙胆草研末，以柿漆调涂一周，时其头即焦，五日已愈。

《过氏近诊医案》

疣

薛己

一老儒眉间患此，二年后，其状如紫桃，下坠盖目，按之如水囊。刺出脓血，目即开张，以炒黑胆草、山梔、芎、归、芍药、柴胡、白术、茯苓等类而愈。

一妇左项肿如鸡卵，不作痛，不变色，劳则发热，怒则寒热，经候不调三年矣。用加味道遥散加味归脾汤间服（间以煎之），佐以海藻散坚丸，年许而消。

一男子郁怒房劳，左胁肿赘如赤桃，服流气化痰之药，其大愈甚，虚症悉具，此肝肾过虚也。用前药及地黄丸而消。

儒者朱宏仁，年二十余，右手背近中指患疣五枚，中一大者如黄豆，余皆如黍黍，拔之如丝，长三四寸许。此血燥筋缩。用汁肝益荣汤，五十余剂而愈。

一妇人左手背并次指，患五六枚如熟椹，薛曰：此因肝经血热也。果月经素不及期，当生血凉血为主。不信，乃用艾灸，手胀发热，手指皆挛，两腋项兼胸乳间皆患疣，经行无期。薛用加味道遥散，加

黄连十余剂，各患渐愈，乃去黄连，百余剂，经行如期，再用地黄丸，三料而全消。

有人患此，用知蛛丝缠七日消烂，屡验。

《焦氏笔乘》

周汉卿

山阴杨翁项有疣，如瓜大，醉仆皆下，溃血不能止。疣溃者必死。汉卿以药糝其穴，血即止。

薛立斋治长洲庠王夫爵，辛丑春，左腿近环跳穴患瘤，状如大桃，按之濡软。恪服除湿流气化痰之剂，恶寒发热，食少体倦，形气俱虚，脉洪大而虚。气瘤也，肺主之。盖肝属木，肺属金，然发于胆经部分，乃肺金侮肝木，元气亏损，而其脓已内溃矣。遂用十全大补汤数剂，出青白稀脓甚多，顿加寒热烦渴头痛，殊类伤寒状。此因脓泄而血气益虚耳。仍用前汤，其势益甚，脉洪数大，按之如无。乃加附子一钱，其势愈甚，而脉复如前，此虚甚而药不能及也。更加附子二钱，三剂诸症顿退。乃朝用补中益气汤，夕用十全大补汤，各三十余剂，出腐骨五块，疮口将完。后因不慎起居，患处复溃，诸症更发，咽间如焚，口舌无皮。用十全大补加附子一钱，服之诸症即愈。二日不服，内病悉至，患处复溃。二年后又患，服前药不应。诊其尺脉微细如丝，此属命门火衰，用八味丸为主，佐以十全大补汤，稍愈。至乙巳，仍患虚寒之症而殁。

一男子左腿外侧近臀肿一块，上有赤缕，三年矣。饮食起居如常，触破涌出血脓，发热恶寒。此胆经受症，故发于腿外侧。诊其脉左尺洪数，左关弦洪。此肾水能生肝木，用补中益气汤、六味地黄丸而痊。

一老姬右腋下生一瘤，渐长至尺许，其状如长瓜子，久而溃烂。一方士以长柄鲜葫芦烧存性，研末搽之，水出消尽而愈。

系瘤法：芫花净洗带温，不得犯铁器，于木石器中捣取汁，用线

一条浸半日或一宿，以线系瘤，经宿即落。如未落再换线，不过两次自落。后以龙骨并诃子末敷，疮口即合。依上法系妳痔，累用得效。系瘤法《苏沈良方》有用蜘蛛丝者，然费力，不如此径捷。如无根，只用花泡浓水浸线，亦得。赵氏家姊尝用系腰间一瘤，不半日即落，亦不痛。

琇按：芫花用之系疣即落，雄猛可知虫门中孙文垣尝用三分以治某氏妇，立下。其症苟非实积，未可轻试。

《续名医类案》

孙真人

瘰，一、二年者，以万州黄药子半斤，须紧实者，若虚而轻即他处产者。用一斤，取无灰酒一斗浸，固浸器口，以糖火烧一伏时，停待酒冷，欲开，令患者日饮之，不令酒气绝。经三五日后，以线围颈，觉消即停饮，否则令项细也。用火时不可多，惟烧酒气出，瓶头有津即止，火不待经宿也。已验如神，忌毒食。

黄履毒曰：予年三十，时髻生一小瘤，根细如线而头如豆大。越十年，渐大如荔，有妨跨马。予有鉴于决瘤之说，不敢医。常叹曰：吾年若六、七十，此瘤当如碗大，必妨行坐矣！奈何？既而叹曰：六、七十，即碍行坐亦何妨？遂安意养之。及四十七岁时，偶擦伤瘤皮，水渗出不止。惧其成漏，乃延潘惠峰问之。云：欲去此瘤甚易，欲塞此漏甚难。瘤去则漏自止矣。不得已，听其治。潘以药涂瘤，甚痛。其肉尽黑，少顷血出津津。予甚惧，且悔，不复求治，但求止血之药。越宿则黑肉已坚如石片，数日脱去，其根尚存如豆，水出仍不止。复商之潘，潘曰：不去其根，漏仍不可塞也。又以前药点之，痛甚，肉黑如初。次日复点，凡三次，内服托里散，每剂用黄芪五钱。凡旬日，坚肉脱去，则根已平，仍服托里散，外用长肌收口药，绝欲息劳，以渐收满，肌肉完好。予之服药守禁，固勤且慎者，而潘君亦可谓妙手矣。

张子和在西华，众人皆讹以为吐泻。一日，魏寿之与张人食肆中，见一夫病一瘤，正当日之上脘内，眦色如灰李，下垂覆目之睛不能视物。乃谓寿之曰：吾不待食熟，立取此瘤。魏未之信也。语其人，其人曰：人皆不敢割。曰：吾非用刀割，别有一术焉。其人从之。乃引入一小室中，令俛卧一床，以绳否其脘，刺乳中，大出血。先令以手揉其目，瘤上亦刺出雀粪，立平。寿之大惊。张曰：人之有技，可尽窥乎？

一女子未嫁年十八两手背皆有瘤一类鸡距，一类角丸。腕不能伸，向明望之，如桃胶然。夫家欲弃之。张见之曰：在手背为胶瘤，在面者为粉瘤，此胶瘤也。以铍针十字刺破，按出黄胶三两匙，立平，更不再作。非素明者，不敢用此法。

一妇人年四十余，有瘰三辨。张令以咸吐之，三涌、三汗、三下，瘰已半消。次服化瘰之药，遂大消去。夫病在上皆宜吐，亦自有消息之法耳。

张景岳三旬外，忽臀下肛门前骨际皮里生一小粒，初如绿豆许，不以为意。及半年，大如黄豆。又一年，如枣核，复如栗矣。乘马坐榻皆有所碍，且渐痛。料此非敷药可散，又非煎药可及，若渐长大，如升如斗，悬挂腰股间，行动不便，将夺何？谋之识者，皆云不可割刺，恐为害。初亦未敢，然熟思：此时尚小，不取则日久愈大愈难矣。遂决意去之。乃饮酒乘醉以柳叶针刺之，所出如豆腐白皮之类，盖粉瘤也。刺后顿消。两日后则肿如熟痛，以会通膏贴，三日脓溃而愈。不两日又肿起，更热更大，始悔其刺之误。再以会通膏贴之，又三日而大溃，溃出一囊如鱼脬者，然后收口全愈。使开之再迟则难瘳矣。

一人眼皮下弦生一小瘤，安如米粒，渐大如豆。外科用攒针三、四枚，翻转眼皮刺其内膜，少少出血。如此二、三次，其瘤日缩，竟得尽消。

一人臂上生一瘤，渐大如龙眼，其人用小艾于瘤上灸七壮，竟

尔渐消，亦善法也。或用隔蒜灸之，亦无不可。

一人腹上生一瘤，大如胡桃。治者以蛛丝捻成粗线，扎其根，数日其丝渐紧，瘤根渐细，屡易屡细，不十日竟脱落，诚奇法也。可见他线日松，唯蛛丝日紧，物理之妙有当知者如此。然缠之亦宜早，若形势既大，恐不宜也。（方出焦氏《笔乘旧案》已载其异）

沈枢文幼嗜指甲，及长不能自禁。此肝火血燥也。又头侧常生小疣子，屡散屡发。又臂生一块，如绿豆大，若触碎则如断束缕，扯之则长，纵之则缩，后两鬓发白点，求治。曰：子素肝病，此部亦属肝胆经也。未爪为筋之余，但行人身之侧，正与嗜爪生瘰等相应。须滋补肾水以生肝胆诸病自愈。与六味地黄丸服之，二年白点自退，疣亦不生。

一男子小腹中一块，不时攻痛。或用行气化痰等药，不应。犹以为血鳖，服行气逐血之剂。后手背结一麻痒子，渐长寸许，形如鳖状，肢体间如豆大者甚多。彼疑鳖生子，今发子外。亦用行血，虚症悉至，左尺洪数，关脉洪数而弦。谓：肾水不能生肝木，以致肝火血燥而筋挛。用六味丸滋水生肝，三月而愈。

陶氏佃民有病瘰者，尝与陶仆输谷如市，道远劳极，瘰攪其颈，气几不接。陶仆素愚，匆遽间削竹为锐针，刺之瘰穿，气溢颈，复完固。荷担而起，一无所苦。

余兄奇峰生两瘤，大如拳。僧传一方，用竹刺将瘤顶上稍稍拨开油皮，勿令见血。细研铜绿少许，放子拨开处，以膏药贴之。数日即溃，出粉而愈。

《续名医类案》

钱国实

山西神池张百长侄女，年十七，自八岁风左手背生瘤，日大，已如钟许。看系粉瘤，可治。与一方：用巴豆、天麻子肉各四两，大杏仁一两，香油一斤二两，血丹八两，熬膏药贴之，一日一换。其皮渐

薄，旬日皮红，半月皮破，出脓碗许，瘤消口平。说之，右卫酬谢。

辛酉夏，广陵各盐场天行时疫，人多湿热，病若伤寒，头疼发热，不恶寒，身体痛，舌红，昏睡不食，思凉饮，肌黄，大便结，小便红。医用发散清凉剂，罔效。钱亦临症，治愈不投，病势数日如故。前后胸背渐长数十瘤，如核桃大，其皮甚薄，以针挑破，每瘤出虱数千，遍抓四处，人人寒禁，莫敢近视，瘤破虱出，调服。后人仿此俱愈。

气颈之症，乃人项下坠如长瘤也。山东多有此症。虽风水所致，亦卧热炕，过食辛辣而然。他方间有此，根由足厥阴肝经之脉循喉咙之后，上人颊颞，属肝，统于足阳明胃经，此盖起于肝胃二经。瘤长挂下，虽非致命，大不美观，古今并无治法。钱访海上仙方，遇异人传授，用青皮六钱疏肝，桔梗六钱引导，木馒头，一名鬼馒头，煨存性二两，消瘰，散肝胃二经结气。共末，酒下一钱。凡气颈小者，三、四月消；大者七、八月或一年消。其功虽缓，其方百发百中，即钱已治兰溪王元直，袁州赵瑚琏二人矣。不惜良方，普利后世。

会稽黄元亮，文士也。年五旬颈生气瘤，候其六脉冲旺，荣卫俱足，精神元气亦厚，止肝郁沉滞，气结成瘤。钱告之曰：公无病人也。气瘤结于颈下，不过不美观耳，终无大害。书云：凡粉瘤、痰瘤、虫瘤、腿瘤、虱瘤、发疽瘤可治；凡气瘤、筋瘤、肉瘤、肩瘤、瘰瘤、血瘤、肋瘤、乳瘤、肘臂瘤不可治，治之破膜泄气，不救。宜经此念，勿信庸愚以轻性命也。黄拜谢而去。

《续名医类案》

中神琴溪

一老婆有奇疾，每见人面，皆有疣赘。更医治之也不可胜数，然无寸效。先生诊之，脉弦急心下满，服之三圣散八分，令吐后，与柴胡加龙骨牡蛎汤，自是不复发，时年七十许。

《生生堂治验》

其它

薛立斋

大尹陈汝邻，两腿酸软，足跟肿，或赤或白，或痛或痒，后破而或如无皮，或如皴裂，日甫至夜，胀痛焮热。用补中益气加减八味丸而愈。

一妇所患同前，亦用前丸及逍遥散加熟地、川芎，百剂而愈。

一男子足跟作痛，热渴体倦，小便如淋，误用败毒散，致头痛恶寒，欲呕不食，咳嗽吐痰。薛用十全大补汤、加减八味丸，各五十余剂而愈。

一男子足跟肿痛，发热，体倦，用补中益气六味丸而瘥。后劳役盗汗、发热，遗精，吐痰如涌，仍服前药而愈。

一男子患前症，乃服消毒散，搽追蚀药，虚症叠出，其形骨立，自分死矣。薛用十全大补，加山茱、山药、两月余而瘥。

江应宿曰：足跟乃督脉发源之所，肾经所过之地。因饮食失节，起居失宜，元气亏损足三阴所致。若漫肿寒热，或体倦少食，此脾虚下陷，宜补中益气。若晡热作痛，头目不清，此属脾虚阴火，用前汤并六味丸。若痰涎上升，或口舌生疮，属肾水干涸，用前汤并加减八味丸主之。此皆亏损之症，当滋其化源，若治其外则误矣。

《名医类案》

丹溪

一老人坠马，腰痛不可转侧，脉散大，重取则弦小而长。朱曰：恶血虽有，不可驱逐，且补接为先。用苏木、参、芪、芎、归、陈皮、甘草，服半月脉散渐收，食进，以前药调下自然铜等药，一月愈。

《名医类案》

虞恒德

一人，因劝斗殴，眉棱骨被打破，得破伤风，头面发大肿发热。虞适见之，以九味羌活汤取汗，外用杏仁捣烂，入白面少许，新汲水调傅疮上，肿消热退而愈。后累试累验。

一人因结屋坠梯折伤腰，势殊亟，梦神授以乳香饮。其方：用酒浸虎骨、败龟、黄芪、牛膝、革薢、续断、乳香七品。觉而能记，服之二旬愈。

许元公人京师赴省试，过桥坠马，右臂白脱，路人语其仆曰：急与按人白中，若血渍白则难治矣。仆用其说，许已昏迷，不觉痛，遂僦轿昇归邸。或曰：非录事田马骑不能疗此疾。急召之。至已入暮，秉烛视其面，曰：尚可治。乃施药封肿处，至中夜方醒，达旦痛止，去其封，损处已白，其青瘀乃移在白上。自是日日易之，肿直至肩背，於是药下之，泻黑血三升，五日复常，遂得赴试。盖用生地黄研如泥，木香为细末，以地黄膏摊纸上，穆木香末一层，又再摊地黄，贴肿上，此正治打扑伤损及一切痈肿未破，令内消云。

《类说》

吴太医

孙和宠夫人，常醉舞如意，误伤邓颊，血流娇惋弥苦。命太医合药，言得白獭髓，杂玉与虎魄屑，当灭此痕。和以百金购得白獭，乃合膏，虎魄太多，及瘥，痕不灭，左颊有赤点如痣。

《酉阳杂俎》

江少微

一商人，被杖皮破血流。以真麻油一斤，熬滴水成珠，入黄丹飞过再熬，试软硬加入铅粉、黄蜡，收起摊膏药贴患处，血止肿消，数日而愈。

予因鉴银损破小指，肿大灌脓。亦以前膏贴上，痛止肿消，不复有脓。三日一换，三换而愈。

游让溪翁云：被廷杖时，太医用粗纸，以烧酒贴患处，手拍血消，复易之。又用热豆腐铺在紫色处，其气如蒸，其腐紫色即换，须待紫色散后，转红为度，则易而愈。

《名医类案》

东垣

一人皮肤皴裂，不任其痛，两手不能执辔，足不能履地，停辘止宿，因制润肌膏与之即效。方以珠青四两、白蜡八钱、乳香二钱，于铁铛内，先下沥青，随手下黄蜡、乳香，次入麻油一二匙，俟沥青溶开，微微熬动，放大净水盆于其旁，以搅药，用铁箸挑滴一二点于水中试之，如硬，入少油，看软硬合宜，新绵滤于水中，揉扯以白为度，磁器内盛，或油纸裹，生用先火上炙裂口子热，捻合药，亦火上炙软，涂裂口上，纸少许贴之，自然合矣。

虞天民治仲兄，年四十五岁，平生瘦弱血少，深秋得燥症，皮肤拆裂，手足枯燥，搔之屑起，血出痛楚，十指中厚皮而莫能搔痒。虞制一方，名生血润肤饮，用归、芪、生熟地、天麦二门冬、五味、片苓、瓜蒌仁、桃仁泥、酒红花、升麻、煎服十数贴，其病如脱。大便燥结，加麻仁、郁李仁。此值庚子年，岁金太过，至秋深燥金用事，久晴不雨，乃得此症。

《名医类案》

东垣

一人，家贫，形志皆苦。时冬寒，于手阳明大肠经分出痛，第四日忽肿，幼少有癰疽，其臂外皆肿，痛甚。先肿在阳明，脉左右寸皆短，中得之比弦，按之洪缓有力，此痛得自八风之变，以脉断之，邪气在表，然其症大小便如故，饮食如常，腹中知饥，口知味，知不在

里也；不恶风寒，止热躁，脉不浮，知不在表也；表里既和，邪气在经脉之中也。故凝于经络为疮痈出身半已上，故风邪上受之，故知是八风之变为疮止经脉之中也。治其寒邪，调和经脉中血气，使无凝滞则已也。炙甘草一分，升麻、桔梗五分，白芷七分，当归尾、生地一钱，生芩一钱五分，连翘一钱，黄芩二钱，中桂、红花各少许，酒水各半，同煎，至稍热，临卧服，二服而愈。

《名医类案》

吕沧州

一僧，偶搔胸中疥，忽自血出，汨汨如涌泉，竟日不止。医治之不效。请吕往视，履时已困极，无气可语。乃持其脉，惟尺部如蛛丝，他部皆无，即告之曰：夫脉，血气之先也。今血妄溢，故荣气暴衰，然两尺尚可按惟当益荣以泻其阴火。乃作四神汤加荆芥穗、防风，不间断晨夜并进，明日脉渐出，更服十全大补一剂，遂痊。

《名医类案》

罗谦甫

牛经历病头面赤肿，耳前后尤甚，疼痛不可忍，发热恶寒，牙关紧急，涕唾稠黏，饮食难下，不得安卧。一疡医于肿上砭刺四五百针，肿赤不减，其痛益甚，不知所由。罗诊视其脉浮紧，按之洪缓，此症乃寒覆皮毛郁遏络络，热不得升聚而赤肿。《经》云：天寒则地在水冰。人气在身中，皮肤致密，腠理闭，汗不出，血气强，肉坚涩，当是之时，善行水者不能行冰，善穿地者不能凿冻，善用针者不能取四厥，必待天温冰泮冻解，而后水可行，地可穿，人脉亦如是也。又云：冬月闭塞，用药多而少针石也，宜以苦温之剂温经散寒则已。所谓寒致腠理，以苦发之，以辛散之，宜以托里温经汤。麻黄苦温，发之者也，故以为君；防风辛温，散之者也，升麻苦平，葛根甘平，解肌出汗，专治阳明经中之邪，故以为卧；血留面不行者则痛，以香白芷

辛温，当归身辛温，以和血散滞，湿热则肿，苍术苦甘温，体轻浮，力雄壮，能泻肤腠间湿热，人参、甘草甘温，白芍药酸微寒，调中益气，使托其里，故以为佐。依方服之，以薄衣覆其首，厚被覆其身，卧于暖处，使经血温，腠理开，寒乃散，阳气发，大汗出后肿减八九分，再服，去麻黄、防风，加连翘、黍黏子，痛肿悉去。经言汗之则疮愈，信哉。

《名医类案》

丹溪

一人，年近五十，质弱忧患，右（一作左）膊外侧生核，红肿如粟，脉浮大弦数，重似涩。此忧患伤血，宜用补以防变症。以人参膏下竹沥。他工以十宣五香间与，后值大风，核高大有脓，中起红线，过肩脊及左（一作右）腋下，急作参膏人芎术汤姜汁饮之，尽参三片，疮溃；又多与四物加参、术、芎、归、陈、甘草、半夏、生姜，服之而愈。

一人面白神劳，肋下生一红肿如桃。或教用补剂，不信。乃用流气饮、十宣散杂进，血气俱急而死。

一人左丝竹空穴壅出一角如鸡距，此少阳经气多血少。朱戒其断酒食，解食毒，须针灸以开发壅滞。他工以大黄、硝脑等冷药贴之，一夜裂开如蚌肉，血溅出长尺余而死。此冷药外逼热不得发故也。

一士人于背臀腿节次生疽，用五香连翘汤十宣散面愈。后脚弱懒语，肌上起白屑如麸，脉洪稍鼓。时冬月，朱作极虚治，令急作参芪归术膏，以二陈汤化下。服尽药一斤半，白屑没大半，呼吸有力。其家嫌效迟，自作风病治之，服青礞石等药，因致不救，故书以为戒。

一老妇，形实性急，嗜酒，脑生疽十五日，脉紧急且涩。用大黄细切，酒炒未，以人参酒炒，人姜煎汤，调末一钱服，少时再服，得

睡，上身汗出而愈（用大黄、人参以汗解奇，此案重见脑顶症门）。

《名医类案》

橘泉翁

一人，年八十余，有疡发左耳后，寒热间作，昼夜呼不可忍。疡医欲与十宣散补托之，翁曰：此有余之火，无俟于补。与防风通圣散加柴胡、白芷下之，肿消痛止。

皇佑中学究任道；腿间患一疮，如发赤肿，复绝便变黑后穴则有黄水出，四边浮浆起，累治不瘥。医王通看之，此疮狭长似鱼脐下疮也。遂以大针针四向并中，随针有紫赤水汁出如豆汁。言此一因风毒蕴结而成，二因久坐血气凝涩而至，三因食肉，有人汁落其间也。道曰：某素好读书而久坐，此疾数岁前，夏月道中买猪脯味水饭，疑似人肉，食已后得此疾。通曰：与误食人汗不远矣。以一异味散子，用鸡子清调敷其疮，日三易，数日得愈。道坚求其方，通曰：止用雪元一味。自后累访名医，皆莫识雪元为何物。道因至许郑间，会医郝老，曰：尝记圣惠有一方治此疾，用腊月猪头烧灰，以鸡子清调敷，此方是也。雪元之名，非郝老博学多记，后医岂不惑耶？

南丰市民严黄七，两足生疮，臭气溃脓，众皆驱斥不容迹出货角器于村野，而旅舍又不容。至京潜投宿于五夫人祠下，夜半遭黄衣吏诃逐曰：何人敢以腐秽脚触污此间？谢曰：不幸缠恶疾，无处见容，冒死来此。纷拿次，夫人出，抗声令勿逐，且呼使前曰：吾授汝妙方，用漏篮子一枚（本草又名野兰），生干为末，人腻粉少许，并水调涂，当效。严拜谢，依而治之，果愈。

《名医类案》

陈斗岩

金台僧嗣真，遍体生痞疔，岁久药罔效。陈曰：此太阴之经蕴风邪，风化为虫病也。初犹未信。翌日，僧持疮痂数片，内有虫如虱，

泣拜求治。乃教以百部、蛇床子、草乌头、樟树叶煎汤一缸，令僧坐汤中浴，一、二时，落疮痂虫无数，一月凡数浴，僧遍体如白癩风状而愈。

《名医类案》

吴茱山

一男子，年近三十，病后遍发疔毒。医以败毒散久服，其毒遂收，惟有疮疡而已。忽一日食羊肉，遂呕，过一夜，满口发疮，状如脓窠，寒热时作，羸瘦憔悴。诸医皆曰：早间毒败不尽故耳。仍行败毒凉剂，渴热转生，越数旬，饮食减少。因请吴治，曰：脉浮无力，此乃虚阳，若用凉剂，不久危矣。遂用附子理中汤服之，少顷，躁烦口开，举家归咎于附子。曰：此无妨，彼人虚甚，况热药热服故躁耳。仍进一服（此理可以贯通服药之妙），其症遂安。连进二次，次早口疮俱收，寒热已定，病遂愈。此盖虚阳染患，不可不察也。

赵子固先生母刘氏，年近八十，左足面一疮，下连大指，上延外踝以至腓骨，每岁辄数发，发必屡月，昏暮痒甚，爬搔移时，出血如泉，呻吟痛楚，殆不可忍，夜分即渐已，明日复然，每一更药则疮转大面剧，百试不验，如是二十余年。淳熙间，赵为大府丞。一夕，母病大作，相对悲泣无计，困极就睡，梦四神僧默坐一室，旁有长榻，生先亦坐，因而发叹。一僧问其故，先生答之以实。僧云：可服牛黄金虎丹。又一僧云：朱砂亦可。既觉，颇惊异。试取药半粒强服之，良久，腹大痛，举家且悔，俄而下*%秽物如铁石者数升，是夕疮但澈痒，不痛面无血，数日成痂，自此遂愈。朱砂之说，竟不复试。先生因图僧像如所梦者而记其事。金虎丹方出《和剂》，本治中风痰涎壅塞，所用牛黄、龙胆、膩粉、金箔之类，皆非老人所宜服，今乃服奇效。竟此疾积热藏府而发于皮肤，岁久根深，未易荡涤，故假凉剂以攻之，不可以常疮论也。神僧之梦，盖诚孝感所致。

有人遍身生热毒疮，痛而不痒，手足尤甚，至颈而止，黏著衣

被，晓夕不可寐，痛不可忍。有人教以石菖蒲三斗剉，日干之，春罗为末，布席上，使患者恣卧其间，仍以衣被覆之，既不黏著，又复得睡，五七日间其疮如失。后以此治患此者，应手效。其石菖蒲，根络石生者节密，入药须此等。

有人患遍身风热细疹，痒痛不可任，连胸胁脐腹及近阴处皆然，痰涎亦多，夜不得睡。以苦参末一两，皂角二两，水一升，揉搥取汁，银石器熬成膏，和参末为丸梧桐子大二三丸，温水下食后，次日便愈。

有妇人患脐下腹上，下连二阴，遍满生湿疮，如马爪疮，他处并无，痒热而痛，大小便涩，出黄汁，饮食已减，身面微肿。医作恶疮治，用鳊鱼、松脂、黄丹之类药涂上，疮愈热，痛愈甚。治不对，故如此。问之，此人嗜酒，贪啖喜鱼是发风之物。急令用温水洗，拭去膏药，寻以马齿苋四两，烂研细，入青黛一两，再研匀涂疮上，即时热减，痒痛皆去。仍服八正散，日三服，分散客热，每涂药得一时久，药已干燥，又再涂新湿药，凡如此二日，减三分之一，五日，减三分之二，自此二十日愈。或问曰：此疮何缘至此。曰：中下焦蓄风热毒气，若不出，当作肠痈内痔，乃须当禁酒及发风物。然不能禁，后果患内痔。

一人遍身忽然肉出如锥，痒痛不能饮食，名血痢。用赤皮葱烧灰水淋汁洗，内服淡豆豉汤数盏而愈。

一人浑身生泡，如甘棠梨，破则出水，内有石一片如指甲大，其泡复生，抽尽肌肉，不可治矣。急用三棱，莪术各五两，为末，分三贴服，酒调下。

一人顶上生疮如樱桃，有五色，疮破则顶皮断。逐日饮牛乳自消。

一人患此疮，脚膝挛痛。有人取蛤蟆治如食法，令食之（败毒）而挛痛自愈。此亦偶中也。

又一人患此疮，脚痛而肿。或令采马鞭草煎汤薰洗（此方妙），汤

气才到患处，便觉爽快，后温洗之，痛肿随减。

一人患此疮，愈后数年，通身筋骨疼痛。遇一道流，问曰：神色憔悴，有病耶？曰：因疮遍身痛也。道流曰：轻粉毒也。遂示一方，药味不过数品，但每贴入铅五钱，打扁，同煎服之，果验。

《名医类案》

薛己

四明屠寿卿，孟夏，当门齿如有所击，痛不可忍，脉洪大而弦。薛曰：弦洪相搏，欲发疮毒也。先用清胃散加白芷、金银花、连翘一剂，痛即止。至晚鼻上发一疮，面钟黯痛，更用前药加犀角一剂，肿至两额，口出秽气，脉益大，恶寒内热。此毒炽血瘀，药力不能骤敌，乃数砭患处出紫血，服犀角解毒之剂，翌日，肿痛尤甚。又砭患处与唇上，并刺口内赤脉，各出毒血，再服前药至数剂而愈。若泥尻神不行砭刺或全伏药力，鲜不误矣。

翰林屠渐新年逾四十，患湿毒疮，误用轻粉之剂，亏损血气，久不愈。一日将晡，诊其肝脉忽洪数而有力。薛告之曰：何肝脉之如此。侵晨疮出紫血三四碗许，体倦自汗，虽甚可畏，所喜血黯而脉静。此轻粉之热，血受其毒而妄行，其毒亦得以泄矣，但邪气去真气虚也，当急用独参汤主之。屠惑于他言，以致邪气连绵不已，竟不起。

一妇人性躁，寒热口苦，胁痛耳鸣，腹胀溺涩逾年矣。症属肝火，用四君加柴胡、炒山栀、炒龙胆数剂，乃与逍遥散兼服而疮愈。又与六味丸及逍遥散，七十余剂诸症悉退。若有愈后身起白屑，搔则肌肤如帛所隔，此气血虚不能营于腠理，用大补之剂。若有愈后发热，身起疙瘩痒痛，搔破脓水淋漓，经候不调，此肝火血热，用四物加柴胡、山栀、白术、茯苓、丹皮、甘草（此二种亦要知之）。

一妇人日晡身痒月余，口干，又用余成疮，服祛风之剂，脓水淋漓，午前畏寒，午后发热，殊类风症。薛谓此肝经郁火外邪所搏。用

补中益气(肝火未平参芪宜缓)加山栀、钩藤,又以逍遥散加川芎、贝母而愈。

一男子年十六,夏作渴发热,吐痰唇燥,遍身生疥,两腿尤多,色黯作痒,日晒愈炽,仲冬腿患疮,尺脉洪数。薛曰:疥,肾疳也;疮骨疽也,皆肾经虚症。针之脓出,其气氤氲,薛谓火旺之际,必患瘰症。遂用六味地黄、十全大补,不二旬诸症愈而瘰症具,仍用前药而愈。抵冬娶妻,正春其症复作,父母忧之,俾其外寝,虽其年少谨疾,亦服地黄丸数斤,煎药三百余剂而愈。

《名医类案》

石山

一人,色苍黄瘦,年三十余,病遍身恶疮。因服轻粉而脚拘挛,手指节肿,额前神庭下肿如鸡卵大。方士令服孩儿膏,谓能补也。汪诊视脉皆濡缓而弱(虚协湿热)。曰:病已三年,毒已尽矣,但疮溃脓血过多,以致血液衰少,筋失所养,故脚为之拘挛;况手指节间,头上额前,皆血少运行难到之处,故多滞而成肿。理宜润经益血行滞散肿,今服孩儿,猛火炮炙,燥烈殊甚,且向所服轻粉,性亦燥急,丹溪曰:血难成易亏,今外被疮脓所涸,内被轻粉所燔,以难成易亏之血,其何以当内外之耗?不惟肿不能消,恐天年亦为之损也。时正仲夏,乃用十全汤去桂附,加红花、牛膝、黄柏、薏苡仁、木香、火麻仁、羌活,煎服百贴,空心常服。东垣四神丹加黄柏,又少加蜀椒,以其能采水银,然后脚伸能行,指肿亦消。惟额肿,敷膏而愈。

一人年三十余,因患此疮,服轻粉,致右腹肋下常有痞块,右眼黑珠时有疔子,努出如雀屎许,间或又消,身有数疮未痊。一医为治疮毒而用硝黄,一医为治痞块而用攻克,一医为治眼疔而用寒凉,诸症不减,反加腹痛肠鸣,大便滑泄,胸膈壅闷,不思饮食,暖气吐沫,身热怠倦,夜卧不安。季冬,汪往视,脉皆浮濡近驶。曰:误于药也。前药多系毒剂,胃中何堪。遂令弃去,更用人参四钱,黄芪二钱,

白术三钱，茯苓、炒芍药各一钱，陈皮、神曲、升麻各七分，甘草、肉豆蔻各五分，煎服五贴，为之痛定；减去升麻，又服五贴，膈宽食进；减去豆蔻，再服五贴，诸症皆除，月余痞块亦散，眼疔亦消。

一妇瘦长面紫，每遇春末夏初，两脚生疮，脓泡根红，艰于行步，经水不调。汪诊视，脉皆濡弱而驶，两尺稍滑。曰：血热也。医用燥剂居多，故疮不瘥。合用东垣四神丹加黄柏，蜜丸服之，疮不复作。

《名医类案》

江董南

旗田张氏子，年二十余，因坐卧湿地，遍身发疮如血风状。医与宣热败毒祛风之剂过多，疮虽稍愈，而气血侵损多矣。身发寒热，步履艰难。秋间，与来就治。脉濡弱，不任寻按，疔瘡殊甚，腹内作膨作泻，午后发寒热，至五更汗出而退。初为滋补气血兼扶脾清热消导，二剂膨去泻止，四服寒热退。但脾伤气虚，四肢无力，泄泻时作，乃以参、芪、归、术、陈皮、枳实、黄柏、麦冬等药，出入加减，遣归，二月而愈。因以煮酒水洗手足，致疮痍复大发，脉浮细而数，补与防风通圣散二服，及与去风湿药洗之，疮痍渐瘳；继与托里健脾清热之剂，月余而安。

浙江一人，生天疱疮遍身。越数日，每泡中放出石子一个，随其泡形为之大小。

吴城一人，腰间生一疔，脓中流出蛔虫四条，医亦甚骇，耳目所未经者。疔后自愈不致伤生。枫桥疡医龚生，目睹人小腹生疔，流出蛔虫二条，俱长六七寸，后亦自愈。

《五湖闻见》

薛立斋

一男子常咳嗽，腿患白癜风，皮肤搔起白屑。服消风散之类，痒

益甚，起赤晕。各砭出血，赤晕开口而痒愈甚。服遇仙丹之类，成疮出水，殊类大麻风。咳嗽吐痰，面色皎白，时或痿黄。此脾肺二经虚热之症。先用五味异功散治之，虚热稍退；又用地黄清肺饮，肺气渐清；又用八珍汤、六味丸而寻愈。后又咳嗽痰喘，患处作痒。用参苏饮二剂散其风邪；又用五味异功散加桔梗补其肺气而痊。二年后咳嗽，作渴饮水，脉洪大，左尺为甚。用加减八味丸补肾水面痊。

一男子素不慎房劳，尝患足三阴亏损，治愈后两腿腕患紫癜风，延于两股作痒。各砭出血，痒处日甚，服消风等药，患处微肿，延及上体，两眼昏涩。谓：肾脏风。先用四生散四服，后用易老祛风丸月余，用地黄丸两月余而痊。后饮食起居失宜，肢体色赤，服二丸随愈。

一男子患白癞风，过饮或劳役患处色赤作痒。服消风散之灯顿起赤晕，遍身皆痒。砭出血，服祛风药，患处出血，恪服遇仙丹，患处愈嫩，元气日虚。先用九味芦荟丸、九味羌活汤，诸症顿愈。用加味逍遥散、加味四物汤乃痊。

一妇人患白癞风，误以为大麻风，服蛇酒等药，患处微肿，经水两、三月一行。曰：此肝血伤而内风也。误服风药必筋脉拘急。不信，仍作风治，果身起白屑，四肢拳挛，始信。先用八珍汤四剂，又用四君子汤二剂月余，乃以四君子汤，又用八珍汤二剂，又月余诸症渐退，元气渐复。又以四君子汤为主，以逍遥散为佐，将两月疮腐脱落，又月余而愈。

《续名医类案》

薛立斋

一男子年四十三岁。自四十已来，每至夏发热而倦，日午益甚，晚凉少可。面生疮痍，耳下筋微肿，更结小核三、四枚筋筋上。曰：此火令不慎房劳，亏损肾水，不能制火然也。名曰注夏。彼不信，服降火败毒药，加口干倦怠，夜间热甚，午后腿软足心热，筋牵痛。复

来问治？曰：口干倦怠，此中气陷下也。夜间发热，阳气陷于阴分也。午后腿酸足热，阴虚火甚也。耳下筋牵痛，血虚不能润筋也。先以补中益气汤，少用柴胡、升麻，加五味、麦冬、熟地治之，诸症顿退。更服滋肾丸而痊。若以每至火令而然，用败毒凉药，鲜不危矣。凡春末夏初患头痛脚软，食少体热，此仲景云春夏剧，秋冬而脉弦大者。正世俗所谓注夏病也。

赵州守，北方人，年愈四十，头面生疮数枚，掀痛饮冷，积日不溃。服清热消毒药不应。诊其脉数，按之则实。以防风通圣散，二剂顿退；又以荆防败毒散而愈。又一男子患在四肢，审其脉症亦属有余。以黄连解毒汤治之亦愈。

《续名医类案》

缪仲淳

一妇人生疔臂上，用连翘、白芷、白芨、花粉各二钱，甘菊一两，紫花地丁、金银花各五钱，甘草、生地、茜草各三钱，地榆四钱，角刺、牛蒡各一钱，服之半日，立出脓血而愈。又治一男子生疔膝下，加牛膝三钱，立破出鲜血愈。

丁右武亲验坐板疮方：松香五钱细研，雄黄一钱细研，如湿痒加苍术三钱，各末，和匀以绵纸包裹，捻成纸捻二条，腊月猪油浸透，点火烧著，取滴下油搽上，立效。（同上）

《续名医类案》

薛立斋

一男子逾四十，胃气素弱，面常生疮，盗汗发热。用黄芪建中汤，少愈；更以补中益气汤而平。东垣云：气虚则腠理不密，邪气从之，逆于肉理，故多生疮。若以甘温之剂实其根本，则腠理自固，即无他疾。

张生患漆疮作呕，由中气弱，漆毒侵之。以六君子汤加砂仁、藿

香、酒芍治之，彼不信，另服连翘消毒散，呕果盛。复求治，仍以前药，外以麻油调铁锈末涂之而愈。

赵千兵患两腿生疮，每服败毒药则饮食无味，反增肿胀。此脾虚湿热下注也。以六君子汤加苍术、升麻、酒芍服之，以黄蜡、麻油各一两，轻粉三钱，为膏贴之而愈。大凡下部生疮，虽属湿热，未有不因脾、肾虚而得者。

一男子湿热下注，两腿生疮。以人参败毒散加苍术、黄柏服之，以金黄散敷贴。又一人患此，久而不愈。以船板灰存性一两，轻粉三钱，为散，麻油调贴，更以黄柏、知母、防己、龙胆草、茯苓、当归、川芎、黄耆、白术服之，并愈。若人两腿生疮作痛或遍身作痛，以当归拈痛汤治之。

一妇人两腿腕紫黯寸许，搔破出水。或用祛风、砭血，年余渐肿如掌许。乃服草乌等剂，遍身瘙痒，时出血水，内热体倦，饮食无味，月经三月一至，脉洪而数，按之则涩。此燥剂愈伤脾血也。先以补中益气汤加白芍、川芎、五味十余剂，乃与加味道遥散加熟地、钩藤二十余剂，再用归脾汤加川芎、熟地治之而不发。

一妇人素清苦，四肢似癣疥，作痒出水，怒则起赤晕。服祛风败毒等剂，赤晕成疮，脓水淋漓，晡热内热，自汗盗汗，月经不行，口干舌燥。此郁伤脾血也。用归脾汤、逍遥散，两月而痊。

一儒者素食膏粱，发热作渴饮冷，患疮如大麻风，大便出黑血，服清热祛风等寒药益甚。谓血分有热火也，故寒之不寒。用四物二连汤以清热凉血，用六味丸以补肾生水而热退；又用柴胡栀子散调理而痊。

一妇人性急善怒，月经不调，内热口苦。患时疮服败毒药，脓水淋漓，热渴头眩，日晡益甚。用加味逍遥散服之渐愈。因大怒月经如涌，眼赤出泪。用四物汤加山栀、柴胡、连、芩、数剂而愈。年余手、足、臂、腕起白点，渐大，搔起白屑，内热盗汗，月经两月余一至。忽怒，或恶寒头痛，或不食作呕，或胸乳作胀，或腹内作痛，或小便见

血，或小水不利，或白帶下注。此皆肝木制伏脾土，元氣虛而變症也。用補中益氣湯加黑山梔及加味歸脾湯間服，半年而愈。

一婦人久郁，患在四肢，腿腕尤甚。誤用敗毒寒涼之劑，晡熱、內熱，自汗、盜汗，月經不行，口干咽燥。此郁火傷脾也。用歸脾湯數劑，後兼服逍遙散五十餘劑而痊。

劉松篁《經驗方》云：會水灣陳玉田妻病天蛇毒瘡，一老翁用水蛇一條，去頭尾，取中截如手指長，刮去骨肉，勿令病者見，以蛇皮包手指，自然束緊，以紙外裹之，頓覺遍身皆涼，其病即愈。數日後解視，手指有一溝如小繩，蛇皮內宛然有一小蛇，頭目俱全也。

孫思邈以貞觀五年七月十五日夜以手中指觸著庭木，至曉遂患，痛不可忍。經十日，痛日深，瘡日高大，色如熟小豆色。嘗聞長者論有此方，遂用治之，手下即愈，痛亦除，瘡亦即瘳。未十日而復如故。方用蒲公英搗爛取汁塗之。（同上）

張子和曰：麻先生妻病伐指，痛不可忍，酒調通經散一錢半，夜先吐，吐畢而痛減。余因歎曰：向見陳五曾病此，醫以為小蟲傷或以草上有毒物觸之，迂延數月，斃盡方已。以今日觀之，可以大笑。

《續名醫類案》

王思中

一人患瘡疹，陰囊腫脹如升，不能跬步。王曰：此瘡虫也。就外科劑中加麥杆四十九莖，遂消。

戊蠅之水乃二百餘年創見之變，人足浸水中，數日即皮破生瘡，痛不可忍。一法取水荊條煎水浴之，立愈。

《續名醫類案》

薛立齋

一男子遍身瘙癢，後成瘡出水，洒漸惡寒，皮膚皴起，眉毛漸落，大便秘結，小便赤少。此屬肺火為患。用補氣瀉榮湯，四劑諸症

渐退，但倦怠恶寒，小便清少。此邪气去而真气虚，用补中益气汤兼换肌散半载，元气复而诸症退。时仲秋，忽大便不实，小便频数，体倦食少，洒淅体重。此湿邪乘虚而作。用东垣益胃汤，二剂顿安。仍用前药调理三月余全愈。

一男子两目俱赤，遍身痒痛，搔起白皮。此肝肺阴虚，误服祛风燥剂。鼻赤面紫，身发疙瘩，搔出血水。用升麻汤下泻青丸数服，又用加味道遥散数剂，身鼻渐白，疙瘩渐消。又用四物汤加参、芪、柴胡、山栀，并换肌散各百余服，喜其年少谨疾，全愈。

一妇人日晡身痒。内外用追毒祛风之剂，脓水淋漓，午前畏寒，午后发热，殊类疟疾。用补中益气汤加山栀、钩藤，又以加味道遥散加川芎而愈。

一妇人手心赤，瘙痒，发热头晕，作渴晡甚。服祛风清热之药，肤见赤痕，月经过期。用加味道遥散倍熟地，热止痒退。更以四物汤加柴胡、参、芪、炙草、茯苓，头清渴止。再用四物汤加参、术、茯苓、山栀，赤晕亦消。

一男子患瘙痒，破而成疮，如大麻风。服遇仙丹，发热作渴，大便秘结，脉沉实，右关为甚。此热畜于内也。先用黄连内疏汤而大便秘利；又用防风通圣散去硝、黄而热渴止；却用八珍汤而疮愈。

一男子脾肾气血虚热后遍搔痒，时喜热，水浴之后，患疮漏，破而出水。用风药益甚，或赤或白，眼作花痒。先用胡麻散、六味丸而痊。次年两股、小腹、颈项复作痒，用四生散、六味丸而愈。

一妇人经水先期，劳役或气恼则寒热瘙痒。服祛风降火等药，不劳怒而自痒发热，更加痰喘气促。服化痰清气之药，形气倦怠，食少胸痞，身发疮疥。服消毒之类，脓水淋漓。服大麻风药，口干作渴，欲水而不敢饮，经水又过期，眉间若动。又复月余，眉毛脱落，经水淋漓。此心肝二经风热相搏制，金不能平木，木克脾土而不能统血，肝火旺而不能藏血也。经云：水生木。遂朝用地黄丸以滋肾水、生肝血，夕用加味道遥散以清肝火、生肝血，月余诸症渐愈。又佐以四

君、芎、归、丹皮，月余经水旬日而止。又两月余，经水五十余日而至。乃夕用五味异攻散加当归，服两月经水四十余日而至。因怒寒热，经水如崩，眉棱角动，脉洪数弦，肝脾二脉为甚。用柴胡栀子散二剂以平肝火，用五味异攻散二剂以补脾气，发热顿退，经水顿止。更以八珍汤倍加参、术及地黄丸两月余，经水如期，眉毛渐生。因饮食停滞，腹胀作痛，另服祛逐剂，泄泻不止，小便重坠，饮食甚少。先用六君子汤送四神丸数剂，泻渐止，饮食少进。又用补中益气汤倍用升麻，数剂重坠渐愈。后因劳心，发热，饮食难化，呕吐涎水，其热自脐上起，觉饥，热频作。乃用六君子汤加炮姜治之，热时饮稠米汤，稍安。两月余又常服加味归脾、补中益气二汤而痊。

一妇人秋间肢体作痒，时发寒热，日晡甚，口苦喜酸，月水先期，面色常青，热甚则赤烙。服清热凉血后发疮疹，赤痒益甚。乃清热败毒，破而脓水淋漓。谓：此肝脾血燥，虚。不信，仍治疮毒，其疮益甚，形气倦怠，饮食减少。先用补中益气汤，间佐以六君、当归，元气稍复。乃以八珍汤倍用参、术，少用川芎、白芍，间佐以补中益气汤，诸症渐愈。又以四君子汤佐以加味消遥散，两月余脓水渐少。又复月余，疮渐结靥。因怒寒热腹胀，饮食少思，患处复甚。用六君子汤加山栀、柴胡，乃用四君子汤为主而疮渐愈。又因怒，月经甚多，发热作渴，疮痛出血。用柴胡清肝散，热退痛止。仍用四君子汤而结靥。又用八珍、山栀、丹皮而愈。

一妇人遍身瘙痒，脓水淋漓，发热，身如虫行，月经不调。先用升麻汤送泻丸，热痒顿退；又用加味消遥散，经行如期；用换肌丸而疮愈。后因怒经行不止，筋骨作痛。用秦艽地黄汤、易老祛风丸而愈。

一妇人性沉静，怀抱不乐，月经过期，遍身作痒。服祛风清火之剂，搔破成疮，出水不止，其痒益甚。或用消风散之类，眉棱跳动，眉毛折落。又服遇仙丹，患处俱溃，咳嗽发热，饮食日少，月经先期。作肝脾郁怒而血燥。前药复伤而益甚，先用四君子、芎、归、山栀、丹

皮，饮食渐进，服月余而嗽止。又以加味道遥散加钩藤，二十余剂而眉不动。乃去钩藤倍加参、术、当归，月余疮结痂。又以八珍汤加山梔、丹皮而痊。

一妇人患前症脓水淋漓，发热作渴，体倦恶寒，经水不利，久而不愈。此肝脾亏损而虚热也。先用补中益气汤加山梔、川芎而元气渐复；又用逍遥散而疮渐愈。又虚后患疥遍身作痒，搔起疙瘩，破而出脓，或出血水。误服醉仙散，殊类风症。用八珍汤数剂而安；又用十全大补汤，患处渐干矣。

一妇人日晡身痒，素清苦，因于郁怒，遍身晡热、内热，自汗、盗汗，月经不行，口干咽燥。用归脾汤数剂，诸症稍退；后兼加味道遥，五十余剂而痊。

一妇人瘙痒发热，日晡益甚，皮肤赤晕，月经过期。此血虚而有热也。以逍遥散倍加熟地，热止痒退；更以四物加柴胡、参、芪、炙草、茯苓、调理而愈。

一妇人怀抱久郁，患前症脓水淋漓。服连翘消毒散，食少胸痞；服清气化痰丸，作呕吐痰；服清热化痰丸，烦热畏寒，四肢厥热，而目赤色，脉大而无力的。此脾胃亏损而虚寒隔阳气于外。遂用六君子汤加炮姜治之，诸症少愈。饮食顿进。又佐以四物汤，诸症渐愈。又以四君子每味各一钱，四物汤每味各五分，诸症全愈。

一妇人每秋间两手心作痒，搔起白屑，因劳役恼怒则发寒热，遍身作痒，起疙瘩。或以为风症，内服花蛇等药，外敷硫黄之类，又服遇仙丹，热渴益甚，月水不通。谓脾、肝二经血燥生风。先用加味道遥散，热渴渐减，又用八珍、柴胡、山梔，患处少可。后因怒气发热胁痛，患处肿胀。用加味道遥散四剂而安；又用四君、芎、归、山梔、丹皮，至半载而痊。

一男子遍身瘙痒，诸药不效，脉浮，按之而涩。以生血药为主，间以益气，百贴而愈。

宋生遍身作痒，搔破成疮出水，脉浮数。此手足阳明经风热所

致。以人参败毒散对四物汤加芩、连服之，外以松香一两，枯矾五钱，轻粉三钱，为末，麻油调敷，月余而愈。又一人患此，但脉沉实，以前药加大黄治之渐愈；再服人参败毒散而平。

《续名医类案》

陆肖愚

徐邑宰，秋末冬初遍身生疔，大小不一，红痛焮痒，黄水淋漓。或谓风热，用防风通圣，数剂不减。或谓诸痛痒疮疡，皆属心火。用芩、连、山梔、生地等十剂，益甚，且饮食渐减，脉之浮数，微按之又沉中带缓而弱。曰：凡风热大都为瘾疹，未必为疮疔。至疮疡之为心火，经固言之。第脉弱为多，此元气不足也。缓者湿也，数虽为热，而微数不可纯责之火。据今日之症，火为标，湿为本；原得病之由又湿为标，元气不足为本。此必乘虚汗出澡浴，湿渍肉腠，久而热蚀为脓水，发为痛痒也。用苍术、苡仁、茯苓燥热，为君；人参、白术、黄芪、甘草补气，为臣；连翘、蝉退清热，为佐；葛根、白芷入阳明肌肉，为使。二剂痛痒顿减，胃少开，十剂全愈。

《续名医类案》

张子和

颍皋韩吉卿自髀至足生湿蠹，大者如钱，小者如豆，痒则搔破，水到则浸淫，类虫行裤袜，愈而复生。瘰痕成凹，十余年不瘳。张晒之曰：此湿蠹疮也。由水湿而得，故多在足下。以舟车、浚川大下十余行，一去如掃。

一省掾背项常有瘰疬，愈而复生。张曰：太阳血有余也。先令涌泄之，次于委中铍针出紫血，病更不复作也。

一张君衮常喜热火烘灼其背及两足，又食自死肉，久而两足常生疔毒，愈而复生，半年余。以清凉饮子下之，得紫黑血积于便

中。去者月余，其疔毒顿除。是知积热毒致痈肿者如此。

《续名医类案》

何书田

阴亏血热，头面红瘰，频发不止，骨热脉数。本元虚怯所致。

小生地 地骨皮 知母 赤茯苓 白薇 牡丹皮 淡黄芩
银花 生甘草 夏枯草

营阴蕴热，屡发红瘰，痒甚，搔爬不已；脉细数有力。当从血分清理。

小生地 羚羊片 丹皮 秦艽肉 淡黄芩 白薇 鲜首乌
生茅术 归身 生苡仁 稀莪草

年高，血虚风燥，时发红瘰，大便艰涩。当用滋营润液法。

鲜首乌 炒阿胶 生归身 白茯苓 秦艽肉 炙龟板 特丹
皮 柏子仁 炒怀膝 稀莪草

曾患血崩，现在周体发瘰，痒而出水。此血燥生风也，治难速效。

小生地 牡丹皮 炒黄柏 苦参 白薇 忍冬藤 白归身
生茅术 生苡仁 秦艽 稀莪

《屏山草堂医案》

王孟英

余郡一人，项边忽痒，渐起白痕一条，相延渐欲至喉，痒不可忍。群医莫识。一方士以刀轻开其痕，出白虱甚多而愈。曰：此虱瘤之类。凡皮内作痒，或起痕、或高起，皆其证也。

《归砚录》

王孟英

陆某，操酒业，极窘，又遭颠沛，久而患一异疾，形消善痒，虱从

皮肤而出，搔之蠕蠕，医治莫效。孟英诊曰：悲哀劳苦，阳气受伤，曲蘖浸淫，乃从虫化。与补气药加杉木、桑枝而愈。

《王氏医案》

沈祖复

陈妇寄居寺后门王姓宅后，年六十余，遍体肌肉生虱，不觉痛痒，每日席上不知凡计。先生诊之曰：“此系湿热酿成，又年高气弱，正气不能化湿，湿蕴生虱；况脉细苔腻，非易治也。”用人参须、薏仁、百部、雷丸、茅术等品，外用苦参、百部、黄柏、豨莶，浓煎洗浴，其虱乃减。

《医验随笔》

何长治

左。劳力伤筋，又经毒水，致两腿常发痒块，出水，脉细数。营分受伤，须忌生冷为妙。

生黄芪二钱 炒归尾钱半 生白芍钱半 秦艽钱半 广木香五分
炒青皮钱半 煅牡蛎三钱 鹿角霜钱半 川断肉三钱 山萸肉钱半
广陈皮八分 炙甘草四分 五加皮钱半 加川桂木五分 煨姜四分

《何鸿舫医案》

丁泽周

李左。遍体水瘰，头面尤甚，形寒内热，风湿热蕴袭脾肺两经，缠绵之症。宜清营祛风而化湿热，以丸代煎，缓图功效。

净蝉衣五钱 荆芥穗五钱 小生地炒，二两 京赤芍炒，一两五钱
粉丹皮一两 茯苓皮烘，一两五钱 六一散一两五钱 小胡麻炒，一两五钱
制苍术五钱 苦参片炒，八钱 肥玉竹炒，一两五钱 紫丹参炒，一两
白鲜皮炒，一两 杜红花四钱 绿豆衣一两五钱 象贝母去心，一两五钱

上药各研末，加冬瓜皮四两，煎汤泛丸。每早服三钱，午后半饥

时服一钱五分，开水送下。

罗左。风湿热蕴于脾肺两经，肌肤红痒作痒，宜祛风清营，而化湿热。

净蝉衣八分 粉丹皮钱半 生赤芍二钱 肥知母钱半
茯苓皮三钱 通草八分 六一散包，三钱 制苍术钱半 苦参片二钱
肥玉竹三钱 生苡仁四钱 冬瓜子三钱 绿豆衣三钱

《丁甘仁医案续编》

孔继炎

妇人某，不知其姓氏，诣予求治。舒臂就诊，见其手腕皆似疮似癬，赤而微突，着指强涩，几无隙处。问遍身皆然乎？曰：下身微少，胸腹肩背成一片矣。问痒乎？曰：痒甚。然不敢重爬，重则疼，且易破。予曰：此风之为也。经曰：劳汗当风，寒薄为皴，郁乃痱。又曰：脉风成为癩。夫同一风也，中于卫则为皴，中于营则为癩，皴，即今之所谓粉刺也。惟其发于卫分，色从气化，故破而出白。癩即今之所谓癩也，惟其结于营分，色从血化，故聚而为赤。此症自以疏风为主，而用活血透表之药，从营分驱去风邪，当必不误。欲立方，又踌思曰：此虽外症，根蒂深矣。观其皮肤之间，鳞次甲比，已从营分突出卫分，坚结固护，如蟹匡螺壳，然岂寻常风药所能破其藩篱。然风药太重，加以峻烈，其性既轻而上浮，其势又剽而难制，营卫受其鼓荡，势必不静，倘从鼻口溢出，是治病而益其病也。奈何？既而曰：得之矣，药何常顾用之何如耳。乃仍用荆、薄、羌、防等驱风，和之以归、芍，托之以参、芪，引之以红花、姜黄，剂不甚重，而水必倍加，煎汤必盈二、三升，连口服下，使汤液充肠满腹，药力借水力以行，势必内盈外溢，透出肌表。桂枝汤之必啜热粥，五苓散之多饮暖水，皆此意也，何以猛药为哉？其人如法服之，果数剂而愈。后数月，又遇一妇，与此症同，即用前法，亦寻愈。

《孔氏医案》

刘世祯

余昔在长沙开设博爱医院时，小西门外有烟草公司经理，因病请余出诊，适公司内有一日本人在座，年约三十岁，能说中国话，谈及渠亦该公司股东，在中国多年，患遍身发小红疹子，初起色红，由红变黑，痒之如刺，不痛不痒，饮食如常，不过觉遍身皮肤紧束不适。曾往日本医院诊治，用刀刮去黑刺，并不出血，虽敷洗兼施，过十余日又长成如故。刀刮数次，不能断根，亦未发作他病，问余有治法否？余曰中国医治病，以平脉为主，不平脉即无从着手。遂请余诊之。脉浮弦，系小柴胡桂枝证，即主柴胡桂枝汤加升麻、鳖甲治之。并立医案云：据余所见，系小邪舍于皮毛之内，肌肉之外，小络之中，与大经络脏腑不相关，无寒热杂合，故不痛不痒，若服此方生效，或发生变动，当能治愈，若服数剂无影响，则甘谢未等数语。该日本人亦会中国文字，阅后欣然致谢。初服二剂，疹子由黑渐红；继服三剂，由红生痒；又服三剂，痒止，红色渐隐于皮内。复诊时，脉浮弦尽退，略大而涩，知为血虚、水亏，用干地、阿胶、百合等味治之，服五剂全愈。该公司经理及日本人联名盛宴款余，并谓中国医学之脉法神妙莫测云。据此可知，虽有怪病，不须奇药，即外科病亦可平脉内治也。

《医理探源》

王文选

王某某，40岁，农民。1959年5月10日初诊。

自诉近来连日煮食灰条等野菜，前天早起突然发现面目、手背浮肿，日甚一日。皮肤发痒，眼睑肿甚难睁，疼如火灼针刺，遇风、遇太阳痒痛更甚。肿处紫斑大小不一。头时昏，身体消瘦，精神倦怠，气息微弱，小便清利，大便时秘时泻；脉浮细无力，舌淡白。病乃脾虚，中气虚弱。拟补中益气汤加减，使脾健运而败毒。处方：

黄芪 4.5 克 党参 4.5 克 白术 3 克 当归 3 克 升麻 1.5 克
柴胡 1.5 克 羌活 3 克 防风 3 克 茯神 3 克 运志 4.5 克 白芷 3 克
桔梗 3 克 甘草 1.5 克 益母草 3 克

二剂，水煎食后服。

5 月 13 日二诊：灼痛发痒减轻，上方加减。方药：黄芪 4.5 克
党参 4.5 克 白术 3 克 当归 3 克 升麻 1.5 克 柴胡 1.5 克
防风 3 克 白芷 3 克 桂枝 3 克 二花 3 克 赤芍 3 克 益母草 3 克

二剂，水煎食后服。

5 月 16 日三诊：面目浮肿已散，手背微肿，紫斑大部消退，手背肿处仍有灼痛，脉缓。投以补中益气丸，日服三次，每次 9 克。服一周而病愈。唯紫斑散肿处皮肤干燥，身体虚弱，用饮食补养调理。

赵某某，男，22 岁，干部。1958 年 7 月 22 日初诊。

患者因感冒曾服西药（不详），第二日全身发痒，出丘疹，扪之若粟，累累碍手，色赤，发热、全身酸痛，微有咳嗽，脉数，舌红而燥。病系暑月外感，内郁不解，加之服西药过敏，致而病症加重，邪火炽盛，伤于血分，故全身出疹发痒。治宜败毒解表清里。处方：

荆芥 4.5 克 防风 4.5 克 柴胡 3 克 连翘 4.5 克 山梔 4.5 克
黄连 1.5 克 羌活 4.5 克 二花 4.5 克 白芷 4.5 克 甘草 1.5 克
桔梗 4.5 克 泽兰 3 克

二剂，水煎食后服。

7 月 24 日二诊：病症无进退，因时值暑令，暑能伤气，火易伤阴，故去连、芷、桔，加益气养阴之品。方药：

黄芪 4.5 克 沙参 6 克 柴胡 3 克 荆芥 3 克 防风 4.5 克
连翘 4.5 克 山梔 4.5 克 二花 3 克 甘草 1.5 克 羌活 3 克
泽兰 3 克 二剂，水煎食后服。

7 月 26 日三诊：不发烧，身痛除，疹色暗；仍发痒，胃纳差，脉象缓，舌苔淡。加和中药。方药：

白术 4.5 克 茯苓 4.5 克 荆芥 6 克 防风 6 克 桔梗 4.5 克

细辛 3克 山梔 3克 厚朴 4.5克 白芷 3克 羌活 4.5克 沙参 6克
陈皮 4.5克 甘草 1.5克 苏叶 1.5克 二剂

7月28日四诊：各症均平，唯四肢发痒，疹色蝉而尚有。以补脾肺益气加解毒除风，彻底治愈以免遗留后患，经常有皮肤瘙痒之症。方药：

黄芪 4.5克 沙参 6克 升麻 3克 柴胡 3克 二花 4.5克
甘草 1.5克 防风 4.5克 荆芥 4.5克 黄连 3克 泽兰 3克
白藓皮 4.5克 羌活 4.5克 三剂，隔日服之。

《中医医案医话集锦》

赵海仙

肺管郁热，脾阳湿困，血燥生风。于是面生红瘰，间有赤虫赤虫名曰尸虫。药力难达，非缓图不可。

生地黄三钱 杏仁泥三钱 使君子三枚 苦桔梗一钱五分
大小胡麻各三钱 白蒺藜一钱五分，去刺 净蝉肚七只 地肤子二钱
白僵蚕一钱五分 雷丸一钱 粉甘草五分 大防风一钱五分
赤茯苓三钱 荷叶筋三钱

《寿石轩医案》

上肢骨折

巢渭芳

吴巧生责打小女，右半臂击断，外反欲脱，痛叫声震屋瓦，四围用血竭、生草、山柰、赤芍、防风、白芷、当归、川草乌、乳香、没药、红花、白芨、芙蓉叶，为末，醋调敷，外以红布包裹，再用夹板紧扎，两旬而痊。另服韭菜汁，以痛止为度。

卜家村某童，因患痢症，登途泄痢时，适小车过去，为轮碾断右

腿，亦以此法而痊。

《巢渭芳医话》

陆银华

洪某某，男，17岁，门诊号 30070

初诊：1964年11月6日

被自行车撞倒，身体向左侧倾跌，左手撑地，当即左前臂疼痛剧烈、瘀肿、畸形，不能旋转。

摸诊：桡尺骨中段明显压痛，可摸到突起的骨折端，有骨擦音。

印象：左桡尺骨双骨折，位置不良。

X线透视确诊：左侧桡尺骨中段双骨折，远端向内向后移位，对位对线不良。

处理：

1. 徒手整复，纠正畸形，整复后X线复查报告：左侧桡尺中段双骨折，对位对线尚可，两骨间距离大致正常。

2. 外敷四黄消肿药膏。

3. 小夹板夹缚固定。

4. 屈肘90°，手心向上，悬吊胸前。

5. 内服以活血消瘀退肿止痛为主。

处方：

归尾、赤芍、泽兰、桃仁、茜草、申姜各9克，川芎、红花各3克，生地12克，二剂。

二诊：11月8日

瘀肿颇剧、外形尚平整。

处理：

1. 换药用四黄消肿药膏。

2. 内服原方三剂。

三诊：11月11日

瘀肿已退，但未尽、疼痛已除。

处理：

1. 换药用四黄消肿药膏。

2. 内服原方三剂。

四诊：11月14日

瘀肿基本已消，手能握拳，但不够灵活，局部很痒。

处理：

1. 改用桃花散外敷。

2. 内服以活血消肿、舒筋活络为法。

处方：

当归、杭白芍、川断、秦艽、五加皮、茜草、申姜各9克，红花3克，淮生地12克，三剂。

五诊：11月19日

局部自觉症状俱减，但夜汗浹背。

处理：

1. 换药用桃花散。

2. 内服以活血补气为主。

处方：

生黄芪18克，当归、赤芍、龙骨各9克，桃仁、五味子各6克，川芎、红花各3克，浮小麦12克，五剂。

六诊～九诊：11月23日～12月7日

先后用桃花散抽药四次，肿痛尽除，外观尚平整。

十诊：12月25日

前臂有麻木感，握拳欠灵。

处理：

1. 继续用红油膏外敷。

2. 内服以舒筋活络之剂：

处方：

川羌活、秦艽、五加皮、宣木瓜、海枫藤、川断、丹参、桑枝各9克，防风6克，细辛1.8克，五剂。

十一诊：1965年1月14日

局部症状俱除。前臂旋转功能全复，无遗后患。X线透视报告：左桡尺骨双骨折，对位对线良好，周围有浓密骨痂生长。

解除夹板，结束治疗。嘱服参茸丸一瓶，以巩固疗效。

王某某，男，12岁，天童公社勤勇大队，门诊号：51511。初诊：1965年7月9日。昨从约一公尺高墙头倒塌而跌下，左手撑地，当即左前臂上部疼痛剧烈，向掌侧弯曲畸形，局部瘀肿。

摸诊：在桡尺骨上段骨折处明显可摸，向掌背高突移位，左桡骨小头突出。

印象：左桡尺骨中上段双骨折，合并左桡骨小头脱臼。

X线透视报告：

左桡尺骨中上段双骨折，明显向掌侧凸出成角，桡骨小头脱位。

处理：

1. 徒手整复，整复后X线透视复查：左桡尺双骨折，桡骨小头脱位整复后位置良好。

2. 小夹板夹缚固定。

3. 手心向上屈肘90°，悬吊胸前。

4. 内服破瘀退肿止痛之剂。

处方：

归尾、赤芍、泽兰、茜草、桃仁、申姜、川断各6克，川芎、土红花各3克，细生地12克。二剂。

二诊：7月11日

瘀肿始退、外形平整，手握拳如常。

处理：

1. 外敷用四黄消肿药膏。

2. 内服原方三剂。

三诊~五诊:7月13日~7月23日

先后用桃花散换药三次。瘀肿全消,疼痛亦除,外形平整。X线透视复查:左桡尺骨中段骨折,对位对线良好。

处理:

改用损伤膏药外敷。

六诊:7月30日

前臂旋转功能复全,可以提重拿物,外形平整。

处理:

1. 外敷损伤膏药。

2. 解除夹板。

结束治疗。

方某某,男,16岁,门诊号37554。初诊:1965年1月10日。十八天前跌仆,左手掌撑地。当时左肘即感剧痛,左肘不能伸屈动弹,动则疼痛尤剧,局部瘀肿。曾经当地医生复位三次症状未见减轻,反而瘀肿益甚,疼痛不堪。摸诊:左肱骨下端向后移位畸形X光片透视:左肱骨髁间骨折,远端向背侧移位。

诊断:左肱骨髁间陈旧性骨折。

治疗:

1. 用插棍拉拔复位。X张透视见复位良好。

2. 外敷四黄膏。嘱每三天换药一次。

3. 夹板夹缚固定。

4. 内服破血消瘀退肿之剂。

处方:归尾、赤芍、泽兰各6克,桃仁、茜草、川断、申姜各9克,生地12克,川芎、乳香、没药各3克,红花2.4克。

5. 嘱握拳锻炼。

二诊:1月16日

肿痛俱瘳,X线透视见位置仍好。

处理:

1. 继续换药、固定。
2. 内服活血消瘀,舒筋活络为主。

处方:当归 6 克,赤芍、茜草、申姜、川断、秦艽、五加皮各 9 克,川芎、红花各 3 克,生地 12 克。

三诊:1 月 29 日

瘀肿全消,尽力屈肘时略有疼痛。

处理:继续换药,内服参茸丸,每日二次,每次一丸,继续功能锻炼。

四诊:2 月 9 日

患手已能摸及同侧肩峰。

处理:内服益气养血舒筋之剂。

处方:党参、白术各 9 克,茯苓、当归、白芍、秦艽、五加皮各 6 克,甘草、川芎、红花各 3 克。

半月后复查见功能基本恢复,嘱回家调养。

汪某某,女,15 岁。门诊号:66182。初诊:1965 年 10 月 5 日。走路不慎滑跌,右手撑地,右手腕上疼痛剧烈,右手腕不能活动,呈曲型餐叉型畸形、瘀肿顿嫩。

摸诊:右桡骨末端压痛尖锐,有高突错位。

印象:右桡骨末端骨折。

X 线透视报告:右桡骨末端骨折(部分骨骺分离)、远段骨块、骨骺明显向背移位。

处理:

1. 徒手整复、纠正畸形、整复后 X 线透视复查报告:右桡骨末端骨折,整复后位置尚好。

2. 外敷四黄消肿膏。

3. 小夹板夹缚固定。

4. 手心向上屈肘 90°,悬吊胸前。

二诊:10月7日

瘀肿颇甚,外形尚平整,患手握拳不利。

处理:

1. 外敷四黄消肿膏。
2. 内服以破血消瘀退肿止痛之剂。

处方:归尾、赤芍、桃仁、泽兰、申姜、川断各9克,川芎、土红花各3克,细生地12克,三剂。

3. 嘱练握拳功能。

三诊:10月12日

瘀肿虽始退,但尚甚,患手握拳仍不利。

处理:

1. 用四黄消肿膏外敷。
2. 内服原方三剂。
3. 嘱继续加强握拳活动。

四诊:10月20日

瘀肿显退,患手握拳活利,外形平整。

处理:

继续以四黄消肿药膏外敷。

五诊:10月23日

瘀肿基本已退,握拳自如,瘀去筋舒。

处理:

改用桃花散外敷。

六诊~九诊:10月26日~11月15日

先后换药四次,用桃花散,肿痛尽消,握拳、旋转如常,功能基本已复。

处理:

1. 解除夹板。
2. 外贴损伤膏药。

3. 嘱继续练手腕功能。

结束治疗。

《陆银华治伤经验》

下肢骨折

周镇

严君，年五十六岁。丙午八月廿八日由沪南乘车，在金利源码头车侧跌伤左环跳骨，遍足俱痛。回邀石晓山诊治，幸未脱骺。即用手术活络舒筋，并扶立以验骨缝合否。商拟归尾、牛膝、寄生、杜仲、细生地、乳、没、地鳖虫、赤芍、狗脊、川芎、桑枝、丝瓜络、桃仁。服药，伤处痛未减，足剧痛。外用韭菜、葱煨熨痛处。廿九日餐前，服礞石丸半粒。少时，用晚膳毕，觉凛寒恶汗冷，呕痰两大碗，内有粉红兼紫黑之血瘀少许，并无粒米及药末，呕止汗定。噫！有如此痰涎而未跌中，抑亦天幸。当日原方加琥珀末另冲。三十日，于廿八日方中加黑大豆、落得打。酌定菜肴笋衣、腐衣、青鱼、火腿、胡桃。初四日石来，伤处骨缝未联，伸缩要透，如不动弹，下去要麻木。当定云苓、杞子、杜仲、归身、山药、牛膝、川断、菝葜、秦艽、寄生、舒筋草、桑枝、大生地、首乌、狗脊，出入为方，并用再造丸半粒酒服为引。嗣后腿足酸定，软痿无力。加入参、芪、阿胶大剂膏滋，并食鹿筋。将养三月，行动如常。以停顿数旬之恙，伤药服之则不寐更甚，且曾引用附子，亦因不宜剔去。中间足痿无力，实照痿症拟花。嗣逢节令，伤处作痛，伤膏未应，悬拟枫香脂、虎骨、乳香、没药四味，入膏贴之而愈。调补既久，后无足弱之患。

《周小农医案》

陆银华

钱某某，男，61岁，门诊号：33831。初诊：1964年12月3日。行

走不慎滑倒，右膝着地，膝盖撞着石块疼痛剧烈，不能站起，半小时后疼痛减轻，但步履疼痛颇甚，即来所诊治，瘀肿未瘀，畸形明显，膝盖呈开口状。

摸诊：髌骨一分为二，两断端之间可放一食指，屈膝更甚。

印象：右髌骨骨折。

处理：

1. 徒手将分离断端揪兜平拢。
2. 趁瘀肿未瘀即用扎带法固定。
3. 外敷四黄消肿药膏。
4. 内服活血消瘀退肿止痛之剂：

处方：

归尾、赤芍、泽兰、桃仁、茜草、申姜各9克，川芎、土红花各3克，生地12克，乳香4.5克，没药6克，三剂。

二诊：12月8日

瘀肿颇甚，疼痛尚轻，断骨距离缩小。

处理：

1. 改用兜法。
2. 外敷四黄消肿药膏。
3. 内服原方三剂。

三诊～十诊：12月12日～1965年1月10日

各用四黄消肿药膏换药一次，并用兜法继续固定。

十一诊：1月15日

自觉症状全消，断骨已接续。

X线透视复查：左侧髌骨陈旧性骨折，已有愈合现象，位置好。

处理：

1. 解除兜法、夹板。
2. 外贴损伤膏药一只。
3. 练屈膝活动功能。

4. 嘱下地步履。

陈某某,女,70岁,门诊号 65377。初诊:1965年9月26日。数小时前右腿扭跌,患肢被身子压着,当即小腿剧痛,不能站立行动。患腿远端成角畸形,压痛尖锐,可摸得骨擦音。X线透视见右胫腓骨下端骨折,远端向前移位。

诊断:右胫腓骨下端骨折。

治疗:

1. 手法整复,纠正畸形。
2. 处敷三黄消肿药膏,嘱其隔二天换一次药。
3. 小夹板夹缚固定。
4. 内服活血退肿,舒筋活络之剂。

处方:

当归、赤芍、秦艽、五加皮、茜草、川牛膝、申姜、桃仁各9克,川芎、红花各3克,生地12克。

二诊:10月4日

瘀肿始退,疼痛已除,继续换药,原方续服。

三诊:10月17日

局部瘀肿已消退,无明显畸形,患处改敷损伤膏药,嘱其适当功能锻炼。

四诊:11月11日

患者已能下地行走,无明显疼痛,X光片示骨折端对位对线良好,骨折线已模糊,解除夹板,敷贴损伤膏药,嘱其回家调养。

朱某某,女,40岁,门诊号 24092。初诊:1965年9月12日。昨夜行走不慎跌仆,左小腿扭整被身体压住,当即疼痛颇剧,不能起立行动,小腿下段高凸不平,触摸时胫腓骨下段可摸得骨折端,闻及骨擦音。

诊断:左胫腓骨下段双骨折。

治疗:

1. 徒手整复,纠正畸形。
2. 外敷三黄消肿药膏,嘱其二天换药一次。
3. 小夹板固定。
4. 内服消肿活血止痛之剂。

处方:当归、赤芍、泽兰、茜草、申姜、桃仁各9克,川芎、红花各3克,生地12克。

二诊:10月26日

患肢肿胀,疼痛已消退减轻,并可轻轻移动。

1. 换贴损伤膏药,并继续固定。
2. 内服调补气血,舒筋之剂。

处方:八珍汤加秦艽、五加皮、川牛膝各9克,红花3克。

三诊:11月4日

患肢疼痛肿胀全愈,已能下地行走。X光片示:骨折端对位对线良好。周围有浓密骨痂生成。

处理:去除夹板,敷贴损伤膏药。

《陆银华治伤经验》

躯干骨骨折

陆银华

林某某,男,51岁,门诊号44965。初诊:一九六四年一月八日。四天前从一丈余高处窗口坠落,左胸挫伤,当即局部肿胀,疼痛剧烈,胸肋胀闷,呼吸不畅,咳嗽、转侧时疼痛加剧,前二天曾咳血数次,现痰中时有血丝。检查:左胸第七、八肋压痛明显,并可闻及骨擦音。治拟止血行血为先。

参三七6克、藕节炭30克,陈皮6克,茜草、赤芍、丹皮炭、杏仁、浙贝、白茅根各9克。二帖。

二诊:一月十日。前方服后,痰红已除,胸痛依存,尚可闻及骨

擦音。治拟理气行血。

归尾、赤芍、香附、元胡、苏梗、郁金各9克，木香、枳壳、砂仁各3克，青皮6克，参三七2.4克。三帖。

三诊：一月十四日。胸痛虽减仍剧，胃纳不馨，神疲乏力，原方再进三帖。

四诊：一月二十八日。诸症迭减，原方服十剂。

五诊：二月一日。诸症已除，治拟八珍汤加肉桂调理以善其后。

翁××，男，64岁，门诊号24469。初诊：一九六四年九月十五日。船碰船而跌仆，右胸肋撞于船边上。伤有三天，胸肋疼痛颇剧，胸闷咳嗽痰多，呼吸不畅，经胸透确诊为右第七肋骨中段骨折，治拟活血止痛。

参三七3克，研吞，一帖。

二诊：九月十六日。胸痛有增无减，咳嗽频数，痰多气逆，呼吸不畅，转侧时可闻及骨擦音。损伤后气血阻滞，肺失清肃下降之令，治拟肃肺化痰。

大力子、杏仁、浙贝、苏子霜、白芥子、旋复花、郁金、元胡各9克，橘红、络各4.5克，通草、枳壳各3克。二帖。

三诊：九月十八日。进剂后咳嗽见减，呼吸亦畅，胸痛仍存，转侧不利，胃纳不馨，脉细滑，苔白，原方继服三帖。

四诊：九月二十一日。咳痰显减，胸痛未除，气滞血瘀未化，治拟理气行血。

归尾、赤芍、木香、香附、元胡、苏梗、郁金、杏仁各9克，枳壳、砂仁各3克，小青皮6克，陈皮4.5克。三帖。

五诊：九月二十四日。胸痛显减，骨擦音已消失，原方增删共进十七帖，于十月二日，诸恙已痊而结束治疗。

《陆银华治伤经验》

关节脱位

王孟英

一富翁倾跌伤臂，骱脱，护痛不许人动摇，人皆技窘。汤令患者向隅立，卒取冷水泼其顶。患者陡作寒噤，即乘势将臂一把，骨随入骱，愈矣。

一人因跌而脊骨脱骱者，下节错向内，无可著手。汤令其家密备栲栳一只，中安绵絮，置于旁，扶患者环柱走，走乏，卒推置栲栳间，上身直而下身弯环，所脱脊骨稍凸出，遂以按入而愈。愚谓此等乎法心思，非凡庸所及，苟能触类而通，则自无难题矣。

《归砚录》

章成之

朱女。右臀从高处下坠，其骨脱臼，日久未能愈合，伤处作痛，不利于行。深虚骨骼腐蚀，转成骨癆。内服剂无非营养强壮之药。

全当归 9 克 杜仲 9 克 川续断 9 克 补骨脂 9 克 鹿角霜 12 克
落得打 9 克 炙乳没各 3 克 小金丹一粒，化服

另：龙骨 18 克 虎骨 30 克 乌贼骨 18 克

三味炙研细末，每次和入饮食中少许。或用：川草乌各 12 克
藏红花 9 克 毛姜 1.2 克 煎汤熏洗患处。

《章次公医案》

陆银华

崔某某，男，38 岁，初诊：1964 年 2 月 11 日。十一天前不慎跌仆，左手撑地，当即左肩部疼痛颇剧，局部畸形，近三天疼痛虽有好转，然畸形、功能障碍依然。

检查：左肩方形，关节部位空虚，手臂不能靠胸，腋窝部可摸到

肱骨头。

诊断：左肩关节上脱位。

治疗：

1. 多人抬杆复位法，复位后畸形消失。
2. 外敷四黄膏，患臂屈肘，紧贴胸壁固定。
3. 内服活血从瘀之剂。

归尾、赤芍、桃仁、泽兰、茜草、申姜各9克，生地12克，川芎、土红花、乳香、没药各3克。三剂。

二诊：2月15日

疼痛已除，功能未复，治拟活血舒筋。

当归、白芍、秦艽、五加皮、申姜各9克，生地12克，川芎、土红花、乳香、没药各3克，红枣7只。三剂。

外贴伤膏

随访：功能良好、无后遗症。

何某某，男，25岁。初诊：3月6日。一小时前骑自行车翻倒，左手撑地，当即肘部疼痛颇剧，局部肿胀。

检查：肘关节微屈，如鹅颈状畸形，鹰咀向后方突出，三点骨标志改变，肘关节屈伸功能障碍。X线透视诊为左肘关节后脱位。

治疗：

1. 手法复位，复位后畸形消失，疼痛减轻。
2. 外敷四黄散。
3. 内服活血化瘀，消肿止痛之剂。

当归尾、赤芍、桃仁、泽兰、申姜、茜草各9克，生地12克，川芎、红花、乳香、没药各3克。三剂。

二诊：3月8日

疼痛已减，但肿胀未退，原方再服三剂。局部换药。

三诊：3月24日

疼痛、瘀肿全除，唯屈伸尚有牵掣不利，治宜活血舒筋通络。

当归、川断、秦艽、五加皮、丹参、申姜各9克，生地、白芍各12克，红花3克，红枣7只。三剂。

四诊：4月4日

功能已复，局部伸屈时略有牵痛。治疗：外贴伤膏一张，嘱其回乡调养。

孙某某，男，34岁，初诊：5月12日。右肩负重压伤，当即听到“咯咯”一声之后，肩部疼痛，肿胀，右臂不能活动，即来所门诊。

检查：右肩方形，右臂外展畸形，腋窝下可摸及肱骨头。

诊断：右肩关节下脱位。

治疗：

1. 手法复位（多人抬杆法）。复位后畸形消失，疼痛顿减。
2. 外敷四黄膏，固定。
3. 内服活血化瘀之剂。

归尾、赤芍、桃仁、泽兰、茜草各9克，生地15克，川芎、红花、乳香、没药各3克。三剂。

二诊：5月24日

右臂功能已复，唯尚有酸痛，治拟舒筋活络。

川羌活、秦艽、五加皮、海枫藤、木瓜、川断、丹参、桑枝各9克，防风6克，细辛1.8克。三剂。

随访：功能恢复良好。

乐某某，男，31岁。

初诊：昨日手拉车翻倒，压着左臀部，当即伤处疼痛，左腿不能伸直，不能坐起。

检查：患肢缩短、内收，左膝紧贴右大腿上，左髋部突出，压痛明显。

诊断：左髋关节后脱位。

治疗：

1. 手法复位，复位后畸形消失疼痛减轻。

2. 外敷四黄散。

3. 内服活血化瘀，消肿止痛之剂。

归尾、赤芍、桃仁、泽兰、茜草、申姜、川牛膝各9克，生地12克，川芎、红花、乳香、没药各3克。三剂。

二诊：

瘀肿疼痛均除，已能站立步履，唯髋关节牵掣不利，拟舒筋活络。

川羌活、秦艽、木瓜、海枫藤、川断、五加皮、川牛膝各9克，防风6克，细辛1.8克。三剂。

药后功能恢复正常。

张某某，男，31岁。初诊：1963年1月24日。四天前因修木船，被木船反落压着右臀部，当即疼痛颇剧，不能起坐动弹。

检查：右臀部肿胀、压痛，有明显骨性突起，患肢短缩、内收、内旋、不能伸直，右膝触贴于左大腿上。

诊断：左髋关节后脱位。

治疗：

1. 手法复位。复位后畸形消失，疼痛即减。

2. 外敷四黄散。

3. 内服：当归、赤芍、泽兰、川断、川牛膝各9克，乳香、没药、桃仁各6克，红花3克，三剂。

二诊：1月28日

疼痛已减，但瘀肿未退。

治疗：

1. 内服：当归、赤芍、秦艽、五加皮、桃仁、生地、泽兰、苏木、川牛膝、丹参各9克，红花3克。三剂。

2. 外敷四黄散。

三诊：1月31日

瘀肿始退，患肢已能活动，原方加川断、申姜各9克，没药、

乳香各3克。续服三剂。

四诊：2月3日

肿痛基本已除，无明显不适感。原方去泽兰、苏木，外贴损伤膏药，嘱其回家调养。

《陆银华治伤经验》

下肢软组织损伤

费伯雄

某。右腿跌伤已久，迄今作痛，每遇阴雨节令殆甚。宜养营卫，兼利节络。

潞党参 云茯苓 焦白术 怀牛膝 炙生地 川断肉 川独活 杭白芍 广木香 金毛脊 当归身 杜红花 嫩桑枝 生姜 红枣

《费伯雄医案》

丁泽周

高右。伤筋起见，变为缩脚阴痰，顶虽溃，未尝得脓，根脚肿硬疼痛，痛引少腹，小溲不利，腑行燥结，身热晚甚，口有甜味，舌苔薄腻，脉象濡滑。蕴湿缩痰，凝结厥阴之络，营卫不从，症属缠绵。姑拟益气托毒，化湿通络。

生黄芪三钱 茯苓皮三钱 炙甲片一钱 清水豆卷四钱
当归尾三钱 福泽泻一钱五分 泽兰叶一钱五分 光杏仁三钱
桃仁泥一钱五分 赤芍药二钱 通草八分 象贝母三钱 苏木一钱五分
陈广皮一钱

外用九黄丹、阳和膏，并用金箍散、冲和膏，敷其四周。

二诊：伤筋起见，变为缩脚阴痰，肿硬疼痛，连及少腹，咳嗽则痛更甚，小溲不利，身热晚甚，舌苔薄腻。蕴湿凝结厥阴之络，营卫

不从，缠绵之症。再拟和营去瘀，化湿通络。

清从豆卷四钱 藏红花八分 福泽泻一钱五分 通草八分
当归尾三钱 桃仁泥一钱五分 黑白丑各八分 泽兰叶一钱五分
生赤芍三钱 连皮苓四钱 炙甲片八分 大贝母三钱 苏木一钱五分
醒消丸吞服，一钱

三诊：缩脚阴痰，肿硬疼痛，上及少腹，下及腿侧，皮色不变，右足曲而不伸，寒热晚甚，舌苔薄腻，脉弦小而迟。寒湿痰瘀，凝结厥阴之络，营卫不从，缠绵之症也。今拟阳和汤加减，温化消解，冀望转阴为阳，始能出险入夷。

净麻黄三分 大熟地四钱，二味同捣 肉桂心五分 生草节一钱
炮姜炭五分 银柴胡一钱 白芥子炒研，三钱 鹿角胶陈酒化冲服，二钱
醒消丸吞服，一钱

《丁甘仁医案》

周镇

任品衡，木业。其室患有崩者屢，经或一月两汛。丙午秋，以车上跌伤足踝，遂至杖而后行。诊脉虚弦，苔薄白。自以骭脱足废，惟欲调经耳。余谓络虚亦常蹇而无力，拟膏方予之。即服一料，弃杖而步，毫无足疾之象。其膏方如下：党参、绵芪、于术、茯苓、山药、扁豆花、玉竹、首乌、龙骨、柏子、赤石脂、牛角觮、黄丝绵、乌贼骨、淮小麦、绿萼梅、合欢皮、杜仲、川断、川牛膝、木瓜、归身、白芍、狗脊、寄生、络石藤、香附等，用阿胶、龟板胶、霞天胶三种收膏。

《周小农医案》

陆银华

下某某，女，24岁，农民。初诊：1965年4月12日从一丈高处跳下，左踝关节扭整伤已五月，踝部肿痛不除，午后肿胀加剧，晚上休息后肿胀减退，压之凹陷，疼痛重滞，X光摄片未见骨质病变。经

中西医多方治疗，肿痛不退，脉细涩，苔白。治拟补气温阳，健脾利湿。

生黄芪 30 克，西党参、生米仁各 15 克，柴胡、升麻、川草薢、炒白术、当归各 9 克，艾叶、陈皮、甘草各 6 克。七剂。

二诊：1965 年 4 月 20 日

进剂后踝部肿痛有所减轻，但午后或久行后肿胀尚明显，治循原法。原方去川桂枝、柴胡，加川椒目，细辛各 3 克。七剂。

三诊：1965 年 4 月 28 日

踝部肿胀明显减轻，重滞已除，原方连服 14 剂，熏洗每日一次。治疗壹个月，踝部肿痛已除，功能全复，结束治疗。

《陆银华治伤经验》

头部软组织损伤

过铸

孙太尊之侄女，跌伤头顶，积瘀不散，以致头顶突起，下至眉际，高肿寸许，按之绵软。余曰：“此瘀血凝滞也。愈凝愈肿，若肿至项肩，则棘手矣。”当令门下士王海涛以刀刺其发际，用手推之，流出紫黑血盂许，肿顿消。隔日结痂复肿，较前则稍平。于是仍用前法，血出微带红色，连刺三次，已见鲜血。用止血散以止其血，并将刺开处之皮用手捏紧，良久即收口，内外并治十余日，平复如故矣。当其初刺之时，即有医力言不可，幸王海涛已为孙府治愈数人，信之甚笃，否则误事非浅。煎剂之方用：

当归首 黄芪各五钱 桃仁泥 白芍各三钱 五茄皮 骨碎补
金毛狗脊去毛 陈皮各二钱 乳香一钱，去油 川芎 苏木各钱半
煎至八分加酒两匙，再煎数滚服。

《过氏近诊医案》

历代中医资料大全分享

你好，我是**逢原**，你现在看到的这本资料是我从网上收集整理的。

本人自学中医多年，耗时多年搜集珍藏了众多的中医资料，包括了目前已经出版的大多数中医书籍，以及丰富的视频教程，而这些中医资料，是博览群书，勤求古训之必备。

只需要在下面输入你的邮箱并确认就可以直接下载中医资料：

http://list.qq.com/cgi-bin/qf_invite?id=03157beabc6d50e0b64029a2715966596d94dcac7ed0cfd7

如果有你也喜欢中医，需要一些学习中医的资料；或者是学习中医的路上碰到了什么问题需要交流；或者碰到一些疾病的困扰，需要求助，可以通过以下方式联系我：

一、发邮件：fyzy999@qq.com

二、加我 QQ/微信：**2049346637**

三、关注微信公众平台——逢原中医，经常有中医文章更新。

四、关注我的空间：<http://user.qzone.qq.com/2049346637>

免责声明：所有资源均是网上搜集，本人收集整理这些中医资料，仅仅为了方便中医同道中人私下交流学习之用，不为营利，将不对任何资源负法律责任。所有资源请在下载后 24 小时内删除，任何涉及商业营利目的均不得使用，否则产生的一切后果将由您自己承担！如果您觉得满意，请购买正版资源。



私人微信号：2049346637



公众平台：逢原中医